


國學基
本叢書
明詩紀事
三



書叢本基學國

事紀詩明

(三)

輯田陳

行發館書印務商

明詩紀事卷七

乙籤

梁潛二十三首

潛字用之。泰和人。洪武丙子舉人。授蒼溪訓導。以薦遷四會知縣。改陽江。陽春。水樂初。召修太祖實錄。擢修撰。兼右春坊右贊善。再遷侍讀。中讒死。有泊菴文集十六卷。詩鈔一卷。

四庫總目。潛文格清雋。而兼有縱橫浩瀚之氣。在明初可自成一隊。此泊菴集十六卷。有文無詩。集未有康熙辛酉。潛裔孫天清續刻家集。小引云。泊菴公詩集。已糜文冢。不復存人間。則舊本久佚矣。

東里集。用之爲文章。馳騁司馬子長。韓退之。蘇子瞻。亦間出莊騷爲奇。務去陳言出新意。古詩高處逼晉宋。五七言近體詩皆可傳。

抑菴集。梁先生文。如江河之流。汪洋衍進。一與風遇。則波瀾勃興。魚龍百怪。出沒隱見。可喜可愕。眞當代之傑作。井觀瓊言。梁用之豐瞻委曲。亦當代一作家。

田按用之五言選體爲多。近體有唐人格律。而時參宋派。水樂詩家最爲傑出。詩集鮮傳。錢牧齋朱竹垞皆未見。故所錄寥寥。余所獲泊菴詩鈔。乃用之曾孫廉嘉靖中刻於辰州者。用之澗水瓊芽詩序云。前代揭學士。稱澗水瓊芽。蓋芍藥芽也。以代茶最勝。惜在北京時。不及采而嘗之。詩云。每憶京臺事事佳。遠聞澗水產瓊芽。玉廚簇簇輕含雪。紅甲重重淺映霞。陽羨初嘗須

並美。鸞林新賜可同誇。儻教采掇封題去。自是春泉煎雪花。鸞林武當茶也。明初入貢品。今豐臺芍藥。盈畦彌隴。園丁捆載入市。士大夫家供瓶盃者。在在皆是。儻掇芽而烹之。爲芍藥增一故實。亦爲我輩添一韻事也。

蟠龍山

壯哉蟠龍山。勢高凌青冥。嵯峨控梁益。幽森會神明。稍見雪山白。還望陽臺青。清湍落危澗。散作萬壑霆。平生磊砢懷。奔馳忽伶俜。

暖翠軒

層軒亦何幽。岿堯暖蒼翠。前楹植松篁。方池羅菱芰。透池出叢薄。升高曠遐視。丹崖絢晨曦。碧澗凝顛氣。遙遙睇雙鶴。九皋聞清唳。何時始投簪。相與暢幽意。

送劉源澄

去年幽并行。今年幽并行。問君亦何爲。歲歲入幽并。幽并古名都。山河壯王城。聖皇今龍飛。崇朝邊境清。登彼黃金臺。浩歌壺自傾。臺下飛雪滿。臺上春風生。富貴何所望。壯遊暢其情。安得復局促。閉戶秋蟲聲。

昔出

昔出今早還。今還心獨苦。慘慘中腸悲。哀哀淚如雨。反哺事中乖。萬鍾今何補。重重雲中山。一一來時路。仰見慈烏翔。不知白日暮。誰能當此痛。大江浩東注。

清風亭偶題

危構鬱岩峩。下俯千仞湍。清波既泓澄。層峯亦上干。玲瓏繡戶開。窈窕曲檻連。丹崖絢晨景。碧澗鳴芳泉。時還鼓輕舸。擊楫泝迴瀾。微茫桃花源。燦爛芙蓉灣。插芳掇蘅杜。結以蕙與蘭。蒼翠襲衣袂。餘香復纏繚。既與幽人偕。或隨漁父還。安得謝塵鞅。相與終盤桓。

夜次滄州分韻得光字

水淨月華冷。露白秋風涼。擊楫凌空宇。渺然迺流光。斗柄已西揭。鴻雁亦南翔。笳管徹中夜。遊子心慨慷。冉冉歲華邁。忽忽鬢已蒼。幸此斟酌同。清賞安可忘。

題趙文敏墨蘭

雲凝湘浦寒。露下衡皋晚。願言結紫蕤。拂袂秋香淺。佳人翳彩鸞。九招不復返。爲爾重多情。極目吳天遠。

春日詞

楊柳鵝黃春短短。葡萄鴨綠銀鉸煖。羅幃似有春風開。如此良辰郎不來。

漁父辭劍圖爲胡學士題

日落昭關暮煙紫。東望吳中一千里。江濤怒湧如雪山。我無羽翼高飛難。感君意氣一回顧。度卻洪濤心更苦。腰間寶劍能言語。解贈向君肝膽露。丈夫相遇心相知。傾情倒意何所疑。窮途倉皇足悲慨。此去道

途猶險。水有蛟。龍山有虎。知爾千愁復萬慮。還君寶劍慎周防。荆門路斷魂茫茫。

賦馬臺

朔風獵獵塵沙起。塞草茫茫幾千里。西楚無人識霸王。空有高臺臨泗水。想當西被秦兵時。諸侯膝行不敢窺。萬金寶劍赤如電。麒麟錦帶懸青絲。日光鱗鱗射銀甲。赤驃烏騅相雜還。帳中美人白玉璫。轅門壯士紅錦帕。此時歡樂登高臺。一覽四方何壯哉。三秦自可塞漢路。咸陽氣色如冷灰。豈知漢兵能楚歌。八千子弟竟蹉跎。芒碭王氣成五彩。玉斗撞破當奈何。

過漢州

試問鄆筒酒。荒城是漢州。野屯低草屋。江水散渠流。黑壤偏宜秫。黃蘆不奈秋。共言王國近。未敢暫淹留。八月十六日以進香發蒼溪

秋色蒼溪淨。舟移別浦幽。人情緣久住。客路暫堪愁。別鶴思華表。歸鴻想故儔。五臺回望處。猶自擬重遊。宿南充

過桂園東澄心諸友

舟人相報語。宿處是南充。小豆繁秋實。歸鴉護晚叢。江流通閩水。村酒勝鄆筒。明日應無雨。灘聲十里中。躡屐衝山霧。褰裳拂澗霓。猶因餘興在。稍覺宦情迷。晴麝眠芳谷。寒鱗躍錦溪。甯辭山路遠。騎馬已雞棲。

和汝器修撰病中見贈

空庭寒景短。過午樹陰偏。旅況如前日。風情異壯年。斷雲歸遠岫。去鳥入空煙。暫此閒中趣。誰令客浪傳。

題環秀山房

聞說幽居好。青山四面看。遠村如栗里。深谷擬王官。芍藥開新隴。芙蓉滿舊灣。水聲晴作雨。嵐氣夏生寒。傍澗還栽竹。開畦更藝蘭。池荷堪製佩。園籜可裁冠。載酒邀人飲。攜琴掃石彈。閒情長自遣。世慮不相干。鶴唳青邱外。猿啼綠樹端。何由過玉笥。清論罄交歡。

舟中偶成憶孟潔

南北東西不暫停。此身飄蕩似浮萍。吟殘細雨春愁盡。嘯殺幽禽午夢醒。岷雪未消江最綠。巫雲初散樹偏青。當時別易今難會。望斷長亭復短亭。

巴東

幾處人家絕似狙。倚空架屋火新畬。峽中夜靜天無月。灘口春深食有魚。雨散陽臺神女廟。鳥啼東瀼榜人。舟頭伐鼓東風急。坐矚奇峯翠滿裾。

寫興

繞澗幽蘭紫蒂芳。隔牆佳樹上春陽。不辭老子遭花惱。政恐南隣笑客狂。曳履放歌忘草澤。濡毫題字愛

箕筥回看佳氣東南近。蜀棧如何路更長。

留重慶

地分巴蜀劃乾坤。石作層城倚塞雲。山勢如龍通棘道。江流噴雪下荆門。綠槐舊驛嘶驄馬。紅葉懸崖嘯暮猿。久客倦吟謀盡醉。提壺沽酒過黃昏。

畦居閒題

藥圃斜通石徑。柳塘淺築沙隄。漁唱有時門外。鶯聲只在林西。

宿長壽

雨晴石坂不生塵。地煖山青畫似春。蕩槳小娃收晚釣。刲羊蜀客賽江神。

集芳園

海榴五月未開花。紫澗幽蘭淺放芽。老子閒敲棋局罷。看兒噴水洗雛鴉。

梁混一首

混字本之。潛弟。洪武末爲瑞州訓導。遷溧陽教諭。改納溪。永樂中辟蜀府紀善。有坦菴集八卷。

永思堂

羈禽戀蓬蒿。離人夢鄉閩。引睇西北雲。中心增鬱紆。桑梓日以遠。歲月日以徂。顧茲在萬里。能不懷歸歎。

邱壠莽沙草。況復春露濡。筋力老且衰。鬢髮日已疏。所幸羈旅間。而與骨肉俱。投簪苟云遂。回轂良易驅。毋用徒自傷。加餐保君軀。

李孝謙一首

孝謙名本以字行。鄞人有長林集。

田按孝謙與弟悌謙爭代父役。忠謙代父戍邊。竟死。可謂孝友一門。兄弟均能詩。惜忠謙詩不傳。

山居爲柯定安賦

四面青山障俗氛。數家雞犬自相聞。茆檐低礙巖前石。木榻高栖雨後雲。晚徑樵歸憑鹿引。秋林果熟與猿分。從來懶入桃源市。自釀松花日半曛。

李悌謙一首

悌謙孝謙弟。

夏日雨中

風雨蕭蕭水滿村。迴無人迹過柴門。重來海燕經年客。漸長新篁幾世孫。已分生涯甘淡泊。卻憐交友絕寒暄。白鷗日日江頭見。心事相忘不復論。

林環一首

環字崇璧。莆田人。永樂丙戌第一人及第。授翰林修撰。遷侍講。有綱齋集十三卷。

題萬竿煙雨圖

溼雲凝煙吹不起。寒影半沈湘江水。湘妃瑤瑟悲夜長。散作雨聲蒼茫裏。杜鵑怨春春始歸。新妝翠袖颯娥眉。愁魂飛去人不知。鸞珮墜地搖參差。披圖卻憶長相思。扁舟落日零陵祠。

林珪一首

珪字崇信。環弟。永樂中薦授泉州教授。有韋軒集。

拂袖

拂袖賦還山。山深足幽趣。危磴瀉寒流。秋聲度高樹。境曠絕行蹤。白雲自來去。

鄭關三首

關字公啓。閩人。有石室遺音。

田按公啓公望兄弟皆能詩。見曹石倉歷代詩選。

山行有感

北邙多舊墓。苔石侵枯骨。借問葬者誰。云是李與霍。英名邁千古。此際何汨沒。一日掩泉扃。萬事從此歇。人生天地間。百歲猶倉卒。誰能免于斯。多謀信爲拙。

題南湖別業壁

家住南湖湖水曲。依稀好似剡溪頭。黃蘆葉暝常知雨。苦竹叢深畏及秋。月下漁樵煙際返。夜深星斗鏡中浮。莫嫌僻處多蕭瑟。野性時時好狎鷗。

送周又玄

伯勞飛燕苦西東。載酒看雲幾日同。別後相思君識否。斷腸多在雨聲中。

鄭閻一首

閻字公望。關弟永樂壬辰進士。授安陸州學正。改無爲州。終廣信教諭。有抑齋集。

閻畫記。鄭閻能詩善畫。

挽鳴秋山人

白湖小隱入雲間。憶絕心知淚自潸。花徑鳥歸春自好。衡門人去晝常關。新詩空有澄江句。問字惟因載酒還。舊業荒涼偏可恨。蕭蕭煙雨閉秋山。

鄭瑛二首

瑛字希晦。閩人。永樂乙未進士。授樂會訓導。有弦齋集。

秋夜泛舟

皎皎秋月明。颯颯寒蘆短。孤舟人未眠。霜花撲窗滿。

漁父

數頃煙波森森。半窗風荻瀟瀟。釣罷棹謳歸去。明月又轉溪橋。

鄭珞一首

珞字希玉。瑛弟。永樂乙未進士。選庶吉士。授刑部主事。出知甯波府。有訥菴、雞肋、二集。

江南曲

偶逢故鄉人。寄書故鄉去。妾家在橫塘。門前兩株樹。

李孟璿一首

孟璿名均。以字行。海鹽人。以薦歷嘉興汝甯訓導。有南莊集。

金碧山水

雨餘山色煖如春。人掩柴門過夕曛。江上圖書和月載。山中雞犬隔雲聞。東風瑤草香初滿。流水桃花路不分。此處仙家渾不遠。底須騎鶴訪茅君。

李季衡一首

季衡名平。以字行。孟璿弟。有西溪集。

凌歊臺

凌歊臺高壯南國。突兀于雲天咫尺。晶簾半捲曉風寒。雕闌倒映秋江碧。臺邊軋軋金輿來。盈盈二八花顏開。英雄一去不復返。薨殘棟委俱塵埃。蜀山雪消清似洗。岷江西來幾千里。此日豪華安在哉。唯聞嗚咽臺前水。

王誼四首

誼字內敬。紹興山陰人。宣德初待詔翰林。有鑑止集。

田按內敬以事謫戍遼陽。弟懌賦隔谷歌云。兄羈囚。弟露宿。兄弟本連枝。誰令隔山谷。兄受饑寒日困辱。弟欲救之力不足。力不足。可奈何。願作高飛鴻。銜之出網羅。哀惻動人。彌臻鶴鷓之歎。內敬五言。格意俱高。

古風二首

妾家東城隅。高門瞰中逵。玲瓏結綺疏。參差雕玉題。旭日麗芳藻。光風泛羅帷。春花媚妍質。徘徊處中閨。調絃拂纖指。哀響流輕颺。聲悲節自促。曲度雲行遲。悵望知音遠。華容非故時。崔峩會稽山。東截海濤碧。松柏無冬春。千歲淪琥珀。中有煉藥士。丹砂固精魄。要我與之俱。遨遊入無極。奮衣欲邁征。浩蕩雲海隔。悠悠紫霞想。未遂諧宿昔。皓首乖願言。臨興起悽惻。

秋日懷孟熙先生

條忽成遠別。幽棲仍薜蘿。草芳經雨歇。蟲響入秋多。夜月柯亭市。涼風鏡水波。相期盡一醉。何日更來過。

采蓮曲

郎騎紅叱撥。妾上木蘭舟。不及鴛鴦鳥。雙飛共白頭。

王惲三首

惲字內悅。誼弟。正統初。官溧水知縣。有娛清集。

田按山陰二王。並以詩鳴。內悅詩較麗密。

石城曉

城角曉鳴鳴。城西月痕墮。城中春思慵。楚夢薰蘭火。玲瓏金馬門。玉珮聲瑣瑣。紅日壓宮垣。萬花眠貼妥。

段七孃

度曲千金賤。凝粧一面紅。聲迷銅雀妓。豔奪館娃僮。白雪飄朱閣。香塵散綺櫳。淚涵司馬袖。腸斷使君驄。秋水涵瞳潤。春山入黛濃。弄簫驚紫鳳。拂軫怨離鴻。鏡展金鸞月。釵橫玉燕風。謝孃收鈿匣。嬴女掩香筒。石竹簦芳髻。芙蓉隱繡幃。燈然珠樹側。人醉錦蓮中。粲粲星輝戶。微微露洗空。幾年憐宋玉。今夕遇韓馮。密意蜂攢蕊。芳心蝶戀叢。春牋封菝蔻。羅帶結芎藭。步障重拋錦。門鋪疊綴銅。曲闌裝翡翠。高榭噪花蟲。鸞唾煙濛柳。烏棲月浸桐。銀觥休鑿落。瓊箭起丁東。客散歌席冷。香昏睡閣融。日高春夢覺。嬌纈散花纓。

送人之京

獨上水邊橈。離顏酒半銷。城頭三鼓近。煙際一燈遙。海色將沈月。沙痕正落潮。未能追逸翮。回首跋層霄。

陳叔剛一首

叔剛名根。以字行。閩人。永樂辛丑進士。授主事。改翰林侍講。有綱齋集。

題心遠亭

幽興在南山。何須遠城郭。閉目謝喧囂。冥心寄寥廓。機忘沙上鷗。趣愜松間鶴。亦有柴桑人。來同林下酌。

陳叔紹一首

叔紹名振。以字行。叔剛弟。正統乙丑進士。除御史。擢湖廣按察副使。有毅齋集。

丹陽湖

積水涵太虛。一望何瀾瀾。風瀾漾輕縠。霞光映文綺。遙山鳥外橫。孤棹沙邊檣。漁家夜語聲。深在蘆花裏。

陳仲完一首

仲完名完。以字行。長樂人。知縣伯康弟。見甲洪武□□進士。授延平訓導。改甯國。永樂初。用薦擢

翰林編修。進贊善。有簡齋迂稿。

田按仲完與兄伯康俱以詩名。伯康卒於洪武中。詩見甲籤。仲完永樂初。用薦爲編修。進贊善。侍仁宗東宮。以淳實稱。仁宗登

極先一年卒。居賢善二十年不徙官。楊文貞爲傳甚惜之。仲完與蘇州陳完同名。選家錄詩互有參錯。辨見後。

賦得空江秋笛贈鄭浮邱助教

大江白露下。秋氣橫中流。翛然一笛響。遠自江上舟。洲前向晚霽。涼雨三弄分明作人語。思逐飛鴻海上來。聲隨白鳥雲邊去。須臾引羽轉清商。蘆葉撼撼兼葭黃。驚回少婦孤篷夢。攪斷羈人萬里腸。駐宮又復變流徵。銀河澹澹天如洗。猿鶴秋吟絕島雲。蛟龍夜吼寒潭水。祇今誰識桓伊心。悠悠人世無知音。曲終徒倚重回首。落月蒼茫煙靄深。

陳寬二首

寬字孟賢。吳人。檢討繼子。

姑蘇志。孟賢詩新麗和平。頗得唐法。

續吳光賢讚。孟賢鑄詞深苦。命篇甚遲而工。有姬辨慧知書。孟賢所爲。皆能誦之。時謂女書記。

題沈恆吉畫扇

紅樹丹山領去舟。蘋花香老不勝秋。滄江風月誰人管。且向前汀問白鷗。

訪包山徐德彰

青山湖上是君家。有約來看巨勝花。踏破白雲秋一片。不知還隔幾重霞。

陳完一首

完字孟英寬弟

田按閩人陳仲完。有簡齋迂稿。見福建通志。晉安風雅。仲安錢塘懷古一律。列朝詩集。明詩綜。錄作孟英詩。古人一詩五見兩集。原有此例。不足怪也。至孟英詩集。余徧考吳人著述。無有能舉孟英集名者。詩綜云。孟英有簡齋稿。豈集名亦堪假借耶。斯不可解矣。孟英佳句。如留客小鷺偏恰恰。可人飛蛙故雙雙。烏紗別製籠頭帽。白苧新裁稱體衣。鷺指飛蝶穿花去。水學驚蛇抱石流。柔櫓嘔啞移畫舫。輕雷輾轉走香車。亦楊孟載一輩人也。

和徐德彰春日雜咏

蹀躞青驄款款騎。淺村深巷柳如絲。土牆茅草低低屋。竹逕柴門短短籬。細雨一簾飛燕子。香風十里醉花枝。館娃溪上春如海。時有人歌白紵詞。

唐庠二首

庠字惟周湖州人

田按吳興二唐。以詩名。絕句殊有風致。

題仲穆竹

湖州總管趙王孫。玉潤冰清似此君。拈出鳳梢三五葉。白鷗波上掃秋雲。

小景

落日青山凝紫煙。秋風殘葉雁來天。五湖多少琉璃水。處處堪留載鶴船。

唐廣一首

廣字惟勤。庠弟。

田按惟勤自號牛隱。朱存理爲作唐牛隱小傳。亦風雅才也。惜詩不多見。

戲贈張伯仁陳邦器

白下橋邊楊柳枝。新黃嫩綠正當時。重來折入尋春手。不比樊川去較遲。

徐章

章字德彰。吳人。

田按德彰與陳孟賢兄弟唱和。稱爲好事。詩亦清穩。

與陳未菴施堯卿秋夜話舊

空江煙雨送秋歸。黃葉蕭蕭獨雁飛。新接笑談三宿共。舊遊心事十年違。燈因坐久花頻落。酒爲寒多力漸微。明發不堪回首望。別情吟思共依依。

徐震一首

震字德重。章弟。

震澤集。德重少從陳太史。初學詩。有帶項羽廟。唯陽懷古。輓岳武穆諸詩。傳諸人口。

田按列朝詩集。稱德重名列景秦十子。余檢明史藝文志云。劉溥與將主忠。王貞慶。晏鐸。蘇平。蘇正。湯胤緒。王淮。沈愚。鄒亮。稱景秦十子。無德重名。蓋傳聞異詞也。

包山寺

屋下清泉屋上山。薛蘿深處扣禪關。詩僧欲問三生話。策杖來偷半日閒。雁沒浦雲秋色外。鶴歸庭樹夕陽間。人生爲惜歡遊少。石壁題詩紀往還。

蔣主孝四首

主孝字務本。儀真人。徙句容。有樵林摘藁。

筆精。淮南蔣主孝。自號樵林居士。諸家選詩。皆不及焉。有五王擊毬圖云。毬門高結春如海。紫袖垂垂翦雙彩。薛王力倦宋王來。興慶宮前花正開。侍兒弄笛申王醉。更有歧王擁花暉。春風不動草如鋪。兄弟相隨入畫圖。黃門擁入五花帳。官奴護鼓花奴唱。博山火。燕水沈香。富貴從來自天降。遲遲春日下龍樓。花夢連輝雨氣浮。大被漸寒歌管歇。三郎別領阿環遊。較元張思廉。亦伯仲間也。

田按樵林居士。述楊仲弘之言。詩取才於漢魏。而音律則以唐人爲宗。故所作時有合處。吳弟主忠。均以詩名。景秦間。主忠名列十子。詩別見。

居燕旅情

不上黃金臺。早歌歸去來。平沙無草木。短褐有塵埃。故里愁言別。明時敢論才。燈前一舞劍。豪氣轉成哀。

寒食夜

細柳垂秦苑。棠梨出漢宮。可憐寒食夜。空自怨春風。

春行

江閣雲籠樹。溪流水泛花。相逢浣紗女。不敢問誰家。

春俠祠

金鞍赤馬紫羅袍。錦橐銀棚插佩刀。不道黃鶯解人意。隔花偷啄白櫻桃。

明詩紀事卷八

乙籤

曾棨七首

棨字子啓。吉安永豐人。永樂甲申。以第一人及第。授翰林修撰。歷侍講侍讀學士。左春坊大學士。進詹事府少詹事。卒。贈禮部侍郎。諡襄敏。有巢睫集十卷。

詩藪。宣廟好文。海內和豫。雖大手希聞。而名流錯出。若曾子啓、劉孟熙、張靜之、李昌祺。及閩中諸王輩。皆浸潤明風。解脫元習。然才俱不甚宏鉅。非國初比。

東里集。太宗皇帝龍飛第一科進士中。簡明秀通敏者二十八人。就文淵閣。盡出中祕書。俾進所業。朝暮大官供膳。月給內帑鈔。爲膏火費。蓋期之於古人。曾君子棨其首也。後有薦文士於上者。必問得如曾棨否。子啓爲文章。如源泉混混。沛然奔放。一瀉千里。又如園林得春。翠芳奮發。組繡爛然。可翫可悅。賦詠之體。必律唐人。與之所至。筆不停揮。狀寫之工。極其天趣。他人不足。已嘗有餘。工書法。草書雄放。有晉人風致。自解大紳。胡光大後。獨步當世。

抑菴集。曾公爲文。思發如湧泉。大篇短章。各極其趣。詩詞尤雄放清麗。出入盛唐諸大家。精於草書。筆勢縱逸。若秋隼奮揚。天驪決驟。不可追躡。

殿閣詞林記。洪武、永樂、洪熙、宣德、四朝。近侍官輪班入直。若本院官。則日在館閣。吳沈、劉三吾、胡廣、楊士奇、胡儼、王英、王直輩。

嘗有內直倡和詩。嘗鑿東華門內新館初成。入直有作云。東華樓觀鬱崢嶸。高閣新成抗碧霄。祕府圖書金作牋。御溝流水玉爲橋。草分碧色承殿幣。鳥弄歌聲和舜韶。當直幾番清坐久。隔簾時有御香飄。蓋當時車駕常臨幸館閣故也。

井觀瑄言。曾子啓詩佳處不減崑體。

國雅曾少詹該博逸蕩。其才長於七言古。遂切直健捷爲工。頗以繁靡爲累。故永成間。多效其體。先輩于肅愍。楊文貞。諸公。互相宗尚。亦一時藝林風氣使然也。其行路難燉煌二作。頗不失唐家聲。

藝苑卮言。曾子榮如封節度募兵東征。鮮華雜沓。精騎殊少。上嘗召試天馬歌。援筆立就。佳之。賜寶帶。又因醉遺火。延燒民居。上弗罪也。後病卒。且氣絕。呼酒飲至醉。頤曰。宮殿非小。六十非天。我以爲多。人以爲少。易簀蓋棺。此外何求。白雲青山。樂哉斯邱。

明詩選。陳臥子曰。學士詩如南金在握。未入丹鼎。又如金羈玉勒。微有啼嚙之恨。

田按洪武中。選舉人張唯等。肄業文華堂。永樂二年。選進士爲庶吉士。百有十一人。又選二十五人。合一甲三人。進學文淵閣。世比之二十八宿。所得人才爲多。肄業文華堂者。無其表見。蓋洪武時所選者。僅河南。山東。二者。永樂時。則合天下之士而精其選也。二十八人者。永豐曾榮。吉水周述。周孟簡。羅汝敬。劉子欽。秦和楊相。王直。余學夔。廬陵王訓。安福。彭汝器。李時勉。甯海章樸。星子盧瀚。余鼎。豐城熊直。永嘉王道。海甯沈升。餘姚柴廣敬。金谿王英。懷安洪順。武進段民。江甯楊勉。會稽章敏。晉江倪惟哲。慈谿陳敬宗。衡山袁祿。開化吾紳。子啓及東王。西王。南祭酒陳光世。北祭酒李時勉。其表表者也。子啓未第時。見賞於解大紳。爲作蓮竹堂記。其文章爛漫。亦頗似大紳。不甚持擇。故遭譏議。然論才人於永樂時。終爲軼羣之駿也。

陳員外奉使西域周寺副席中道別長句

漢家郎官頭未白。扈從初爲兩京客。忽逢天邊五色書。萬里翩翩向西域。腰間寶劍七星文。連旌大旆何

繽紛解鞍夜臥營中月。攬轡朝看隴上雲。黃沙斷磧千迴轉。玉關漸近長安遠。輪臺霜重角聲寒。蒲海風高弓力軟。茲行騎從歷諸蕃。氈帳依微絕漠間。殘煙古樹羌夷聚。遠火荒原獵騎還。蕃酋出迎通漢語。穹廬葡萄酒如乳。舞女爭呈于闐粧。歌辭盡協龜茲譜。當筵半醉看吳鉤。上馬便著錦貂裘。山川遙認月支窟。部落能知博望侯。草上風沙亂騷屑。邊頭日暮悲笳咽。行窮天盡始回轅。坐對雪深還杖節。歸來雜還宛馬羣。立談可以收奇勳。卻笑古來征戰苦。邊人空說李將軍。

田按陳員外名誠。字子魯。吉水人。永樂十一年。西域哈烈諸國來貢京師。及歸。帝命誠及戶部主事李暹。指揮金哈藍伯。偕中官李達。送之。就齋。覽書文綺紗羅布帛諸物。分賜其酋長。其行也。京朝官多贈誠詩。子啓之外。王希範詩云。劍佩翩翩出武威。關河秋色照戎衣。輪臺雪滿逢人少。蒲海霜空見雁稀。蕃部牛羊沙際沒。羌民煙火磧中微。茲行總爲宣恩德。不待葡萄苜蓿歸。胡若思詩云。旌旆西征逸氣雄。玉關春早聽歸鴻。紫駝夜度交河月。馳馬長嘶瀚海風。黃沙古蹟行行見。白草寒雲處處同。莫言萬國崑崙外。總在皇仁覆育中。十三年誠等還。哈烈諸國復遣使偕來。貢文豹西馬。及他方物。誠因進所作西域行程記。紀山川之險易。人民之多寡。土壤之肥瘠。賞蓄之饒乏。與其飲食衣服。言語好尚之不同。詔付之史館。擢誠郎中。明年諸國再貢。及還。帝復命誠齋書幣報之。子啓復有送陳郎中重使西域詩云。馳驅宛馬入神京。拜命重爲萬里行。河隴壙曠還出候。伊西部落總知名。天連白草寒沙遠。路透黃雲古蹟平。卻憶漢家勞戰伐。道傍空築受降城。玉關追遞寒雲黃。西陲涉沙道路長。山繞高昌遺碣在。草遮姑默廢城荒。閑聽羌笛多乘月。暗捲戎衣半帶霜。不用殷勤通譯語。相逢總是舊蕃王。重宣恩詔向窮邊。蕃落依稀似昔年。酋長拜迎張繡幌。羌姬歌舞散金錢。葡萄夜醉氈毼月。騾馱長嘶首帶煙。百寶嵌刀珠飾靶。部人知是漢張騫。王行儉送陳郎中子魯。再使西域詩云。翩翩旌旆出皇州。瀚海崑崙是昔遊。塞外風雲隨使節。天涯霜雪敵征裘。還家不

論千金囊。佩印須爲萬里侯。想見番夷歸聖德。自西河水亦東流。周恂如送陳郎中重使西域詩云。故人好文仍學武。早歲出身事明主。載筆曾經直玉堂。分陝還聞佐藩府。前年復拜漢仙郎。遠傳天詔向遐方。辭家不作兒女態。上馬甯憂道路長。驅車曉出蕭關北。莽莽黃雲望空積。錦帳迎風夜宿遲。朱旂捲空軍行疾。揚鞭追遞過伊西。部落多因水草移。樓煩城郭居人少。鐵勒沙場煙火稀。手持龍節經諸國。橫行直欲向西極。畫角寒吹月色殘。吳鉤醉拂霜花白。番王幸觀漢儀型。氈裘夾道多歡聲。拜迎不但設供帳。職貢還隨朝玉京。五色狡狴日光動。百羣天馬皆龍種。歸來同獻白玉墀。天子非常賜恩寵。粉署遷官月未餘。乘輅又復出皇都。山川遙憶經行處。番部重迎使者車。薊城官舍春開宴。金樽綠酒歡相饒。英雄漫說李將軍。意氣甯慚班定遠。問君此去來何時。辛勤三載計還期。半酣筋鼓發征騎。旌旆悠悠空爾思。又有周孟簡錢習禮詩見後。

題王學士所藏王孟端老檜蒼崖圖

王郎工畫妙入神。平生強項世所曠。有時興至自盤礴。睥睨已喜旁無人。忽然放筆作古檜。白日煙雲倏冥晦。淋漓盡帶雷雨垂。慘淡長疑鬼神會。古藤纏絡枝相繆。屈鐵磊砢騰蛟虬。左擎右攫飛不去。崖石欲裂山精愁。王郎一生何不遇。五十得官嗟已暮。胸中時吐氣崢嶸。半落蒼崖化爲樹。知君愛此長蕭森。藏之願比雙南金。秋來恐有乘槎客。泛入天河無處尋。

龍支行有序

唐穆宗時遣大理卿劉文鼎出使吐蕃。道成紀武川。以至龍支城。耆老千人拜且泣。問天子安否。言頃從軍。戰敗於此。今子孫未忘唐服。朝廷尙念之乎。兵何日來。言已皆嗚咽。密聞之豐州之人。

也。

龍支城頭暮吹角。黃雲蔽天沙草薄。虎髯使者長安來。特麾擁蓋邊塵開。城門盡是胡兵守。城外老人多白首。拜迎使者雙淚流。問云天子今安否。自言家世豐州住。少小辭家隸軍戍。吐蕃連日犯蕭關。胡騎長驅涇隴間。將軍戰敗鼓聲絕。棄戈遺鏃填丘山。自從陷沒身爲虜。五十年來在邊土。依棲部落作蕃人。生長兒孫盡胡語。朝看烽火望中原。夜聽鳴笳憶故園。頽垣敗屋誰家宅。斷磧荒蹊何處村。奉使還時報天子。早遣官軍復清水。假令年老身歸死。已免遊魂作胡鬼。

海子橋

鯨海遙通一水長。滄波深處石爲梁。平鋪碧甃連馳道。倒瀉銀河入苑牆。晴綠乍添垂柳色。春流時泛落花香。微茫迴隔蓬萊島。不放飛塵入建章。

送彭巡檢子韶赴閩

送君南去片帆歸。五月薰風白紵衣。路繞閩山征騎遠。月明蠻徼邏兵稀。枕椰綠暗經殘雨。荔子紅垂映落輝。小弟衫關煩寄語。客心長伴鶴鴿飛。

曉渡章江

日落西山欲曙天。渡頭人語古城邊。鐘聲杳靄臨江戍。帆影參差隔浦船。幾處蘼蕪深夕露。萬家楊柳暈

晴煙年年過客頻來往。誰復東流嘆逝川。

揚州

翠裙紅燭坐調笙。一曲嬌歌萬種情。二十四橋春水綠。蘭橈隨處傍花行。

周述二首

述字崇述。吉水人。永樂甲申。以第二人及第。授翰林編修。進諭德。再遷左庶子。有東墅集六卷。

四庫總目述及第時與從弟孟簡同榜。成祖至比之。蘇史亦稱其文章雅贍。然其詩不出當時臺閣之體。

維楊懷古

廣陵河上路。煬帝昔曾過。不見瑤花發。猶傳玉樹歌。臺荒衰柳在。宮廢亂螢多。欲問前朝事。悲風起夕波。

踏雪

一路寒山雪未消。尋芳不惜碎瓊瑤。梅花昨夜將春色。開到江南第幾橋。

周孟簡一首

孟簡述從弟。永樂甲申。以第三人及第。授編修。進詹事府丞。改襄府長史。有急就西垣。兩京吟藁。

田按孟簡登第後授編修二十餘年。始遷詹事府丞。又改長史。仕宦可謂不達。王行儉李古廉云。然竹垞詩綜僅稱官詹事府丞疏矣。

送陳員外使西域詩有序

司封員外郎陳公子魯。邑之賢者也。以明經登進士第。列官於朝。屢使蕃夷。克舉厥職。永樂初拜擢今官。今年秋。皇上欲遣儒臣有文武才者。遠使西域。大臣以子魯薦。命下之日。子魯躍然喜。動顏色。告諸寮友曰。士生明時。得委身於朝。苟可効涓埃。雖鞠躬瘁力。無所遜避。西域雖遠。聖天子聲教所暨之地也。於是治裝告行。噫。子魯其賢矣哉。視萬里若出戶闥。雖殷大夫何以過之。子於子魯居同鄉。學同志。復得相與宦遊於兩京。欲已於言得乎。遂賦詩歌以識別。

金臺八月驚寒早。一夜清霜零白草。故人別我出都門。西風萬里交河道。憐君草莽一書生。曾是高皇知姓名。揮毫每視金鑿草。乘傳屢入南交城。只今又作鳳池客。天語傳宣到番國。郎官不減舊聲華。聖主非常賜顏色。新錫貂裘不憚寒。壯遊誰道別離難。流沙只合吟邊度。蔥嶺惟應馬上看。看山對景多行樂。張騫偉績今猶昨。聖主當圖絕漠功。丹青好畫麒麟閣。

王直十五首

直字行儉。泰和人。永樂甲申進士。選庶吉士。歷修撰。仁宗卽位。遷侍讀。進侍讀學士。右春坊右庶子。宣德初。進少詹事。正統初。進禮部侍郎。尋進尙書。改吏部。景泰帝卽位。加太子太保。進少傅。以易儲進太子太師。英宗復辟。乞休。天順中卒。贈太保。諡文端。有抑菴集四十卷。

四庫總目。直詩文典雅純正。有宋元遺風。自永樂初爲庶吉士。卽奉命入閣。典司制誥。翰林二十餘年。朝廷著作。多出其手。當時與王英齊名。有西王東王之目。而直尤爲老壽。歸然後一代重望。明白中葉以後。文士始好以矯激取名。直當宣德正統間。去開國之初未遠。淳樸之習。猶未全漓。文章不務勝人。惟求當理。故所作貌似平易。而溫厚和平。實非後來所及。雖不能追古作者。亦可謂尙有典型者矣。

水東日記。王抑菴先生典選。遇不如意事。好誦古人詩以自寬。一日有新得給事中。卽欲干撓選法者。曰。偶然題作木居士。便無窮求福人。御史有言。吏部進退官不當。則曰。若教鮑老當筵舞。更覺郎當舞袖長。要多切中云。

田按東王詩。冲融雅飭。可肩隨西楊。史稱東王自內閣出治部事。蓋西楊濟之。水東日記云。楊文貞公傳。王抑菴尙書作公。嘗三致書商榷書削。再致潤筆。且求其親書。俾子孫寶藏。田謂此四楊恐其有憾。故於生前預求作佳傳。以掩其迹。其謠於取名如此。

杏園雅集詩

穆穆春陽。杏華旣繁。爰與君子。樂此中園。鳴鳥在上。芳草在下。惠風徐來。心焉孔豫。豈無旨酒。亦有嘉殽。載勸載醕。以永今朝。時之和矣。物亦遂只。天子萬年。德音不已。

翰林記。正統二年三月。館閣諸人。過楊榮所居杏園燕集。賦詩成卷。楊士奇序之。且繪爲圖。曰。杏園雅集。預者。三楊二王。錢習禮。李時勉。周述。陳循。與錦衣千戶謝庭循也。榮復題其後。人藏一本。亦洛杜之餘韻云。

下衛河憶前行諸公

移舟下前浦。風急衛河深。極目曠千里。悠悠西日沈。永懷白雪唱。自和滄浪吟。煙波何處泊。徘徊勞寸心。

題山水畫

冥冥芳樹春。杳杳青山曙。幽人載酒行。耽此靜中趣。還擬問漁舟。深入桃源去。

題天池石壁圖

石壁凌蒼蒼。天池在其上。層巒鬱龍嵒。積水浩奔放。飛流且百仞。峻拔非一狀。迢迢松下人。雅尙與之抗。披襟滌塵煩。極目喜幽曠。遠將勝匡廬。近欲踰雁宕。予意良亦然。臨風默惆悵。

下銅塘口

泛舟銅塘口。截出樟樹鎮。江迴水百折。風雨一何盛。望望洲渚長。迢迢人煙暝。牛羊被阡陌。桃李紛相映。人家依古樹。寂寞柴門靜。徘徊念鄉邑。山川逾遼遠。誰謂行路難。棹歌滿清聽。

西南夷以麒麟獅子諸物來獻有旨賜觀退而賦此以進

聖皇端拱如堯羲。深仁大德均華夷。昆蟲草木各生遂。四方萬國皆恬嬉。西南夷在荒服外。自昔窮處天一涯。只今感德爭貢獻。梯山航海來京師。麒麟當前旅庭實。天朝上瑞安敢私。麕身牛尾蹏類馬。有角不觝稱仁慈。回翔中庭鳴應律。從以額額黃金獅。雄姿猛氣乃柔伏。蒙茸領下舒髯髯。紅纓錦帶巧縈絡。左顧右盼鮮鸞吹。龐然福祿從古稀。進退馴擾不受羈。黑章白質相間錯。晴日正照光陸離。神羊巨尾凝玉脂。彩輪輿曳參追隨。馬哈毛質亦甚奇。兩角觶曲垂半規。矯矯獼猴霜雪資。下視赤豹憎黃熊。祥鳥皓彩

奪人目。振鬮還欲搏朝曦。駝雞七尺好羽儀。飲啄不羨山梁雌。元裳縞袂貌閒暇。警曉會上蟠桃枝。紛紜前後若有喜。共逐麟趾登彤墀。天門大開玉色怡。慶雲燁燁垂九芝。千官趨朝儼在列。鳴環曳珮紛透池。懽呼拜舞頌明主。若此嘉祥天所爲。周南想像託賦詠。豈若親見當盛時。皇圖聖壽同天地。彌憶萬歲長如斯。小臣作歌愧荒陋。黽勉上繼唐虞詩。

田按永宣兩朝瑞牒連翩。象胥雜沓。奇獸珍禽。疊見賦頌。魁然其形。移玉山。雪色毛鮮。滿秋水。姚少師廣孝詠白象也。鈎爪戟利。鑿齒霜潔。首同蜀山之精。額壯昆吾之鐵。李祭酒時勉賦獅子也。肉騷麟臆。齒筋玉質。赤鬣粉敷。龍麟潤澤。日如紫電。尾若流星。不資牝牡。神化流形。胡祭酒儼頌龍馬也。素質玄章。雲舒霧凝。匪包而鳳。匪角而麟。梁侍讀潛歌騶虞也。祇應元氣母。孕此石腸兒。錢修撰仲益紀神龜也。西飡瑤草。入崑崙。東啄瓊芝。栖蒼木。周尙書忱咏白鳥也。與鳳同類。踰踰於帝舜之庭。如玉之輝。鬻鬻在周王之囿。楊少師士奇賀白鵠也。鳳之族。兮神之精。備五色。兮揚徽青。冠雞紫兮尾魚。植發丹邱兮越赤城。高經歷得嗚。賦青鸞也。海南之國。卜利哇。乃有此獸。出大麓。命文問錯。分黑白。毛質無瑕。瑩如玉。超騰迥覺長風生。一鳴解使百獸伏。金少保幼孜歌福祿獸也。他若玄兔。白雉。靈犀。白鹿之屬。更僕難數。太保王公此詩。與夏忠靖原吉聖德瑞應詩。會萃一篇。更爲賅備。夏公詩云。聖主膺乾運。垂衣馭八區。道隆堯舜比。功茂禹湯俱。蕩蕩三邊肅。熙熙兆姓娛。普天歌至治。率土發靈儲。爰有諸蕃國。能忘萬里塗。隨槎超瀚漫。獻瑞効勤劬。渺渺來中夏。惓惓覲帝居。麒麟呈玉陛。獅子貢金鋪。紫象靈山種。驪驄渥水駒。駝雞同鸞鶴。文豹擬騶虞。福祿身紆錦。靈羊尾載車。霜姿猿更異。長角獸尤殊。綵檻奇音鳥。雕龍雪色鳥。玄龜三尾曳。山鳳五花敷。日上龍墀麗。風回貝闕迂。禮官躬典設。蕃使肅奔趨。仙掌開丹辰。祥煙散紫衢。重瞳欣一顧。百辟震三呼。茲豈尋常致。端由聖化孚。既將昭常德。尤足壯神都。炎漢何能擬。姬周莫並驅。拜瞻嗟慶幸。稱贊愧荒疏。惟願皇風洽。仍祈化日舒。鴻

千載固聖壽萬年餘。

賜遊西苑詩

圓殿巍巍近紫薇。宸遊常得奉慈闈。丹楹仰見神龍繞。繡拱還看彩鳳飛。一統皇圖天廣大。萬年聖德日光輝。比隆惟有唐虞盛。此外應知似者稀。綺構憑高倚北辰。洞門斜轉上嶙峋。金鋪宏敞甯知暑。青瑣虛明不受塵。仙卉花開騰鳳彩。古松枝偃露龍鱗。臺前池水涵空闊。散作恩波四海均。萬歲仙山玉壘成。御池千頃鏡光平。渾疑弱水通三島。還似崑崙接五城。繡羽錦鱗春意滿。瑤林琪樹午陰清。靈臺靈沼傳周雅。此日謳歌頌聖明。詔許觀遊到九霄。玳筵賜宴接金貂。玉壺美酒葡萄溢。寶鼎珍葢芍藥調。翠柳低垂渾解舞。黃鸝婉轉似聞韶。愚臣何幸蒙恩澤。願效涓埃答聖朝。

田按東楊賜遊西苑詩及序。已具錄別卷。行儉此四詩。亦同時賜遊作也。又東里集有賜遊西苑詩序。與東楊所述略同。末云。十奇預侍宴間。於茲歷矣。東里又有遊西苑詩云。廣寒宮殿屬天家。晚從宸遊駐翠華。瓊液總頒仙掌露。金支皆插御筵花。樟穿嶺藻波間雪。旗颺芙蓉水上霞。身世直超人境外。玉盤親捧棗如瓜。附錄於此。

遊萬歲山詩

路過龍池得勝遊。長橋中斷卻容舟。三門窈窕煙霞迴。萬石空嵌洞壑幽。長岳雲昏疑帶雨。康干松老不

知秋。山下一石，號慶雲，萬變奇峯，蓋良岳之絕奇者。又有康干石，重來最喜蒙恩澤，絕勝驂鸞訪十洲。

田按抑菴此詩有序云：六月七日，陪少師少保及諸學士於太液池上，焚三朝寶錄草本，詔許遊萬歲山，觀前元遺跡。中官引自圓殿後，度石橋，橋中空二丈許，用一大舟實其中，以通行者。既度入山門，門有三，中爲御路，衆從左右門入。山背奇石疊成，相傳金時取宋良岳之石爲之，至元增飾加結構焉。此詩末云：重來最喜蒙恩澤，蓋在賜遊西苑後矣。

題范啓東秋江捕魚圖

我家住在澄江上，曾羨漁翁盡日閒。舉網得魚供酌酒，傍岩濯足弄潺湲。芙蓉浦裏晚花淨，楊柳汀前秋葉斑。此日看圖動遐想，鷗波浩蕩幾時還。

題畫

危岑離立千仞峭，石孤撐數尋。風清竹外微著，日轉松間薄陰。天闊最宜遠望，亭閒正好長吟。眼前飛瀑如練，更愜幽人素心。

夜泊

灘水微茫清見沙，隔河荒草少人家。舟中夜起看北斗，霜露滿天山月斜。

王英七首

英字時彥，金谿人。永樂甲申進士，選庶吉士，歷修撰、侍讀。仁宗卽位，進侍講學士，再遷右春坊大

學士宣德中遷少詹事。正統初擢禮部侍郎。進南禮部尚書。卒諡文安。有泉坡集。

田按泉坡早結主知。雖陟清華。未及柄用。史稱好規人過。故與三楊齟齬不合。余觀東王祭泉坡文云。出入朝廷。敬恭將事。不翕而同。不矯而異。可以知其旨矣。詩五言如良玉纈栗。迥異當時壑閣之體。

六賢詠

待制本儒生。素心亦何烈。臨危仗孤劍。誓死以殉國。蛟龍爲悲吟。天地慘無色。殺身良獨難。求仁義斯得。

黃待制尋。

劉公廟堂器。制行超羣儒。累遷陟華要。獻替多謀謨。解組值衰暮。歎歎返長途。全軀效子容。知止儕二疏。周詩詠明哲。清風其穆如。劉工部傑。

渤海事文翰。景範肅芳規。一命才未究。惜哉時已危。悲悽近故域。凝睇掩荆扉。薄採南山蕨。莫充首陽饑。遺生竟誰待。視死乃如歸。陳渤海介。

文貞尙儒雅。探索古聖經。蜚騰冠羣秀。久爲幕下英。乘槎重興歎。道在時不行。慷慨力陳言。沈冥獨撫膺。未能效仙尉。竊自比仲卿。葛都事元諱私諡文貞。

伯遠負奇操。肅然佩珩璜。守官非狗祿。蹈世嘆危亡。鳳凰本靈鳥。其鳴待朝陽。頽光不足惜。振翮千仞岡。王博士彰。

鳴陽有佳士。金玉麗厥躬。擔簦師先覺。琢礪德彌充。辭華若利劍。揚馬避其鋒。懷寶終不售。抗志靡他從。勉遵宣尼訓。固守君子窮。朱徵君夏

阿魯台受封後遣其幼子入侍

遠分符券册天驕。恩似春陽及草苗。虜騎萬人先納款。蕃兒十歲也歸朝。舊垂髻髻纏宮錦。新賜珠纓珥漢貂。暗想黃雲砂磧裏。托身何幸到青霄。

章敞一首

敞字尚文。會稽人。永樂甲申進士。選庶吉士。改刑部主事。歷員外郎中。改吏部。擢南禮部侍郎。有質菴集。

送李推官謫湖南

玉陛朝承明主恩。扁舟八月下荆門。斷煙斜日荒山路。野水寒鴉獨樹村。江浦潮聲天外遠。衡陽秋色望中昏。鷓鴣聲裏湘江暮。莫賦離騷怨斷魂。

余學夔一首

學夔字一夔。泰和人。永樂甲申進士。選庶吉士。授翰林檢討。進侍講。有北軒集。

田按侍講與修兩朝實錄。宣德五年。實錄成。敕吏部進纂修以下官。疏自陳老疾。竟不加官而去。士論高之。楊東里稱其明經。

博古負直氣。侃侃遇事徑發。不肯苟阿狗。蓋古之君子也。詩亦軒爽。

送胡中書教授臨江

十載抽毫侍御筵。傳經鄉郡理歸船。天低玉笥浮雲外。水遠清江夕照邊。賓館春醪從客醉。鳳池詩句許人傳。養親正喜鄉園近。何用臨歧更惘然。

章樸一首

樸字原質。甯海人。永樂甲申進士。選庶吉士。坐收藏方正學遺文死。

田按永樂時。藏侯城文者。罪至死。迄今遜志齋集。軒軒天壤間。公論所在。雖峻罰不能令其泯滅也。原質坐是以死。哀哉。

臨刑詩

面母終無日。歸魂定有期。空令二三月。鵲帶血痕號。

明詩紀事卷九

乙籤

陳敬宗七首

敬宗字光世。慈溪人。永樂甲申進士。選庶吉士。授刑部主事。擢翰林侍讀。改南國子司業。遷祭酒。卒贈禮部侍郎。諡文定。有澹然居士集十八卷。

陳子龍明詩選。文定詩典質和平。盛世之風。

田按光世學行爲六館師表。與李祭酒時勉稱南陳北李。中官王振欲納交光世。求書楮子四箴。署名而已。官太學二十餘年。諸生多位卿貳。獨久不調。意豁如也。向推其應制諸作。余謂五字詩。尤沖澹有章。柳遺意。

南溪草堂

去家南溪濱。還住南溪曲。未覺雲物疏。共愛山水綠。臨流四五家。桑麻繞茅屋。日出雞犬喧。春深散花竹。乘興泛滄浪。煙波渺遐矚。山色遠逾淨。漁歌斷還續。歸來蘿逕深。筠窗愜幽獨。軒冕豈不榮。野服無拘束。鷗鳥相與閒。逍遙乃云足。

載酒堂

彭澤去已遠。誰知物外情。高懷獨超曠。淡然無俗營。結廬在山水。虛閣涵餘清。同志或相遇。開樽聊共傾。白雲滿巖阿。秋風吹落英。有酒不爲歡。空餘身後名。微雨曉來霽。悠悠天宇澄。雖無軒冕貴。聊自樂吾生。

元夕觀燈應制

皓月金門夜。和風玉殿春。雲移三島近。燈簇萬花新。天仗臨丹扆。星橋接紫宸。中官宣德意。宴賞及羣臣。紫禁疏鐘靜。高城刻漏傳。五雲迎寶蓋。萬戶綴金蓮。瓊醴行仙席。龍盤進御筵。教坊呈百戲。齊過玉階前。劍珮青霄近。峯巒翠閣重。花明金殿月。香度玉樓風。拜舞諸蕃集。歡娛萬國同。遙聞歌吹發。五色慶雲中。紫陌連清禁。彤樓接絳河。九門星彩動。萬井月華多。寶炬通宵朗。鸞笙協氣和。臣民涵聖澤。齊唱太平歌。山擁金鼉壯。雲盤綵鳳來。星河隨斗轉。珠闕倚天開。歡洽春聲徧。恩從淑氣回。願歌魚藻詠。長奉萬年杯。

雜槐歲鈔。永樂己丑。令自正月十一日爲始。賜元宵節假十日。壬辰正月。賜文武羣臣宴。聽臣民赴午門外觀盪山。歲以爲常。車駕駐兩京。皆賜觀燈宴。上或御午門。示御製詩。使儒臣奉和。覽而悅之。賜以羊酒鈔幣。時評應制諸作。以陳侍講敬宗五首爲上。

翰林記。宣德三年元宵節。賜文武大臣觀燈於萬歲山。命中官侍宴。學士楊榮進元宵賦。賞鈔三千貫。侍讀錢習禮等賦詩以進。成命觀燈於萬歲山。賜宴。各以詩進。賞鈔各六千錠。七年元宵節。賜觀燈於西苑。仍賜內閣白金綵幣。遣中官送於其第。蓋自宣宗卽位以來。凡遇時節。必賜侍臣以詩章。及內醴珍羞。而元宵爲尤盛云。

田按。元夕應制詩。遊人多晝日。明月譚燈光。唐王維句也。雙鳳雲中扶輦下。六鼉海上駕山來。宋王珪句也。明初高季迪亦有

元夕應制觀燈詩。永宣兩朝賜宴觀燈。傳爲盛事。諸臣進御詩篇。宜廟品第。以陳員外元宗爲第一。余謂員外明月只隨仙仗轉。紅雲偏近御筵多。自足擅場。而當時應制諸作。陳祭酒敬宗五律外。殊多工者。楊少師榮云。象緯臨天闕。瑤空集萬靈。雲霞紛掩映。星斗疊晶瑩。寶地春應滿。金門夜不扃。十官陪宴樂。歌舞在明庭。周庶子述云。魚輪通宵徹。金蓮達曙紅。門開九霄上。輦度五雲中。劍佩隨仙蹕。旌旗拂彩虹。宸遊多樂事。此夕萬方同。曾詹事榮云。天臨黼戩動龍光。三島新移植建章。燈火萬枝懸寶炬。綺羅千隊出紅粧。瓠棧月轉留仙蹕。禁禦風迴散御香。歌舞不知清漏永。宮筵選進紫霞觴。梁侍讀潛云。銀漢橫空寶月圓。六鷲飛出五雲端。蓬萊紫禁天中起。玉井紅蓮地上看。滿殿嬌歌留夜景。千門羯鼓散春寒。教坊戲樂回同異。願奉龍顏萬歲歡。胡祭酒儼云。風清華月麗晴空。滿露凝開聖澤濃。燈火遙連丹闕外。簾韶只在彩雲中。九重瑞靄浮金雀。萬樹銀花燦玉虹。光祿傳宣催進酒。烏紗都映醉顏紅。金少保幼孜云。天仗森森列寶台。教坊初進鼓如雷。金蓮夜放輕寒散。絳蠟春融淑氣回。仙樂謠調雙玉管。紫宸頰上萬年杯。傳柑歲歲承恩渥。感遇深漸負不才。閩園重夜不屬瓊樓十二敵銀屏。東風一曲昇平樂。此夜都人盡許聽。

李時勉一首

時勉名懋。以字行。江西安福人。永樂甲申進士。選庶吉士。授刑部主事。進侍讀。改御史。以事下獄。復官。進侍讀學士。再遷學士。改祭酒。諡文毅。改諡忠文。有古廉集十一卷。

國史唯疑李時勉。陳敬宗終淹國學。西楊與有責焉。聞敬宗頗直指西楊過。惟西楊匡輔君德。處多功大。未易瑕疵。疑在魏徵。褚遂良之間。

藝林伐山。元武伯英詠燭翳詩。嗟殘瘦玉關心吐。蹴落春紅燕尾香。爲一時所賞。國朝李古廉詠翳刀詩。吳綾翳處魚吞浪。蜀錦裁時燕掠霞。深院響時春畫靜。小樓工罷夕陽斜。公之直節清聲。而詩嫵媚如此。信乎賦梅花者。不獨宋廣平也。

田按祭酒折脅殿廷。荷枷國學。剛毅之氣。折而益勵。詩乃清婉可味。

送樂舞生戴尙禮歸禾川

豔秋菊兮花滿枝。掇芳香兮泛瓊卮。送君去兮南歸。風飄飄兮吹衣。楚山峩峩兮楚水漓漓。水有蒲蓮兮山有靈芝。山中之樂兮何有窮期。恨一別兮天之涯。月皎皎兮長相思。

古意寄曾學士

梧桐生崇岡。亭亭出雲林。一朝樵夫探斤斧。來相尋。幸爾鑿下餘。斲削成素琴。粲粲絃朱絲。煜煜徽黃金。當窗試一彈。悠然太古音。清風流水遠。白雲蒼山深。世無鍾子期。誰能識子心。

小瀛洲爲抑菴少宰賦

甲第旣宏敞。齋居愛幽偏。徘徊梁棟間。宛在蓬壺山。蒼松隱崖岫。白日霏雲煙。皓鶴天邊來。靈颿波上旋。僿侻羨門子。羽蓋何翩翩。我欲往從之。愧無凌風翰。一水遡難卽。引領增慨然。

周忱一首

忱字恂如。廬陵人。永樂甲申進士。選庶吉士。授刑部主事。進員外。改越府右長史。擢工部侍郎。巡撫江南。遷戶部尙書。改工部。卒諡文襄。有雙崖詩集六卷。

卽按甲申庶吉士。進學文淵閣者二十八人。恂如自陳年少。得與其選。蒞吳有惠政。吳人思之不衰。篤於交誼。解大紳繫獄。交

知絕迹。薪米之奉。獨出恂如。大紳贈詩。有當時霜雪被滿野。惟見青青松樹枝之句。

送廖主事還南京

題柱才名舊。還宮別意新。柳花低撲酒。山翠遠迎人。去馬嘶芳草。嬌鶯惜晚春。秣陵千里外。飛夢更相親。

李昌祺十四首

昌祺名禎。以字行。伯葵子。見甲永樂甲申進士。選庶吉士。擢禮部郎中。出爲廣西左布政。改河南。

有容膝軒草。運甓漫稿。

四庫總目。昌祺詩一變綺靡。纖巧之習。而以流逸出之。故別饒鮮潤。

李時勉古廉集。李布政詩。如纖雲浮空。變態而難狀。春泉注壑。滲澗而無窮。

水東日記。廬陵李禎。爲人耿介廉潔。自始仕至歸老。始終一致。人頗以不得柄用惜之。嘗自贊其像曰。貌雖醜而心嚴。身雖進

而意止。忠孝稟乎父師。學問存乎操履。仁廟稱爲好人。周藩許其得體。不勞朋友贊詞。自有帝王恩旨。蓋亦有爲言之也。景泰

中。韓都御史雍。告之故老。進列先賢祠中。獨以嘗作翦燈餘話不得與。

安磐頤山詩話。李昌祺翦燈餘話。記事可觀。集句如不將脂粉澆顏色。惟恨繡塵染素衣。漢朝冠蓋皆陵墓。魏國山河半夕陽。

對偶天然可取也。

田按方伯詩。色新意古。諸體並工。在水樂詩家中。獨標一格。當時選二十八士。進學文淵閣。有才如此。不與其列。操鑿衡者。能

辭其咎乎。

春日與高逸人行秦淮河上作

明詩紀事 乙籤 卷九

端居苦無惊。今日得良契。逍遙出近郭。散策淮水際。草輒倦堪眠。林香醉宜憩。鳥嘒晴始和。川容晚逾媚。篠深風葦密。沙沒夕潮至。野鷺渾忘機。似識靜者意。幽懷頗得愜。逝景苦難繫。候卒晡欲還。春城暝將閉。因知市朝隱。兼有林壑致。永言終此生。涵泳太平世。

題雙燕圖寄表弟陳安行

君家吟溪北。我家郡城西。君家梁間燕。我家梁間棲。我從出鎮來。寒暑又三變。不見故鄉春。惟見故鄉燕。挈家古城邊。禹家汴河涘。燕識主人心。相隨不相離。念君千里隔。見君幾時得。欲令燕銜書。飛歸到君側。君能弗吾棄。爲理白雲莊。願言共君老。看燕雙飛翔。

擬唐塞下曲

羽箭雁翎刀。風沙北地豪。弓開關月滿。鵬沒陣雲高。勁騎三邊出。名王一夕逃。對軍方得意。新拜繡書褒。

彭澤縣石崖僧房

窗戶俯澄潭。龍宮似可探。藤蘿棲鶴樹。瓶錫定僧岩。斜日疏疏磬。長風去去帆。只應輸野衲。長此臥煙嵐。

宿廢普濟寺

青山行欲盡。深樹見僧房。雲氣千峯暝。秋聲一院涼。長藤懸破衲。脫葉覆空廊。龍象黃金地。蕭蕭蔓草長。

三月四日卽景

忽忽春將暮。俄過三月三。草誰憐益母。花自媚宜男。乍到尋巢燕。初眠上箔蠶。新茶與稗筍。鄉味憶江南。
張舒州家觀元承旨危素畫像

虞揭凋零玉署空。堂堂至正獨推公。氣全河岳英靈秀。手抉雲霞制作工。江總歸陳翻恨老。賈生鳴漢早稱雄。丹青似有無窮意。卻寫南冠入畫中。

雨中發洪都

豫章城下水如苔。風雨官河一棹開。山色遙連蕭寺暝。雁聲斜度楚雲哀。霜凋遠樹寒燈見。鳥背孤帆極浦回。畫棟朱簾遺閣廢。荒基歲歲長蒿萊。

送子生還鄉

紅樅村稀夜合殘。行人千里問鄉關。客情偏在初秋裏。旅夢頻生半醉間。細雨帆檣投極浦。孤村燈火隔前山。西風無限滄洲意。欲採芙蓉愧未閒。

駕幸朝天宮祭星

上帝蕭臺衛百靈。儲皇拂曙醮羣星。清都祕籙開雲篆。白晝神雷擲火鈴。曉露未乾珠樹溼。天風微動寶花零。叨恩久在南宮裏。長從鑾輿幸冶亭。

訪鷺洲書院遺址

宋家書院但空名。二水中分草樹平。陵谷變來基亦廢。野人耕處草還生。落花細雨文魚上。殘柳西風白雁鳴。臨眺不堪懷往事。城頭畫角更淒清。

小滿日口號

久晴泥路足風沙。杏子生仁棟謝花。長是江南逢此日。滿林煙雨熟枇杷。

梔子畫眉圖

昔年曾伴董嬌嬌。長把春山笑倩描。今日梁園空見畫。烏嚙花落鬢蕭蕭。

山中見牡丹

不嫌惡雨並乖風。且共山花作伴紅。縱在五侯池館裏。可能春去不成空。

張徹三首

徹字玉瑩。新淦人。永樂甲申進士。歷吏部主事。郎中。有退菴集。

田按甲申一榜。入文淵閣進學者。江西多至十五人。此外如李布政昌祺。張郎中徹。殊自錚錚。不在諸人之後。

盱江山水圖爲鄭文選誠作

吾聞匡廬之山盤礴而崔嵬。金作蓮花雲作臺。九江之水小如杯。洞天石扇空中開。巨靈怪山欲將海門扼。剗卻一半移向君家來。君家住在盱江潏。宛若神仙開紫府。白日吹笙鼓琴瑟。窗戶無塵灑香雨。門前

春煖溪水生。園林好景皆天成。溪花向日半含笑。溪樹無風如有聲。沿溪有路出林杪。溪頭遠見孤舟小。行人日晚促歸驂。斷岸天高度飛鳥。三山迢遞隔紫煙。飄輪羽蓋來飛仙。問之何所事。丹鼎功未圓。直欲授君久視長生訣。並乘白鶴上下相周旋。嗟我村野人。未達仙家奧。自知骨相凡。何由得深造。老來頭白欲息機。見畫頓覺心神飛。何當長揖謝塵俗。與君挂席西江歸。

送皮如谷

喜釋魯橋役。便尋金水船。銘心思報主。迴首若登仙。掃雪開松徑。穿雲種秫田。端居謝名利。詩酒度流年。

晚過劉懋烈山莊

喬木山中舊日莊。花深苔徑襲人香。青松白石隨心賞。翠壑飛泉引興長。林月夜分桑柘影。溪雲冷入薜蘿裳。多情惟愛天台客。剪燭分題醉夜涼。

王恪一首

恪字孟誠。湖口人。永樂甲申進士。授評事。歷廣東道御史。遷參議。未赴。乞歸。

題閣阜山

葛嶺煙霞幾萬重。仙壇湧出翠芙蓉。瓊林月上時聞鶴。丹鼎雲生或見龍。天上珮環蒼玉冷。山中冠劍紫苔封。憑誰喚起西風夢。鳴水臺前五粒松。

羅亨信三首

亨信字用賓。東莞人。永樂甲申進士。改庶吉士。歷工部吏科給事中。謫交趾。洪熙初。召還爲御史。正統初。擢僉都御史。巡撫宣大。進右副都御史。景泰初。轉左副都御史。有覺非集。

少年行

金張遊俠子。隸籍李輕車。祛服過侯弟。鳴箏入主家。醉呼槐市酒。夜宿杜陵花。更有期門約。悲歌別狹斜。

戍婦詞

去年戍桑乾。今年戍交河。書來渾不定。教妾夢如何。

古意

傍石蒲草瘦。傍湖蒲草肥。因依各已定。不願更相移。

羅汝敬一首

汝敬名肅。以字行。吉水人。永樂甲申進士。歷翰林修撰。以言事下獄。改御史。擢工部侍郎。兩使安南。巡撫陝西。有寅菴集。

雲錦峯

廬山東南雲錦屏。裂雲製錦羅紫青。水簾捲秋天漠漠。春色入樹花冥冥。屏陰處處青山小。古刹鳴鐘白

昏曉一鏡平湖凝黛螺。萬里長天度飛鳥。故人舊隱斗南家。玉堂十載思煙霞。何時乞得南歸去。醉臥屏前埽落花。

楊勉一首

勉字宗助。江甯人。永樂甲申進士。選庶吉士。改刑部主事。進郎中。擢行在本部右侍郎。坐事繫獄。洪熙改元。復官。出爲山東石參政。改廣東。

樂靜爲謝庭循賦

素志厭煩囂。華軒敞幽闕。端居得時暇。琴咏聊獨適。芸窗竹露繁。草徑蘿煙積。座分嘉樹陰。簾逗遠山碧。寥芳涉清澗。玩雲憩苔石。一鶴溪上還。青林帶斜日。境勝迹自幽。神怡興逾逸。妙契靜中趣。於焉樂無極。

熊直一首

直字敬方。其初冒姓胡。吉水人。永樂甲午舉人。有西澗集。

薊門秋夕

清漏遲遲月轉廊。博山銷盡水沈香。重城不鎖還家夢。兩夜分明到故鄉。

明詩紀事卷十

乙籤

魏驥一首

驥字仲房。蕭山人。永樂乙酉舉人。授松江訓導。遷太常博士。宣德初。進吏部員外郎。歷太常少卿。正統三年。擢行在吏部左侍郎。改禮部。再改南吏部。進尙書。景泰初致仕。卒諡文靖。有南齋前後集。

雙槐歲鈔。魏文靖公。天順甲申。遇憲廟卽位。詔文武官五品以上致仕者。進階一級。時年九十一歲。進一品官階。閒居澹懷云。一品新升遵紫詔。百年將屆荷蒼穹。至己丑元日。年九十六。詩云。年登上壽身逾健。官拜深恩秩更加。庚寅元日。年九十七歲。詩云。酒香旋漉迎佳客。詩就清吟續舊編。辛卯年九十八歲。九月十九日。病中臨終詩云。瑤島不勞青鳥至。菊籬還許白衣來。官至一品。年近百歲。國期大臣罕與之儷。池北偶談。魏文靖詩秀麗可誦。

題趙松雪小像

天潢玉樹溥華滋。水晶宮小春遲遲。漚波桂楫浮輕漪。桃笙豹枕羅香幃。蜀琴曉鳳彈吳絲。翠華渺渺羶塵飛。銅仙淚泣風淒淒。瑤階土蝕秋蟲悲。蟬衫寶璫雙蟠螭。玉堂歸老江南時。

黃子久沙磧圖

江邨望極際春明。市地人家喚欲磨。芳草一川朝豔豔。嬌鶯隨處柳層層。茆茨偏水遇幽鳥。苔徑穿雲接稻塍。回首夕陽天未墮。老漁猶自未收罾。

林長懋一首

長懋字景時。莆田人。永樂乙酉舉人。除南昌教諭。改青州教授。擢翰林編修。遷中允。出知鬱林州。忤旨下獄。十年遇赦之官。有竹莊集。

關陔詩話。竹莊詩格守唐人矩矱。不踰尺寸。

出西門行

出西門。望晉陽。太行山高路茫茫。來鴻雁。鳴蛩蜚。今我不樂。露爲霜。來日短。去日長。況復萬里非故鄉。

陳全三首

全字果之。長樂人。永樂丙戌第二人及第。授翰林編修。遷侍講。有蒙菴集。

田按果之詩有新色。希蹤章柳。

秋江曉釣

澄江澹夕波。危峯逗煙景。孤坐一竿秋。微風鬢絲冷。釣國非所任。濯纓趣方領。長嘯山月高。蒼茫楚天迴。

送人歸江右

祖席白下亭。買櫂秦淮浦。人分梧葉秋。恨帶芭蕉雨。長風吹片帆。倏忽邈何許。矯首隔雲山。望望空延佇。
敝舊

故國別來久。那堪憶舊遊。鶯花春接席。風雨夜同舟。明月心千里。青山夢一邱。相思限吳越。雲樹共悠悠。
謝瑾一首

瑾字庭蘭。鄞人。永樂丙戌進士。出使粵中。以薦除刑部員外郎。遷郎中。出知平陽府。擢陝西按察使。有蝸濡集。

田按庭園詩好作奇語。

長淮

千里淮流勢若奔。建瓴西下地平吞。天吳激浪來江口。鬼伯推潮出海門。疏雨數聲雲入浦。遠林一抹水連村。汧流有客登瀛去。路入清河日又曛。

曹閩一首

閩字冀成。江夏人。一云黃巖人。永樂丙戌進士。官監察御史。有蘭臺稿。

息耕軒爲應尙惠賦

早歲厭卑近。所向輕四方。泛舟越黃河。驅車登太行。客路無所極。翻然歸故鄉。東臯足春雨。曉出移新秧。石田士力薄。豐歉未可量。肆勤苟及期。卒歲庶有望。所喜隣交親。言論款衷腸。卽此諧所願。貧富安其常。 辭常生一首

常生字壬用。上虞人。永樂丙戌進士。官吏部郎中。

青州道中

遠道長爲客。寒宵夢到家。故山風景好。香雪壓梅花。

劉髦一首

髦字孟恂。永新人。永樂戊子舉人。有石潭存稿。覆瓿集。

登東華

層樓華構鬱崔嵬。隔水紅塵晝不來。鐵笛一聲天外響。月明疑是呂仙回。

黃暘一首

暘字原升。莆田人。永樂辛卯。第三人及第。授編修。

次潞河

朝發薊門道。暮宿潞河灣。落日如有意。爲我駐西山。雁影水雲外。砧聲煙樹間。時逢瀛洲侶。共泛仙舟還。

錢習禮一首

習禮名幹。以字行。吉水人。永樂辛卯進士。改庶吉士。授檢討。歷侍讀。侍讀學士。掌院事。擢禮部侍郎。卒諡文肅。有應制集。詞垣續稿。歸田稿。

和曾侍講送陳郎中重使西域

歸朝名馬貢飛黃。再撫羌夷出塞長。纔到交河南部識。重經瀚海舊營荒。客程春半時逢雨。虜地寒多夏亦霜。從此番酋俱款附。不須生致左賢王。

熊概一首

概字元節。吉水人。舉人直子。永樂辛卯進士。榜姓胡。除御史。出爲廣西按察使。改廣東。宣德初。擢大理卿。巡撫兩浙。及蘇松諸郡。遷南都察院右都御史。有芝山居士集。

登岳陽樓

巴陵城上岳陽樓。樓外長江日夜流。簾捲斷雲衡嶽曉。窗含殘雨洞庭秋。東南勝概留清賞。唐宋衣冠嘆昔遊。倚徧闌干重弔古。蒹葭零落不勝秋。

黃壽生一首

壽生字行中。莆田人。永樂辛卯進士。改庶吉士。授檢討。有集十卷。

過凌霄道中

浩浩寒流急。茫茫曉望賒。綠州迷杜若。碧浪泛桃花。川樹煙中沒。雲帆鳥外斜。欲尋天盡處。彌漫失津涯。

林實一首

實字中美。長樂人。永樂辛卯進士。榜姓吳。除監察御史。出爲廣西按察僉事。有樸齋集。

雨中懷陳馬二翰林

二月山城煖正融。桃花開盡杏花紅。朋游零落春風後。客況淒涼暮雨中。閩海幾年誰寄雁。淮山千里獨乘驄。玉堂蓬閣如天上。此日懷人思不窮。

馬鐸一首

鐸字彥聲。長樂人。永樂壬辰第一人及第。除修撰。有玉巖集。

送人歸平陽

太行山上西日微。桐鄉城下行人稀。關河萬里愁歸客。汾水秋風孤雁飛。

林誌六首

誌字尙默。閩縣人。永樂壬辰第二人及第。授編修。歷修撰。侍讀。右春坊諭德。有菰齋集十五卷。

田按尙默爲王孟揚弟子。詩沿闕馭。時有警音。尙默之卒也。同館多有挽詩。侍講秦和余學颺詩云。詞華推哲匠。科第重明經。

泛覽窮奇僻。幽探洞竒冥。淒涼遺舊事。惻愴看新銘。日暮四岩曲。援壘不可聽。多病文園久。仙遊去不還。喪車經衛水。丹旆入
閭闔。野鳥悲殘雨。浮雲蔽舊山。孤雛扶襯往。辛苦冒危艱。檢討東魯許。彬詩云。故友留長劍。孤兒哭素帷。茂陵無舊藁。杜曲有
遺詩。黃甲名猶在。青雲志可悲。潞河丹旆去。行道亦漣洏。修撰秦和曾。鶴齡詩云。臥病京華衆所憐。青燈孤榻夜蕭然。賜歸方
擬辭雙闕。長逝旋聞隔九泉。桂館餘風人共惜。詞垣遺稿世應傳。追追旅櫬南還路。遙指三山若箇邊。修撰吉水劉子欽詩云。
憶昨春明話別離。宦期數月永相違。半生富貴成春夢。一舉科名冠盛時。老我忽驚雙鬢改。懷人更覺寸心悲。校文應過揚雄
宅。灑淚臨風不盡思。諸公詩世不多見。附錄於此。

題周選部山水圖

披圖紫薇署。拄笏青山曉。蓬瀛望超忽。樓閣訝縹渺。天鏡一棹浮。雲屏數峯繞。滄洲窅無際。赤縣坐來小。
憑虛恍天遊。玩化已心了。懷哉安期生。汗漫扶桑表。

遊西峯古寺

石上尋片雲。西山得微逕。松門天路虛。花宇金潭映。落葉飛晝長。垂蘿結秋暝。蚤緣遠公社。寄適陶潛詠。
三生了羣迷。一寂喻澄境。雖云吾喪我。應悟慧生定。

送隱士黃聲玉

雙井秋陰合。蓬門石徑斜。殘陽催鳥過。疏雨落花。山帶垂青幔。窗螢照碧紗。不知林下客。幾處醉煙霞。
夜宿黃田驛

早有浮名賦遠遊。青山明月共孤舟。渡頭夜市聞方語。樹裏寒燈隱驛樓。年少有情多惜別。秋深無物不關愁。鄉園殘夢蒼茫裏。忽聽舟人起棹謳。

後灣渡

清溪源發古靈山。小澗縈迴出後灣。竹徑暗通流水入。柴門常對落花關。黃昏問渡行人少。白日隨潮野艇閒。記得舊遊曾買棹。一篙春雨逐鷗還。

畫山水爲張中書題

鑑湖春水綠如苔。湖上羣峯錦障開。誰買扁舟從賀監。白雲林下獨歸來。

西蜀竹枝詞

竹郎祠前江水流。竹郎祠上同雲收。竹枝歌向雪中去。大小蛾眉俱白頭。

黎恬一首

恬字潛輝。清江人。慎弟。見甲籤永樂壬辰進士。授監察御史。出知交阯南靈州。以薦擢春坊諭德。

送李大使還清江鎮

三載司征報政成。還官深喜拜恩榮。金臺行色逢秋暮。玉筥歸心共月明。望入長安孤雁遠。到來古鎮片帆輕。煩君寄語周通府。渭樹江雲總是情。

余文一首

文字孟質。莆田人。永樂壬辰進士。官常州知府。

送黃希尹歸莆

昔見遊青瑣。今看已白頭。爲丞淹海國。作客戀皇州。看劍情仍在。還家寵獨優。都門遲去騎。潞水艤歸舟。岸斷人煙迴。川長夕照浮。亂山迴驛路。深樹隱城樓。客舍清溪曲。鄉關碧海陬。親朋登眺處。還憶薊門不。

黃澤二首

澤字敷仲。閩人。永樂壬辰進士。官浙江布政使。有旗山集。

直沽晚渡

雨歇夕陽斜。孤帆挂落霞。城頭聞戍角。海口見人家。衰鬢驚秋葉。歸心逐暮鴉。今宵何處泊。棹月入蘆花。

臨安卽景

臨安多沃土。宜麥復宜蠶。塔影錢王墓。鐘聲淨土菴。吳衣矜白苧。越果重黃柑。父老何爲者。官亭候使驂。

陳鑑三首

鑑字有戒。吳人。永樂壬辰進士。除監察御史。歷湖廣、山東、浙江、按察副使。都察院左副都御史。巡撫陝西。兼督甯夏。延安綏德邊備。進右都御史。太子太保。左都御史。諡僖敏。有介菴集。

田按倭敏鎮陝西有威惠陝人呼爲黑髯翁關中陳泰挽公詩云關西民仰黑髯公紀其事也。

宜君山中縱目

石磴迂迴疋馬遲。峯嵐掩映樹參差。幾回按轡看雲度。澗底人家總不知。
衛河道中春陰寫懷

青山隱隱晝沈沈。十日乘舟五日陰。幾度望春春已半。野花號鳥總關心。

祈仙臺

仙臺百丈倚雲高。玉輦曾登望九霄。青鳥不來王母去。茂陵風雨恨迢迢。

劉咸一首

咸字士皆。泰和人。永樂壬辰進士。官廣東按察副使。有河南詠古詩。虛菴集。

河陰

敖倉屹屹對崑關。廣武蒼蒼夕照間。一片雲生牛口谷。幾家人住虎頭山。英雄割據鴻溝在。王霸興亡白晝閒。往事茫茫只如此。臨風何用起長歎。

林純一首

純字居粹。黃巖人。永樂甲午舉人。授湖口訓導。

題畫

夙有紫霞想。冥棲在巖谷。短屐映蒼苔。長鑱斲黃獨。誰云寡儔侶。長嘯友麋鹿。白雲暮飛來。遮斷前山綠。

陳祥一首

祥字崇儉。天台人。永樂甲午舉人。官工科給事中。

春遊國清

幾日林霏暝不開。五峯飛翠溼亭臺。鈎簾閒探春消息。一對尋巢燕子來。

王達一首

達字公路。嘉興人。永樂甲午舉人。官襄陽衛經歷。有南溪吟卷。管窺集。雲溪遺稿。

題宋高宗荔支圖

晏坐深宮寫荔支。建炎天步久艱危。江南風味真奇絕。莫遣當年北使知。

明詩紀事卷十一

乙籤

陳循二首

循字德遵。太和人。永樂乙未第一人及第。除翰林修撰。洪熙改元。進侍講。宣德初。進侍講學士。正統中。進翰林學士。入文淵閣典機務。旋進戶部右侍郎。兼學士。景泰中。進少保。歷文淵閣。華蓋殿大學士。英宗復辟。謫戍鐵嶺。尋放還。有芳洲集十卷。

賽齋瑣綴錄。宣廟最好詞章。選南楊與陳芳洲二先生。日直南宮應制。南楊思遲。陳思敏。一日代御製壽星贊。陳援筆贊云。渺南極兮一星。燦祥光兮八紘。兆皇家兮永齡。我懷思兮治平。賴忠貞兮弼成。宜壽域兮同升。南楊以指閣畫壽域二字。欲易而未就。時中官促進甚急。曰。先生有則改。無則罷。遂取去。賜內閣問。二楊先生曰。壽域二字如何。西楊應曰。八荒開壽域。中官還詰南楊曰。八荒開壽域。此句詩如何。南楊曰。好詩。中官曰。先指壽域爲未好何也。南楊默然。少頃。陳退食。遇西楊於喘門。西楊語陳曰。適賜壽星贊甚佳。必大手筆也。陳唯唯。後正統間。朝鐘一日不受杵。命內閣製祠鐘文。南楊入室中。翻舊稿不得。太監候久。促陳芳洲曰。先生何不作。陳乃白南楊曰。舊無此稿。先生第口占。我寫。南楊乃起一語。陳遂續成之。

沛縣

漢祖歌風處。荒臺宿草迷。野雲連碣北。溪雨過豐西。人自殊方至。書因去客題。鶴原千里隔。落筆數行悽。

過徐州迴鑾處

偶過迴鑾處。遙因想翠華。彩雲飛輦路。象迹印汀沙。曉日彭城地。春風楊柳花。獨慚隨使節。重此泛仙槎。

陳輝八首

輝字伯煒。閩人。永樂乙未進士。除監察御史。出爲貴州按察僉事。遷廣東副使。有存菴琴邊清唱二集。

謝肇淪福州府志。陳輝工詩善鼓琴。草書學懷素。老而筆力尤勁。解縉雅推服之。

田按伯煒詩格清婉。永樂中當推作家。其官吾黔按察僉事時。與巴陵方御史與侔唱和。永樂甲辰。御史巡察赤水。得一聯云。雲生石洞重陰合。雨過峯巒積翠深。索伯煒卒成之。見琴邊清唱集。而黔志職官列巡按御史方侔於宣德朝。誤矣。

遊絳月軒

靈境闕空寂。雲門入中峯。玩奇事幽賞。因得相追從。蕭條林木昏。羣物生秋容。暝色半潭雨。寒聲雙澗松。行吟送落葉。歸思聞疏鐘。蓮社有佳約。東林期再逢。

秋日同諸公登清冷臺

靈峯起千仞。高臺鬱岑寂。煙蘿窮攀登。林谷恣探歷。憑高一長嘯。頓覺萬緣息。長江天際來。茫茫去無極。

萬籟送天聲。連山起秋色。更聽白猿嘯。東林澹將夕。

落芳峯性上人山房

聽梵來山寺。逢僧宿石樓。風泉行處滿。花竹坐來幽。別澗鐘聲晚。空潭樹影秋。東林微月白。相送虎溪頭。

寒夜留宿故人隱處

高齋期夜宿。蘿徑獨攜琴。尊酒成幽酌。孤燈照短吟。竹泉分小磻。霜葉響空林。且盡山中醉。誰論物外心。

寒夜有懷宗武

坐向東樓月上時。懷君不寐益淒其。獨拚斗酒山中醉。深負孤琴雨後期。夜久霜風還動竹。天寒雪雀自爭枝。也知別後能相憶。故遣新詩慰所思。

題上清方壺山水

曾過蓬島訪茅君。路入中峯紫翠分。琪樹寒生雙澗雨。石門秋臥半潭雲。捲簾山色當窗見。拂軫溪聲入坐聞。何日暫辭塵服累。青松白鶴自爲羣。

小景題贈密齋先生

長尋幽絕避囂喧。野服吟秋到鹿門。幾處秋山連斷岸。數家黃葉帶孤村。風潭石瀨清琴響。煙徑苔花翳屐痕。卻羨漁樵林下趣。白雲相對欲忘言。

哭草堂上人

上人隻履歸何處。振錫泉臺去不回。雙樹落花禪榻靜。一燈深竹影堂開。池虛殘月餘明鏡。松偃高枝翳古苔。馴鳥不知人事改。捲簾日日去還來。

李茂弘一首

茂弘字用受。黃巖人。永樂乙未進士。官吏部員外郎。

遊泉南清溪洞

僊人跨鶴去不返。古洞寥寥遺空山。瑤草叢叢曉煙淡。碧桃寂寂春風寒。徒聞金丹換毛骨。不見白日生羽翰。蓬萊三島渺何許。令人矯首空長嘆。

許彬一首

彬字道中。甯陽人。永樂乙未進士。改庶吉士。授檢討。正統末累遷太常少卿。兼翰林待詔。提督四夷館。景泰中奉迎英宗還。擢本寺卿。天順初進禮部左侍郎。兼翰林學士。入直文淵閣。尋出爲南京禮部右侍郎。甫行。貶陝西參政。乞休去。成化初以侍郎致仕。有東魯先生集。

王士禎漁洋文略。鄉前輩許侍郎彬詩有云。道上鉤衣蒼耳子。風前聒客白頭翁。句可誦。

田按漁洋稱侍郎道上鉤衣蒼耳子一聯。余謂不如黃河九曲天邊落。華嶽三峯馬上來。尤雄俊也。

題王舜耕畫

流水橋頭行客。青山樹杪人家。仙源正在何處。松蘿深鎖煙霞。

高穀二首

穀字克用。揚州興化人。永樂乙未進士。選庶吉士。授中書舍人。仁宗踐阼。改春坊司直郎。尋遷翰林侍講。正統中進侍講學士。擢工部侍郎。入內閣。知制館。景泰初進尚書少保。東閣大學士。兼太子太傅。尋進謹身殿大學士。英宗復辟。謝病歸卒。成化初。贈太保。諡文義。有育齋集十七卷。歸田集三卷。拾遺集一卷。

寄王爲善先輩

右軍軒居足清致。爐煙細繞匡山屏。瑤琴鼓時月皎皎。白鶴舞罷風泠泠。讀書累日不出戶。教子有時還過庭。安得相從一握手。談詩酌酒共忘形。

題江村夕照圖

青山繞郭暮雲飛。江上人家半掩扉。楓樹影斜村社散。蓼花香細釣船歸。天晴白鷺依沙集。秋老黃雞啄黍肥。好似輞川圖畫裏。空林煙火正斜暉。

牟倫一首

倫字秉常。宜賓人。永樂乙未進士。官監察御史。以諫謫甘肅。

題肅州景

百雉層城萬里遙。漢家曾此建旌旄。不聞官吏鳴宵柝。尚有番王款聖朝。貢去天閑皆駿馱。馱來銀甕有蒲萄。於今絕塞無烽警。定遠何須戍險勞。

蕭儀三首

儀字德容。樂安人。永樂乙未進士。官吏部主事。以論遷都北京。忤旨見殺。有襪綫集十五卷。

四庫總目。儀文有紆徐曲折之致。而意境不深。其詩爲失鑿。明詩綜所不錄。殆偶未見歟。

田按永樂時。江西有二蕭儀。一樂安人。永樂甲午舉人。乙未進士。官吏部主事。一泰和人。永樂丁酉舉人。官教諭。樂安蕭儀。有襪綫集。見四庫總目。及查夏重江西志。錄詩者。往往誤爲泰和蕭儀。泰和縣志。江西詩徵。皆有此失。

昨見伐木謠詞甚愴意甚真深足以見一時之事俗故賡之

永樂四年秋起夫。只今三載將何如。無貧無富總趨役。三丁兩丁皆走塗。山田雖荒尙供賦。倉無餘粟機無布。前月山中去未回。縣檄倉忙更催去。去年拖木入閩關。後平山裏天正寒。夫丁已隨瘴毒歿。存者始惜形神單。穉子多孤母多老。幾度臨門望歸早。火伴還家始報音。遺骸已潤荒山草。官家役簿未除名。孤兒嫠婦仍登程。去年丁壯已殞歿。今年孤弱知無生。君門如天多隔阻。聖主那知萬民苦。但聞木數已將

完。王事雖勞莫懷土。

和潘參政遊玉山韻

玉。山。山。頭。雲。作。堆。仙。人。居。處。有。樓。臺。吹。笙。靜。夜。來。子。晉。度。曲。有。時。聞。善。才。深。洞。歸。龍。長。帶。雨。古。碑。字。落。半。封。苔。元。都。勝。覽。知。無。極。琪。樹。東。風。花。正。開。

雲林圖

喬。林。冉。冉。晴。雲。浮。灑。氣。泱。泱。山。木。稠。林。深。或。招。老。鶴。宿。雲。暗。恐。挾。神。龍。遊。茅。茨。幾。架。在。空。谷。略。約。百。尺。橫。清。流。道。人。雲。外。夢。初。醒。長。嘯。一。聲。天。地。秋。

張居彥一首

居彥字翰華。上虞人。永樂丁酉舉人。累官福建按察僉事。

舟中寫懷

老。畏。年。華。暮。愁。深。鬢。雪。多。浮。名。秋。草。露。歸。思。大。江。波。舊。恨。憑。詩。遣。衰。顏。借。酒。和。故。鄉。無。限。樂。歸。去。著。漁。蓑。

李騏一首

騏字彥良。長樂人。永樂戊戌第一人及第。授翰林修撰。

芝山蘭若

東峯六曲屏峯下。祇樹深深舊蘭若。施食臺前芝草香。繙經席上流雲瀉。我昔逃禪來此山。上人飛錫上方還。香床說法天花落。丈室懸燈水月閒。揭來精舍東溪裏。垂帷永日聞流水。四壁煙蘿世外青。六時鐘梵雲中起。招邀乘暇更登臨。共愛雲堂花木深。莫道空門俱是幻。片時清淨卽禪心。

周敍一首

敍字功敍。吉水人。永樂戊戌進士。改庶吉士。授編修。歷修撰。侍讀。遷南侍講學士。有石溪集。

江上行

江流昨夜添新雨。綠樹流鶯嬌不語。三三白苧冶遊郎。兩兩紅粧浣紗女。青山江上立嵯峨。江中新水生洪波。畫船搥鼓凌風去。兩岸春聲雜棹歌。

吳源一首

源字叔淵。閩人。永樂戊戌進士。官當塗知縣。

凌歊臺

晚風扶醉上凌歊。落日孤城思寂寥。歌舞盡隨王氣散。英雄長恨霸圖銷。黃山樹色空嗚鳥。采石江聲半落潮。惆悵不須嗟物換。六朝遺事總蕭條。

尹鳳岐二首

鳳岐字邦祥。吉水人。永樂戊戌進士。詩綜誤作丙戌改庶吉士。授編修。遷侍讀。

田按梁文莊水東日記稱侍讀喜作戲謔詩。今錄二詩。亦復莊雅。

送朱善繼使南郡

南國山川舊帝畿。皇華駟牡去駢駢。柳垂禁籞絲千縷。花繞宮牆錦一圍。朝士共矜文度至。鄉人爭羨買臣歸。明朝冀北相思處。煙樹蒼茫夕照微。

挽左都御史陳儷敏公

烏府服官早有聲。清時夷夏盡知名。五朝出入持風紀。一代衣冠屬老成。白首還家今有幾。丹心戀闕死猶生。傷心爲賦招魂句。悵望東吳倍愴情。

金誠一首

誠字誠之。番禺人。永樂戊戌進士。授工部主事。改刑部。

澹齋

端居探元化。因物窮至情。智者取其實。薄俗徒徇名。玄酒本忘味。大音亦希聲。沖和養天性。得之良足矜。繁華豈不貴。倏忽秋露零。寄心向冥漠。永以全堅貞。

習嘉言一首

嘉言名敬以字行。新喻人。永樂戊戌進士。改庶吉士。授編修。累官詹事府詹事。有溫樹稿、垣西稿、尋樂集。

和春坊諭德黎潛輝早朝謝恩

一麾出守滯多時。又沐恩波拜赤墀。士論久因科第重。宮臣新荷薦書移。秋風紫燕矜神駿。曉日文鷄振羽儀。粉藻治平應有待。聖朝此日際重熙。

林真二首

真字伯誠。閩人。永樂戊戌進士。仕至監察御史。

田按閩縣有兩林真。一字伯誠。洪武二十六年舉人。永樂戊戌進士。仕至監察御史。一字汝質。永樂三年舉人。官知縣。粵王臺絕句。詩綜屬之汝質。余檢徐泰明風雅。徐燿晉安風雅。均以爲伯誠作。今從之。

元日早朝

暫逐鷄行覲紫宸。九重仙樂奏芳辰。龍樓高聳星河近。鳳歷初頒歲月新。曙色漸分三殿曉。鐘聲散入萬家春。小臣共沐恩波重。願效華封祝聖人。

粵王臺

屠龍人去幾時歸。空有高臺對夕暉。回首舊時歌舞地。年年春草鷓鴣飛。

黃閏一首

閏字期餘信豐人。永樂戊戌進士。選庶吉士。出爲儀隴知縣。有竹居吟稿。

和侗侗生春日看花之作

多情才子惜春華。樂府新聲對客誇。朱雀橋邊舊遊路。東風開遍小桃花。

劉鉉一首

鉉字宗器。長洲人。永樂庚子舉人。授中書舍人。遷兵部主事。擢翰林侍講。歷侍講學士。國子祭酒。天順初。進少詹。卒。贈禮部侍郎。諡文恭。有假菴集。

水東日記。正統十三年。彭時榜進士。詔選北士爲庶吉士。命儒臣教督之。長洲劉詹事先生宗器。公安王祭酒先生伯宣。亦嘗同事。時山東士二人。尹旻。同仁。孫昱。廷昭也。同仁之言曰。兩先生言行皆可師法。劉先生一日出送行同官之任南京詩一律。命書之。詩成慟哭不能語。忠誠之發。左右莫不感動。其詩曰。一尊傾罷兩蕭蕭。客思離情總不消。十載禁林同侍講。五更青瑣共趨朝。四風鴻雁南歸急。落日雲煙北望遙。此際送君無限意。疏疏楊柳玉河橋。

甯昌言萬玉清秋圖

甯公在昔稱時賢。頭顱半白歸園田。老懷淡泊愛幽雅。高居別築臨同川。數畝園林占清勝。四時景物誇奇妍。賓從日盈北海座。琴尊晚載南湖船。一朝陵谷那知變。廢盡東南舊庭院。扶疏修竹爲誰青。零落芙蓉

蓉不成片。繁華事往今已休。東床老去懷舊遊。陶令宅邊松尚在。習家池上水空流。六十年來駒過隙。俛仰之間已陳迹。畫圖寂寞久無聞。流落人間匪朝夕。客從何處遠持來。佳致依然不殊昔。夢迴昨夜到松陵。鐘斷長橋月初白。

曾鶴齡二首

鶴齡字延年。泰和人。永樂辛丑第一人及第。授修撰。歷侍讀。南侍講學士。有松坡、雁叟二集。合爲松雁集二十八卷。

田按延年五言愷實有味。

澹軒爲清江黎氏作

靡靡流俗弊。紛紛士習乖。被服崇紈綺。雅音變淫哇。譬彼洛水流。蕩滌將無涯。偉哉君子徒。超然異等儕。浮華非我願。澹泊素所懷。招隱入蘿徑。遁迹結茅齋。烹葵味自甘。聽泉韻自諧。屣履步林澤。時復緣雲崖。顧盼生清風。此道誰與偕。

郭教授致仕還泰和

別離古所悲。今我翻成歡。酌酒勸君飲。飲盡言其端。故鄉贛水濱。夙昔尙衣冠。清風激隣壤。英譽聞江關。別來曾幾年。耆舊多凋殘。後進非無賢。惜哉矜式難。君今罷官去。素望高如山。嶷嶷坐幽居。當令淳俗還。

庭菊欣向榮。采掇以怡顏。揆予邈難追。引睇興長嘆。

于謙五首

謙字廷益。錢塘人。永樂辛丑進士。宣德初除御史。超遷兵部右侍郎。巡撫河南。山西。正統中遷左侍郎。以事繫獄。左遷大理寺少卿。復出巡撫河南。山西。尋內召。景陵踐阼。拜兵部尚書。加少保。英宗復辟。棄市。成化初復官。弘治初贈太傅。諡肅愍。萬歷中改諡忠肅。有集十三卷。

四庫總目。謙詩風格適上。興象深遠。雖志存開濟。未嘗於吟詠求工。而品格乃轉出文士上。

西湖志餘。于肅愍高風大節。不在詞華。而其斷簡殘篇。得於煨燼之餘。往往膾炙人口。如肅颯行囊。君莫笑。獨留長筇倚青天。天外冥鴻何縹緲。雪中孤鶴太清癯。風穿疏牖銀燈暗。月轉高城玉漏遲。渭水西風吹鶴髮。嚴灘孤月照羊裘。皆直寫胸臆。不當以風雲月露比擬也。

陶元藻全浙詩話。珊瑚網法書題跋。卷中載于忠肅落花吟云。昨日花開樹梢紅。今日花落照頭空。花開花落尋常事。未必皆因一夜風。人生行樂須少年。老去看花亦可憐。典衣沽酒花前飲。醉掃落花鋪地眠。風吹花落依芳草。翠點胭脂顏色好。韶光有限蝶空飛。歲月無情人自老。眼看春盡爲花愁。可惜朱顏變白頭。莫遣花飛江上去。殘紅易逐水東流。忠肅墨迹。世不多見。此詩爲汪玉水所藏。今不知歸於何所矣。

田按辛丑一科有三個人。薛文清。劉忠愍。于忠肅也。科目得人。于斯爲盛。忠肅絕句。極有風致。

夏日卽事

密密榆槐散綠雲。蕭蕭庭館絕纖塵。林鶯巧語如留客。梁燕低飛不避人。歲月無情催暮景。江湖何處是

通津數莖白髮籠紗帽。深愧淵明漉酒巾。

題山水

溪山疏雨歇。水木散輕陰。樵唱知何處。白雲深更深。

春日登樓

柳條如翠綫。萬縷織春愁。遮斷東風路。無緣入畫樓。

暮春遇雨

暖風吹雨浥輕塵。滿地飛花斷送春。莫上高樓凝望眼。天涯芳草正愁人。

村舍桃花

野水縈紆石逕斜。筆門蓬戶兩三家。短牆不解遮春意。露出緋桃半樹花。

劉球一首

球字求樂。更字廷振。安福人。永樂辛丑進士。授禮部主事。改翰林侍講。以忤王振。矯旨下獄死。景泰初。贈翰林學士。諡忠愍。有兩溪集二十四卷。

少保東萊黃公輓詩

岳降生英傑。賓興得異才。能令吾道泰。還起士風頽。佐縣同棲棘。參戎志面槐。退常親簡策。進不藉梯媒。

敷奏陳忠款。超遷自上裁。從容喉舌寄。親切摺紳陪。受命龍墀下。宣威瘴海隈。餉資蕭相給。民借寇公回。邊鎮金湯固。蠻邦宇宙開。皇言重譯布。方物兩京來。邏騎防秋出。還旌走傳催。入朝雖髮白。報國未心灰。寵任綏南土。崇階逼上臺。堯天期捧日。殷鼎待調梅。豈謂椿齡暮。俄興薤露哀。訃音聞北闕。恩典下東萊。栢木兒孫樹。甘棠父老培。令終名不朽。何日到泉臺。

萬節一首

節字資中。安福人。永樂辛丑進士。除榮昌知縣。入爲御史。擢廣西按察副使。有雪坡集。

書岡山

高齋適幽曠。穆然對前山。誰云陶彭澤。讀書在其間。往昔迹已邁。今人心尙閒。落葉滿衡門。取琴爲我彈。興到時獨往。孤雲相與還。

陳中一首

中字舜用。莆田人。永樂辛丑進士。除戶部主事。遷員外郎。有介庵集。

蘭陵詩話。舜用才情敏贍。嘗遊靈山真靜崖。和盧希韓詩。疊韻二十。叩鉢而就。其詩如山迴瘴嶺。椰煙白。路入蠻鄉荔雨晴。黃鶴不來松樹老。白雲已去洞門閒。雖苦吟者不能及也。

金陵送林弘豫歸莆

觸熱纔聞過建康。離亭何事又嚴裝。家山久積南閩夢。旅雁愁分薊北行。一騎斜陽槐影綠。孤舟細雨藕花香。念予未遂林泉願。歸思隨君繞故鄉。

鄭述一首

述字季述。莆田人。永樂辛丑進士。除刑部主事。出爲惠州通判。擢南雄知府。

書懷寄王士俊

遙數歸期未有期。天涯贏得鬢成絲。宦情久已同雞肋。野服惟應稱鹿皮。松菊久牽元亮興。蓴鱸虛動季鷹思。何當散髮烏山下。遲爾林間擘荔支。

唐寅一首

寅禮陵人。永樂癸卯舉人。授光山訓導。遷岷府教授。

漁村夕照

鷓鴣嘯斷雨初晴。渡口風來水氣腥。溪北村南齊曬網。釣船閒在夕陽汀。

俞山一首

山字積之。秀水人。永樂癸卯舉人。除岷山訓導。正統中。改宜興。遷邕府伴讀。景帝踐阼。進鴻臚寺左丞。尋進左少卿。拜吏部侍郎。進太子少傅。以老乞歸。有梅莊集。

題畫梅

望來絕勝董嬌嬈。凍粉含香玉影搖。十二樓頭明月滿。不勝清淚溼鮫綃。

張楷二首

楷字式之。慈谿人。永樂甲辰進士。除御史。出爲陝西按察僉事。遷副使。擢都察院右僉都御史。有和唐音二十八卷。和李杜詩十二卷。

麗堂詩話。楊文貞公精鑒識。慎許可。序張式之詩。稱曷哉乎楷而已。

野獲編。正統十四年。福建勦賊。都御史張楷作除夕詩云。靜夜深山動鼓聲。生民何苦際斯時。又云。亂離何處覓屠蘇。濁酒三杯也勝無。又云。庭院不須燒爆竹。四山烽火照人紅。爲給事中王詔所劾。罷去。宣德中。楷先爲御史。作詩以獻宣宗。意欲求進罪之。賴學士陳循力救而免。至竟終以詩敗。

田按式之詩。於永宣時。不落下品。惟和唐音。和李杜。不自量力。遂貽捧心之譏。

寄和州劉使君

與君十載成分手。猶記沙頭倒玉瓶。白首不離江上郡。好山多在郭西亭。海雲作雨兼天黑。隴麥將春入望青。料得高吟總清勝。一尊何日爲君聽。

宮中詞

宮中楊柳戲青娥。不見葳蕤舞鳳過。怪底東風不相忌。隔牆吹送落花多。

明詩紀事卷十二

乙籤

薛瑄十六首

瑄字德蘊。河津人。永樂辛丑進士。除御史。正統初。出爲山東提學僉事。進大理左少卿。忤王振下獄。論死。尋免。景泰初。起大理寺丞。進南大理卿。英宗復辟。拜禮部右侍郎。兼翰林學士。入閣預機務。乞歸卒。贈禮部尚書。成化初。謚文清。隆慶中。從祀孔廟。有河汾集。

四庫總目。明代醇儒。薛瑄第一。而其文章雅正。具有典型。絕不以俚詞破格。其詩如翫一齋之類。亦間涉理語。而大致沖澹。吐言天拔。往往有陶韋之風。蓋有德有言。瑄足當之。

藝苑卮言。講學者。動以詞藻爲雕鏤之技。工文者。則以拙語爲談笑之資。若鑿柄不相入。無論也。七言最不易工。吾姑舉諸公數聯。如翼軫衆星朝北極。岷嶓諸嶺導南條。天連巫峽常多雨。江過潯陽始上潮。此薛文清句也。溪聲夢醒偏隨枕。山色樓高不礙牆。狂搔短髮孤鴻外。病臥高樓細雨中。千家小聚村村晚。萬里河流處處同。殘書淡燈燈前疊。小閣江山霧裏詩。化石未成猶有淚。舞鸞雖在不驚塵。此莊孔暘句也。竹林背水題將徧。石笋穿沙坐欲平。出牆老竹青千箇。汎浦春鷗白一雙。時時竹几眠看客。處處桃符寫似人。竹徑旁通沽酒市。桃花亂點釣魚船。此陳公甫句也。何嘗不極其致。

田按文清古體淡遠。律體雄闊。絕句極有風韻。非一時講聲律者所能及。

宿山亭

山深郵舍孤。入門晚色靜。四顧足喬木。蕭蕭北風勁。向夕起重霏。窗戶倏已暝。然松代秉燭。明暗光靡定。草草具杯酌。何暇梨果飮。乃知山林趣。足發遠游興。天明登前山。清風滿蘿逕。

泊舟貽溪宿陽樓山下

草堂傍溪谷。瀟灑無塵埃。隱几流水去。開牖青山來。客情既虛靜。遠目何曠哉。引節得周覽。外慮仍侵懷。村落日已暝。山岷猶未回。念此不能寐。遠抱殊難裁。

蘭陵懷古

早發郟子國。午至蘭陵邑。蘭陵久已荒。禾黍帶荆棘。惟有古寺存。逕入林影密。老僧知我來。出門遠候立。下馬問往事。爲我指遺迹。蒼茫古城東。墓有苟卿石。我欲往尋之。還爲野水隔。憶昔周室卑。蠻荆凌上國。茲邑乃荆疆。人物殊烜赫。寂寞千載餘。浮雲空古色。如何當日閒。重有逃讒責。只今文字存。尙爲人指摘。鞭馬舍之去。極目遠天碧。

七盤道中

曉度七盤山。北行道彌惡。峭壁根虛無。危機架飛閣。飄飄風吹衣。漠漠雲漲壑。下有黑龍江。亂石何磊落。急瀨轉雷轂。奔湍散流沫。洄潭更陰沈。俯視誠可愕。茲路屬再來。卽事情已昨。艱險難具論。惟與存顛末。

送人之蜀

岷江瀉東溟。岷山倚西極。江山古名秀。楊君將此適。秋風送征帆。夜火明水驛。相憶瑤華音。看取東風翼。

龍陽山行遇雨

歲晚山行深。山中水重疊。叢篁夾溪橋。橋斷橫槎接。陰雨竟連朝。雲林黯一色。虛風忽冷然。蕭蕭墜黃葉。撫景復何爲。內顧遠遊客。

舟發城陵磯

急鼓催舟發。依稀見岳陽。遠波浮島嶼。衆水合岷湘。竹瓦居人閣。杉牌賈客房。且看風景異。未覺遠遊傷。

題溪山佳趣圖

仙人騎鶴去已久。猶有畫圖傳世間。石林倒浸碧溪裏。玉峯秀出青雲端。數椽茅屋鎮寥闕。一葉扁舟常往還。借問此中何所樂。萬事不羈山水閒。

儀真

東南水陸會真州。吳楚風雲控上游。潮落瓜州遠渡出。天連揚子大江流。迎鑾鎮古名猶在。解纜橋荒事已休。多少繁華成俯仰。萬家楊柳不勝秋。

歌風臺

故城南畔泗河隈。漢祖歌風舊有臺。樂飲一時酬父老。壯心千古憶雄才。新豐桑拓蕭疏盡。芒碭雲霞散漫開。一自鼎湖龍去後。英魂幾復沛中來。

陽武懷古

黃河南下是通津。縣郭千年秋水濱。兵結團城猶有漢。車驚博浪已無秦。黑陽山晚橫殘照。清水潭乾起暮塵。立馬幾回思往事。宰平誰識社中人。

山水小景

湖水茫茫浪拍天。春風湖上有人煙。小樓半在花林內。簾捲青山看釣船。

絕句

細雨纖纖草吐芽。短牆茅屋是誰家。春寒未有好情思。忽見幾株村杏花。

徐州見黃河

我家正在龍門下。流出黃河幾曲長。忽向徐州城外見。牽情一水正思鄉。

汾上春行

清汾信馬踏春酣。汀草萋萋隴麥醺。正是煖風颯鳥日。水村花隴似江南。

鞏洛道中

嵩高雲氣晚嵯峨。清洛西風咽逝波。水色山光渾似舊。宋家陵墓夕陽多。

吳與弼二首

與弼字子傳。臨川人。天順初。以薦召見。拜左春坊左諭德。辭不就。有康齋集十二卷。

四庫總目。與弼出處之間。物論頗有異同。然其學能兼採朱陸之長。刻苦自立。及門弟子陳獻章。得其靜觀涵養。遂開白沙之宗。胡居仁得其篤志立行。遂啓餘干之學。其功未可盡沒。其詩文亦皆淳實近理。又不得以其急於行道。躁於求名。遂并其書而詆之也。

秋晚

風來夜枕寒。雲宿曉窗雨。旅思共秋生。遙思故山侶。

門外閒坐

習靜生憎損病心。晚涼門外獨橫琴。呼童細剔溪頭樹。爲愛青青雲際岑。

陳獻章十五首

獻章字公甫。新會人。正統丁卯舉人。用薦授翰林檢討。萬歷初。從祀孔廟。追諡文恭。有白沙集。

龍堂詩話。陳白沙詩。極有聲韻。匡山大忠祠曰。天王舟楫浮南海。大將旌旗仆北風。世亂英雄終死國。時來胡虜亦成功。身爲左衽皆劉豫。志復中原有謝公。人衆勝天非一日。西湖雲掩岳王宮。和者皆不及。餘詩亦有風致。但所刻淨稿者。未之擇耳。升菴集。陳白沙詩。五言冲淡。有陶靖節遺意。然質者少。徒見其七言近體。效簡齋康節之流。至於筋斗樣子。打乖箇裏。如禪。

家呵佛罵祖之語。始是傳燈錄。偈子非詩也。若其古詩之美。何可掩哉。然譚解者。篇篇皆附於心學性理。則是癡人談夢矣。頭山詩話。公甫自是禪學。如午睡詩云。道人本自畏炎炎。一榻清風捲書簾。無奈華胥留不得。起憑香几韻楞嚴。又云。天涯放逐。渾閒是。消得金剛一部經。是也。又有詩云。是身如虛空。樂矣牛滅滅。公甫禪學。滿盤托出。何曾如宋人所謂。改頭換面者耶。藝苑卮言。陳公甫如學禪家。偶得一自然語。謂爲遊戲三昧。公甫少不甚攻詩。出之若無意者。徵近自然。弇州山人續稿。公甫詩不入法。文不入體。又皆不入題。而其妙處。有超出於法與體及題之外者。余少學古。殊不相契。晚節始自會心。偶然讀之。或倦而躍然以醒。不飲而陶然以醉。不自知其所以然也。

夢蕉詩話。陳獻章作詩。脫略凡近。其書法得之於心。隨筆點畫。自成一家。

廣東新語。粵人以道爲詩。白白沙始。白沙書。晚年川茅筆。奇氣千萬丈。峭刻槎枒。自成一家。

經鱷洲

夕舫凌大波。北風吹我席。冥冥鱷洲煙。宛對君山碧。來雁知天寒。歸人看月色。超超塵外心。浩矣周八極。

感劉琨與盧諶事

越石信英臣。子諒亦文雅。生遭晉運微。奔走風塵下。晉陽嘯晴月。胡雛夜回馬。并州囚石勒。從事爲別駕。成敗非所論。吾憐鑿坏者。

秋興

盛時不得意。衰老徒傷悲。志士曷爲爾。載籍多見之。翹首面崑崙。白龍有遺池。振衣一千仞。高詠秋風誰。

贈謝德明有事赴廣還

月落五仙城。天空一雁鳴。離愁動江色。歸纜解鐘聲。鷺應船謳起。溪尋酒幔行。經過不買醉。貪嗅早梅馨。

九日寄丁明府

病裏登高意。村邊社樹蒼。有歡開酒禁。無力控詩狂。老鬢簪花醜。秋襟照水涼。如何丁明府。不肯共重陽。

春日江村

草帶籬腰綠。花簪石頂紅。園林開畫景。鶯燕語春風。山靄霏霏合。江流渺渺東。獨來橋畔路。高拄過眉筇。

中秋撥悶用舊韻

疏星圍碧王。秋氣正平分。共持今夕酒。又減去年人。白髮來千丈。青山忽數墳。年光付流水。萬物信乾坤。

偶憶夢中長髯道士用一囊貯羅浮山遺子戲作示范規

九節之筇手所持。兩年衰病負幽期。香爐瀑布還匡阜。碧水丹山自武夷。雞犬幾時同馭氣。雲霄無日不支頤。可憐一覺羅浮夢。不記長髯道士誰。

晨起將出尋梅

朝煙橫野犢鳴陂。索杖山齋睡起時。田父喜留今日酒。梅花不欠去年詩。衝寒索笑來何處。帶病尋香出每遲。彷彿西湖夢中見。水邊籬落忽橫枝。

對酒

竹杪風輕瓦雀哀。葛巾蕭散步階苔。放懷自對溪花笑。好事誰撐酒舫來。白髮驚看今日老。青春剛到隔年回。壯心被酒如飛鶴。又逐紅雲上玉臺。

次韻張侍御叔亨至白沙

生死遭逢未可知。兩生名氏至今疑。自陳多病甘爲退。肯與閒愁博得衰。冷雨侵人呼酒數。瘦藤扶杖看花遲。繡衣未笑茅根禿。來請延陵十字碑。

河橋柳色

廬阜清風長官宅。渭城朝雨王維詩。東西綠徧河橋路。長與離人照酒卮。

黃別駕報世卿將來白沙

君去廬山幾度春。君來不來桃花新。花日喜逢黃別駕。共對廬山說故人。

石門讀貪泉碑

芙蓉花發西華寺。遠訪殘碑到石門。一曲貪泉歌未了。夕陽紅近水西村。

得廷實書

洗竹添花張戶曹。忽拋閒散事煎熬。東門春水無人釣。又長溪頭幾尺高。

莊泉四首

景字孔陽。江浦人。成化丙戌進士。改庶吉士。授檢討。以諫謫桂陽州判。遷南行人司副。進禮部郎中。天啓初。追諡文節。有定山集。

四庫總目。景辭於講學。故其文多闡太極圖之義。其詩亦全作擊壤集之體。然如山隨病起。青逾峻。菊到秋深瘦。亦香。土屋背牆烘野日。午溪隨步領和風。魯樹可驚遊子夢。黃花偏愛老人顏。酒殘漫傾剛月上。釣絲繞鰲覺風和。錄之以備別格。亦論唐詩者存寒山子集之意也。

麓堂詩話。莊定山未第時。已有詩名。苦思精鍊。累日不成一章。如江穩得秋天。露冕春停江上樹。往往爲人傳誦。晚年益豪縱。出入規格。如開闢以來元有此蓬萊之外。更無山之類。陳公甫有曰。百練不如莊定山。有以也。

升菴集。莊定山早有詩名。詩集刻於生前。淺學者相與效其太極圈兒大。先生帽子高。以爲奇絕。又有絕可笑者。如贈我一壺陶靖節。還他兩首邵堯夫。本不是佳語。有滑稽者。改作外官答京宦。苞苴詩云。贈我兩包陳福建。還他一疋好南京。聞者捧腹。然定山晚年詩入細。有可並唐人者。古詩如題竹及養菴兩篇。七言如題玉川畫。五言律如野暝微孤樹。江清著數鷗。與君真自厚。不是兩相留。七言律如遊琅邪寺。偶上蓬萊第一重。道人今夜宿芙蓉。塵埋下界三千丈。月在西巖七十峯。又秋燈小榻留孤艇。疏雨寒城打二更。北海風回帆腹飽。長河霜冷岸痕高。和沈仲律原字韻。心無牛口千秦穆。迹繼龍頭愧郝原。寄劉東山云。塵外有人占紫氣。鏡中疑我尙朱顏。次東橋詩云。電懸雙眼疑秋水。髻擁三花御野風。又豈無湖水甘神澤。更有溪毛當紫芝。又招隱誰甘同寂寞。著書不獨爲窮愁。木昌道中云。行客自知無歲暮。賓鴻不記有家歸。寄鄧五羊云。後時自許甘邱壑。前席將無問鬼神。浮世虛名非得已。出山小草卻悲人。別時笑語風吹斷。會處迷離夢寫真。此數首若隱其姓名以示人。觀者決不謂定山作也。

藝苑厄言。莊孔陽佳處不必言。惡處如村巫降神。里老罵坐。

靈巖山逢大虛僧

雲水秋江與別蹤。三年不見意何窮。誰知小榻青燈裏。又是寒巖白髮中。坐久可忘今夜月。夢回誰喚北堂鐘。相逢更有梅花約。留取他年一笑同。

遊平湖南寺

綠陰撐入榜湖州。水作清深樹作幽。是畫不知還是寺。晚峯斜日更登樓。

次韻升卿弟

七尺自臨潭底影。一瓢不聒樹頭風。安心了了無言說。興味都歸半醉中。

往年寄無錫秦方伯有定山泉亦龍山好卻愛香茶兩寺僧之句因與慈溪孤鶴翁誦之不勝有懷

更作一詩寄

公在龍山我定山。尋僧兩寺一般閒。三年記得詩僧去。不見梅花一句還。

明詩紀事卷十三

乙籤

瞿佑十三首

佑字宗吉。錢塘人。洪武中以薦歷仁和、臨安、宜陽、訓導。遷周府長史。永樂間。謫戍保安。洪熙時赦還。有存齋樂全集、香臺百詠。

詩談：錢塘瞿宗吉，組織工麗，其溫飛卿之流乎。

田汝成西湖遊覽志餘：瞿宗吉風情麗逸，見之詩篇者，往往有歌扇舞裙之興。金公素謂之司空見慣者，誠然也。夏時正修杭州府志，獨不錄其詩詞，而白蘇、楊薛、俱紅、倚翠之篇，悉皆哀採，豈非貴耳而賤目哉。錢塘陳耑子肅者，喜遊俠，爲奇俊語。宗吉甚奇之，嘗春日遊湖，有句云：茜紅女兒歌白紵，墨黑燕子來烏衣。後商於閩中，盤桓妓館，賦詩云：青銅三百一斗酒，荔枝十八羅家娘。適一歲而卒。年二十三云。宗吉作念奴嬌詞，悼之曰：海山何處，嘆人間別有芙蓉城闕。霧閣雲窗深幾許，獨駕青驪超越。香靄雲屏，被翻錦浪，笑捧龍綰。鏡鸞舞罷，半簾燈影明滅。誰信一飲瓊漿，玉山自倒，魂逐鷺鴻沒。瘴雨蠻煙歸夢斷，愁滿空梁殘月。嗚昔相期，殺雞炊黍，中道成長別。故山秋晚，何人共採薇蕨。

歸田詩話：元遺山編唐鼓吹，專取七言律詩。郝天挺爲之註，世皆傳誦。少日效其制，取宋金元三朝名人所作，得一千二百首，升爲十二卷。號鼓吹續音，自爲八句題。其後云：曠選亡來雅道窮，尚餘律體見遺風。半生莫售穿楊技，十載曾加刻楮功。此去

未應無伯樂。後來當復有楊雄。吟窗玩味章編絕。聖世宗唐恐未公。既成求觀者衆。轉相傳借。或有嫉之者。藏匿其半。因是遂散失不存。再欲哀集。無復是心矣。

姜南洗詞新錄。世之習者。或男或女。有學彈琵琶。演說古今小說。以覓衣食。北方最多。京師特盛。南京杭州亦有之。嘗讀瞿存齋過汴梁一律云。歌舞樓臺事可誇。昔年曾此擅豪華。尙餘長嶽排蒼昊。那得神霄隔紫霞。廢苑草荒堪牧馬。長溝柳老不藏鴉。隨頭盲女無愁恨。能撥琵琶說精家。觀此則自昔蓋有之矣。

田按宗吉才華爛漫。詠古之作。最爲警策。若徒賞其安樂美人行。美人畫眉歌。及漫興書生歡諧篇。鮮不爲才人之累矣。

故宮人

金輪夜半北方起。炎精未墜光先死。青衣去作行酒人。泥馬來爲失鄉鬼。江頭宮殿列鸞旣。湖上笙歌樂宴安。魚羹自從五嫂乞。殘酒卻笑儒生酸。格天閣上燒銀燭。申王計就斬王逐。累世內禪諱言兵。中興之功罪難贖。開邊釁動終倒戈。師臣函首去求和。木綿庵下新鬼哭。誤國重逢賈八哥。琉璃作花禁珠翠。上馬裙輕淚粧媚。朔風吹塵笳鼓鳴。天目山崩海潮避。往事興亡誰與論。亭亭白塔鎮愁魂。惟有棲霞嶺頭樹。至今猶說岳王墳。

折花怨

雙雙蝴蝶翻金粉。風裏流鶯棲未穩。銀瓶吸水漾漣漪。下階白揀珊瑚枝。雖然得入華堂裏。未必春光願如此。樹頭花落還結子。瓶內明朝抱香死。東風一樣發陽和。豈知中道有蹉跎。人生輕出棄根本。失枝落

節將奈何。

舊鏡嘆

美人在時對鏡粧。美人去後鏡無光。玉臺零落白鳳凰。錦衣拋擲紅鴛鴦。夜深喑喑聞鏡語。何不持挂墻頭樹。新人新鏡自相宜。舊物荒涼無所依。

古塚行

白楊風送棠梨雨。寒食原頭哭偃鬼。馬醫夏畦有子孫。歲歲猶能來作主。孤墳三尺掩黃沙。多年白骨久無家。妖狐穿穴狡兔伏。樹死枝枯嘯老鴉。斷碑仆地土花碧。當日爭揮諛墓筆。文字摧殘讀不成。牧兒占作攤錢石。

春日卽事

晴日暉暉轉綠蘋。東風應候物華新。歸來燕子已知社。開到海棠方是春。淺碧平添湖面水。輕紅浮動馬蹏塵。杜陵野老雖貧困。援筆猶能賦麗人。

夏晚納涼

竹床藤簟晚涼天。臥看星河小院偏。雲影恰如衣暫薄。月華那得扇長圓。清泉冷浸冰盤果。嘉樹香籠寶篆煙。想是高樓風更爽。玉人閑按十三絃。

清明卽事

風落梨花雪滿庭。今年又是一清明。游絲到地終無意。芳草連天若有情。滿院曉煙聞燕語。半窗晴日曬蠶生。鞦韆一架誰家院。人隔綠楊聽笑聲。

伍胥廟

一過叢祠淚滿襟。英雄自古少知音。江邊敵國方嘗膽。臺上佳人正捧心。入郢共知讎已雪。沼吳誰識恨尤深。素車白馬終何益。不及陶朱像鑄金。

題和靖墓

詩落人間有墓存。誰歌楚些爲招魂。愁連芳草春無迹。吟斷梅花月有痕。華表柱存遼鶴返。少微光賈楚天昏。生芻一束人如玉。想像高風酌酒尊。

阿嬌金屋

咫尺長門有別離。君心甯記主家時。黃金作屋成何事。只辦相如買賦資。

朝雲誦偈

春樹紅顏一擲梭。六如偈裏暗消磨。主翁不惜榮華過。一笑重逢春夢婆。

師師檀板

千金一曲擅歌場。曾把新腔動帝王。老大可憐人事改。縷衣檀板過湖湘。

看潮詞二首

嘉會門邊翠柳垂。海仙橋上赤欄欹。行人指點山前石。曾刻先朝御製詩。
一線初看出海遲。司封祠下立多時。須臾金鼓連天震。忙殺中流踏浪兒。

西湖遊覽志餘。郡人觀潮。自八月十一日爲始。至十八日最盛。蓋因宋時以是日教閱水軍。故傾城往看。至今猶以十八日爲名。非謂江潮特大於是日也。是日郡守以牲醴致祭於潮神。而郡人士女雲集。儼借幕次。羅綺塞途。上下十餘里間。地無寸隙。伺潮上海門。則泅兒數十。執綵旗。樹畫傘。踏浪翻濤。騰躍百變。以誇技能。豪民富客。爭賞財物。翌宗吉看潮詞。須臾金鼓連天震。忙殺中流踏浪兒。紀其事也。

鄧林二首

林初名彝。字士齊。一字觀善。新會人。洪武丙子舉人。授貴縣教諭。永樂中。改南昌教授。擢吏部主事。宣德中。坐法戍保安。遇赦。晚居杭州。有湖山遊詠錄。退菴集。

保安留別傅存齋

兩鬢西風吹斷蓬。杖藜扶病看秋容。菊花渾似詩人瘦。山色不如歸興濃。紫塞一杯桑落酒。彤庭五夜景陽鐘。燕鴻岐路東西去。此後相思意萬重。

題山水畫送人歸羊城

數椽茅屋鎖煙霞。君住蒼巖第幾家。賣藥修琴歸去晚。東風開徧碧桃花。

平顯十八首

顯字仲微。錢塘人。以薦授藤縣知縣。謫戍雲南。晚授校官。有松雨軒集八卷。

田按仲微謫滇。沐黔國爲脫伍籍。延之幕府。晚以校官歸。沐景顯錄其詩入滄海遺珠。選家據此採錄。其全集則未之見也。余所得松雨軒集八卷。乃鮑氏知不足齋本。首有張宗海序。稱其歌詩變怪豪放。良非虛語。

梨園載酒

柳絲鎖綠鸞巢煖。梨雲壓夢更籌短。春入滇南早幾分。鱗屋參差沸絃管。催花小雨風不顛。洗粧欲過城西園。翩翩飛蓋散霞綺。青驄馱酒雙連錢。白霓拖光挂林樾。綺練翻空炫晴雪。恍然似泛山陰船。十里清溪弄明月。冶桃穠杏非不紅。解與兒女爭嬌容。冰蕤昨夜宴香露。玉肌淨洗鉛華空。玉案峯頭夕陽墮。醉帽欹斜千百朵。溶溶月色始歸來。將軍未上城門鎖。及時行樂與衆同。邊候不驚年長豐。莫待平原草如翦。惆悵飄香曲水中。

題萬松樓閣玩月圖

萬松樓閣參天起。壁翠開窗瞰江水。風捲秋聲落怒濤。一片銀山月明裏。宋都一百五十年。頽基故址遺荒煙。飛龍舞鳳氣消歇。寒潮日夕空迴旋。我家住在西湖北。幾度登臨弔陳迹。埽雲高枕斲苔鏡。相約山

僧臥秋色房。山老子天機精。誰家樓頭坐月明。此時興發復不淺。寫詩作畫能雙清。披圖卻在萬里外。白首神馳久吁怪。何當便買下瀟船。歸踏濃陰聽箏籟。

題唐子華畫

芙蓉削翠幾千仞。雲氣蒼鬱藏飛樓。沃州天姥宛相似。恍然欲作凌空遊。羸驂之子邁何處。赤腳長鬚沽酒去。數椽茅屋老斜陽。一壑秋聲在深樹。杖藜昔步仲谿頭。隔林問魚鱖。釣舟肥鱸縮項強一尺。折柳貫之聽棹謳。吳興意匠鵝溪絹。風景依稀夢中見。白頭未往神獨歸。洗硯題詩淚如霰。

三茅歸養圖爲句曲鄒公勉題

三茅之山。神仙所居。虎龍餘氣。磅礴爲區。邃古鴻濛老。鼓鑪造化鑪。六丁運颯輪。鑄劍如昆吾。紫霞蕩射。赤蟬蝟。平地亂蠹青珊瑚。鄒林之下鄒公宅。兩翁顏童顛雪白。人傳千年萼綠華。來嬪洗髓浮邱伯。夜半虛空聞打麥。雙崖響應裂如壁。山中宰相脫塵去。服食至今皆琥珀。青童舞力倦。戲浴碧井丹。罡風天上寒。吹墮點蒼山。琳宮絳闕不可攀。濯足江水波濤間。茅君白鶴飛鸚鵡。借招一隻騎之還。兩翁顧而笑。扶攜陟瑤壇。玉杯九醞零露溥。海藤作杖如琅玕。按歌綠雲璫。俯仰八極寒。青邱弱水東漫漫。若木倒景搖三韓。素娥纖手折庭桂。一枝贈出爛銀盤。

聞仲容弟居橫里

令弟謀生亦有涯。橫溪移屋就魚蝦。藕花官漾十三里。桑陰鄰村百數家。颺字帘風誇魯酒。賣絲船雨避吳娃。白頭兩地遙相憶。夢遶春令原上沙。

和張真居詩韻爲陳景中作

石屋雲蒸菌亦斑。菌巢人已隔玄關。當年興動開陽室。五月詩成浴鵠灣。灰死鼎爐餘藥冷。塵生窗戶落花閒。神交故舊應同否。知在蓬萊第幾山。

寄天佑

圓通長老。人獅子。能外形骸似大顛。手種松秧今幾尺。吟成詩句已三玄。未丹雛鶴巢中伏。不雨神蛟洞底眠。萬里書來慰岑寂。開緘宛若對深禪。

寄題李得全池亭

池亭春色浩無涯。看到高秋次第花。隔竹臼聲烹紫茗。出林丹火轉黃芽。閒驚鶴夢敲楸玉。坐曳魚羹傍釣車。遲我重來分十詠。好占庭樹鵲楂楂。

安眠軒卷

金帝偶洒浮提汁。一落人間又幾年。白鶴瑤笙聲已遠。蒼蛟銀榜勢猶懸。親王翰墨千鈞力。長史文章百世傳。他日載書歸皓首。錦囊光采照青田。

贈王克佐歸杜濱

巾子峯頭月正秋。觀光歸繫柳塘舟。故園松菊存三徑。上國衣冠快一遊。靜著醫方爲祕要。穩敲詩句入冥搜。阿咸況是青雲器。早晚除書報竹樓。

宿仲徽弟家

楊柳風高散碧絲。踏潮初上晚涼時。塵埃迹遠清無暑。山水情深快有詩。蓬首百年同氣客。荆花千里故園枝。新秋小圃多生意。菱芡菱荷已滿池。

贈蔡彥吉

仙客騎鯨下葛灣。白頭塵迹幸相攀。詩留翠壑蒼崖上。名在丹臺紫府間。風柳不波蕁正滑。雪籬將凍菊猶斑。洞真觀裏桃開日。尙欲重來問大還。

寄無垢垠公

爲愛招提無垢氛。暝隨歸鳥到前村。柳陰孤艇入港汊。竹裏一燈明寺門。曾見海枯僧白首。苦禪塵慮客黃昏。所懷所蘊不傾倒。落月使人牽夢魂。

謝孫德齋惠茶

謾誇龍井靈芽好。爭及鶴山天味真。一夜蟄蟲蘇厚土。萬槍香翠茁先春。惠占館下羣公子。詩謝江南老

道人清吸銀瓶聽松雨。不勞躬拾墮巢薪。

題黃鶴山人王叔明畫

我昔見之湖上居。當門萬朵翠芙蓉。承平公子有故態。文敏外孫多異書。開吮彩毫消白日。夢騎黃鶴上清虛。此圖定倚吳山閣。醉點南屏春雨餘。

謝毡衫

新染滇波色未乾。毳茸香絮煖成團。行春不溼杏花雨。踏雪可衝驢背寒。捲霧遠來天萬里。壓風高臥日三竿。客來坐席眞温厚。獨愧才名亞冷官。

題扇寄滇南

林泉有約共投閒。歸伴先生放白鷗。昨夜夢魂清化鶴。戛然鳴到碧雞山。

琵琶士女

斜盤金蓮小鳳頭。紫檀香煖弄纖柔。此心舒卷同蕉葉。祇恐西風不耐秋。

郭文二首

文字仲炳。昆明人。

丹鉛總錄。滇中詩人。永樂間稱平居。陳郭名文。號舟屋。其詩有唐風。三子遠不及也。如竹枝詞云。金馬何曾半步行。碧雞那

解五更鳴。儂家夫婿久離別。恰似兩山空得名。又登碧雞山太華寺一聯云。湖勢欲浮雙塔去。山形如擁五華來。一時閣筆。信佳句也。但全篇未稱耳。其全集予嘗見之。如二詩者。亦僅有也。靜志居詩話。舟屋竹枝詞。顧仲瑛編入玉山雅集。則是詩元季已流播矣。用修稱是永樂閒人。其集既不可得。無由臆決。偶閱柯遜東岡集。附錄滇南別意詩。則平居、陳、郭、四人之作皆存焉。平名宣。武林人。居名廣海昌人。陳名謙。吳人。東岡跋云。郭、居、皆武士中賢者。郭善詩文。征南將軍都督沐繼軒。嶧師之。居精吏事。總府辟掌簿書。數十年得官。陳官鎮撫。有詩名。宣則松雨先生子也。黔府四塾。薦升廣東通判。所云松雨先生者。知藤縣事。顯字仲微。考東岡引疾去滇。在景泰二年七月別意詩。卽是年之作。郭於元時撰竹枝。入明八十四年。未必尙存。用修雖稱見其全集。竊疑竹枝非集中詩。玉山雅集所載。當別是一人也。

滇南詩略。郭舟屋布衣。買舟青草湖。嘯咏自得。都督沐璘聞而造之。避蘆中不見。一日揮去侍從。攜小童幅巾斗酒。移棹物色。相與論詩文訂交。

登太華蘭若

夕陽滿秋山。餘景落滇水。捨舟事幽討。路入泉聲裏。風傳隔寺鐘。葉響登山履。嗟我久紅塵。遊賞從茲始。

常州旅宿

隄邊流水高於城。搖搖孤艇如空行。欲晴未晴小雨外。斷虹落日爭鮮明。峨峨塔勢遠凌漢。隱隱雁行斜墮汀。遊人夜向酒樓宿。月明風冷吳歌清。

唐文鳳三首

文鳳字子儀。歙人。桂芳子。永樂中。以薦授興國知縣。改趙府紀善。有梧岡集。

四庫總目文鳳詩文豐縟深厚向落浮華能不失其家法。

田按紀善詩骨幹老蒼如豫章凌雲非復尋常近賞。

題李營邱枯木圖

營邱枯木天下無。筆端造化何榮枯。想當磅礴欲畫際。天爲逐興神爲驅。鄧林已化防風骨。滄海乍出珊瑚株。長材何異徂徠產。大用不值明堂需。自憐形質赦斤斧。豈嘆薪饜供樵蘇。萬牛回首力未許。獨匠指顧心難圖。空遺假蹇蔽村野。白石鑿鑿泉鳴鳴。枯梢似挂瘦蛇影。亂葉恍苗垂龍鬚。只今廊廟重締構。枿杞梓當貯儲。按圖工師儻所取。意營目盼增嗟吁。

上東門行

上東門在何所。河陽城南瀍水滸。舊時繁華今已空。惟有當年一坏土。聞說漢家全盛秋。門前列第皆王侯。朱輪翠轂日來往。凝笳疊鼓長喧啾。畫棟雕檐接宮觀。十里香塵飛不斷。天上頻頒丹詔下。民間屢免田租半。白髮老人不識兵。閭閻小兒歌太平。鬪雞走馬尋常事。豈有紛紛愁嘆聲。乞歸二傅章初上。曾此公卿盛供帳。道旁觀者如雲屯。雜綵從車凡幾輛。韶華轉眼流星過。倏忽荆棘埋銅駝。逢萌挂冠固已矣。石勒倚嘯將如何。往事傷心難自保。惆悵東門不能道。君不見北邙山頭四五陵。玉匣珠襦委荒草。

白霑港

晚泊豁吟緒。行行步渚沙。雨添新柳耳。水減嫩蒲芽。烏鬼來漁艇。青蚨付酒家。微風吹短褐。倚杖數歸鴉。

陳亢宗二首

亢宗名宗。以字行。永嘉人。兵部員外郎。

賜午門觀燈應制二首

鼇峯千仞鬱嵯峨。萬蠟融春洽太和。明月只隨仙仗轉。紅雲偏近御筵多。旌旄影颺黃金闕。絲竹聲翻白雪歌。萬歲三呼頻祝頌。醉歸數問夜如何。
白玉仙京上帝家。六龍遙駕五雲車。巨鼇此夕移三島。火樹迎春吐萬花。水咽宮壺留夜色。懽騰黎庶樂年華。承恩盡醉歸來晚。一派鈞天隔彩霞。

靜志居詩話。唐人讎集賦詩。每推一人擅場。如昇平公主席上。李端擅場。返王峻鎮幽朔。韓翃擅場。劉相巡江淮。錢起擅場。他未暇悉數。永樂中。命翰林賦白象。則胡庶子廣第一。賦神龜。則王贊善汝玉第一。午門觀燈。則陳員外亢宗第一。

陳景融一首

景融字菊逸。嘉興人。雷子。

次飲酒懷古韻答張子英

日月不我與。光陰年復年。不知千載後。孰識千載前。死生固虛誕。彭殤亦徒然。浩歌且復飲。賦命存乎天。

鮑仁濟一首

仁濟字原弘。黃巖人。洪武中。除樂清訓導。永樂初。遷伊府紀善。有恕庵集。

絕句

涉水采芙蓉。江空曉雲溼。脈脈無一言。獨背西風立。

李進二首

進字孟昭。嘉興人。永樂初。聘爲府學訓導。有西園先生集。

姜南墨畚。錢縛李孟昭詩。醜藉可愛。

題豐樂樓圖

錢唐城郭帝王州。勝概千年尙有樓。南浦雲開朱箔曉。西山雨歇畫欄秋。玉人歌舞成春夢。芳草王孫非舊遊。物換星移遺跡在。蕭條殘墨不勝愁。

春暮有懷李孟璿

煖煙無力度鄰牆。風裊遊絲拂地長。深院獨眠淹病酒。衿羅初試淺薰香。新巢燕子來如約。未謝梨花待洗粧。綠草滿池春欲去。幾隨詩夢到君傍。

錢遜一首

遜字謙伯。紹興山陰人。洪武末，以薦授甯夏提舉水利吏目。永樂初，遷孟津知縣。改戈陽，坐累戍交趾。復官文昌主簿。有謙齋集二十卷。

胡人醉歸曲

貂帽錦靴明繡衣。調鷹射虎捷如飛。紫髯寒作蝟毛磔。碧眼夜看霜月輝。箏箏聲中傳漢曲。琵琶帳底醉明妃。更深宴罷穹廬雪。亂擁旌旄馬上歸。

張振一首

振字孟起。海鹽人。宣德間，官重慶知府。

南屏山房

插天青壁障湖南。結屋何愁地主嫌。綠樹交陰連古刹。白雲移影落虛檐。源頭引水惟劄竹。門裏看山只捲簾。更傍東籬閒採菊。悠然相對卽陶潛。

錢曄二首

曄字允輝。苕熟人。浙江都司經歷。有避菴集。

過江

蓬底茶香午夢醒。大江風急正揚舲。浪花作雨汀煙溼。沙鳥迎人水氣腥。三國舊愁春草碧。六朝遺恨晚

山青不知別後東湖上。誰愛菱歌倚棹聽。一作張東海詩。

贈澄江周歧鳳

琴劍飄零西復東。舊遊清興幾人同。一身作客如張儉。四海何人是孔融。野寺鶯花春對酒。河橋風雨夜推蓬。機心盡付東流水。惟有家山在夢中。

麓堂詩話。周歧鳳多藝能。坐事亡命。扁舟野泊。錢暉投之以詩云云。歧鳳得詩。爲之大慟。江南人至今傳之。

余吉祥一首

吉祥字大昌。黃巖人。永樂中官禮部主事。

題蕭翼賺蘭亭圖

江右風流數王謝。右軍詞翰尤瀟灑。當時已重東山公。況乃遺流百年下。暮春之初天氣新。蘭亭觴詠無雜賓。乘歡紀事興不淺。行草半兼書入神。要將翰墨貽孫子。百本再書那得似。辨才祕此亦癡絕。蕭郎得之何太詭。龍顏日角真天人。把玩一笑生陽春。太平正須堯舜治。底用曲藝勞其神。虎臥龍跳固莫比。區區玉匣猶殉死。真蹟終翻定武碑。墨本至今存有幾。畫師貌得蕭郎事。寂寞瞿曇殊失意。卷圖得失兩茫然。對客且談貞觀治。

袁鑑一首

鑑字伯時。上虞人。官太湖尉。

曉出西郭

路入山陰道。蒼茫雲水連。青山環曉堞。綠草帶晴川。楊柳人家屋。蒹葭水檻船。相過感疇昔。回首意茫然。

吳鎮二首

鎮字稽陽。吳江人。

寄徐汝成先生

落日停橈采白蘋。空將遠意問行人。音塵杳杳三千里。芳草萋萋又一春。每向詩中成晤語。還於夢裏得相親。燕山明月吳江水。照見飄蕭鶴髮新。

送人還新安

津亭芳草碧萋萋。人立東風酒半酣。萬點落花舟一葉。載將春色到江南。

羅紘一首

紘字孟維。紹興山陰人。有蘭坡集十二卷。

田按孟維博學修行。及門之士著名者。張璠輩二十餘人。子周孫碩皆能詩。

題畫

入山採靈藥。山深愁日短。空林獨自行。木客時爲伴。朮肥晨露滋。芝潤春泥煖。荷鋤暮歸遲。前溪白雲滿。

明詩紀事卷十四

乙籤

劉績十一首

績字孟熙。紹興山陰人。渙子。有□□集。

國雅孟熙會稽名家。才思雄健。長歌頗放誕。如馬嘶秋草闊。鷗落暮雲平。野雪消不盡。春江流正深。屬與豪華。非鄙促語。

田按會稽三劉。稱詩孟熙最爲傑出。隱居不仕。人稱四江先生。

去婦詞

去婦兩眼淚。爲君滴平生。一滴致妾意。再滴感君情。三滴眼欲枯。血點淋香纓。不滴堂前花。死株有時榮。不滴階畔草。苦心展芳萌。請滴橋下水。長煎嗚咽聲。

大隄曲

春風起大隄。歷亂樓前柳。樓頭多女兒。解勸襄陽酒。襄陽估客足黃金。百千爭買女兒心。茱萸帳薄燈光透。翡翠衾重蘭氣深。蘭氣未消燈未滅。合歡交綰丁香結。良霄一刻惜如金。黃金易擲情難歇。前船南商去。後船北商來。不知妝鏡匣。今夕爲誰開。

題宋院人畫着苔梅

濃露洗花骨。苑空勞勞春。綠鬪疊仙帔。粉姿疑笑人。畫屏冒幽夢。夜苦香不歇。楚竹裂鳳膺。恨魄如懸玦。

王山農畫梅歌

玄冥凍律凝陰谷。山魅幽幽弔僵木。誰卷蛟機一尺煙。鋸刀碎刻藍田玉。博羅仙人調小鳳。瓦冷霜華不成夢。火薰金鴨蘭氣溫。鑲窗斜月淡幽痕。

帆山夕照送顧大往遼海

落景石帆秋。餘紅挂樹頭。斜憎樵笛送。遲賴估檣留。魄落光猶閃。帆遙綵漸收。依依映旌旆。遠過城西樓。

題二姝撫嬰圖

休織流黃罷養蠶。桃根桃葉並清酣。龍綃卻暑肌香膩。蟬翼凌風鬢影鬋。常恨畫中題荳蔻。誰教窗下種宜男。螽斯合備房中樂。見說如今化已覃。

古築城詞

力限秦與胡。築城爲疆界。那知楚漢兵。不在長城外。

書扇

家遠綠川長。回舟菡萏香。緩聲歌白苧。明月墮橫塘。

憶原上人

一兩棕鞋八尺藤。廣陵行徧又金陵。不知竹雨松風夜。吟對秋山那寺燈。

聽胡琴

胡絃輕軋語星星。破入甘州便淚零。一種尊前沈醉客。解聽爭似不曾聽。

李迪畫蘆雁

遠別胡天趁稻梁。秋風吹斷不成行。夜深獨宿江南渚。夢怯黃蘆葉上霜。

偶桓六首

桓字武孟。太倉衛人。洪武中。以薦爲崇安從事。授桂林河泊大使。永樂中。終荆門州吏目。有江雨軒稿。醉吟錄。鳳臺吟嘯集。

姑蘇志。武孟少嘗接識楊維禎。倪瓚。瓚謂其詩有超乘挽繼之力。日升川至之漸。

梅花草堂集。偶武孟落拓嗜酒。喜吟咏。年八十二卒。嘗自作挽詩云。堪憐八十白頭翁。自笑生前萬事慵。北闕薦賢雖有剡。南村作守竟無功。就詩不愧詩才拙。嗜酒惟愁酒盞空。留得五湖風月在。浪遊誰復繼遺踪。著江雨集。遊秣陵。雅慕醉吟先生之爲人。又作醉吟錄。行於世。

錢大昕十駕齋養新錄。江雨軒稿八卷。自題表陽偶桓武孟。按太倉志。偶桓字武孟。少嘗接識楊維禎。倪瓚。瓚亦稱之。洪武二十四年。應秀才舉。爲崇安從事。授廣西桂林河泊大使。終荆門州吏目。致仕歸。遇淮南故人蔣文用。卽隨入京。僑居建安坊下。

放情觴詠久之乃還。卒年八十二。家桃源涇。築江雨軒。每日題賭牛。又號海翁。志所云桃源涇者。卽西涇也。明初西涇尙屬岷山縣。故黃容敘其集。稱爲岷山偶武孟也。其辛卯立春日試筆詩云。野老行年七十三。是武孟生於元順帝至元五年己卯。其卒當在明永樂十八年庚子矣。武孟有自題桃花書屋詩卷詩云。野翁家住桃源曲。手種桃花結書屋。太平老作葛天民。自真無榮亦無辱。又有元夕寫興寄西上諸友詩。予所藏乃葉文莊葵竹堂鈔本。前有巡撫宣府關防印。

田按偶武孟選元人及明初詩。題曰乾坤清氣。錢塘金弘選元人詩。亦曰乾坤清氣。貝廷璠爲作序。見清江集。武孟江雨軒稿。世不多見。予檢陸文量菽園雜記云。予觀政工部時。葉文莊公爲禮部侍郎。嘗欲取吾岷元末國初以來。諸公文集。擇其可傳者。或詩或文。不出十篇。名曰岷山片玉。以傳。命予採集之。若郭翼義仲林外野言。殷奎孝章強齋集。袁華子英耕學稿。易恆久成。泗園集。呂誠敬夫來鶴軒集。朱德潤澤民存復齋稿。林鍾仲鋪松谷集。沈丙南叔白雲集。馬廉公振澗南漁唱。屈昉季明寓庵集。王資之深瑞菊堂集。鄭文康時又平橋稿。偶桓武孟江雨軒集之類。不久予除南京吏部主事。恐致遺失。俱以送還。鄉先輩之美。竟泯泯矣。錢竹汀江雨軒集跋云。得自葵竹堂鈔本。當卽文量所見者也。明史藝文志。四庫提要。均未著錄。安得好事者。爲物色而甄錄之。

題李道衡畫

昔從金焦赴江夏。隨路看山如看畫。蘭船久泊琵琶亭。徘徊獨向匡廬下。眼空九疊芙蓉屏。紫煙靄靄香爐青。秀色無端豈能攬。胸次直欲吞崢嶸。卻笑不如謝康樂。陟峻探奇恣盤薄。回首十年如夢醒。豈得無情戀邱壑。如今見畫如見山。豁然洗我塵土顏。丹崖翠巘隱樓觀。神遊窈窕難躋攀。盤盤磴道凌雲起。有

客攜筇領童子。拄杖過橋無垢氛。行處流霞黏步履。瀑流一派懸絕壁。下噴風雷幾千尺。樵兒赴薪爭渡溪。白石清泉相蕩激。怪松倚澗騰虬龍。支撐日月摩蒼穹。茯苓琥珀出其下。采掇恐有商山翁。老夫本有山水癖。一落人寰頭已白。欲卜幽棲恨未能。對此長歌空嘆息。

歲暮

忽忽歲云暮。朔風吹客衣。卻因鄉井近。轉覺信音稀。山響蹻蹻嘯。江空鶴鶴飛。百年渾潦倒。底事未能歸。

清真觀

殿閣峨峨轉夕暉。放生池上客來稀。應知羽士登真去。獨見山童汲澗歸。雲冷松巢空鶴唳。雨荒丹竈長苔衣。野人素有煙霞癖。欲向玄關共息機。

題唐人馬圖

內廐多龍馬。奚官晚更調。獨矜紅叱撥。老氣壓天驕。

王孟端墨竹

龍香細細霜藤滑。寫出瀟湘碧玉枝。傾耳風簾明月夜。飛瓊何處弄參差。

懷友次陳石泉韻

楓林葉赤露華濃。來往晴沙一逕通。遙望美人秋水隔。蘋花吹老楚江風。

郭廬二首

廬字敬夫。福州人。有鏡湖清唱。

石倉歷代詩選徐興公云。國初吾郡詩人輩出。十子而外。復有二十餘家。郭敬夫湮沒二百餘年。無有知者。予近得鈔本詩百十篇。敬夫青鋪嶺絕句云。家林想在空濛外。一帶螺江隱翠微。又有門前湖白與山青。分攜空過白湖亭之句。其所居當在白湖螺浦之間。與鳴秋山人相鄰也。

暉上人獨坐亭

石逕通幽境。岩亭古木深。禪扉生晚翠。羅幌挂秋陰。止水空中興。孤雲物外心。澹然無一事。殘月下東林。
士琛家宴歸賦以贈之

我愛南湖客。清風兩鬢絲。久聞陶令趣。長與遠公期。醉倚花前石。行吟竹外池。葛巾仍不著。日日挂東籬。
施敬四首

敬字孟莊。錢唐人。謫居滇。

田按孟莊謫滇南。征途中寄錢唐親友云。萬里移家入瘴煙。故鄉音耗若爲傳。衡陽自古無來雁。況去衡陽路八千。沐景頤錄其詩入滄海遺珠。

寄伯瞻

別後悠悠渺所思。使來渾不寄新詩。雲林一去無多地。風雨相違又許時。茱萸綠深江路草。枇杷黃盡客

窗枝多情惟有西齋月。曾照清宵醉酒卮。

沙津送客登望江亭

沙市津頭送歸客。西風江樹數蟬鳴。夕陽靄靄衆山暝。秋水迢迢雙鷺明。蔓草已蕪王粲宅。亂雲長繞呂蒙營。登臨不是攜尊酒。若箇能平慷慨情。

秋塘曲

蓮謝秋塘晚。風來野水香。采蓮休采葉。留蓋睡鴛鴦。

漁人

浪迹煙波薄名利。釣舟長傍酒家橫。白魚青菜桃花飯。不識憂愁過一生。

鄭嘉一首

嘉字原亨。紹興山陰人。有柳莊集。

送辰長老住橫山寺

紫檀煙靄鶴迴翔。清磬泠泠出上方。岩畔異花薰講席。澗邊修竹護禪房。東林結社蓮新種。南岳分春茗乍香。三伏炎蒸應不到。綠蘿風洒石潭涼。

毛鉉一首

鉉字鼎臣。紹興山陰人。以薦官國子學錄。有北郭集。

田按鼎臣以詩名。與唐之淳、劉續、蔡庸、稱唐、劉、毛、蔡、詩品略相似。

剡溪霽雪送原上人

積雪蔽招提。虛室夜生白。開門不見人。鳥棲山正寂。疏星帶長汀。澹月照幽壁。此境足安禪。何爲迷所適。

蔡庸一首

庸字惟中。紹興山陰人。有庸菴集。

輓憲上人

舊禪棲古越。旅櫬隔新亭。社散蓮猶白。吟餘草自青。鳥迷行道路。蛙產灌畦瓶。聽絕晨參磬。寥寥入杳冥。

李勣一首

勣字文勉。紹興山陰人。

田按文勉性不羈。好與文士遊。鄉先生劉續、王誼、鄭嘉、謂曰。爾欲與我輩遊。須讀書乃可。感悟力學成名。時人稱劉、王、李。

爲李公子悼妾

珠沈碧海玉沈淵。空向芳春憶舊年。鳳管已停花底奏。鸞牋猶記月中聯。珊瑚淚暗新遺枕。玳瑁塵生舊舞筵。一自楚天雲雨散。酒醒無奈夢嬋娟。

張璩一首

璩字蘊之。岷人。有駭齋集二十卷。

姜南洗硯新錄。宋徽宗善圖繪。多畫翎毛。今人家往往收之。間有近代名人題詠其上。或譏之。或惜之。如忠勤伯汪公廣洋雙鷺圖云。蘆葉青青水滿塘。文鷺晴臥落花香。不因羌管驚飛起。三十六宮春夢長。釋子來復喜鵲圖云。黃沙風急疾。蔡秋回首中原淚暗流。誤聽當時靈鷲語。誰知舊喜是新愁。釋宗泐小鵲圖詩云。落日黃塵五國城。中原回首幾含情。已無過雁傳家信。獨有松枝喜鵲鳴。又雪江獨棹云。長嶽秋深百卉腓。胡塵吹滿袞龍衣。淒涼五國城邊路。得似寒江獨棹歸。周仲方雙燕圖云。江南簾幕重重雨。長嶽河山處處花。兩地舊巢傾覆盡。西風萬里入誰家。張璩畫閣云。御墨淋漓寫楚關。披圖卻憶政宣間。分明一種湘纍怨。萬里青城似武關。

紫虛觀

紫峯壇上鶴成羣。碧洞靈芝長石根。雲引晝陰歸竹隴。水流春色出花源。藥爐伏火仙留訣。茶竈生煙客到門。欲就上清傳寶籙。未知何日謝塵喧。

朱純一首

純字克粹。紹興山陰人。有淘鉛、驢背、自怡等集。

姜南醉經堂舖糟編山陰朱克粹詠游絲一律云。裝陌遙看一縷微。籠煙曳日轉依依。不緣蛛網縈鉤合。肯逐鸞梭上錦機。香逐落花低趁蝶。燉隨柔絮欲沾衣。無由繫得東君駕。空向春風上下飛。咏物之作。不減前人韻格也。

田按克粹與羅頤、張嵩輩結鱸湖詩社。

天寶宮詞

長安胡騎正啾啾。塵暗宮花粉黛愁。鳳笙不知何處去。野鳥嘯月上延秋。

鄧定三首

定字子靜。閩人有畊隱集。

小草齋詩話。國初鄧布衣定。題昭君出獵圖云。傳呼莫射南飛雁。欲寄平安到漢家。一時傳詠以爲絕唱。然元陸子方昭君詞云。勸君莫射南飛雁。欲寄思鄉萬里書。在哉詩不蹈襲之爲難也。

善溪徐無用山房

幽居多野況。麋鹿自爲羣。水向雙溪出。山從絕頂分。松窗朝聽雨。石碓夜舂雲。我亦逃名者。相期避世氛。

南澗寺

諸天樓閣倚層空。下視扶桑積水東。山色潤含烏石雨。鐘聲遙度海門風。萬家井竈炊煙白。幾處江城返照紅。聞道講師曾說法。曇花飛繞梵王宮。

江上送客

別酒臨行醉未消。綠楊何處繫蘭橈。知君最是相思處。月落江頭夜半潮。

高壁一首

壁字貴明。紹興山陰人。有遜菴集。

雨窗卽事

春色雨中消。飛花亂如霰。坐久不成吟。開簾放雙燕。

高廩一首

廩字居豐。紹興山陰人。有會稽懷古詩。

遊靈峯寺

珠林迴象界。寶閣俯重城。佛境由來淨。塵心到此清。山光連野碧。湖影盪空明。不見談玄客。閒雲自送迎。

韓永一首

永字景脩。嘉興人。

送陳處器

水自潺湲月自明。黃昏溪上幾回行。隔林何處吹長笛。并作思君一段情。

陳顯二首

顯字漢昭。嘉興人。景融子。有竹鄰集。

姜南扣舷凭軾錄。始與陳漢昭能詩。嘗題枇杷山鳥圖云。虛橋垂黃雨滿枝。山禽飽啄已多時。那知歲晏空林裏。竹實蕭疏風亦饑。此詩怨刺之意。見於不言之表。

題竹

湘江玉一枝。風節清如許。掃榻臥秋陰。鷓鴣嘯暮雨。

秋螢

寒光一點映松蘿。零落西風恨更多。莫向波間照秋影。滿溪涼雨顛殘荷。

張慎一首

慎字汝誠。鄞人有東皋集。

田按汝誠東皋集中。如青燈夜雨。頭新白。黃菊秋風。眼暫明。佳句遠尋流水外。短筇閒挂白鷗邊。夕陽茅屋誰沽酒。明月蘆花好放船。閉門花雨鷺磯過。捲幔蕭風燕入忙。殊有別趣。

清明感懷

自入春來不肯晴。幾番風雨過清明。病餘蓬巷又花落。人靜茆堂唯燕聲。川路久無舟可濟。石田方嘆犢難耕。松楸望望何時埽。滿眼新煙空淚橫。

許穆二首

穆字士深。松江華亭人。

重遊姑蘇登黃氏舊樓

吳門煙柳綠參差。倚遍闌干有所思。雨暗園林花落早。春寒簾幙燕歸遲。蛾眉尙想臺前月。鶴髮空添鏡裏絲。一曲悲歌弔陳迹。傷心不似舊遊時。

過謝氏舊宅

舊日繁華散曉煙。尙餘甲地澱湖邊。春風舞榭空羅綺。夜月樓臺罷管絃。鶴唳華亭雲杳杳。鶯囀金谷草芊芊。誰憐門下傷心客。一度登臨一惘然。

岑琬一首

琬字公琬。餘姚人。有雪崖集。

錢塘偶成

畫舫行春醉欲迷。湖光好在古城西。不知傾國人何在。楊柳東風鳥自啼。

馬景約一首

景約字自牧。閩人。

明妃曲

家國知何在。風沙滿目愁。惟餘天上月。還似漢宮秋。

張肯一首

肯字繼孟。吳人。有夢菴詩稿。

題海棠雙鳥

雙雙何事爲春忙。花底飛來羽翼香。今夜且留枝上宿。莫燒銀燭照紅粧。

張羽一首

羽字孝翊。黃巖人。有掬清集。

田按孝翊嘗從吳圭一受詩法。所居室名月窟。宋景濂爲之記。永樂中尙存。徵修大典。賜官不受。

靜軒

平生心似水。投老竟辭官。地僻無人到。雲深只自看。白知新髮短。青戀舊氈寒。且喜無迎送。焚香坐閉關。

明詩紀事卷十五

乙籤

劉薦三首

薦字士端。青田人。誠意伯基孫。參政璉子。洪武中襲封。貶秩戍甘肅。尋赦還。永樂中卒於家。有盤谷集十卷。

玉堂漫筆。太祖時南京官僚。想用傘蓋。襲封誠意伯劉薦。有華蓋殿侍宴。退朝詩云。團團褐羅傘。被服金文章。可見。

雙澗秋潭

幽居罕人事。欲與麋鹿休。行行雙澗阿。愛此川上流。蕩漾碧潭影。纖鱗自沈浮。兩虹出幽壑。一鏡凝清秋。忘形洲渚間。洗耳攀巢由。

松磯釣石

結屋清澗阿。意與林泉適。行吟松下磯。垂綸坐磐石。得鮮豈足娛。懷曠理自得。樹影拂天光。山氣洽水色。自非釣璜士。曷與麋鷄隔。曷哉懷古人。豈敢忘疇昔。

會甯道中別姜惟清主事

八千道路邊疆去。回首甘涼憶舊遊。沙塞孤城胡騎接。玉關落日酒泉流。哈欄果實供盤饌。蘇魯麻蕪解客愁。此日故人重會別。秣陵歸思不勝秋。

郭武一首

武字吳隆。營國公英孫。贈定襄伯鈺子。官尙寶司丞。

夜泊湘陵縣逢袁公禮戍貴州

青山如龍渡江去。江上波濤溼煙樹。三湘七澤枉帆過。水綠蘋香是何處。清波渺渺愁予心。寒猿故故嘯楓林。誰將橫笛叫清夜。一曲武溪深復深。憐君遠戍烏蠻客。把酒燈前話離別。相逢何必舊相知。惆悵回船江月白。

郭登五首

登字元登。尙寶司丞武弟。洪熙時授勳衛。正統中擢錦衣衛指揮僉事。超拜都督僉事。景帝監國。進都督同知。再進右都督。景泰初封定襄伯。英宗復辟。掌南京中府事。以事論斬。宥死降都督僉事。憲宗卽位。復伯爵。成化中卒。諡忠武。贈侯。有聯珠集。

麓堂詩話。國朝武將能詩者。莫過定襄伯郭元登。謫甘州時。有送蒙翁歸朝詩曰。青海四年羈旅客。白頭雙淚倚門親。莫道得

歸心便了。天涯多少未歸人。又曰。甘州城南河水流。甘州城北胡雲愁。玉關人老貂裘敝。苦憶平生馬少游。予集蒙翁類博稿。見舊草紙背。翁親書王母宮四律。愛而錄之。頗疑無改竄字。與他草不類。久之見所謂聯珠集者。乃知爲此考詩。幸不誤錄也。王奉常集。定襄起將校。得之於邊。雲寒草間。已復謫戍。老困思歸而後。詩益工。國雅定襄節。概頗奇。不顧文辭。

靜志居詩話。定襄山王楸樹諸篇。力已排棄。至詠梟之作。直兼張王韓杜之長。豈惟武臣。一時臺閣諸公。執出其右。田按忠武詩。才力雄博。大篇最爲見長。竹垞推其詠梟諸作。可謂具眼。沈歸愚以爲非詩正聲。非通論也。聯珠集今鮮傳本。余就所見錄之。殊憾不足盡所長耳。

過安南衛

絕頂見孤城。征驂向曉行。鳥嘯多異響。花發不知名。石澗閒雲碓。山田趁火耕。愁聞耆老說。三月未曾晴。

普安道中

竹暗藤荒路欲迷。一重山度一重溪。枯槎假蹇如人立。蠻語侏儻似鳥嘯。花底雨晴飛蛺蝶。水邊冬煖見虹霓。祇應風味堪題處。三寸黃柑壓樹低。

梅花鋪

綠樹冬深不怕霜。怪來風土說南方。人經蠻寨愁蛇蠍。客聚盤江趁虎場。翠黛插雲山似戟。潢流蒸氣水如湯。王師到處密恩澤。甘雨隨車洗瘴鄉。

自緬甸迴感懷寄沐征南

毒霧昏昏水拍天。孤帆風雨瘴江邊。鯨波去日渾如夢。虎穴歸來始自憐。終夜眼穿看北斗。幾人身已試蛟涎。滇陽萬里渾驚訝。又隔滇陽路五千。

暮春登大同西北城樓同仰寺丞瞻潘御史洪賦

滿地花飛春已闌。溪風山雨更生寒。浮雲蔽日終難散。腐柱擎天恐未安。西北兵戈猶擾攘。東南民庶半凋殘。先朝遺老慚無補。獨對西風把淚彈。

沐昂一首

昂字景顥。

四庫總目昂字景高不字景顥疑其初字景高至洪熙元年後避仁宗之諱改高爲顥史未及詳

黔甯昭靖王英子。初爲廂軍左衛指

揮僉事。永樂中擢都指揮同知。領雲南都司。累遷至右都督。正統初代兄子斌鎮守雲南。卒贈定邊伯。諡武襄。有素軒集。

四庫總目滄海遺珠四卷沐昂所編共詩三百餘首皆明初流寓遷謫於雲南者以其爲劉仔肩王偁諸家詩選所不及故名曰遺珠此編去取精審所錄多斐然可觀自古以來武人能詩者代代有之以武人司選錄而其書不愧善本者惟此一集而已。

和逸先生聞砧韻

秋高萬木脫林鵠。與子庭前開綠醕。忽聞別院動砧聲。西風吹斷蕭蕭雨。隔岸人家紅樹稀。辭巢燕子故飛飛。酒酣自起爲君舞。正愛涼飈吹我衣。

沐璘二首

璘字廷章。定邊伯昂孫。景泰初。以都督同知鎮守雲南。有繼軒集。

菽林伐山。雲南都督繼軒沐璘。字學皇象。畫學米元章。詩學大朝盛唐。以僻遠人罕知之。

升菴集。邱文莊公曰。自漢南越入中國。始有南海。然四海竟不知所在。今望祀四海於蒲州。滇之極西。百夷之外。間有大海通西南島夷。卽四海也。宜於雲南城望祀之。慎案王莽立四海郡於西甯之地。亦妄也。今滇西百夷之外。有大海在。今阿瓦地。沐璘爲都督。曾至其地。有詩云。蛇首樓船十丈長。船頭鏡鼓樂笙簧。篙師百櫂齊搖去。阿瓦城邊水似湯。卽四海無疑矣。田按。沐氏自黔甯以來。世有傳詩。繼軒詩極有風韻。

臨安荔枝

建水夫何如。厥土早而熱。蠻花開佛桑。候禽罷鷓鴣。莽雲覆溟濛。梅雨滋霧翳。接地茂緇枝。遮空舒黛葉。翠葆霞焜煌。錦幄風掀揭。香麝忌經過。飛颺防盜竊。勁錐赤膚脫。肥脊瓊穰凸。明璫怪可飡。冰丸訝許齧。鳳爪天下奇。龍牙衆中傑。飽食慚素餐。長吟望林樾。

遊無爲寺

白石磷磷積翠巒。林花深處有茅菴。煮茶迎客煙生竈。劔筍出山雲滿籃。香爇龍涎清沴氣。壁懸塵尾罷

清談野禽時見人來往。驚觸崖花下石潭。

王清一首

清字一宿。合肥人。世襲濟甯衛指揮。遷廣東都指揮。死於寇難。有建囊集。

雙槐歲鈔。王清濟甯衛指揮。慷慨多勇略。常提兵入衛。宣德間。率所部出喜峯口。及至鴛鴦海。覘虜。累立奇功。曾有句云。落日龍荒。覘虜還。劍光直射斗牛寒。少年氣節應無敵。肯負平生一寸丹。正統丁巳。升廣東都指揮。以親老不遂迎養。陳情乞分俸於原衛。詔許之。蠻夷叛。據大藤峽。清往討有功。己巳。協同總兵。駐軍高州。廣賊黃蕭養。劫鄉民叛。衆十餘萬。圍攻廣州。清帥舟師赴援。至沙角尾。水淺舟膠。失利被執。賊素知清威望。不敢害。清投水不死。因寄衣還廣城中。大書詩云。半夜愁吟海珠寺。幾回夢墮鬼門關。數日賊擁清至城下。使諭衆開門降。清罵賊不絕。遂遇害。

遊青山

天際芙蓉紫翠重。巖前古廟倚長松。陰廊碑斷蒼苔合。空洞雲歸碧筱封。爭樹有時喧鳥雀。殷雷無地走蛟龍。題詩卻憶登臨日。曾醉煙霞最上峯。

明詩紀事卷十六

乙籤

馬愉一首

愉字性和臨朐人。宣德丁未第八人及第。授修撰。正統中再遷至侍讀學士。入內閣。參預機務。進禮部侍郎。卒。贈尙書。有澹軒集七卷。

翰林記。大學士楊榮家於長安東門之南。宣德三年三月。學士楊溥掌院事。率僚友迎首甲馬愉等三人。宴其中。楊士奇因名其堂曰聚奎。爲文以識之。衆皆賦詩。自是遂爲例。不知何時。此禮遂廢。然館閣相與宴集。猶謂之聚奎宴。蓋自此始也。

題李鎮撫公餘清趣卷

沙場走馬獵初還。細柳幘門盡日閒。倚閣攤書開翠幌。凭欄敲句對青山。數聲鶴唳蒼松下。一曲瑤琴綺席間。正是太平烽火熄。雕弓長弛不須彎。

蕭鑑三首

鑑字孟勤。泰和人。副使。獅子見甲。宣德丁未進士。選庶吉士。授編修。正統中進侍讀。國子祭酒。景

秦初兼翰林學士。入直文淵閣。尋進戶部侍郎。再進尙書。英宗復辟。削籍歸。成化中復官。有尙約居士集。

田按孟勤宣德二年丁未進士。至八年合丁未庚戌癸丑三科。共選二十八人爲庶吉士。孟勤居首。史稱其學問該博。文章爾雅。余檢尙約集。五言冲淡。有韋柳遺意。

題山水圖二首

身已與世遠。超然景方寂。嘉樹敷層陰。蒼苔間行迹。亭亭山上雲。齒齒溪中石。豈無同心人。相賞共晨夕。青山何峒峒。下有嘉樹林。高亭晝閒敞。窗戶含層陰。好鳥鳴檐間。始知春意深。迴無物外累。默處抱冲襟。

南皋慢興

朝衣脫卻換荷裳。自是郊居引興長。松徑曉煙蘿薜暗。藥欄春雨杜蘅香。傳經有客隨藜杖。載酒何人問草堂。更擬垂綸理清棹。武陵溪水卽滄浪。

吳惠四首

惠字孟仁。吳人。宣德丁未進士。除行人。歷官桂林知府。廣西參政。

田按孟仁有投洋詩云。使臣雖渺軀。威靈挾玉冊。煌煌大明詔。海君敢失職。告爾應有知。安瀾送飛驛。王整震澤編云。孟仁使占城時。海風暴作。操筆爲文。投洋水中。風濤頓息。當卽指此詩也。孟仁入義甯峒一篇。具體昌黎。毋謂亦宜。間無作家也。

入義甯峒

天設此邦險。乃爲蠻獠窟。亂峯青入天。萬石雲中突。峭壁蟲崇墉。古洞嵌砮砒。關門守一夫。仰面攻豈得。從來詐力徒。恃此每狂悖。撫馭失其宜。禍作勞翦伐。嗟彼蠻獠人。生亦具膚髮。天性匪盡乖。順逆理可奪。單車抵其壘。開誠破迷惑。涕泣盡投刃。盟心牲載割。兵氣潛以消。約束鮮睢刺。頓覺嶮巖處。嵐光堪拄笏。迺知邊釁開。十五激之發。柔遠有經綸。禁網尙疏闊。

喜雨

山城五月土欲焦。浮雲瀾漫橫四郊。昏黑須臾失天地。滂沱高下平塘塢。及時萬畝播嘉穀。鼓腹百姓歡。衡茅張燈置酒宴嘉客。醉翁亭記當筵飽。

水災後過淮作

聞道淮安富。開倉復賑貧。江南半天地。小惠莫言春。

春日漫興

十日不出花盡開。城南城北錦成堆。卽教閉戶從花盡。莫遣看花不醉歸。

徐琪一首

琪字聯璧。錢塘人。宣德丁未進士。除太僕丞。出爲寶慶知府。有西湖散人稿。

書眉

野性從來不受羈。隨聲百轉任高低。也曾鎖向雕籠聽。不及林間恣意啼。

林文四首

文字恆簡。莆田人。宣德庚戌。第三人及第。授編修。正統初。進修撰。景泰中。進春坊諭德。兼侍講。再進庶子。英宗復辟。改尙寶司卿。拜學士。成化初。進太常寺少卿。仍兼學士。卒。贈禮部侍郎。諡襄敏。有澹軒稿。

田按澹軒詩格清遠。有儻然出塵之致。

題山水圖三首

淑氣轉林壑。青陽變故陰。新花發枯木。弱植鳴幽禽。駕言訪知己。攜我牀上琴。欲調陽春曲。庶以貽知音。山屋隱雲深。危峯倚天立。澗轉暗泉通。林疏斜影入。披襟納松風。臨流坐苔石。浩歌澹忘歸。於焉以終夕。蘋末起西風。秋聲振林壑。山雲卷復舒。林葉埽還落。郊墟轉新涼。展卷窗下讀。榮辱了不聞。終身成獨樂。

鷓鴣圖

芳竹叢深路不分。聲聲相應隔湘雲。別來忽向圖中見。彷彿江南曲裏聞。

李棠四首

棠字宗楷。縉雲人。宣德庚戌進士。授刑部主事。歷員外郎中。超擢本部侍郎。巡撫廣西。有蒙齋集。

田按宗楷在刑部。以善聽斷名於時。超拜侍郎。巡撫廣西。有惠政。以思明士知府黃瑠。爲庶兄玆所殺。宗楷廉得其實。獄已具。玆使人走京師。請景帝廢太子立己子。帝大喜。立擢玆都督同知。遂不得竟其獄。謝病歸。詩有陶韋遺韻。

燕清八詠有序 錄四

余至廣西之明年。視公署後一小軒。頽然將壓。欲葺之。以便燕息之所。時寇起歲祲。輟環四方。無虛日。故未暇及。越壬申秋。寇平。且得歲。民用乂康。余樂甚。因命工葺之。揭其楣曰燕清。公事之餘。日尙羊其間。軒之前植物八品。玩之爲樂。興之所至。初不知物之爲我。而我之爲物也。各賦一詩。合爲八詠。

質性本巖壑。何年植軒墀。栽培豈人力。亦荷乾坤私。昔聞出蕭艾。今已干雲霓。嗟彼蒲與柳。經秋忽先萎。顧惟堅貞操。青青閱四時。願言託幽契。歲晚相因依。

右松

弱質怯寒沍。託根本炎荒。去冬與今春。冰雪一月強。老榦凍欲死。枝葉萎且黃。到今秋已深。疏花始芬芳。興衰感物理。怛焉成內傷。

右素馨

種菊滿籬落。杖策時一行。匪徒事遊豫。愛此秋氣清。引觴注醽醁。泛泛黃金英。取醉亦有適。豈必制頽齡。

有懷時激烈。長歌振林垌。緬思靖節翁。悠然千古情。

右菊

種竹我來初。森森已成叢。悵焉感時序。浪迹成飛蓬。所賴天降康。豐年及野農。移床坐層陰。市地光玲瓏。高歌激商灑。習習來清風。邊氓既云樂。久客何憂沖。

右竹

薩琦一首

琦字廷珪。閩人。宣德庚戌進士。選庶吉士。授編修。正統中進侍讀。景泰中擢禮部侍郎。兼少詹事。早朝

鶴立形埤夜未央。參差環珮覲明光。嵩呼近識龍顏喜。御坐濃薰雉尾香。花霧煖開金殿曙。柳煙晴引玉階長。招搖乍轉千官肅。遙聽鐘聲出建章。

方熙一首

熙字孟明。莆田人。宣德庚戌進士。選庶吉士。出爲潮州通判。有東軒集。

東巖

石徑蒼苔古。長廊白晝閒。臺花和雨墜。獨鳥向人還。

毛宗魯一首

宗魯字師曾掖人宣德庚戌進士官御史有葵軒稿

王士祿濤音集宗魯詩筆淹潤惜不多見

大澤山

芙蓉朵朵倚空碧蒼松倒挂嵯峨石山頭雨過霽色鮮嵐氣浮空翠欲滴白雲出岫本無心時時繞護禪房陰衲子挂錫無他事跣跣日坐蒼苔深

范理一首

理字道濟天台人宣德庚戌進士授江陵知縣擢德安知府再擢福建布政使改貴州拜南工部侍郎改吏部有丹臺稿

田按楊文定執政時其子自家來省道出江陵不爲縣令所禮乃天台范道濟也文定重之擢爲德安知府再擢布政使或勸當致書謝道濟曰宰相爲朝廷用人非私理也人兩賢之道濟治吾黔實惠及民祀之名宦

石梁

萬疊雲山紫翠重微茫一徑路遙通忽聞鐘磬穿雲出漸見樓臺隱霧中瀑向巖前飛玉屑人從天上踏銀虹此身卽是登方廣變幻何須更遠窮

鍾順二首

順字必華。南海人。宣德壬子舉人。知沔陽州。擢太平知府。有鳴盛集。

荆南晚眺用劉仔肩韻

日落晴川泊去舟。眼前風景憶曾遊。青分松逕山邊寺。紅隱楓林驛外樓。過雁遠牽孤客恨。清砧偏動羈鄉愁。一官牢落成何用。空有丹心戀帝州。

清夜聞笛

小樓人醉月初斜。歸思迢迢隔海涯。短笛誰吹斷腸曲。滿庭香雪落梅花。

徐有貞四首

有貞初名理。字元玉。吳人。宣德癸丑進士。選庶吉士。授編修。歷修撰。侍講。春坊諭德。擢僉都御史。進左副都御史。英宗復辟。拜華蓋殿大學士。兵部尚書。封武功伯。未幾下獄。戍金齒。尋赦還。有武功集五卷。

吳中往哲。武功伯夙負高才。談鋒文氣。英邁莫敵。兼葭堂雜鈔。徐武功居史館。修何尚書文淵事賦詩曰。溫州太守重來歸。昔何廉退今何違。卻金館在已如掃。掩月堂寒空掩扉。人間固有假仁義。天下豈無真是非。老夫忝乘春秋筆。不作諛詞取世譏。

匏翁家藏集。天全翁自南詔歸。適大參祝公。僉憲劉公。皆致仕家居。登臨遊賞之樂。必共之。酒酣興發。更倡迭和。落紙人爭傳。

之以爲奇。

姑蘇志。徐元玉詩。文雄偉奇麗。詞尤妙絕。

弇州四部稿。武功伯於書少所不窺。能詩歌。善行草。得長沙素師。來襄陽風。

書史會要。武功書法古雅雄健。名重當時。

田按武功。恆云。左邊堆數十萬金。右邊殺人流血。而目不轉者。真宰相也。此語亦太露殺機。陷于忠肅。傾險甚矣。得流金齒亦幸事。

輓東萊黃少保

公也人中傑。乘時起海濱。明良欣際會。屯難見經綸。鸞鳳無卑集。龍蛇有屈伸。玄成多直諫。懷慎素安貧。冀北初分治。南交久撫馴。居官方保奭。留守比君陳。奄嘆摧梁木。俄驚委大椿。悲風來萬里。陰景翳三辰。遺烈存青史。餘休啓後人。淒涼聞訃日。哀思動儒紳。

登獅山

麥黃天氣爽如秋。乘興聊爲峇嶠遊。香徑踏花來洞口。小舟送酒過溪頭。橫塘樹色連龍隴。茂苑煙光接虎邱。絕勝竹林觴詠處。卽今誰數晉風流。

題畫

山下雲連山上溪。西水接溪東。舟渡白鷗飛處。人行綠樹陰中。

鷓鴣圖

煙雨蕭蕭苦竹秋。感人常自叫鉤輈。披圖無限江南思。不必聞聲也自愁。

李賢一首

賢字原德。鄧州人。宣德癸丑進士。授吏部主事。進郎中。擢兵部侍郎。改戶部。英宗復辟。兼翰林學士。入直文淵閣。預機務。進尙書。坐事下獄。謫福建參政。未行。留爲吏部侍郎。尋復官。進太子太保。成化初。進少保。華蓋殿大學士。卒。贈太師。諡文達。有古穰集三十卷。

國史唯疑郭瑄爲兵部尙書。雅持正。試進士李賢嘉禾詩。謂有公輔器。與張統之譏楊士奇事同。

雙槐歲鈔。文淵閣有植芍藥有臺。相傳宣廟幸閣時。命工砌者。初植一本居中。澹紅者是也。景泰初。增植二本。純白居左。深紅居右。舊常有花。自增植後。未嘗一開。天順改元。徐有貞。許彬。薛瑄。李賢。同時入爲學士。居中一本。遂開四花。其一久而不落。旣而三人皆去。惟賢獨留。人以爲兆。明年暮春。忽各萌芽。左二右三。中則甚多。而彭時。呂原。林文。劉定之。李紹。倪謙。黃謙。錢溥。相繼同升學士。凡八人。賢約開時共賞。首夏四月。盛開八花。賢遂設燕以賞之。時賢有玉帶之賜。諸學士各賜大紅織衣。且賜宴。因名純白者曰玉帶白。深紅者曰宮錦紅。澹紅者曰醉仙顏。惟謙以足疾不赴。明日復開一花。衆謂謙足以當之。賢賦詩十章。閣院宮寮咸和。彙成曰。玉堂賞花詩集。

納蘭成德。淥水亭雜識。玉堂賞花會。賦詩者四十人。學士則南陽李賢。安成彭時。榜李呂原。莆田林文。安成李紹。永新劉定之。錢塘倪謙。東吳錢溥。侍讀則金城黃謙。詹事則陵陸陳文。長洲劉鉉。侍講則眉山萬安。漁陽李泰。中允則古杞孫賢。暨善則范陽牛綸。修撰則吳中陳鏜。博野劉吉。錢塘童綠。華容黎淳。編修則西蜀李本。毘陵王僎。餘姚戚淵。宜興徐溥。瓊山邱濬。秦和尹。

直安成彭華。霽川陳秉中。臨川徐瓊。四明楊守陳。臨江吳匯。檢討則嚴州傅宗安。成張業。河東邢讓。翰林五經博士。則天台鮑相。典籍則西蜀李鑑。泰和陳穀。侍書則浙江謝昭。其二人則禮部員外郎。臨淮凌耀宗。中書舍人。江東曹冕。詩成李賢序之。彭時作後序。

田按諸公和李文達內閣芍藥黃字韻詩。彭學士時句云。色借宮袍近柘黃。林學士文句云。玉帶肇名新賜白。金花應瑞舊圍黃。倪學士謙句云。託根終近省闈黃。又云。近侍曾聞亞姚魏。品題今喜得蘇黃。黃侍諫句云。資福玉盤先逞白。廣陵金帶總腰黃。永新劉學士定之。則玉帶白。宮錦紅。醉仙顏。各賦一詩。見本集。此後成化中。徐少傅溥。賦內閣芍藥。用吟扉二韻。本院官皆和之。正德中大學士梁儲。楊一清。賞芍藥。用東冬清青爲韻。詩各別紀於後。

除夜書懷

使節淹淮甸。殘冬接早春。揚州除夜客。湍水未歸人。歌管千家樂。琴書旅舍貧。鄉懷從此切。清淚欲沾巾。

周旋一首

旋字中規。永嘉人。正統丙辰。第一人及第。授修撰。進侍講。兼左春坊左庶子。有畏庵集十卷。

泉川耕讀

南山崇且深。溪水清以漣。良田百餘畝。草屋八九椽。藹藹桑麻場。漠漠榆柳煙。清晨荷鋤去。日暮荷鋤還。孺子掩柴扉。攤卷青燈前。讀罷命濁酒。取醉輒復眠。

劉定之三首

定之字主靜。永新人舉人髦子。正統丙辰。第三人及第。授編修。遷春坊洗馬。再遷右庶子。英宗復辟。改通政司參議。尋改翰林學士。進太常少卿。成化初。兼侍講學士。入內閣預機務。擢工部侍郎。改禮部。卒。贈尙書。諡文安。有呆齋集四十五卷。

水東日評。劉洗馬定之。與兵部侍郎王偉遇於朝。偉戲劉曰。吾太僕馬多。公須一一洗之。劉應聲曰。何止太僕。諸司馬不潔。我固當洗之。聞者快之。

翰林記。劉井。學士劉定之所浚。在公署後堂之左。

麗堂詩話。劉文安公。不甚喜作詩。縱其學力。往往有出語奇崛。用事精當者。如英廟輓歌。石鐘山歌等篇。皆可傳誦。殿閣詞林記。成化中學士劉定之。應制賦元夕詩。絕句百首。頃刻而成。

題子昂蕃馬圖

烏騅赤騮皆龍種。對立春風耳雙聳。踏鐵高蹠疑削成。垂項長鬣欲飛動。南官牽來意態閒。老髯側立何蒼顏。攘袂並語乃年少。紅衫黑鞵面如盤。氣象本自陰山北。人馬俱帶風霜色。相將雄跨入九軍。使欲長驅周八極。想常有元乘運時。天閑育此神駿姿。振策南馳御宇內。降王萬里皆繫纆。趙公王孫日所覩。含毫揮染心宜苦。固知名筆掩曹韓。可惜裸將來黼黻。百年縑素人珍藏。錦囊玉軸相輝煌。乾旋坤轉須臾事。單于來獻眞飛黃。

江湖勝覽

扁舟遊江湖。歷覽既已廣。有如閱弈棋。變態須臾往。聊用適吾意。奚必復存想。嗟君好事寫作圖。時一觀之更有娛。乃知翰墨亦所好。如此高懷不可無。我行衛河正春暮。中原萬里羅煙樹。澶淵鷗泛水東流。太行龍騰勢南去。前代功名那復知。白髮老叟談明時。閭閻歌舞樂堯舜。梯航朝貢來四夷。請君過此駐鳴槽。爲我登臨一弔古。曹操台前尋片瓦。信陵墳上酬坏土。

裕陵輓詞

睿皇厭代返仙宮。武烈文謨有祖風。享國卅年高帝並。臨朝八閩太宗同。天傾玉蓋旋從北。日昃金輪卻復中。賜第初元臣老朽。負恩未報泣遺弓。

程思溫一首

思溫字叔玉。婺源人。正統丙辰進士。禮部員外郎。死土木之難。

鳳池

玉殿分行曉侍班。退朝花底珮珊珊。鳳池春暖多清暇。自把龍涎試博山。

王偉一首

偉字士英。攸人。正統丙辰進士。選庶吉士。授戶部主事。遷兵部郎中。擢侍郎。有桐山集七卷。

閒中偶成簡杜大尹

岸幘披襟酒乍醒。久居林下已忘形。侵尋老景雙蓬鬢。流落天涯一草亭。春漲水添千頃綠。雲開山擁半空青。年來博得閒中趣。一任浮生迹似萍。

林璧一首

璧字貴璧。黃巖人。正統丙辰進士。除禮部主事。再遷南吏部郎中。

梅溪明因寺

開戶碧峯入。問途黃葉封。寒泉鳴絕澗。落日在高松。

李顥一首

顥字思誠。博羅人。正統丙辰進士。授戶部主事。改刑部。遷員外。出爲福建按察僉事。歷福建參政。山東、浙江、布政使。拜工部侍郎。

承召之京憶羅浮

吾郡佳山水。羅浮天下聞。自隨丹鳳詔。閒卻玉床雲。流水清無限。梅花瘦幾分。欲歸歸使得。猿鶴莫移文。

戴璉一首

璉字汝器。南海人。正統戊午舉人。官訓導。有靖節集。

送張序班還京

官舍花枝映酒卮。離筵玉管雜青絲。客情後夜知何處。樽酒今朝醉莫辭。雨過江城榕葉暗。月明山路馬行遲。誰云吏隱金門下。會見承恩出鳳池。

明詩紀事卷十七

乙籤

施槃一首

槃字宗銘。吳人。正統己未第一人及第。授修撰。

懸笥瑣探。正統三年。吳學得舉者三人。周郁爲春秋魁。第四名。張璣第十一。施槃第十五。既而赴會試。槃咏蝴蝶云。莫怪風前多落魄。三春應作探花郎。己未果狀元及第。

送友

楊柳含煙翠欲流。楊花飛雪點行舟。春風送別淮陰道。落月嘯鶻動客愁。

倪謙十四首

謙字克讓。錢塘人。徙上元。正統己未第三人及第。授編修。進侍講。景泰中。進中允。再進侍講學士。預修寰宇通志。進春坊大學士。英宗復辟。改通政司參議。兼侍講。進本院學士。坐科舉事。戍開平。成化初。復學士。尋授南禮部侍郎。以言官劾致仕。旋復職。進尙書。卒。贈太子少保。諡文僖。有玉堂南宮上谷歸田等集。

四庫總目三楊壑閣之體。至宣正之間。而極弊。冗闊膚廓。幾於萬喙一音。謙當有明盛時。去前輩典型未遠。故其文步驟謹嚴。樸而不徑。簡而不陋。體近三陽。而無其末流之失。雖不及李東陽之籠罩一時。然有質有文。亦彬彬然自成一家。

田按尚書在朝。頗稱躁進。卒以萬安銘墓。尤致譏議。詩不爲選家所稱。余觀其七古。勁健拔俗。不愧當家。固不失爲一時騷雅之選也。

題山水畫

蒼山疊秋晏。巖壑鬱蕭爽。虛亭闕無人。古道絕來鞅。雲迷遠近村。樹隔東西瀆。安得濯塵襟。中林恣幽賞。

石蒲畫

齒齒水中石。脩脩石上蒲。清風一披拂。疏翠自紛敷。宛若避世人。悠然山澤耀。坐疑碧溪月。移影在庭隅。

題蘭贈潘景瑞

叢蘭在幽谷。皎潔冰雪恣。光風汎疏穎。白露凝華滋。我欲結爲佩。采芳薦彤墀。惆悵隔澧浦。路遠莫致之。悠悠十年別。迢迢千里思。含情託毫素。永固同心期。

山水畫爲祝給事題

連峯起伏如蟠龍。幽壑下浸馮夷宮。溪深水長足魚鰲。時有扁舟垂釣翁。人家幾簇依林薄。共食溪鮮有眞樂。黃鳥嘯殘碧樹枝。白雲鎖斷青山腳。錢鏐之孫寫作圖。筆法不讓方方壺。當時清隱宛在日。萬朵芙蓉浮太湖。我亦有居環水竹。西風吹老千竿玉。披圖日夜憶江南。夢繞溪頭舊茅屋。

題李瓊司訓廬山圖爲顏夏官所寫

我聞匡廬鎮南服。云是禹貢敷淺原。崑崙支脈遠分析。衡岳五嶺遙相連。層巒疊嶂數千仞。五老香爐凝翠煙。水簾一片瀉空闊。元氣噴薄銀河懸。昭明舊隱在何處。中有古寺名開先。漱玉之亭最奇勝。飛瀑正注神龍淵。棲賢谷西白鹿洞。李渤讀書今幾年。平生慨想不一到。夢繞落星湖水邊。五羊顏君南海客。筆奪造化天無權。青山蜿蜒欲飛去。滿壑浮雲紛擘緜。澄江浩浩渺無際。但見萬里乘風船。漁村樵徑遍林麓。有路宛達諸峯巔。披圖可望不可卽。似隔弱水觀蓬圓。高堂素壁時挂此。頓使襟懷塵慮蠲。何當把酒呼坡老。共和六一山高篇。

題山水畫

碧山插水江無波。小舟一葉如飛梭。山光壓舟載不起。滿日排空橫翠蛾。中林可是楊雄宅。路指巖阿放舟入。問字須教酒剩攜。誰識先生玄尙白。苔封蘚蝕一徑微。綠蘿古樹環荆扉。陰嵐漠漠每入戶。空翠濛濛常濕衣。夜來一雨經林莽。添得江聲滿前浦。開門萬壑總浮雲。吞卻山根猶未吐。幽林雅好能無同。一簇人家居漢東。危橋策杖從小童。來往惟應桑苧翁。

商山四皓圖

商山鬱嵯峨。中有三秀芝。四皓此避秦。採擷充其饑。羸綱高張正流毒。冥鴻矯矯安能羈。一朝輒道口銜

壁萬方耿耿炎精赤。據床嫚罵溺儒冠。巖穴深藏甘斂迹。誰知衽席間。以愛迷至公。偉哉留侯建奇策。禮幣直走商山中。翩翩乃偕來。願爲太子死。赤帝見之驚。公胡至於此。把酒相看意慘悽。黃鵠歌殘淚如水。一出重九鼎。漢業安如山。拂衣不受萬鍾祿。爲樂孰似商山閒。高風渺渺仰圖畫。名與茲山同不刊。

湖口石鐘山爲庫部王郎中恕賦

彭蠡之口兩石鐘。上下壁立金芙蓉。何年鼓鑄出爐冶。造化融結當洪濛。山靈昔聞訴眞宰。帝令疏鑿驅鬼工。雕鏤險陋向山麓。空洞穴隙紛玲瓏。鳴聲底用事撞擊。自有巨浪乘長風。何殊張樂洞庭野。大音迭奏聞金鏞。五老分明俯垂聽。鏗鑄震撼馮夷宮。爾來世歷千萬古。至今追蠡懸高空。坡仙當年適臨汝。沿河南去路遙通。平生好事此足見。放棹特過湖水東。月明夜抵絕壁下。怪石正與風濤衝。噌吰鏗鞳互響應。寓目始得窮奇蹤。此景居民久應識。口不能道嗟漁翁。我皇曾此戮鯨鱗。攀崖上登山閣中。龍香落紙灑宸翰。滄江夜夜光如虹。憶惜黃華使荆楚。柰予王事方匆匆。天生佳景不一到。悵望思逐南飛鴻。

送宗華上人主杭普福寺

祖印相傳屬惠能。蕭然塵外一高僧。遠歸天竺湖邊寺。暫數長安塔上燈。紫竹秋巖和月臥。綠蘿春徑撥雲登。何當躡屣分清賞。共指雙峯話葛藤。

題畫

移家白雲深。靜枕清溪曲。日暮門不開。茶煙滿蘿屋。

題花卉翎毛

簇簇海棠枝。雙雙頭白鳥。何處聞一聲。春風瑣窗曉。

寄仁和聶司訓

絳帳隨車去莫攀。詩名重見動江關。畫船醉倚芙蓉露。吟到西湖第幾山。

閨情

片片飛花迎水流。園林綠暗不勝愁。斷腸無計留春住。人老東風燕子樓。

墨竹推篷圖

倚風爭舞翠雲翹。半啓篷窗酒量消。薄暮欲投湘浦宿。隔江誰弄紫鸞簫。

張諫一首

諫字孟弼。赤水衛人。正統己未進士。授行人。進御史。累遷順天府尹。坐事謫萊州知府。擢太僕寺卿。

田按吾黔有進士。自孟弼始。先世自旬容來。卽洪武中。進嘉瓜張觀後裔也。孟弼以孝著。父母沒。廬墓。再產芝。人稱孝芝張氏。

望古

賦心旣傳盛。經術復開尹。竝興巴彭城。名德乃興準。牂牁處荒維。因此山嶷嶙。如何初郡縣。賢俊已連軫。人文張華夏。覆載詎畦畛。乃知豪傑士。不受山川窘。遙遙今幾世。嗣響何泯泯。望古一長歎。負重愁絕顛。

楊璿一首

璿字叔璣。無錫人。正統己未進士。除戶部主事。歷郎中。遷山西參政。進陝西布政使。改河南。入爲戶部侍郎。改右副都御史。巡撫荆襄。移撫河南。有宜閒集。

輓李桓仲

不見邱園起孝廉。白頭蹤迹竟長淹。竹香醉裏秋三徑。草色吟邊雨一簾。落日山陽聞弄笛。春風座上想掀髯。傷心多少門人淚。洒向梁溪水欲添。

成始終一首

始終字敬之。無錫人。正統己未進士。除御史。出爲湖廣按察僉事。有蓬菴、觀光、紀行等集。

發桃花口直沽舟中述懷

直沽洋裏白沙村。百丈牽船日未昏。楊柳人家飛海燕。桃花春水上河豚。養高無計尋韋曲。投老何方覓謝墩。只待干戈平定後。草堂歸飲獨山門。

張和三首

和字節之崑山人。正統己未進士。授南刑部主事。進員外。遷浙江提學副使。有篠菴集。

國雅張節之寓日成韻。風彩醞藉。如秋聲兩岸葉。晚色萬峯雲。積水浮仙嶼。寒星伴使舟。水螿飛不定。沙鳥宿還驚。至與朱千戶夜話云。瀚海地荒龍駕遠。交河風急雁書沈。此政英廟北征時也。情之發於忠愛不渝。能自慨切。

爲陸以平題畫

九疑空翠隔煙波。北渚雲橫有雁過。欲采芙蓉寄離恨。碧天秋晚奈愁何。

至晉陵作

布帆搖曳夕陽斜。渡口南風起浪花。路入晉陵三百里。故鄉回首是天涯。

晚渡石湖

畫船搖曳水雲鄉。湖上南風作晚涼。醉擊唾壺歌小海。藕花飛出兩鴛鴦。

祝顯一首

顯字惟清。長洲人。正統己未進士。授刑科給事中。遷山西左參議。進參政。有侗軒集。

途中卽景

野曠雲初捲。山晴翠欲流。殘陽牛背笛。新月水邊樓。異土逢佳景。危途得勝遊。浩然襟袍豁。清興落滄洲。

劉儼一首

儼字宣化吉水人。正統壬戌第一人及第。授修撰。歷右春坊大學士。太常少卿。天順初。改掌翰林院事。卒。贈禮部侍郎。諡文介。有文介集三十卷。

田按景泰丙子宣化主順天鄉試。閣臣王文陳循子不中。飛章搆陷考官。賴高穀救獲免。宣化尋卒。得諡文介。倪克讓詩云。飛章交搆徒爲爾。美諡玉成文介公。紀其事也。宣化嘗云。翰林之職。清高固可喜。淹滯亦可歎。譬金水河中魚。化龍之期。未可必有。而網罟之患。則可必其無。可謂善喻。

贈西溪遺叟

幾年習隱向西溪。喬木陰陰徑路迷。階下雨晴苔色潤。窗前春近草痕齊。閒來縱酒惟高枕。老去看雲只杖藜。卻笑五侯門下客。紅塵騎馬日栖栖。

呂原一首

原字逢原。秀水人。正統壬戌第二人及第。除翰林編修。歷中允。侍講學士。左春坊大學士。天順初。改通政司參議。兼侍講。入內閣預機務。進翰林學士。卒。贈禮部侍郎。諡文懿。有介菴集十二卷。

輓陳偉敏公

總握臺綱肅穆風。頭銜晉秩到三公。遭時寵膺承優渥。垂老榮歸保始終。鶴髮方遊鱸浦外。龍泉遽闕虎邱東。當年節鉞臨關峽。韓范威名孰與同。

黃諫二首

諫字廷臣。蘭人。正統壬戌。第三人及第。授編修。累官翰林學士。天順初。改尚寶卿。坐事謫廣州通判。有使南稿。蘭坡集。

列卿紀。黃諫工詩善書。旁及宋元畫家。吹毫運思。一一臻妙。

畫史會要。黃諫在翰林。能各體書。尤精繪事。館中壁寫白菜其上。題者先後數百人。一日。眾共惋惜。諫一一書之。并繪白菜如舊。

將進酒

將進酒。歌莫停。人生不滿百。酒盡還須傾。吁嗟世事只如此。常醉何須誇獨醒。君不見東家有酒不解飲。西隣碌碌勞此生。如何劉伶終日醉。千秋萬世留其名。

從軍行

白骨蒼烟晚。黃雲塞草秋。貂蟬雖足貴。聞說出兜鍪。

韓雍二首

雍字永熙。長洲人。正統壬戌進士。除御史。擢廣東副使。進右僉都御史。巡撫江西。改山西副使。以事下獄奪官。尋起大理少卿。復爲右僉都御史。巡撫宣府。大同。入爲兵部侍郎。坐累貶浙江參政。

擢左僉都御史。進左副都御史。提督兩廣軍務。再進右都御史。正德中。諡襄毅。有集十五卷。

田按襄毅素爲武功。伯徐有貞所輕。有貞自金齒赦還時。仰觀天象。謂將星在吳。益自負。常以鐵鞭自隨。數起舞。及聞襄毅征兩廣有功。乃擲鞭太息曰。孺子亦應天象耶。初賊蔓延兩廣。議者謂當分兵撲滅。襄毅決計。全師直搗大藤峽。始至峽口。僮生里老數十人。伏謁道左。願爲嚮導。襄毅叱左右縛斬之。果賊也。賊大驚曰。韓公天神也。磨兵奪橫石塘。及九層樓諸險。邱文莊潛凱歌。所謂一夜山靈驚失險。回頭不見九層樓也。大藤峽延廣六百里。中有大藤如虹。橫亘兩岸間。襄毅先後破賊三百二十四砦。斧大藤斷之。易名斷藤峽。勒石紀功而還。自作平斷藤峽長歌以紀事。所謂大藤根株悉已斷。五嶺封疆眞再造也。

苦雨阻風夜泊劍江龍霧洲述懷

積霖殆三旬。陰雲不能埽。深江浩無涘。滔滔走黃潦。怒風長號鳴。排空雪山倒。東作已逾時。耕子心悄悄。百穀未始播。平疇尙豐草。農事或荒廢。生民曷溫飽。蹇予德淺薄。致此災沴兆。惕焉發深省。中懷自憂懊。誰能補天漏。捧出日杲杲。雨暘允時若。稼穡遂堅好。維舟坐終夜。無計叩穹昊。古聞誠可格。我但精意禱。隔凡洞庭林屋洞天中有大書。隔凡二字鐫之石上。小洞因效之以名。劉僉憲廷美小洞庭十景之一。

林屋洞天好。似不通人寰。君家小石巖。亦在雲水間。紅塵自南陌。樂事非東山。辭榮休此中。世事無相關。

卞榮一首

榮字華伯。江陰人。正統乙丑進士。官戶部郎中。有卞郎中集七卷。

四庫總目。榮在景泰間。盛有詩名。居郎署二十年。朝騎甫歸。持贖乞詩者。捧塞戶限。日應百篇。湯沐公餘。日錄盛稱其狀元自

是渴睡漢。宰相須用讀書人。一聯以爲雖有窮哉。渾無痕迹。蓋亦雋才。然所作亦多淺率。蓋得之太易也。
麓堂詩話。詩在卷冊中易看。入集便難看。古人詩集。非大家數。除選出者。鮮有可觀。卞戶部華伯。在景泰間。盛有詩名。對客揮翰。敏捷無比。近刻爲全集。殆不逮所聞。

烏衣佳話。詩人志向。各自不同。如題漁父之作。有美其山水之樂者。有憫其風波之苦者。卞戶部華伯云。天外閒雲物。外情功名。真似一絲輕。浪花深處船如舞。只爲心安不受驚。祝希哲云。荻花風緊水生鱗。山色浮空淡抹銀。總道江南好風景。從前都屬打漁人。是皆羨其樂也。李西涯云。漁家生事苦難勝。盡日江頭未滿罾。回首不知天已暮。晚風吹鬢雪鬢鬢。唐子畏云。朱門公子饜鮮鱗。爭詫金盤一尺銀。誰信深溪狼戾裏。滿身風雨是漁人。文徵明云。小舟生長五湖濱。雨笠風蓑不去身。三尺銀鱸數斤鯉。長年辛苦只供人。是皆憐其苦也。屬意雖不同。而寫詠景物。各極其妙。

贈許德容

少年赤手能搏虎。踏遍東華輓紅土。纏頭百萬輕買笑。挽弓兩石漫好武。江南風月誰平分。拂衣歸臥龍山雲。姑蘇臺下爲別墅。招要三友詠五君。金屏如花人去早。北里薰天迹如掃。平章不必喚張侯。來往風流成二老。

沈彬一首

彬字原質。武康人。正統壬戌進士。官刑部郎中。有蘭軒集。

玉谿漁隱

憶昔扁舟訪玉溪。滿隄花樹逐人迷。開籠放鶴雨新霽。倚棹觀魚日未西。野老醉歌青箬笠。牧兒歸唱白銅鞮。鹿門誰道遠朝市。風月一灣猶可攜。

盧祥一首

祥字仲和。東莞人。正統壬戌進士。授南禮科給事中。改吏科。以事謫蒲州通判。尋起爲禮科都給事中。進南太僕少卿。改順天府丞。擢僉都御史。巡撫延綏。有行素集。

菽園雜記。巡撫陝西都憲嘉興項公思。令慶陽邠甯州縣督民種樹道旁。民頗怨之。巡撫延綏都憲廣東盧公祥。有詩嘲之。其終篇云。可惜路旁如許地。只栽榆柳不栽桑。項公和韻云。老我豈無衣食計。安知此地不宜桑。二詩今在慶陽公館壁間。邠甯慶陽皆古兩地。七月之詩。言蠶桑之事備矣。要之盧公之言得之。

古道

馳車出東城。車聲何磷磷。攬轡就古道。古道多荆榛。十進九反卻。硯瓦摧吾輪。所造未千里。計程已逾旬。豈不欲改轍。良愧前修人。

陳汝言一首

汝言字時獻。潼關衛人。正統壬戌進士。授戶部主事。歷郎中。景泰中驟進戶部侍郎。天順初。以迎駕功。遷兵部尙書。以賄敗。

秋夜

喔喔荒雞唱五更。起瞻北極大星明。佳人搗練秋如水。壯士吹笳月滿城。江海久慚生計拙。干戈深動故園情。尺書望斷南來雁。惆悵空令涕淚零。

金溥一首

溥字博菴。都勻衛人。正統甲子舉人。官教諭。

訪袁處士

處士幽棲水本清。客來開甕語流鶯。醉歸不識西溪路。芳草垂楊送到城。

商輅一首

輅字弘載。淳安人。正統乙丑第一人及第。授修撰。景泰初入內閣參機務。進侍讀。擢兵部左侍郎。兼左春坊大學士。英宗復辟。斥爲民。成化初。以故官入閣。進兵部尚書。改戶部。兼文淵閣大學士。尋加太子少保。進吏部尚書。謹身殿大學士。卒。贈太傅。諡文毅。有文毅集十卷。

送徐巡宰之莆田

與君相結意綢繆。不惜離筵重唱酬。紅葉樽前牽別恨。白雲江上動鄉愁。舟移劍水清風遠。春到閩山瘴雨收。況是莆陽文獻地。宦情詩思兩悠悠。

周洪謨一首

洪謨字堯佐長甯人。正統乙丑第二人及第。授編修。歷春坊贊善。侍講。侍讀。學士。進南國子祭酒。改北。擢禮部侍郎。進尚書。卒諡文安。有南皋集二十卷。箚齋集五十卷。

堅瓠集長甯周堯佐。正統甲子發解。赴公車。舟泊邗江。夜夢一人謂曰。吾乃子前身也。前程萬里。終身清要。周問子何人。曰。吾友鶴山人也。姓丁。家維揚。乙丑周榜眼及第。後官南京。以詩寄維揚太守三原王恕曰。生死輪迴事杳冥。前身幻出鶴仙靈。昔年一覺揚州夢。華表歸來又姓丁。王得詩甚訝。集郡中耆老詢之。羅文節曰。友鶴山人名鶴年。吾友丁宗啓之父。官武昌。遂家焉。伯氏登進士者三人。友鶴獨恬然布素。以詩名家。元末隱居。建文中沒於成都。王以復周世以爲異。如羊祜房琯事云。田按尚書雪山句云。疑有五城十二樓。玉色玲瓏界天白。又登翠屏山句云。一帶岩巒多宿霧。半天樓閣自秋風。頗稱高唱。惜不得其全集錄之。

眉山天下秀

大峨兩山相對開。小峨迤邐中峨來。三峨之秀甲天下。何須涉海尋蓬萊。昔我登臨彩霞表。獨騎白鶴招青鳥。雲龕石洞何參差。時遇仙人拾瑤草。丹崖瀑布連天河。大鵬圖南不可遏。晝昏雷雨起林麓。夜深星斗棲崑阿。

葉盛十二首

盛字與中。崑山人。正統乙丑進士。除兵科給事中。進都給事中。出爲山西右參政。擢右僉都御史。

巡撫兩廣。改左僉都御史。巡撫宣府。進禮部侍郎。改吏部。卒諡文莊。有水東稿八卷。開封紀行五卷。棗竹堂稿八卷。涇東小稿八卷。和山東勝覽詩一卷。

姑蘇志。文莊力行好古。清修苦節。慕范文正之爲人。文章紆徐委備。有法則。彭韶贊云。希文不相。古今所惜。人以爲知言。

吳中往哲記。文莊所著書。殆幾百卷。篤學辯博。爲一時首稱。

書史會要。葉盛善行楷。得蘇文忠筆意。

田按李文達嫉葉文莊。以此爲世所短。文莊碩德重望。不以詩名。余綜覽全集。七言近體。風格迥上。卽精研聲律者。無以過之。自來名輩。往往出其緒餘。足了數人。此其徵也。

華亭徐氏水南別業

見說東湖孺子亭。如今別業在南溟。水禽沙鳥衝烟白。岸芷汀蘭帶雨青。場圃未乾秋浸潤。釣船將到晚潮腥。宦情元少鄉心切。一曲滄浪擬共聽。

梧州嘉魚亭早發

嘉魚亭子壓星河。此日憑闌興若何。二水遠通交廣外。一山高比太行過。蠻郎蕩槳筒艚小。蜺老移家竹筏多。祇說澄清須我輩。馳驅莫遣負恩波。

桂林道中

官棹匆匆幾日閒。桂州風物暫開顏。青蛇出匣磯頭水。蒼玉成林海上山。刀笠每乘春雨去。鼓笳常帶夕

陽還行人只說山韓事。曾有威名動百蠻。

廉州

萬山行盡覓廉州。州在黃茅海上頭。剝竹住來獠戶屋。縛藤浮去蜩家舟。鹽開白石和烟煮。珠出清池帶月流。此去南交殊不遠。夷歌時復使人愁。

自梧抵桂作

蒼梧靜江十日閒。叫號滿船清淚漣。荒茅篔簹竹一千里。急峽危磯三百灘。山村尙苦打門吏。谿峒慣出攻城蠻。恩威在天作雷雨。坐看赤子迴歡顏。

周教授挽詩

記得南康城下過。相攜同上汎湖船。我無狂客一斗酒。君有冷官三十年。春樹暮雲傷遠別。青山碧水照新阡。客邊令子清於玉。坐對題詩思惘然。

寶慶道中

十行天上詔初頒。五月湖南客未還。地濕怕聞青草瘴。溪深愁度紫陽關。煙中白鳥衝人下。雨外紅蕖照水閒。最愛泉聲與山色。行行相送到人間。

寄周德原

浩浩紅塵隘九衢。看家來往只文儒。殘燈白屋繙琴譜。落日青山對酒壺。近水籬邊花自發。隔林枝上鳥相呼。舊遊可是忘情久。不寄山農萬玉圖。

次韻叔簡至日述懷

卜築東垣幽絕處。茶瓜曾爲故人留。藥資久缺非無病。詩債頻催也自愁。門外安車慚北郭。座中塵榻慕南州。履長慶罷歸來早。帶得天香到小樓。

開封懷古二首

夷門山下駐鳴珂。對景傷懷可奈何。古寺風霜摧鐵塔。前朝宮闕臥銅駝。春歸長嶽林花發。日落繁臺野鳥歌。試上故城高處望。大河東去浩煙波。

梁苑梁山似舊時。梁王賓客竟何之。小黃園上秋風老。凝碧池頭夕鳥遲。此日北征端可羨。當年南渡已堪悲。誰知衰草寒煙裏。亦有明昌進士碑。

呂道士松隱

閒道山人是謫仙。手栽松樹已參天。雲生曉洞疑龍下。露滴秋壇惱鶴眠。化石幾時堪入貢。斲苓長日可延年。明朝我約陶宏景。來聽南風萬斛泉。

劉昌一首

呂字欽謨。吳人。正統乙丑進士。授南工部主事。歷員外郎中。出爲河南提學副使。遷廣東參政。有
胥臺、鳳臺、金臺、嵩臺、越臺諸稿。

藝苑卮言。劉欽謨詩。如村女簪花。瓔豔羞澁。正得各半。

田按。欽謨無題五首。有名於時。細繙釋之。惟東風一夜芭蕉綠。亦似含愁卷半心。差有新意耳。

和夏選部齋宿韻

江郭風濤急。晚春薄塞消息上。梧桐憂添白髮三千丈。夢歷瓊樓十二重。龍氣誰占衝斗劍。鯨聲又起隔
煙鐘。無媒不用逢人歎。且自同歌漢業豐。

明詩紀事卷十八

乙籤

王佐二首

佐字汝學。臨高人。正統丁卯舉人。授高州通判。改邵武。臨江。有雞肋集。

楊慎升菴集。天順初。英廟大獵。從官皆戎服。弓矢以護蹕。應制賦詩。有祭酒劉某詩。以瑠弓爲弓瑠。太學生輕薄者。帖詩於監門云。獵羽楊長共友僚。瑠弓詩倒作弓瑠。祭酒如今爲酒祭。銜官何以答廷朝。廣東舉人王佐。復上詩於劉云。樂羊終是愧巴西。許下唯聞哭習脂。豈是先生無好句。弓瑠何愧古人詩。本爲能得司成之喜。劉覽之愈怒。其後王佐刻其桐鄉詩。具載此首。遂大傳其事。

思鄉寄鳳博唐德光

石田茅屋舊家風。遙憶瓊州在夢中。藤鉢曉茶吹椶末。瓦罌春酒呷筠筒。房蜂醉蜜榔花白。鸚鵡將雛荔子紅。情景年來無限好。可能留待一衰翁。

廣東詩粹。椶末。菜萸末也。瓊州俗以菜萸末雜辛香。和茶飲之。

武夷九曲棹歌

碧水丹山第六灣。翠峯絕處見玄關。道人不管來遊客。坐與白雲相對閒。

彭時二首

時字純道。安福人。正統戊辰第一人及第。授修撰。郟王監國。入閣預機務。進侍讀。忤旨不與閣事。尋遷左春坊大學士。再遷太常少卿。天順初。仍入閣。兼翰林學士。成化初。進吏部侍郎。再進兵部尚書。加太子少保。兼文淵大學士。改吏部。進少保。卒。贈太師。諡文憲。有文憲集四卷。

慈懿太皇后梓宮輓歌

漢家推馬鄧。周室仰姜任。名掩先朝懿。恩加四海深。椒房留盛事。繭館著徽音。中外交垂涕。難忘報德心。

田按英宗遺詔。定后妃名分。憲宗卽位。中官希周貴。妃旨。言子爲皇帝。母當爲太后。錢氏無子。不得稱太后。彭文憲時力持之。卒得兩宮並尊。又請錢太后加慈懿徽號。及慈懿崩。帝重違周太后意。不欲耐廟。時偕朝臣伏文華門泣請。帝與太后感動。卒得合葬裕陵。主亦耐廟。此當時輓歌也。

送劉行人儉使琉球

金蹙麒麟新賜袍。馳驅萬里著賢勞。海邊日月明樓櫓。水底魚龍護節旄。重譯俗同文化遠。冊封禮肅使星高。島夷一一憑宣諭。職貢時修荷寵褒。

岳正二首

正字季方。溧人。正統戊辰第二人及第。授編修。進左贊善。天順初。改修撰。入閣預機務。謫欽州同

知未至。逮繫獄。杖戍肅州。尋釋爲民。成化初。復官。出爲興化知府。嘉靖中。追贈太常寺卿。諡文肅。有類博稿十卷。

麓堂詩話。蒙翁才甚高。爲文章俯視一世。獨不屑爲詩云。既要平側。又要對偶。安得許多工夫。然其所作。如公子行。短短床二曲。綽有古調。留侯圖四絕句。句意皆非時人所到也。

醉經堂舖糟編。蒙泉岳季方先生。自翰林入闈。英廟深所眷注。後爲曹石所嫉。謫黜補外。卒興化守。嘗有燕臺懷古詩云。督亢陂荒蔓草生。廣陽宮廢故城平。黃金不置高臺上。似怪年來士價輕。結句深有慨於時也。

桃源圖

小槳輕搖帆半斜。仙山似有浮雲遮。前溪後溪響流水。千樹萬樹開桃花。圖畫已成晉故事。風俗還是秦人家。退之元亮不可問。小立空庭謾自嗟。

致仕後戲作

五十年來謝世紛。百年勞逸喜平分。不應又受先生號。去與青川管白雲。

黃紱一首

紱字用章。平越衛人。正統戊辰進士。除行人。歷南刑部員外郎中。出爲四川參議。進參政。歷四川湖廣布政使。擢右都御史。巡撫延綏。拜南戶部尙書。改左都御史。

國史唯疑黃紱爲戶部郎中。值部堂缺官。署堂印。諸僚事之如堂體。亦奇聞。時以硬黃目紱。

黔詩紀略公爲有明貴州名臣之冠勁節清風沾丐閩里零篇小詠亦自當行

和周草庭飛泉

嚴陵富春瀨。呂望渭水濱。盛名各一時。千古迹未陳。出處雖異趣。懷抱甯不均。豈必薄軒冕。獨與魚鳥親。

夏寅二首

寅字正夫。松江華亭人。正統戊辰進士。除南吏部主事。歷郎中。出爲江西提學副使。遷浙江參政。再遷山東布政使。有文集四十卷。

麓堂詩話。夏正大。劉欽謨。同在南曹。有詩名。初劉有俊思。名差勝。無題詩人盛傳之。夏每見卷中有劉欽謨詩。則累月不下筆。必求所以勝之者。後劉早卒。夏造詣益深。竟出其右。如虔州懷古詩曰。宋家後葉如東晉。南渡虔州益可哀。母后撤簾行在所。相臣開府濟時才。虎頭城向江心起。龍脈泉從地底來。人代興亡今又古。春風迴首鬱孤臺。若此者甚多。然東南士夫。猶不喜夏作。以爲頭巾詩。不知何也。

放英綠雪亭雜言。夏正大。過彭澤賦詩曰。縣樓寂寂枕江聲。五里荒山二里城。彭澤到今更幾令。縣人開口誦淵明。愚按柴桑翁作縣八十日。有何功德及民。而異代口碑。猶嘖嘖不泯。無乃以其人品之高。如龍潛鳳戢然耶。藝苑卮言。夏正大。知鄉濤。夫衣繡見達官。雖復整飭。時露本態。

金精山在甯都縣西北十五里

金星何年光墮地。峭壁萬丈懸丹梯。混沌初疑巨靈擘。森爽只許仙人棲。清泉挂巖石齒齒。碧草滿洞風

淒淒山空氣冷不可住。出谷一嘯斜陽西。

送王給事

一語回天事已難。朝居青瑣暮藍關。冰霜夜結孤臣思。花柳春融逐客顏。楚樹荒涼三戶縣。越山重疊五溪蠻。殊方本較長安遠。只是皇恩許便還。

劉翊一首

翊字叔溫。壽光人。正統戊辰進士。改庶吉士。授編修。歷中允。屢遷太常卿。進吏部侍郎。兼翰林學士。入文淵閣預機務。進戶部尚書。加太子少保。兼文淵閣大學士。再加太子太保。進謹身殿大學士。卒諡文和。有古直先生集十六卷。

青山白雲圖

數點雲山夢裏青。淡煙疏樹晚冥冥。自從失腳紅塵裏。不敢人前說獨醒。

鄭文康二首

文康字時父。崑山人。正統戊辰進士。有平橋稿十八卷。

四庫總目。文康詩主勸懲。詞旨質直。頗近擊壤集體。而溫柔敦厚。藹然可挹。要不失爲風人之遺。

刺牡丹

名花不入小家園。歲歲花時沸管絃。只恐春風容易過。鄰翁耕作種瓜田。

玉立亭

前元時崑山王君祐。有玉立亭。會稽楊廉夫嘗飲其中。題詩曰。王郎崑之秀。玉立而長身。亭子如筮大。不直一欠伸。亭前千尺峯。倒影入座賓。燒琴有罌桐。漉酒有烏巾。客來塞屋破。露坐草上茵。時時來鐵叟。共酌羅浮春。題曰。令小朵雲捧硯爲賦此章。君祐之宗孫益。復亭其地。予亦爲賦絕句。

玉立長身舊主君。百年遺事至今聞。宗孫賓客還如舊。只欠楊家小朵雲。

王常一首

常字大經。臨川人。正統戊辰進士。除御史。謫莆田知縣。

鳳凰山廣化寺

春氣蒸人似酒醺。尋幽一逕過溪分。風花輕拂歸林鳥。晴旭濃薰護塔雲。僧補衲衣松下坐。童敲茶臼竹間聞。老禪出定心如水。不管歸鴉噪夕曛。

尹旻一首

旻字同仁。歷城人。正統戊辰進士。改庶吉士。除吏科給事中。改刑科。英宗復辟。進通政參議。擢吏

部侍郎進尙書卒贈太子太保諡恭簡。

田按同仁人品卑下詩乃清俊可喜。

送恭上人還靈巖

遠公厭塵世棄我入天台。戒行無人識。幽懷到處開。心澄千里月。夢結故山隈。到日許元度。時應問偈來。

張城一首

城字世瓊。秦興人。景泰庚午舉人。授中書舍人。有皇華集。西莊遺稿。

題金太僕竹

瘦仙寫竹三十年。晚年鈎勒尤精專。興來一掃四五幅。枝枝葉葉生雲煙。渭川湘水渺何許。今日分明圖畫裏。爲誰寫作化龍枝。懸向高堂動風雨。

柯潛六首

潛字孟時。莆田人。景泰辛未第一人及第。授修撰。歷中允。洗馬。英宗復辟。改尙寶司少卿。遷翰林學士。再遷詹事府少詹事。仍兼學士。有竹巖集十八卷。

四庫總目。潛詩沖澹清婉。不落蹊徑。

鄒岳莆陽文獻。柯潛爲文整潔。詩尤清婉。接人外樂易而內狷介。鄰郡有中貴人。寵冠一時。士大夫欲求速化者。爭趨其門。其

人素慕潛文詞。歷欲屈致一見。潛卒不往。天下學士大夫。仰之以爲異人。

靜志居詩話。漢有金馬石渠閣。臺東觀。宋有總明。陳有德教。周則虎門麟趾。北齊則仁壽文林。唐則麗正集仙。開元中始定爲翰林院。其署與他公廨不同。中有徘徊精舍。四面步廊。畫壁花磚。假山叢竹。侈金鑿之祕記。建學士之新樓。汴宋玉堂。尤加藻飾。泊乎南渡。雖屬偏安。而省舍一新。濯纓之泉。漱硯之砌。芸香之亭。汗青之軒。以及蓬巒。松坡。蘭畦。芝館。藥洞。菊徑。橋洲。鶴砌。儲圖史。翰墨於中。故論者以詞臣爲神仙之職也。明初舊院有修竹林。學士黃宗豫寄東里詩云。一別詞垣數月餘。娟修竹近何如。北京旣建院。設下河橋。西堂後有井。劉文安所鑿也。亭二間。凡八楹。柯學士所築也。非在左。亭居右。至今入翰苑者。以劉井柯亭爲佳話。

田按竹巖集。四庫著錄。僅二卷。余所藏者十八卷。爲學士四世從孫維騏所編。當爲完本。學士在翰林。以名節著。詩亦俊爽出塵。

題山林圖送林伯安還鄉

前山盤盤橫黛綠。後山峨峨擁蒼玉。一泓流水抱幽村。百丈懸崖挂飛瀑。竹籬茅屋白雲間。縈紆石徑苔花斑。斜川杜曲無乃是。亦似莆田烏石山。君家正住山之下。邃館崇軒總瀟灑。喬林六月生清秋。門外尋常無車馬。旅食京華五六年。夢魂常在水雲邊。如今喜買扁舟去。舊遊蹤迹還依然。年來我亦久爲客。塵土迷人空太息。送君不得隨君歸。一片遙岑望中碧。

重遊梁溪

酷愛梁溪景。三旬兩度過。芳樽從爛漫。長日此消磨。石氣生青雨。泉聲透碧蘿。吟詩有高興。直欲到陰何。

題李侍御莊上

清絕山居苔滿蹊。茆檐常借與雲栖。舊栽槐樹陰初合。新種秧苗葉未齊。流水一灣芳草渡。煖風十里綠楊隄。我來對景忘歸去。吟就新詩拂石題。

送錢學士使安南

詔選詞林第一人。遠持旌節賜藩臣。暫教闕下辭鷓鴣。要使天南識鳳麟。驛騎寒衝殘月曙。宮袍光動萬花春。錦囊應貯如椽筆。一路題詩句有神。

題詩送陳公輔歸毗陵

故人歸去碧山阿。茅屋深深掩薜蘿。一榻白雲眠未起。石闌干外落花多。

攜琴步月爲劉貢士題

白髮山翁住翠微。蘿雲長與護柴扉。抱琴無處尋知己。自向溪頭步月歸。

王輿一首

輿字廷貴。武進人。景泰辛未。第三人及第。授編修。遷侍講。歷春坊右庶子。改南翰林學士。進國子祭酒。擢南吏部侍郎。召爲戶部侍郎。進南戶部尙書。尋進南吏部。卒。贈太子太保。諡文肅。有思軒集十二卷。

暇日過天甯東院

碁局詩囊在處攜。投閒幾度過招提。涼分半榻竹風細。香散一簾花雨迷。白石菴中嘗讀易。碧紗籠外更留題。日斜又別高僧去。笑指前溪作虎溪。

童軒十八首

軒字士昂。鄱陽人。僑寓南京。景泰辛未進士。除南吏科給事中。改戶科。進都給事中。謫壽昌知縣。擢雲南提學僉事。進太常少卿。再進本寺卿。擢右副都御史。總制松潘軍務。進南吏部侍郎。再進南禮部尚書。卒贈太子少保。有清風亭稿。諭蜀稿。枕肱集。

四庫總目。戴冠濯纓亭筆記。稱童軒性寡合。不妄取予。居南京日。家人衣食或不給。惟王恕餽以米及白金。或不受。毘陵王傑知其介。不敢致餽。有以禮幣求文者。導使詣軒。軒亦不納。其人品本爲高潔。其詩亦雅淡絕俗。然在明代不以詩名。殆正德以後。北地信陽之說盛行。寥寥清音。不諧俗尙故耶。

田按尙書詩。在景泰間。當首屈一指。劉欽謨。夏正夫。及十才子輩。皆在下風。王弇州藝苑卮言。效敖陶孫。評有明一代詩人。曾不一及。清風亭稿。得表章於四庫宏開之日。譬諸豐城之劍。其光當引星辰而上。

門有車馬客行

門有車馬客。駕言來故里。念子久不歸。契闊近一紀。主人延客坐。悲泣不得語。移時敝寒暄。始復相爾汝。借問邦族間。親知今有幾。一一聽客言。大非疇昔比。壯者死行役。老者半爲鬼。前年困征徭。十戶九凍餒。

去年坐買辦。往往鬻妻子。上司急誅求。鞭撻不少止。貪吏寡仁恕。股削至腦髓。言罷各掩泣。張燈具雞黍。觴行三四酌。深竹映寒雨。平明客登途。愁緒誰爲理。

將進酒

將進酒。君莫辭。請君聽我歌新詞。百年三萬六千日。一歲歡娛能幾時。君不見古人名利相奔趨。蘭亭梓澤皆邱墟。何如秦宮花下醉。滿堂明月紅氍毹。榮辱信有命。富貴亦有期。一朝光寵還自至。何須讀盡古人書。黃金注。白玉鍾。綠醅初潑葡萄酒。貂裘不惜酒家換。便須醉臥埋春風。盛時一去不再返。綠鬢明朝成老翁。將進酒杯莫空。雲臺煙閣我何有。仰天大笑浮雲東。

采蓮曲

采蓮朝下湖西曲。短袂輕綃鬪妝束。小紅艇子駕雙橈。盪破鱗鏡光綠。荷葉荷花颺錦雲。鴛鴦兩兩護波紋。荷錢卻喜似儂鈿。藕絲還愛似儂裙。湖頭昨夜西風雨。沙觜新添三尺水。翠倒紅翻相向愁。波中半露青蓮子。采蓮復采蓮。回船正迎浪。不嗔歸去遲。只嫌明月上。明月團團湖水秋。清光滿面照儂羞。郎家只隔湖北垞。咫尺橫波日夜流。

巫山高

巫山高。高望不極。疊巘連崖倚天碧。雲裏芙蓉十二峯。宛如神女晚妝濃。襄王已去今千載。行雨行雲尙

有蹤。朝朝暮暮荒臺下。幾見行人時駐馬。玉珮仙香杳不聞。空有神巫奏歌舞。路入楓林樹色青。古祠飛雨亂芳生。相思何處愁魂斷。木落蕭蕭猿夜聲。

江南曲

桃花斑斑落紅雨。玉缸春酒醲如乳。吳姬白紵裁舞衣。一曲嬌歌少年子。江頭日晚停商舶。囊傾黃金誇上客。當壚一斗沽十千。引滿紅螺吸明月。杯空月落江水寒。勸君且宿茱萸灣。遲明大扁挂帆去。千里煙波傷玉顏。

趙松雪寫東坡小像并書其山城杏花詩次原韻

瀉波漲碧蘭苕春。王孫英標真可人。眉山老仙招不起。東風誰薦溪頭蘋。清興懷賢應猝發。一夜松窗歌白雪。曉來點筆爲傳神。宛似臨皋步明月。杏花零落山城中。悠悠往事如雲空。何當共飲玉堂酒。一枝燭影搖殘紅。

東林小隱爲沈處士題

小隱東林地。身閒歲月忘。曲池山倒影。虛閣水生涼。雨潤琴聲漫。風曠藥臼香。羨君清趣好。無夢到岩廊。與許漢英秀才夜話

白下棲遲地。睽違又十年。蹉跎雙鬢改。險阻一身全。夜雨溪南業。秋風幕下田。別來空有夢。惆悵未能還。

咸陽晚眺

渭水東流落日西。咸陽秋色望中迷。荒煙古渡人稀到。衰柳空城馬自嘶。霸業已消三月火。斷碑猶載數行題。東門牽犬人何在。空見年年碧草齊。

鳳西草堂爲鄒義官賦

清隱臺西地最奇。四時佳趣自相宜。秋風羅蔓垂茅屋。春雨桃花近竹籬。勸客小姬歌白苧。遣懷新句寫烏絲。相過況有知音在。不用黃金鑄子期。

簡溪爲吏部吳主事題

溪上幽居廠竹扉。溪邊春水淨苔衣。吟鈔甫里新詩草。坐買嚴陵舊釣磯。幾點青山當戶立。一雙白鳥背人飛。也知習靜眞成簡。游俠無勞問是非。

九日

蕭蕭木葉下高枝。又是深秋九日期。黃菊酒香人病後。白蘋風冷雁來時。參軍帽落誰同調。宋玉詩成益自悲。有約不能逢一笑。看山窗下獨支頤。

竹棚口

君住竹棚口。妾家桃花津。來往不相識。青山應笑人。

駿馬

駿馬響金羈。蹀躞長安道。少年挽雕弓。彈落花間鳥。

宿觀音山驛

溪聲泱泱流。木葉蕭蕭下。離人耿不眠。寒燈伴長夜。

寶帶橋

寶帶橋頭水滿磯。小舟雙槳暮漁歸。藕花蒲葉俱零落。惟見斜陽乳鴨飛。

送蔣道還茅山

黃冠野服列仙曹。天上朝元翠羽膺。鐵笛一聲秋月白。又騎黃鶴下三茅。

田舍雜詠

不逐漁舟覓水源。繞溪花竹自成村。青山遮斷紅塵路。只有詩僧日款門。

楊守陳一首

守陳字維新。鄞人。景泰辛未進士。改庶吉士。除編修。歷侍講。洗馬。進侍講學士。再進少詹事。擢吏部侍郎。卒。贈禮部尚書。諡文懿。有晉菴、桂坊、鏡川、東觀、金坡、銓部等集三十卷。

雙槐歲鈔。景泰初開經筵。每講畢。命中官布金錢於地。令講官拾之。以爲恩典。戶部尚書高穀。年六十餘。俯仰不便。恒莫能得。

有一講官忘其氏名。常拾以貽之。有識者病其嫚瀆。時宮中又賜諸內侍。以銀豆等物爲闕笑。楊文懿公守陳時。在翰林。賦銀豆謠云。願將銀豆三千斛。活取枯骸百萬人。嗚呼。國阜用汰。至此極矣。

黃鶴寄周先生

黃鶴出人世。恥與雞鶩羣。翩然去埃壒。歸巢故山雲。願采瓊田草。寄之大茅君。悠悠歲華晚。渺渺江海春。

王越三首

越字世昌。濬人。景泰辛未進士。授御史。擢山東按察使。再擢右副都御史。巡撫大同。宣府。改左副都御史。旋進右都御史。總督軍務。改左都御史。進三邊總制。加太子少保。還掌院事。進兵部尚書。加太子太保。提督軍務。以功封威寧伯。進太子太傅。佩平胡將軍印。改大同總兵官。以事奪爵。除名。謫居安陸。詔復左都御史。致仕。尋起總制甘涼。兼制延甯兩鎮。加少保。卒。贈太傅。諡襄敏。有集四卷。

四庫總目。越魁傑之才。其詩文有河朔激壯之音。而往往傷於粗率。

筆精。王襄敏詩。氣魄雄壯。不事磨鍊。如斬蛇赤帝留神劍。墮淚銅仙泣露盤。仕宦得閒方是貴。世途雖好不如禪。妾夢幾時曾得鹿。多歧何處不亡羊。公馳驅戎馬之間。而賦詠不輟。未可與操觚輸苑者並論也。

田按襄敏雄才逸氣。不受檢束。詩亦復爾。然摘其佳句。如滿院落花春去早。一簾斜日燕歸遲。騷人已負梅花約。游子空歌楊柳枝。寒夜有霜供月色。窮邊無樹着秋聲。雨添野水連天遠。風約閒雲出岫遲。一水盡頭僧釣月。萬松深處鶴巢雲。雨添新綠。

水痕淺。風落殘紅。花片輕。百年人有幾時健。一歲月無今夜明。客路蒼茫。愁對酒。鄉山迢遞。厭聞鶉。落花寂寂。空蹀鳥。冷雨瀟瀟。已禁煙。扶筇竹下。思閒坐。圍筆花前。廢苦吟。月影到窗。僧未定。秋聲著樹。葉先飛。石壁掃雲。開梵剎。野橋分水。到僧房。未嘗不一一入格也。

與李布政彥碩馮僉憲景陽對酌

相逢無奈又離羣。樽酒休辭飲再巡。自笑年來常送客。不知身是未歸人。馬嘶落日青山暮。雁度西風白草新。別恨十分留一半。三分黃葉二分塵。

擬送李錄事赴饒州

隱隱紅亭車馬紛。勞歌唱徹不堪聞。天連極浦鶉翻日。水滿長湖雁叫雲。酒醒鄉關愁遠隔。詩成風月喜平分。懸知別後當深夜。冷雨空齋獨憶君。

鵲鴿

花落梨園宿雨晴。東風枝上夢初醒。雪衣娘子調新譜。學得霓裳第幾聲。

王佐二首

佐字彥弼。侯官人。景泰辛未進士。除刑部主事。歷員外郎中。出爲廣東參政。有梅軒集。

都下送陳世光還閩

黃金臺下始逢君。一曲驪歌手又分。惜別酒斟燕市月。還家路遠越山雲。青青草色連天遠。隱隱溪聲隔

岸聞明到故園逢北雁。好題尺牘慰離羣。

送人之吳中歸省

幾年官舍念親違。此日君恩暫賜歸。雙珮曉辭丹闕迴。寸心遙逐白雲飛。風前古木秋聲早。雨外荒村夜火微。一棹吳江待明發。承歡寧羨老萊衣。

吳宣二首

宣字師尼。崇仁人。景泰癸酉舉人。授左軍督府經歷。改中府。擢鎮遠知府。有野菴集。

宿黃巖寺

重疊青山放眼看。飛泉如練落驚湍。秋聲一夜不得住。搖蕩九天孤月寒。

銅陵

白浪黃流窻滿風。薄陰天際轉孤篷。浮生未了青山色。明日孤雲又向東。

汝訥二首

訥字行敏。吳江人。景泰癸酉舉人。官南安知府。有學鳴集。北游稿。

題夏仲昭墨竹

太常墨妙今所無。風流老勁古爲徒。興酣放筆一揮灑。雲根迸出青珊瑚。空堂白日驚風雨。大枝雖披小

枝俯蒼雲墮地寒不收。金刀錯落鏗琳璆。鬢毛飄蕭神骨爽。六月彷彿臨清秋。

寄懷省軒大兄

依約扁舟到郭門。鴨闌鶯脰一川分。割餘野稻肥黃雀。落盡江楓凍白雲。風景暫收新句好。酒樽不厭暮寒醺。殘年料得思行役。江驛鳴榔枕上聞。

明詩紀事卷十九

乙籤

徐溥二首

溥字時用。宜興人。景泰甲戌第二人及第。授編修。擢庶子。再遷太常卿。兼學士。拜禮部侍郎。改吏部。兼文淵閣大學士。參預機務。進禮部尚書。加少傅。兼太子太傅。尋進華蓋殿大學士。加少師。兼太子太師。卒。贈太師。諡文靖。有謙齋文錄四卷。

內閣芍藥呈李先生

禁城遲日曉陰紅。藥翻階紫閣深。香雨乍沾殊有態。綵雲長護豈無心。玉堂封值人何在。金鼎調和事可尋。幸遇清時多暇日。退朝常得對花吟。
名花獨自殿春歸。一種人間得見稀。不逐人情誇富貴。故知天意與芳菲。仙姿合種瑤臺側。盛事曾徵金帶圍。把酒看花成舊識。年年相伴住黃扉。

田按文靖在翰林時。曾和李文達內閣芍藥黃字韻詩。弘治初。入內閣。參預機務。尋進首輔。復倡爲吟屏二韻詩。一時僚友多有和章。學士李東陽詩云。一春風日幾時晴。數種名花競淺深。禁苑栽培真得地。化工雕刻本何心。叢疑月下留鸞宿。香到人

閨許蝶尋。臺閣風流前輩遠。綵毫重和玉堂吟。曉開花底佩聲歸。萬葉枝頭露未稀。力盡丹青空澹縮。眼看紅紫漫芳菲。棧雲直傍瑤臺起。澗日應須錦障圍。願向人間分此種。莫教春祇在彤扉。少詹王蔡詩云。玉殿東頭紫閣陰。仙葩香煖五雲深。棧培尙荷宣皇力。閣落聊觀造化心。香醞受風紅矮甍。柔條上雨綠侵尋。謝公詩好難爲和。繞砌空嗟盡日吟。東皇借汝這將歸。小雨化間密復稀。色映風池分曉潤。香薰雲閣擷春菲。金盤露滴九重迴。玉盤風欲一尺圍。不似江南三月見。蕭蕭籬落野人扉。學士程敏政詩云。宮樹花飛盡綠陰。陸離紅映掖垣深。仙妝露洗羞塗額。國色天成笑捧心。池上紫薇元並植。風前粉蝶敢相尋。錦亭爛漫金尊賞。消得元暉好句吟。太僕卿諸懌詩云。風流獨擅玉堂陰。手植當年意已深。好是雲霄清切地。偏承雨露發生心。暗香豈待憑欄嗅。絕品從教按譜尋。五色詔成長對此。清平誰羨謫仙吟。

邱濬五首

濬字仲深。瓊山人。景泰甲戌進士。選庶吉士。授編修。歷侍講。侍講學士。進翰林學士。改國子祭酒。拜禮部侍郎。進尙書。加太子太保。兼文淵閣大學士。參預機務。加少保。卒贈太傅。諡文莊。有瓊臺會稿二十四卷。

四庫總目。濬相業無可稱。然記誦淹洽。冠絕一時。故其文章爾雅。終勝於遊談無根者流。在有明一代。亦不得不置諸作者之列焉。

篋墩集。瓊山邱公。每謂作文必本於經。爲學必見於用。考古必證於今。鄙意適然。遂爲知己。其詩如仙翁劍客。隨口所出。皆足驚人。雖或兼雅俗。備正變。體裁不一。然諦視而徵誦之。氣機流觸。天籟自鳴。格律精嚴。亦不失人間矩度。

雙槐歲鈔。瓊州定安縣南。有五指山。卽黎母山。瓊崖之望也。少保邱文莊公。少時詠之。爲人所傳誦。詩曰。五峯如指翠相聯。撐

起炎州半壁天。夜盪銀河摘星斗。朝探碧落弄雲煙。雨餘玉筍空中見。月出明珠掌上懸。豈是巨靈伸一臂。遙從海外數中原。識者知其異日必貴。後竟如其言。

蔣冕瓊臺詩話。仲深先生在翰林爲名學士。在太學爲名祭酒。名聞四海。朝鮮國人見先生送張中書使其國詩。用魚鱉成橋事。歎曰。自古詩人未有用此者。詩云。玉節煌煌照海東。奏君去意拂晴虹。風麟瑞世人爭視。魚鱉成橋道自通。天入元菟低沒鵲。江浮鴨綠澹蜚鴻。茲行喜從文章客。多少豪吟倡和同。又先生送陳修撰使高麗詩云。海上天風吹節旄。玉堂仙客錦宮袍。詔頒龍闕恩偏渥。詩到雞林價倍高。萬仞紫金浮曉日。一江鴨綠漲秋濤。遠夷未識中原鳳。爭觀文章五色毛。又送凌尚寶使交南云。旭日初昇萬國明。銀函玉札下南溟。符臺自昔瞻躋月。遠道於今望使星。老樹古香生桂蠹。亂山殘雨帶龍腥。茲行萬里真奇絕。好把新詩紀所經。

升菴集。邱文莊公夫人。自南海浮江而上。過鄱陽湖。夜夢達官呵擁入舟曰。吾乃翰林編修戚淵也。昔與邱先生同官。義不容絕。特報爾。三日後有風濤之險。隻帆片櫓無存。可亟遷於岸。夫人驚覺。如其言。移止寺中。未幾江中果有風濤。衆舟盡溺。至京。夫人白其事於文莊公。公以聞於朝。遣官諭祭。文莊又爲文祭之。有詩紀事曰。幽顯殊塗隔死生。九原猶有故人情。受卿眞作芙蓉主。太白常留翰苑名。念我冥冥來入夢。哀君側側每吞聲。朝回坐對黃封酒。悵歎雞壇負舊盟。

田按土木之變。人情洶懼。有議棄宣府者。官吏軍民紛然爭出。右副都御史羅公亨信。巡撫宣府。仗劍坐城下。令曰。出城者斬。又誓諸將爲朝廷死守。人心始定也。先挾上皇至城南。傳命啟門。亨信登城曰。奉命守城。不敢擅啟。時寇騎日薄城下。亨信卒與總兵楊洪。得全孤城。亨信卒。秦和王公直爲作墓誌。略不及此。瓊山邱公作輓羅都御史詩。以補其闕云。六飛北狩無消息。邊城四望狼煙赤。敵馬長驅去復來。何人卻建捐邊策。鎮朔將軍生入關。北門鎖鑰空餘鑿。強兵健馬盡南走。黃塵蔽日天漫漫。白首靈臣南海客。手持一劍當門立。誓與孤城同死生。怒髮衝冠氣千尺。車輪生角馬駐蹏。居人不動行人歸。叱咤之間樓櫓具。金城鐵壁湯爲池。雲州失守赤城破。健兒蹠足城邊過。老妻穉子盡登陴。公亦援袍雪中坐。山前山後無敵城。此城屹立

如巨屏敵騎南來資扼塞。王師北出恃屯營。屏蔽京師功卓偉。設有長城長萬里。江淮果賴張真源。河朔僅餘顏御史。憂國勞邊兩鬢霜。事成乞骨歸故鄉。肘間腰玉者寒路。無人上書訟陳湯。一葉扁舟五湖水。瘴海邊頭萬山裏。折簡不通朝貴書。抱膝長吟聊爾爾。羅浮山崩天墜星。乾坤一夜收英靈。公兮生死已無愧。邊人至今嗟未平。明史槩括此詩意。爲亨信立傳。詩之有關繫如此。

送人入蜀

嗟君萬里去。孤棹下雲安。地濕天長漏。時清道不難。江流春泛雪。灘石午生寒。如過臨邛令。琴心莫浪彈。

送友人涂景旻下第歸五羊

曉日都門道。春風酒一杯。爲憐君獨去。卻憶我同來。楊柳春堪折。芙蓉秋始開。臨歧凝望逸。目斷越王臺。

和李子搆都門春日韻

碧桃花底共鳴珂。雲淡風柔氣候和。輦路雨餘生嫩草。宮河冰泮動微波。近天樓閣逢春早。向日園林得煖多。我有新詞三百闋。興來呼酒對君歌。

瓊臺詩話。趙松雪集。載李子搆海子上卽事詩云。馳道塵香逐玉珂。彤樓花晚鼓雲和。光風漸綠瀛洲草。細雨微生太液波。月榭管絃鳴曙早。水亭簾幙受寒多。少年易動傷春感。喚取蛾眉對酒歌。邱仲深先生偶閱之。諷詠數次。時冕侍側。因覓紙和之。落筆卽成詩云云。子搆名才。元京兆人。生十七。與松雪翁同於海子上賦詩。松雪稱其詩。雜於唐人中。未易辨也。以冕觀之。先生之詩。其亦無愧松雪所謂哉。

送畫竹屈生

東風吹散漕河冰。旋買吳船載酒行。野樹依依連故國。雲山點點引歸程。郢中誰和陽春曲。吳下多傳子夜聲。白首奉常無恙在。韞才應已付鄉生。

客中對月

萬里思歸客。傷心對月華。願憑今夜影。回照故園花。

張甯十三首

甯字靖之。海鹽人。景泰甲戌進士。除禮科給事中。出爲汀州知府。有方洲集二十六卷。

詩談海鹽張靖之高雅得唐調。

藝苑危言。張靖之如小權急流。一瞬而過。無復雅觀。國雅靖之縱調。騁情頗稱作者。其采蓮。昭君。風力。丹彩。俱備。堪以陶寫幽心。至林葉經霜。盡河冰近午。開是前賢未振語。殷璠所謂意新理快。斯得之。

紫桃軒雜綴。張黃門靖之。負海內重名。與時不能俯仰。拂衣早退。性喜繪事。不輕與人點染。余少時曾見其海天落照。石梁飛瀑。二幀。極詭麗奇偉之觀。近又見李白看廬山瀑布圖。泉壑樹石。縱橫森布。一唐帽紅衫人。仰面掀鬚。豪態溢出。知其有傾河倒峽之氣。鬱盤於胸也。抑先生假以自寓乎。

無聲詩史。張靖之詩思敏捷。工人物山水。

靜志居詩話。黃門致仕歸築方洲草堂於海濱。疊石爲山。上有峯曰蒼玉。曰挂頰。曰小飛來巖。曰宿雨。曰滴露洞。曰歸雲坡。曰蘭雪岫。曰茶煙嶼。曰詠月壘。曰卓筆泉。曰洗硯池。曰暎山。皆劖於石。而通日之曰一笑山。家居三十年。歌詩畫筆。與雲東逸史。

齊稱暮年無子。有二婢子。曰寒香。晚翠。剪髮自誓。不下樓者四十年。有司以聞。詔旌爲雙節。釋明秀詩云。交頸雲環報主恩。鏡臺花落洗頭盆。同心誓死方洲上。霜月寥寥夜照門。一時和者甚衆。黃門嘗過杭州。潑墨寫目。送飛鴻。手揮五絃圖。縱橫潦草。侍婢笑之。題詩云。閒尋敗筆作圖畫。小鬢侍立笑欲倒。山頭積似土灰堆。樹根亂若蓬蒿草。所云小鬢。殆卽寒香。晚翠乎。

田按靖之成化中。以給事中使朝鮮。有贈朴判書詩云。朝鮮賢臣朴判書。老成風雅非凡儒。維山玉筍鳳凰侶。弱流鐵網珊瑚株。鴨綠江頭始相見。雅度清談便依戀。曲池春水曉同吟。驛路東風夜供燕。判書名元亨。朝鮮陪臣。充館伴者也。靖之遊太平館。賦七言長律六十韻。朴隨和之。殊不相下。靖之得溪流殘白春前雪。柳拆新黃夜半風之句。朴攔筆曰。不能屬和矣。靖之對客揮毫。驚動遠齋。馬工不如枚速矣。

士女圖

吳城士女越樣妝。籠冠盤髻銷金裳。東風淡蕩桃李月。看花不語情何長。女伴相將牽稚子。庭院無人花正芳。陽春宛宛白日暮。空抱花枝歸洞房。

田按靖之死後無子。有二妾曰寒香。晚翠。自誓不下樓者四十年。靖之士女圖落句云。陽春宛宛白日暮。空抱花枝歸洞房。人以爲詩識。

舟過富陽

離家纔十日。鄉思漸多遠。江近村居少。山高石路危。野人驚客至。水鳥傍船飛。何處桐廬縣。蒼茫對夕暉。寧遠東南有山。居海中。去岸二十里。名覺華島。中有大龍宮。千佛院。皆金人所建。土僧數十人。自相耕鑿。若與世隔者。每歲一城薪炭。皆仰給於此。聞其中甚幽絕可愛。惜行役匆匆。不能一到。

古刹寥寥海島邊。行人指點說當年。山門未乞新開額。常住猶耕舊施田。寒日每輸城邑炭。漁舟時送佛燈錢。官程咫尺空經過。悵望煙波思渺然。

爲遼東巡按陸侍御平題畫

蕭蕭落木翳林垆。野色催寒帶晚晴。滿地秋風吹雨過。亂山斜日照人行。草荒別墅鷗盟遠。雲護空壇鶴夢清。彷彿江南舊遊處。小橋西舍讀書聲。

爲徐甘谷寫枯木竹石

梓澤荒涼勝覽空。平泉無樹領春風。與君共老滄江曲。晚色寒聲滿釣篷。

題子昂馬圖

沙蹟春深苜蓿肥。錦鞍新卸遠行歸。牧兒不敢從南牧。手挽弓梢看雁飛。

寄張天所

杜陵莊南雲氣昏。尙胥橋北水連邨。春來日日多風雨。一棹浮查直到門。

題梅道人畫

荒山亭館客遊稀。瀑布無聲野鳥飛。愁絕梅花庵外路。年來風景故應非。

龜溪晚泊

桑柘陰陰碧草齊。隔溪茅屋夕陽低。村南村北無人迹。惟有山雞背水啼。

懷舊

吳興佳境道場山。絕壁迴崖紫翠間。十載舊遊渾不忘。畫船攜酒上蘇灣。

彥敬小景

陰陰綠樹草堂低。積雨初晴水滿溪。門逕晝長人不到。百花深處一鴛鴦。

村店

暖風吹綠山前草。膏雨染紅溪上花。滿地芳菲春未歇。古林幽屋是誰家。

秋江煙艇

山水風煙共一舟。清羸詩病不禁秋。殘陽欲盡寒潮落。欲采江蘺寄遠遊。

周瑛三首

瑛字廷潤。興隆衛人。景泰甲戌進士。授刑部主事。歷員外郎中。出爲臨安知府。改衡州。擢太僕寺卿。復出爲廣西布政使。有草亭存稿。

傅汝懷黔風舊聞錄。草庭詩。情實古雅。稱其爲人。

黔詩紀略。正景之際。灑頭沅首。風雅漸興。草亭詩能自造風格。惜傳者太少。不盡所長。

飛泉二首

下馬碧山阿。散坐清溪濱。退觀千古上。地下人已陳。引手弄潺湲。與君懷抱均。安能被炎汗。日與簿書親。北山深窈窕。遠接漁樵蹤。中有寒泉水。如奏嶧陽桐。灑雨映疏竹。隨風鳴長松。坐久人迹絕。孤雲起前峯。

次韻丁天玉遊凌元洞

雞鳴桑樹深。犬臥苔花溼。何處課春耕。猶倚斜陽立。

易貴一首

貴字天爵。貴竹長官司人。景泰甲戌進士。官辰州知府。有竹泉集十五卷。

黔詩紀略。竹泉先生。淹貫羣經。尤長於易。嘗構別業於貴陽城北二里許。讀易巖谷中。至今稱點易巖。考明史藝文志。易貴詩經直指十五卷。黃虞稷千頃堂書目。易貴竹泉文集十五卷。朱檢討華尊經義考。亦載易氏貴詩經直指。佚記長老言。易氏易經直指。亦十五卷。今皆未見。黔人箸述。見於史者。別集始於王教授訓經說始於先生。並明一代貴州文教學祖。其開創之功。不在道真長通下。

別辰陽士民

明時多循良。美化接州郡。惟予拙無如。竊守已逾分。喜茲士民好。敦樸肯我近。深慚教養疏。百一未能盡。引退緣避賢。遮留愧斑斕。人生有本業。努力勤自奮。詩書守儒術。名業可騰振。田疇勤力作。衣食天肯靳。我歸亦無事。把卷一農畷。

何喬新五首

喬新字廷秀。一字天苗。江西廣昌人。家宰文淵子。景泰甲戌進士。授南禮部主事。改刑部。歷員外郎中。遷福建按察副使。改河南。擢都察院右僉都御史。巡撫山西。遷刑部侍郎。進尚書。卒。贈太子少傅。諡文肅。有椒邱集三十二卷。

雙槐歲鈔。成化庚子。內閣劉吉丁外艱。詔賚以羊酒寶鈔。起復視事如故。吉三上疏辭。託貴戚萬喜。得不允。陳編修晉。上書勸其力辭。吉不答。人無敢言者。吉每談笑對客。殊無戚容。丁未。今上新政。科道交糾。萬安尹直。以次罷遣。吉獨不動。慮科道言之。乃傾身阿結。昏夜款門。斬免彈劾。建言欲超遷科道。待以不次之位。去治改元。風雷發自天壽山。毀瓦傷物。震驚陵寢。上戒諭羣臣修省。遣官祭告。於是左春坊庶子兼翰林侍讀張昇疏言。應天之寶。當以輔導之臣爲先。今天下之人。敢怒而不敢言者。以奸邪尙在樞機之地也。因數吉十罪。且謂李林甫之蜜口劍腹。賈似道之牢籠言路。合而爲一。科道交章劾昇。指爲輕薄小人。上命謫昇南京工部員外郎。其同鄉何喬新。贈以詩曰。鄉邦交誼最相親。忽向離筵勸酒頻。抗疏但求碑聖治。論思端不忝儒臣。自憐石介非狂士。任詆西山是小人。暫別巒坡非遠謫。莫將辭賦弔靈均。由是人目吉爲劉棉花。以其耐彈也。田按尙書詩。溫雅有則。澤古者深。與凡響自別。

題黃君愈宣江山一覽亭

山翁不川溺。溪翁不山住。茲亭何巍巍。妙得江山趣。浮光混簾櫳。飛翠墮窗戶。江山百里間。一一堪指顧。披雲款巖扉。乘月泛煙渚。鷗鷺狎琴尊。麋鹿隨杖屨。悟茲動靜理。悠然豁心慮。嗟予抱清尚。山水夙所慕。

聞君構危亭。便擬投簪去。憑高騁遐矚。允矣愜中懷。

金章宗畫馬圖

明昌天子世宗孫。善書善畫兼善文。揮毫拂素貌騏驎。神妙不數曹將軍。龍鬣鳳臆真無比。汗血猶沾渥
注水。汧陽雲錦非不多。如此權奇能有幾。憶昔武元起海東。從騎躩蹠皆游龍。西馳木葉風沙靜。南蹴大
梁榛棘空。梁王已死陳王戮。飲馬泉荒無苜蓿。天閔十二俱下材。薄蹠秃尾空多肉。此圖想是建國初。明
昌以後此馬無。北荒鐵騎忽馳驟。山後山前草木枯。

庾公樓

庾樓昔日瞰江濟。高棟危闌截風雨。年深傾圮成荒邱。月冷蘆江嘯杜宇。庾公蕭灑清談人。連輝椒掖秉
國鈞。寡謀輕啓歷陽釁。臨難鼠竄私其身。寇平尙委免誅殛。猶秉旌旄鎮南國。神州未復羯虜驕。擁衆何
常翦仇敵。當時參佐殷謝徒。嘯詠風月無遠圖。樓中開宴揮玉麈。志識僅比牧豬奴。九原冥冥不可作。雲
散太虛水歸壑。廬山飛瀑和雨來。似爲元規洗餘惡。

沅州

潭陽遠在夜郎西。石徑縈紆路轉迷。俗獷猶存盤瓠舊。林深只聽鷓鴣嘯。茅簷凋敝哀三戶。嵐靄氤氳接
五溪。欲弔靈均何處是。江頭蘭芷正萋萋。

道旁李花爲風雨所殘

縞袂珠襦白玉冠。含悽無語怨春寒。東風不爲多情惜。無數殘鈿趁馬鞍。

李裕五首

裕字資德。豐城人。景泰甲戌進士。授御史。擢山東按察使。遷陝西布政使。入爲順天府尹。進右副都御史。總督漕運。巡撫江北。再進右都御史。調南京。尋入爲工部尙書。進吏部。有餘力稿。

因樹屋書影。李太宰古澹集。翻唐響。

田按尙書。晚以李攸省進。致干清議。詩頗近雅音。

褒城道中

褒斜通蜀漢。百折擁岡巒。崖際戍樓出。山腰棧道盤。霜林萬葉盡。茅屋幾家殘。少憩谿頭石。猿嘯落日寒。

龍山驛偶作

驛路通山谷。人家傍驛亭。芋田和雨種。竹牖帶煙扃。沙淺溪流碧。春深野燒青。一樽聊自酌。高詠有誰聽。

莒州道中

盡日馳驅不憚勞。瑯琊陵谷半蓬蒿。囊沙洲畔雲初起。呪虎臺前鳥自號。莒水東歸滄海闊。蒙山斜倚穆陵高。不堪滿目多遺事。馬上吟餘首重搔。

開河夜行

日落煙水暝。秋聲浦樹多。船頭聞犬吠。知己近開河。

經九曲池

煬帝行宮俯蜀岡。木蘭亭榭已荒涼。可憐九曲池中水。猶帶哀音過柳塘。

段堅一首

堅字可久。肅府儀衛司人。景泰甲戌進士。授福山知縣。擢萊州知府。改南陽。

明儒學案。可久得聞禹錫。自良輔。以泝文清之旨。雖未及門。而郡人陳祥贊之曰。文清之統。惟公是廓。則固私淑有得者也。

田按。可久弟子周憲。字小泉。爲蘭州戍卒。恭順侯吳瑾。總兵於陝。聘爲子師。小泉固辭。或問故。小泉曰。總兵役某。則某軍士也。召之不敢不往。若使教子。則某師也。召之豈敢往哉。肅藩樂人鄭安。鄭甯。乞除樂籍。從周先生讀書。可久訪小泉。不遇。詩云。小泉泉水隔煙蘿。一濯冠纓一浩歌。小泉著述罕見。附記於此。

失題

風清雲淨雨初晴。南畝東阡策杖行。幽鳥似知行樂意。綠楊煙外兩三聲。

謝省一首

省字士修。黃巖人。景泰甲戌進士。南兵部員外。出知寶慶府。

晨登巾山

初日上高峯。輕煙散林薄。一徑不逢人。坐聞松子落。

康麟二首

麟字文瑞。順德人。景泰甲戌進士。福建按察僉事。

田按文瑞輯雅音會編所作規撫前賢。雖局邊幅亦無俗響。

冬日有懷東李公子

金陵淹旅食。況復歲華深。倚樓一聲雁。離人千里心。青燈寒照影。白雪苦牽吟。賴有賢公子。時來叩音。

除夜有感

旅館蕭條歲事闌。獨憑杯酒強爲歡。家林親舍三年別。客路梅花幾度看。春意又從今夕煖。宦情還似舊時寒。催人光景如流水。莫遣秋霜點鬢端。

彭華一首

華字彥實。安福人。景泰甲戌進士。改庶吉士。授編修。歷侍讀。侍讀學士。翰林學士。詹事。進吏部侍郎。入內閣。參預機務。加太子少保。進禮部尚書。卒。贈太子少傅。諡文思。有素菴集十卷。

次丹邱表兄過桐廬韻

知君謫宦爲彭澤。我亦棲遲桂嶺東。鴻雁情深長惜別。琴書道在未爲窮。青山笑客頭先白。綠酒欺人顏

易紅莫向桐廬悲失意披襟且挹釣絲風。

陳政一首

政字宣之番禺人景泰甲戌進士選庶吉士終雲南按察副使有東井集。

灤州道中

幽谷春深煖尚遙挾陰殘雪未全消野禽似解吟邊意飛傍肩輿過石橋。

杜庠一首

庠字公序長洲人景泰甲戌進士除知攸縣有楚遊稿江浙歌風集。

靜志居詩話公序嘗過赤壁題詩張汝弼奇之一時呼爲杜赤壁。

送吳瓊州

瓊守相逢晚來從海舶頭鳥微猶有國沙盡更無州風雨迷蛟室雲霞結蜃樓喜聞爲政好黎俗遍歌謳。

彭澤七首

澤字民望攸人景泰丙子舉人除應天通判有老葵集。

懷麓堂詩話吾楚人多不好吟故少師授彭民望少爲諸生偏好獨解得唐人家法如淵明圖詩曰羲熙人物幾皇上典午山河甲子中恨殺溇陽江上水隨潮流過石城東幽花曰脈脈斜陽外微風助斷腸桔槔亭曰春風滿溪水不見野人勞皆佳句

也。獨不自貴重。詩不存稿。子輯而藏之。僅百餘篇而已。

沅湘耆舊集。民望詩宗法甚正。涯翁稱其清而腴。簡而有餘。見之而可親。追之而不能及其所之。其傾倒如此。田按老癸風調適上。七律尤推擅場。正統景泰間。不多見也。

題淵明圖

歸來三徑已秋風。籬下依然菊滿叢。五斗折腰羞作縣。百年多難早成翁。義熙人物羲皇上。典午山河甲子中。怪殺潯陽江上水。隨潮流過石城東。

泊岳陽樓下

平湖空闊水浮煙。孤嶼依微樹接天。歲月有期陵谷變。神仙多事古今傳。城樓吹笛風迴市。沙浦鳴榔月滿船。細讀屈騷哦賈賦。淒涼遺事使人憐。

北園踏雪

雪擁平園路有無。短筇雙屐細縈紆。身隨野鶴行應慣。詩到梅花興轉孤。灞上他年憐鄭棨。湖西無地著林逋。便當喚取徐黃手。寫作寒天一老圖。

九日陳師召李賓之陸克深天錫同遊月河寺

欹側危亭勢欲崩。亭前花草錦交塍。分題次第詩聯軸。勸客殷勤酒滿升。遠寺夕陽留塔影。西風落木見

山棱英雄郭隗名猶在。千古荒臺試一登。

歌風臺

豨破跡奔幾戰爭。親于此地駐旄旌。荒臺會見高歌日。小縣猶存古沛名。幾載艱難天下業。千秋魂魄故鄉情。危亭寂寞山河裏。剝落殘碑野草生。

淮口阻風

淮河波浪接雲長。浦口人家住渺茫。桃葉有歌空悵望。柳花無賴正顛狂。高原舉目風塵暗。孤剝題詩落日黃。欲把靈龜問詹尹。好風何日送帆樑。

金陵雨後登樓

醉倚危闌看雨收。分明遠樹見晴洲。千年壯麗山爲郭。十里人家水繞樓。燕子近來誰是主。鳳凰已去有遺邱。如何東晉諸名士。卻上新亭雙淚流。

黃瑜一首

瑜字廷美。香山人。景泰內子舉人。知長樂縣。有雙槐詩集。

田按廷美所著雙槐歲鈔。世稱淹貫。詩亦不涉俗韻。

送張九衢都帥北上時鎮惠潮

環佩趨天北。帆檣向斗東。離情滿江漢。秋色入梧桐。飛輓三河道。傳宣五柞宮。巖廊用儒將。應見虜塵空。

明詩紀事卷二十

乙籤

劉溥四首

溥字原博長洲人宣德初授惠民局副使調太醫院吏目有草窗集二卷

南濠詩話長洲劉溥八歲賦溝水詩云門前一溝水日夜向東流借問歸何處滄溟是住頭後仕雖不顯卒以詩名藝苑卮言景泰中稱詩豪者十才子而劉溥湯胤緯爲之首湯尤縱誕每稱杜陵無好句然與劉論詩伏不出一語

王錡寓園雜記劉廷美爲刑部主事居京師與徐武功劉原博諸公爲詩友每相過必談論達旦嘗歲除廷美旅邸無聊原博邀之守歲廷美因挾所藏鍾馗畫像求題原博遂援筆大書一詩於上明且持歸懸之中堂京師風俗每正且主人皆出賀惟置白紙簿并筆硯於几賀客至書其名無迎送也是日朝罷劉定之黃廷臣兩學士首至見此詩各摘簿一葉錄之以去朝士繼至者皆摘錄之頃間簿已盡矣廷美晚回索簿閱賀客以圖往報家人告其故明日復置一簿亦如之中書舍人金本清戲謂廷美曰此鍾馗乃耗紙鬼也一時京師傳爲奇事原博詩曰長空湖雲夜風起不分成羣跳狂鬼倒提三尺黃河冰血灑蓮花舞秋水飛螢負火明月羞櫺窠影黑曠鷗鷗綠袍烏帽遶行事礮臚剗腸天亦愁中有巨妖誅未得盍駕輶輪驅霹靂如何袖手便忘機回首東方又生白

田按原博在景泰中負盛名惟律體及絕句差有可觀當時如童士昂聶壽卿輩均不得與十才子之列時論之不足信如此

寒食日過胡汝器墓

雨晴泥滑路微分。駐馬南原日未曛。白下一杯寒食酒。青山三尺故人墳。野田行客愁深草。江樹殘鷺泣斷雲。俯仰光陰傷往事。落花清淚共紛紛。

感懷

塞雁南飛又北旋。上皇音問轉茫然。孤臣自恨無容地。逆虜誰能共戴天。王衍昔年知石勒。謝玄何日破苻堅。京城四塞山河固。一望龍沙一淚漣。

麗堂詩話。劉草窗已巳歲塞雁南飛一詩。聞者傷之。今所刻本。似此者蓋不多也。

田按英宗北狩。當時見之篇詠者。張和與朱千戶夜話詩云。客裏相逢感慨深。劍歌時復動悲吟。清尊坐對三更月。紫塞遙馳萬里心。瀚海地荒龍馭遠。交河風急雁書沈。微生愧乏安邊策。北望長天淚滿襟。張甯感事詩云。羽書昨夜報居庸。百萬雄師下九重。天子垂衣臨大漠。羣臣喘笏扈元戎。禁中已乏回天諫。關外誰成闢地功。千載澶淵扶日穀。令人卻憶寇萊公。寶馬朱輪接上游。時危誰解奉天憂。鼎湖龍去英雄盡。劍閣雲深日月愁。玉帛已隨胡地草。青山依舊漢宮秋。元勳野死潼關破。談國何人更首邱。與原博感懷一詩。讀之令人拔劍起舞。

題福山曹氏畫

歌舞當年只醉遊。不知何物是閒愁。如今桐樹無人洗。風雨空山幾度秋。

列朝詩集。福山曹氏。富甲一郡。植梧桐數畝。主人將納涼其下。令人以新水沃之。謂之洗梧。淮兵由福山入。吳。曹氏園亭首被禍。故草窗詩云。

偶作

燈影分明隔絳橋。玉階行盡轉迢迢。春風只在銀屏裏。殘雪和愁幾日消。

湯胤績三首

胤績字公讓。濠梁人。東甌襄武王曾孫。授錦衣百戶。轉千戶。景泰中。進指揮僉事。坐事謫爲民。編籍常州。成化初復官。充參將。守延綏。戰沒。有東谷集十卷。

劉昌懸。字瑣探。予在史館時。日請良醞酒一斗。然飲少多有藏者。湯東谷胤績。從予索之。詩曰。兼旬無酒飲。詩腹半焦枯。聞有黃封在。何勞市上沽。予嘗至其第。見其廳事春聯曰。東坡居士休題杖。南郭先生且濫竽。後堂曰。片言曾折虜。一飯不忘君。蓋東谷嘗從興濟伯。禮部尙書楊忠定公善。奉迎鑾輿。故云。其東偏曰。暫拄西山笏。閒開北海尊。其西偏曰。長身惟食粟。老眼漸生花。豪俠之氣。可以想見矣。

七修類稿。湯胤績志大言大。武略少可。而詩文亦稱是。李文達當國。見其有大志。且通文墨。亦重之。每自言。士不脫穎而出。何見其才。使某獨當邊方一面。必有可觀。李因薦爲參將守邊。一日與友人正飲間。敵人牧馬城下。遂勒兵出。語友曰。某擒此胡來飲。不意胡人大至。湯兵寡無援。胡直前一箭而斃。數月後。口外通州驛。天色將暝。忽有兵官驕從甚盛。來坐中堂。令免供具。但索紙筆燈燭。閉戶而寢。明早驛吏候起。寂然無聞。開門惟見壁間一詩。末句云。血污遊魂歸不得。幽冥空築望鄉臺。一時哄然。人以湯素好怪。而死亦有怪焉。

藝苑卮言。湯公讓詩。如淮陰少年。斗健作噉人狀。

妓

閒臨金鯉小方池。自掬清泉洗面脂。約伴海棠亭上去。袖揮花影坐彈碁。

俠

四郊射虎漸縱橫。雁子都兒怕出征。解辦月錢供內省。終身常隸國西營。

絕句

薰風十里綠楊隄。一色樓前首尾齊。醉擁胡床歌水調。秋孃只在畫橋西。

蘇平三首

平字秉衡。海寧人。永樂中舉。賢良方正。不就。有雪溪漁唱。

水東日記。海昌詩人蘇秉衡。嘗言宋一代近體詩。其彷彿唐人。僅王禹玉元夕一詩耳。猶惜其鑄京春酒沾周晏。沾周字音調不諧。易沾爲陪可也。高棅軒太史詩二千首。亦只取其夜聞吳女誦經一律。然好事者。則以八字管定秉衡近體詩。云。禁是則莫能爲也。蓋與許洞詩僧事相類云。

靜志居詩話。鄒御史克明。作三奪詩。以秉衡爲首。其次湯公讓。其次劉原博。克明名在十子之列。在同調亦不免嘲笑之。他可知已。

送沈愚歸玉峯

皇州鶯囀柳條新。客路那堪此送君。歸夢不離吳苑月。還家高臥玉峯雲。江村貰酒逢寒食。驛路看山對夕曛。最是臨歧分手處。落花離思共紛紛。

秋日書懷

十年京國敝貂裘。萬事無成已倦遊。客裏青衫司馬淚。天涯明月杜陵愁。秦淮煙暝砧聲夕。楚澤雲深雁影秋。南望故園歸未得。懶將詞藻賦登樓。

和沈愚閭門柳枝詞

此地吳王舊市朝。空遺衰柳日蕭蕭。行人不用頻回首。煬帝宮前更寂寥。

蘇正一首

正字秉貞。平弟。有雲壑集。

田按秉貞與兄秉衡名列十才子。

重遊金陵有懷玉山沈愚

歧路東西奈別何。壯心憔悴惜蹉跎。重來雲物非前度。黃葉秋風積恨多。

沈愚四首

愚字通理。崑山人。自號崑峒生。有箕籟、吳歛二集。

寓園雜記。崑山沈通理詩。清麗微婉。樂府尤高。有吳宮詞諸篇。往往膾炙人口。又有續香奩四卷。蓋倣韓致堯之作。

崑山人物志。沈通理善章草。工詩。清圓錯落。如珠相聯。滾滾不自休。嘗雪夜賦絕句云。瓦爐溫酒夜燈前。紙帳梅花伴鶴眠。不

似玉堂金馬客。五更風雪去朝天。業醫授徒以終其身。

筆精吳人沈愚善書工詩。

靜志居詩話景泰十子才多下中。通理特爲翹楚。

長安道

西望長安道。東風吹綠塵。鬪雞三市曉。躍馬五陵春。柳色迷行客。花香撲麗人。金張居戚里。遊宴不辭頻。追和楊眉菴次韻李義山無題詩

蘭槳雙欵倚桂舟。隔花臨水思夷猶。香囊玉佩勞相贈。繡幄銀屏惜共留。愁繞鳳凰秦樹暝。夢回巫峽楚雲秋。多才苦被春情惱。鏡裏潘郎雪滿頭。

金井怨

牽絲猶怯冷。照影卻含羞。獨立梧桐月。芳心不奈秋。

題畫

汀蒲短短柳毵毵。三月桃花水滿潭。攜酒抱琴同一醉。人生只合住江南。

晏鐸二首

鐸字振之富順人。永樂戊戌進士。改庶吉士。授監察御史。以言事謫。上高典史。有青雲集。

田按振之盛有詩名。列景泰十子。金陵春夕詩云。花月金陵十四樓。事詳十四卷揭軌詩後。

登黃鶴樓

宦遊歲月易蹉跎。登覽其如感慨何。黃鶴不來仙已去。古樓猶在客重過。青山遠樹寒煙積。芳草平洲夕照多。此日獨吟傷往事。長江渺渺水空波。

聞笛

河橋楊柳半無枝。多爲行人贈別離。羌女不知蕭索盡。月明猶向笛中吹。

王淮一首

淮字柏原。慈溪人。有大塊稿。

列朝詩集。柏原好作長歌。下筆輒數十韻。造語奇麗。擅名江湖間。景泰十才子之一也。

溪村晚泊

暝色蒼茫欲暮天。溪行偶此住蘭船。竹枝倒映清潭月。花樹低籠斷岸煙。梵寺鐘聲村墅外。驛樓燈火市橋邊。今宵寥落誰爲伴。數點沙鷗對客眠。

鄒亮一首

亮字克明。長洲人。正統初。用薦授吏部司務。遷南監察御史。有鳴珂、漱芳等集。

田按克明列名景泰十子。嘗作三夸詩。譏劉原博。湯公讓。蘇秉衡。然所作亦無以相勝也。

湘中絃

渺渺煙波帶白蘋。露寒風細月如銀。沙棠舟上愁回首。只聽猿聲不見人。

蔣主忠一首

主忠字存恕。儀真人。徙句容。有集。

田按主忠名列十子。

經龍潭故居

不到故園久。寧辭歸路遙。山光自今昔。人物歎蕭條。古鎮東西市。長江旦暮潮。何當尋舊業。來此伴漁樵。

王貞慶一首

貞慶字善甫。定遠人。駙馬都尉永春侯甯子。有茗芋集。

列朝詩集。駙馬都尉王甯。以文雅著。嘗與姚少師。釋南洲。爲鬪茶之會。有詩流傳。長安以爲韻事。子貞慶。尤工詩。折節好客。劉原博諸人集中。所稱金粟公子者也。亦十才子之一。

清明日寫懷

地僻長時少送迎。坐看春色又清明。傳家舊物青氈在。處世中年白髮生。楊柳東風猶料峭。杏花疏雨半陰晴。寒翁得失何須論。且共沙鷗暫結盟。

明詩紀事卷二十一

乙籤

魏時敏十七首

時敏字竹溪，莆田人。官無錫縣丞。改宿遷。筆情列朝詩集，明詩綜均作改桃源。今從未軒集作宿遷。有竹溪詩集。

黃仲昭未軒集。竹溪天資警敏，覺出等夷。有司辟爲邑從事。日坐曹署，治文牋，暇則焚香鼓琴，灑墨作山水，尤篤意於詩。遊京師，與姑蘇劉欽謨、同邑周次玉往來倡和。由是竹溪之名，傳播遐邇矣。謁選時，家宰尹旻聞其名，試以詩，有簡拔自漸。非漢吏，威儀今喜識周官之句，大爲稱賞。遂拜吳錫縣丞。改宿遷。未幾致仕歸。其在無錫及家居，皆倡一時名勝爲詩社。年八十餘，猶未嘗一日廢吟事也。其五言如寄吳太守、孤燈殘夜夢、千里故人心、送林郎中致政、煙雲新世態、花竹舊郊居、題巖山清隱、軒冕浮雲裏、江山醉眼中、七言如懷江湖故人、千里宦情星北拱、百年人事水東流、秋日病起、黃花籬落家家酒、白雁江天處、處砧寄余汝盛、閒吟有客知何遜、獨酌何人識馬周、集名竹溪，其氣和平，其體正大，其味雋永，藹然有盛唐風致。

筆精，余閱燈市，有魏竹溪詩，雋永可味，警句甚多，不能殫述，細抽一二，以示同好。如殘歷愁中盡，流年夢裏過，容思秋聞雁，鄉心夜聽潮，林深芳樹合，磣轉夜泉分，身病仍耽酒，家貧易廢詩，交情貧後見，鄉夢客邊多，大空孤鳥沒，江闊遠帆來，野色低青嶂，亭陰壓翠苔，世途輕白髮，交態重黃金，川雲沈野色，溪雨亂泉聲，野水帆歸浦，秋山燒隔林，雨餘一水富，溪落嵐淨千峯入，戶低林隱曉嵐山，半出湖添秋雨水平鋪，茶竈蟻煙籠野色，硯池秋雨洗溪聲，白酒熟時留客醉，黃花開晚待詩催，一樽酒盡空明月，千里書來見故人，江上有詩楓落早，籬東無酒菊開遲，酒杯此別憑誰共，吟社他生得再回，皆婉轉切情，新越可喜。

蘭陔詩話。竹溪詩雅。練逸。無儒響弱調。品格當在開元大歷之間。

田按竹溪詩。鍊句選聲。步武唐人。有唐臨晉帖之似。

寄姑蘇劉欽謨

清貧終不厭。未老亦宜休。楊柳闔門曉。蒹葭震澤秋。園蔬乘雨種。林菓帶霜收。感慨應懷古。題詩上虎邱。

和王文偉韻

最喜投閒日。尊鱸正及秋。鐘聲林下寺。燈影水邊樓。老去仍青眼。吟多易白頭。還思爲客處。梧雨滴鄉愁。

秋夜有懷寄楊大使

孤館涼風發。長天白雁過。旅魂秋易斷。鄉夢夜偏多。野曠雲連樹。江寒月浸波。不知揚子宅。秋興近如何。

題湧泉巖

再入招提境。蕭條異昔時。流泉分古澗。荒蘚上殘俾。門掩花空落。人閒鳥不知。那能招惠遠。重與話心期。

題淨慈寺洪上人卷

爲客臨江館。尋僧到虎谿。路深春草合。鳥散夕陽低。呪鉢龍生雨。安禪燕落泥。焚香聽說法。轉覺俗途迷。

除夕宿大雲院

巖風吹野樹。溪雨浸山田。自汲烹茶水。誰供買酒錢。苦吟方得句。多病只貪眠。不管人間事。清閑過歲年。

偶成寄高尊卿

一春臥病掩荆扉。轉眼風光是葛衣。江郭雨晴榕葉暗。土莊地煖荳花肥。厭騎羸馬聽雞出。喜買扁舟載鶴歸。欲把長竿釣明月。白雲占斷子陵磯。

寄余汝盛

久旱村園豆麥焦。鑿池引水灌田苗。籬疏野竹橫窗戶。潮滿春帆礙浦橋。酌酒不愁無苜蓿。揮毫深喜有芭蕉。人生適意應如此。莫怪淵明懶折腰。

琴川道中

斷雁聲寒隴日昏。畫船搗鼓入孤村。燈前感舊無書劄。枕上思親有夢魂。短髮尙紆新宦牒。好懷都負舊琴樽。題詩卻憶山莊下。風雨瀟瀟書掩門。

休息軒

亭小貯琴聲。池清蘸花影。曉日上窗紗。幽人夢初醒。

題畫

雪裏青山茅屋。雨中芳草溪橋。野艇空橫古渡。滄江自落寒潮。

梅

歲晚行尋溪上春風遙憶隴頭何處一聲長笛月明醉倚南樓

送王生還金陵

故國征驂蹴曉冰別來春夢亦無憑回頭雲樹三千里何處關山是秣陵

閨思

別後衡門鎖不開年年春雨長莓苔東風似欲添離恨故引雙飛燕子來

途中憶錢塘

驛程迢遞路茫茫夜聽城笳斷客腸卻憶去年秋色裏一帆疏雨過錢塘

賞菊

短籬疏雨正離披淡白深紅朵朵宜自計老年才思減重陽過後不題詩

題出獵圖

驅馬駢弓意氣驕平原雪淨草蕭蕭西戎莫向雲中過大樹將軍正射鵰

趙不易一首

不易字秉庸順德人有一德稿

楊柳雙禽

千樹垂楊繞汴堤。錦帆去後草萋萋。迷樓紅粉俱塵土。野鳥逢春空自嘯。

湯琮一首

琮字畧庵。金齒衛人。

滇南詩略。畧庵正統間。與同郡陶甯、張志舉、程廣、曹遇、結詩社。

鸚鵡

翠閣香閨帶綠陰。忽聞靈舌轉嬌音。總將懷袖温存意。不稱雲林自在心。籠絡反因毛羽誤。矜誇休羨賦詞深。隴山烟羽春雛小。莫遣虞羅著意尋。

張志淳南園漫錄。郡有一士。以所題鸚鵡詩告先人。先人嘗誦之云云。此可以名湯鸚鵡矣。惜遠地無與張之也。

陶甯一首

甯字致遠。金齒衛人。

滇南詩略。劉大紳云。陶公詩風致絕佳。首開永昌風氣。

卽事

杜宇枝頭百舌吟。何人不動惜芳心。桃花紅雨梨花雪。鋪得春愁一寸深。

南園漫錄。永昌五十年前。時有爲詩者。多可觀。幼誦一絕句云云。又題菜燈云。草堂照破齋鹽夢。華屋燒殘肉食心。如此之類甚多。其人姓陶名甯。與今爲社學師者異矣。

邱吉三首

吉字大祐歸安人有順信齋集

田按永宣以來兩浙詩人多矜麗藻吳興則以邱大祐爲眉目時與歸之以較劉菊莊馬浩瀾輩邱爲差勝

呂山花園池亭

錦繡堆中着幔亭。香蘭芝草雜春情。黃鸝庭戶吹笙澁。金鯽池塘洗硯腥。綠蟻不空銀鑿落。雕闌長護玉娉婷。何人爲倩夸娥力。移得東湖小洞庭。

采蓮曲

細語呼人遠不聞。水光搖蕩石榴裙。一身肌骨無多重。欲入荷花化綵雲。

寄館天甯寺

茶爐吹斷鬢絲煙。借得禪林看鶴眠。不道秋風何處起。一堆黃葉寺門前。

賀麟一首

麟字文徵嘉興人

石門夜泊

驛路迢迢送夕陽。石門灣下泊連檣。買漁人喚溪邊棹。乞米僧歸竹下房。楓葉經霜時自落。羅衣臨水不

勝涼。且沽樽酒澆離思。明日看山認故鄉。

姚綸一首

綸字允言。嘉善人。有夢草編。

題畫

風景蒼茫地。人家遠近煙。雲低長礙樹。水遠欲浮天。白日消棋局。青山落釣船。平生蕭瑟意。對此轉相憐。

陳昌二首

昌字穎昌。平湖人。有菊莊集。

江湖勝覽

筆牀茶竈寄生涯。來往煙波到處家。帆影拂雲過九澤。猿聲嘯月下三巴。黃陵廟古多春草。白帝城空有暮鴉。寂寞不須傷往事。且沽尊酒洗梨花。

暮春寄友人

風風雨雨過芳時。斷送春光總不知。桃李野牆花落早。蘼蕪江國燕來遲。夜深檐溜寒無寐。日晏廚煙濕未炊。裘馬踟躕自年少。獨慚衰朽困天涯。

蘇大一首

大字景元休寧人。

田按景元嘗輯洪武以來詩爲明正音惜不傳。

山房睡起

砌草茸茸石徑斜。竹籬茅舍帶江沙。晝長睡起多情思。看遍林陰商陸花。

陸琦一首

琦字公璠嘉善人有友蘭集。

題雲林訪友圖次陳漢昭韻

爲愛幽棲好。乘閒一訪君。磴喧泉漱石。林暝樹藏雲。路向山腰轉。源從谷口分。坐探歸路晚。天末有斜曛。

李焘二首

焘字桓仲無錫人。

過潘韞輝東園

爲愛東園好。春來事事宜。藥名人不識。花信蝶先知。晉帖臨青李。商歌詠紫芝。小車乘興往。何必定幽期。

幽居

狂簡難諧俗。幽居頗自便。看雲常獨坐。聽雨或高眠。字許隣人問。詩從野老傳。久知山木喻。細讀養生篇。

懷悅一首

悅字用和嘉興人以納粟官通判有鐵松集

田按用和輯友朋倡和之作爲士林詩選四庫錄入存目用和家擅園亭之勝邱大祐蘇秉衡輩爲遊客賦詩贈答頗有顧阿瑛玉山雅集之風然用和不及阿瑛遊客亦不及玉山之盛也

春興

花氣醺人似酒醇東風隨處掃香塵不知畫舫琵琶月載得南湖幾度春

朱翰一首

翰字漢翔嘉興人有石田清嘯集

田按漢翔輯嘉興人詩爲構李英華可謂好事石田集中詩如芳草有情隨處綠白鷗無事傍人閒帆隨斷雁投荒浦家在寒塘掩暮雲山寺有僧留共飯石枰無鱗坐彈碁亦佳句也

送包山馬世用遊楚

鯉魚風急布帆輕酒盡離亭思不勝明月幾時經漢口好山何處是巴陵擬將鄉信憑秋雁誰與蓬窗坐夜燈會晤末期滄海遠曲闌從此爲君憑

周瑾一首

瑾字汝成秀水人。

感懷

紫燕銜泥巢已成。柳花入簾江雨晴。抱書臥病不出戶。空好一春花滿城。

倪光一首

光字應奎鄞人有味易詩集。

甬上耆舊詩。味易先生年八十生而舉殯。擬陶公自祭。杜牧之志墓事。懸像設奠。延慶寺爲詩自挽。羣公俱屬和。金太僕本清。別畫竹題一詩相寄曰。先生舉殯。吾爲寫生。其詩有言。舉世稱高士。闕天合少微。先生得之大喜。其作達如此。

訪茅山張鍊師不遇

客中曾有約。孤騎入茅山。一水落天上。亂雲生竹間。花深溪路遠。松老洞門閒。採藥不知處。月高猶未還。

章珍二首

珍字文重鄞人。

劉生

不事毛錐子。談兵動主君。開弓學明月。射雁落黃雲。桃葉迷歌扇。榴花醉舞裙。遨遊五陵地。結納李將軍。

題鄭汝誠所藏山水圖

南山春雨晴。西溪春水滿。孤舟釣夕陽。沙明綠蒲短。

黎擴一首

擴字大量。臨川人。以薦授貴池訓導。遷蘇州教授。有學鳴稿。

山茶

葉苦寒。摧綠花愁。雪妬紅。自知榮遇晚。不敢恨春風。

張淵二首

淵字子靜。歸安人。有鴻墩集。

史鑑西村集。子靜長髯秀目。儀貌樸野。吳吳作湖語。見者未之奇。及其微酣發興。以手拄頰。瞳目直視。且思且草。俄益十數紙。人始嘆服。

田按子敬嗜東坡詩。號夢坡。晚徙烏程水北。又號水北村農。史明古稱其詩。探隱摘微。抉蒐拾瑣。居蓄委積。無所不有。然後引而伸之。大放於辭。雲蒸川涌。翕張歛散。激射旋轉。殊形異態。層見疊出。觀者心顛目愕。不能言其狀。子靜長篇拉雜。明古狀之。可謂酷肖。余錄其較清穩者。

次韻沈陶菴題有竹莊

愛汝石田茅屋好。依然風物似斜川。白蘋洲渚滄江外。紅樹園林夕照邊。艇子打魚偏趁月。山童洗藥每臨泉。老夫欲問東家住。分取瓜疇數畝煙。

次陳滄洲重陽韻

置卻功名土苴間。滄洲長與白鷗閒。到門秋水當天坐。繞屋蘆花帶雪關。明月滿川惟載鶴。清江一笛正看山。祇慚碌碌東西者。贏得流年損壯顏。

蔡昇二首

昇字景東。吳人。有西巖集。具區百詠。

吳定璋七十二峯足徵集。景東輯太湖志。王文恪采掇爲霞澤編。著述甚富。梓行者有西巖集。具區百詠。

楊白花

楊白花。當青春。飛去不飛來。何處隨行塵。宮院深深空愛惜。輕薄焉能定蹤迹。江南江北千萬里。茫茫春意無消息。無消息。可奈何。連臂美人朝夜歌。曲調宛轉哀情多。

馬蹟山

幾簇人家幾處灣。灣灣石磴可躋攀。小橋流水東西澗。疊嶂層雲上下山。劉晏祠荒秋草碧。吳王井廢雨苔斑。釣船此地尋鷗侶。不憚煙波日往還。

范麟一首

麟字文祥。象山人。

城市山林爲賢上人賦

招提城市裏。風景似深村。芳草欲迷路。白雲常到門。閒階留鳥迹。古木上苔痕。隔水無多地。從茲判寂喧。

明詩紀事卷二十二

乙籤

聶大年十六首

大年字壽卿。臨川人。宣德末。用薦爲仁和訓導。遷常州教諭。景泰初。徵入翰林。卒。有東軒、冷齋二集。

水東日記。聶大年詩。三十年來作家絕唱也。袁主事衷。愛其醉後。跌起口占云。老我不勝金谷罰。傍人哂笑玉山頹。王翰林稱其願得明朝。又風雨。免教行李出都門。而吾友張筱菴。喜其送僧。十年湖海孤舟別。萬里雲霄一錫飛。以爲不能忘之。但未知大年曾以此爲極致否。大年詩翰。著名於時。不得預京銜。或以大年嘗署桃符云。文章高似翰林院。法度嚴如按察司。以此見忤達官。其然豈其然乎。晚年被徵修前史。至京而卒。予嘗比之梅聖俞宜也。

懸笥瑣探。王文端公直。嘗以詩寄錢塘戴文進索畫。且自序昔與文進交。時嘗戲作一聯。至是十年而始成之。臨川聶大年題。其後曰。公愛文進之畫。十年而不忘也。使公以十年不忘之心。待天下之賢。則天下豈復有遺才哉。語亦稍聞於公。公置之不省。後大年舉爲史官。困於讒議。臥病逆旅。自度不可起。乃使所親投詩於公家。中二聯云。鏡中白髮難繞我。湖上青山欲待誰。千里故人分髮少。百年公論蓋棺遲。公得詩泣下曰。大年欲吾銘其墓耳。明日而大年卒。公爲墓志。有曰。吾以大年之才。必能自振。故久不擬薦。而乃止一校官耶。大年之言。固爲正論。公不以爲意。至泣而銘其墓。真所謂休休有容者矣。

因樹屋書影。臨川聶大年。正統間爲仁和教諭。予得其遺詩一卷。工於七律。如一飯未嘗忘鉅鹿。千金何必學屠龍。可憐弄玉

歸天上。誰遣崔徽在卷中。老去維摩長臥病。重來蘇晉愛逃禪。故鄉夜雨燈前夢。京國秋風病後容。白馬祠前潮似雪。碧雞坊外路如天。露井曉分澆藥水。春鋤香帶種花泥。鐵馬渡河冰已合。金笳吹月夜無風。柏子香消春夢覺。梨花門掩雨聲寒。聽經白晝來山鬼。呪食清齋起鉢龍。綠水畫船春繫纜。絳紗銀燭夜登樓。荷葉雨鳴湖水冷。稻花香散野田秋。杖龍化去秋池涸。笙鶴歸來夜月寒。皆足以傳。

西湖遊覽志餘。最大年襟懷坦率。有清才。文章流麗。詩復俊逸。而灑翰得李北海遺意。

詹氏小辨。大年書法趙承旨。俊爽可愛。

田按臨川甘彥初。以律體見長。壽卿古詩不多見。豈挹其流風耶。東軒集詞新調爽。竹垞議其平熟。非公論也。

答友人

老去微官欲避名。感君攜酒款柴荆。吟邊白髮三千丈。雨裏黃鸝四五聲。更喜折花臨水坐。還來倚杖看雲生。鼎湖聞說幽居好。學得龐公不入城。

過六橋

平生踪跡半四海。此日重來問六橋。山靄拂衣晴冉冉。水風吹面晚蕭蕭。江山勝概餘孤寺。巖谷遺民見五朝。惟有老僧知客意。茶瓜留話數相招。

飲求上人滴翠軒

迴抱岡巒千萬峯。上方臺殿隱疏鐘。聽經白晝來山鬼。呪食清齋起鉢龍。門外犬迎曾宿客。塔前雲護舊

栽松寄聲翠樾堂中老。如此佳遊未易逢。

送邱上人還洪都

師住章江門外寺。閒來飛錫訪名山。便從西竺傳經去。且趁南風鼓棹還。花雨飄從天上下。月波移在殿中間。蒲團一榻曾分我。消得茶瓜半日閒。

留別隆上人

塵世繁華轉眼空。結菴聊住萬山中。曾將一偈酬靈澈。卻笑三年別遠公。持鉢曉分龍女供。過湖還趁鯉魚風。相思回首意無限。霜落滿林秋葉紅。

過德清懷趙子昂

宋朝冠蓋多陵寢。尙憶王孫玉雪標。何處野煙生筆塚。一溪春水長蘭苕。烏絲小楷俱零落。大雅遺音久寂寥。莫向吳中歌此曲。水晶宮殿冷蕭蕭。

遊龍翔宮

蕊宮琪樹罷棲鸞。空有玄都太乙壇。野老不尋殮玉訣。山人自製切雲冠。杖龍化去秋池涸。笙鶴歸來夜月寒。前度劉郎偏好事。種桃留與後人看。

讀楊廉夫集

文章五色鳳之雛。酒借詩豪膽氣籠。白髮草玄楊子宅。紅粧檀板謝家奴。金鉤夢遠天星墜。鐵笛聲寒海月孤。知爾有靈應不死。滄桑更變問麻姑。

列朝詩集七修類稿曰廉夫母夢金鉤入懷而生別號鐵笛道人晚年避亂淞江之泖湖謝伯理家蓄四妾名草枝柳枝桃枝杏花皆善音樂每垂畫舫恣意所之豪門巨室競相迎致大年之作能叙其寔今集中無也

酬王司訓雲箋之贖

獨倚東風有所思。霜紈小帖寫唐詩。多情欲爲秋娘賦。老卻江南杜牧之。

和周鼎京師雜詩

斗帳方床不動塵。梅花夢繞故園春。西湖多少閒風月。盡屬扁舟載酒人。

春草

平原歸路暗迴汀。細雨和煙煖更生。野火年年燒不盡。爲留春色醉蜻蜓。

次彥顯無題

歌扇舞衫空自好。行雲流水本無蹤。琵琶欲寄相思調。人隔巫山十二重。

五月二日胡孝子水亭

綠樹重陰埽不開。水心亭子絕纖埃。翻疑身在西湖上。只欠扁舟賣雪來。

題王牧之先生梅

醉騎款段踏晴沙。吟訪西湖處士家。新樣越箋三萬幅。題詩大半爲梅花。

夏日小窗睡起書懷

窗前修竹兩三竿。蒼翠尤宜雨後看。俗客不來門自掩。水禽唳過石闌干。

題宋高宗遺墨

摩挲五十四驪珠。絕勝滕王蛟蝶圖。惆悵彩雲飛不盡。至今遺恨滿西湖。

王達一首

達字致道。錢塘人。有蘭芷集。

班姬

玉輦聲磷磷。君恩雨露新。秋風朝暮起。紈扇暗生塵。

劉泰五首

泰字士亨。錢塘人。有菊莊晚香諸集。

藝林伐山。菊莊劉士亨詠山茶云。小院猶寒未煖時。海紅花發景遲遲。半深半淺東風裏。好是徐熙帶雪枝。蓋海紅卽山茶也。

古詩亦有淺爲玉茗深都勝。大白山茶小海紅。

蓉塘詩話。劉後村潛夫詰猫詩云。古人養客乏車魚。今汝何功客不如。飯有溪魚眠有毯。忍教鼠嚼案頭書。蓋有諷乎在位者。國朝劉士亨亦有詠猫絕句云。口角風來薄荷香。綠陰庭院醉斜陽。向人只作猙獰勢。不管黃昏鼠輩忙。亦潛夫意也。士亨又嘗題詩於南屏淨慈寺壁。有云。虎熟不驚團社客。鷗閒嘗送過湖僧。時按察使秦和曾蒙簡見之。笑謂察察曰。是乃譏我輩也。田按士亨詩。爲竹垞痛詆。余錄數絕句。亦殊楚楚有致。

豐樂樓

層樓高處宴王孫。湖上青山落酒尊。三百年來春一夢。月明還照湧金門。

小景

隔岸峯巒過雨新。桃花水煖碧潏潏。誰家艇子閒來往。只載春光不載人。

春日湖上二首

浴鵝灣頭盪槳過。雨聲昨夜漲湖波。落梅天氣寒偏峭。未許春風試薄羅。步逐東風踏軟沙。背人驚鷺去斜斜。兩株紅杏疏籬外。知是湖村賣酒家。

秋鶯

紫陌曾聽駐馬蹏。王孫金彈杏花西。秋聲不似春聲好。莫戀斜陽儘意啼。

馬洪一首

洪字浩瀾。仁和人。

田按馬浩瀾。菊莊弟子。王元美評其詞學。有出藍之美。

續遊仙詩

玉案珠簾翡翠屏。焚香夜誦蕊珠經。月明鸞背飛瓊過。小駐花陰帶笑聽。

劉英二首

英字邦彥。錢塘人。有寶山集。蕉雪稿。竹東小編。湖山詠錄。

西湖遊覽志餘。劉邦彥善詩翰。隱居不仕。遨遊湖山。名振遠近。吳興邱天祐贈詩云。慚愧無瓊報木桃。論文惟覺醉醪醪。昔年公幹名先重。今日相如賦最高。酒畔吳歌紅線毯。袖中章草紫霜毫。風流更在諸公上。日日題詩付薛濤。

同客過湖

山繞重湖寺遶山。天留圖畫在人間。路從烏柏林邊轉。船近黃妃塔下灣。歲月祇隨華髮改。煙波空付白鷗閒。當歌不耐傳觴促。獨俯寒波照醉顏。

載酒過湖

船頭斗酒配雙柑。坐聽黃鸝漱晚酣。湖上有山山有寺。人生只合老江南。

劉師邵六首

師邵字師邵紹興山陰人績子有半齋集

送張孝廉之京

別離知不遠。情至亦潸然。樹引投京路。鷗隨出浦船。去程秋雨裏。歸夢曉霜前。親舊如相問。卑棲似往年。

贈開光寺隆上人

自向前塘住。相將廿載餘。息來諸妄斷。老去萬緣疏。洗竹通幽徑。攀藤補弊廬。時時得佳句。還向壁間書。

寄王內悅先生時方待詔公車

鯨背神山接絳霞。每瞻辰極想京華。祥煙色借宮城柳。湛露香浮御苑花。天樂迴傳雙鳳闕。雲綏遙駐六龍車。明光奏技多如雨。應數王褒頌最佳。

畫竹

誰弄參差管。聲悲引恨長。夜深龍起聽。明月滿瀟湘。

小畫

雨餘溪樹涼。落日水清淺。浩歌歸去來。心隨楚雲遠。

秋塘

煙水微茫漾遠愁。采菱歌斷夕陽收。鷺鷥不省紅衣老。猶戀銀塘十里秋。

錢洪一首

洪字理平。常熟人。有竹深遺稿。

初夏書懷

黃鸝嗁。暖隔江村。嫩綠團陰。暗小門。昨夜茅檐雷過雨。階前添箇籜龍孫。

趙宗文一首

宗文名文。以字行。長洲人。官鄱陽知縣。有慎獨齋集。

田按宗文金山寺一篇。可稱高唱。傳詩不在多也。

金山寺

水天樓閣影重重。化國何年此寄蹤。淮海西來三百里。大江中湧一孤峯。濤聲夜恐巢枝鳥。雲氣朝隨出洞龍。幾度欲登帆去疾。蒼茫遙聽隔煙鐘。

陳贊四首

贊字惟成。餘姚人。以薦授訓導。入爲翰林待詔。遷廣東參議。進太常少卿。有蒙菴集。和唐音稿。西湖百詠。

四庫總目。西湖百詠二卷。宋黃嗣杲撰。附明陳贊和韻。詩皆七言律體。每題之下。各注其始末甚詳。頗有宋末遺聞。爲諸書所

未載者。嗣景詩格頗工整。贊所和才力少弱。亦足肩隨。皆迥在許向華亭百詠之上也。
田按永宣間。張式之好和古人詩。有和唐音。及和李杜詩各十餘卷。惟成亦有和唐音稿。及和宋董嗣景西湖百詠。王襄敏蒙傑之士。集中有和唐三體詩。習俗移人。賢者不免。惟成詩品。與式之差堪伯仲。

劉妃墓

在方家峪鳳凰山下。褒親崇壽院後。紹興中。思陵敕葬妃子於此。

煙草萋迷石獸眠。生前應沐寵恩偏。芳魂寂寂依何處。幽魄沈沈闕夜泉。水鳥競巢神路柏。雨苔深翳饗堂磚。一坏誰奠清明酒。只有楊花鋪白氈。

聚景園

在清波門外阜陵。致養北宮。拓圃西湖之東。斥浮屠之廬。九曾經四朝。臨幸繼以諫官。陳言出郊之令。遂絕園。今荒圯。惟柳浪橋花光亭存。

聚景依稀有舊蹤。阜陵曾養此園中。花光柳浪名還在。鳳輦霓旌事已空。金井梧桐愁夜雨。碧闌芍藥怨春風。如今倚杖閒回首。霜葉離離映水紅。

留別顧明府

滄江春雨餘。離離汀樹濕。樽酒不成歡。東風去帆急。

竹枝詞

月落柀歸。嘯樹頭。巴江日夜自東流。百丈牽船上灘去。風波節節替郎愁。

楊軾一首

軾字軾同。餘姚人。

僧房雞冠花魚字韻

絳績昂藏錦不如。臨風欲鬪又躊躇。若教夜半能三唱。驚起山僧打木魚。

汪敬一首

敬字思敬。祁門人。有養浩齋稿。

傲陶儲體

斜光在高樹。歸鳥何喧喧。池月漸東上。參差林影偏。清風松下來。白雲巖際還。心知不可見。此意誰與言。

沈宣一首

宣字兩山。仁和人。

蟹

郭索橫行逸氣豪。秋來興味滿江皋。玉缸十斛醪釀酒。不待先生賦老饕。

應律一首

律字志和黃巖人以薦授郡學訓導改蘭陽遷鄱陽教諭有復菴稿

三月六日泛江

番江江水夜來生乘興相攜載酒行芳草連天春欲暮落花滿地雨初晴近人白鳥忘機事滿眼青山不世情倡和流連歸去晚東風淡宕片帆輕

羅宜一首

宜字從可南城人景泰初以薦爲南豐訓導

雲門寺

長歌康樂詩遠訪麻源谷逶迤山竇深繚繞邨路曲憩坐雲門幽淨埽苔階綠飛橋臥晴虹奔流漱寒玉銅陵故無恙華子今不復瞻彼釣魚臺緬想藏書屋勝跡半已非遊觀駭心目居人巢雲松瀟洒異塵俗開樽暢雅懷題詩繼芳躅一笑澹忘歸斜陽下山麓

潘寶一首

寶字時用無錫人

暮春過南浦

江上人家春水西。挑花短短壓牆低。可憐十日東風惡。紅雨滿林噉竹雞。

黎近二首

近字之大臨川人。宣德間應文學材行科。除高要知縣。有未齋稿。奉心集。

江西人物志。黎近知高要縣時。徭賊據城東南。郡不能制。近爲榜文諭降之。被誣奏逮。繫獄十年。作大明饒歌鼓吹曲十二章。太平頌。幸太學頌。二章獻之。英廟嘉歎。命釋之。召見。獻麒麟白象二頌。上欲處之禁林。爲忌者所阻。

黃源寺

檐影沈沈深數層。古苔新竹別來增。尋詩自有談空客。結社今無出世僧。石澗水香春洗鉢。花臺風細夜籠燈。老來賸有登臨興。拄斷蠻溪幾尺藤。

羊角山

自昔桃源隔市廛。誰知城市有神仙。積花洞口疑無地。賣藥壺中別有天。萬里玉書黃鶴外。九關金鎖白羊邊。烏衣燕子槐安蟻。世事曹騰幾百年。

徐琦一首

琦字德用。吳人。

客中有懷東周巽菴陳未菴

漢陽城北水東流。楓葉蘆花萬里秋。白雁未傳鄉國信。碧雲空結海天愁。吳中文翰推洪道。江右詩名數太邱。幾度篷窗望奎壁。光華還自燭南州。

徐遜一首

遜字德熙。吳人。

登金山寺

一峯玉立大江中。絕頂登臨四望通。淮甸有山皆向北。南徐無水不流東。樓臺影落波心月。鐘鼓聲傳渡口風。明日仙凡便相隔。海天千里放歸篷。

明詩紀事卷一

丙籤

李東陽二十首

東陽字賓之。茶陵州人。天順甲申進士。改庶吉士。授編修。累遷侍講學士。歷左庶子。太常少卿。擢禮部侍郎。直文淵閣。參預機務。進太子少保。禮部尚書。文淵閣大學士。加少傅。再加少師。卒。贈太師。諡文正。有懷麓堂集一百卷。

四庫總目。東陽文章爲明一代大宗。自李夢陽。何景明。崛起弘正之間。倡復古學。文必秦漢。詩必盛唐。才學足以籠罩一世。茶陵之光焰幾燼。逮北地信陽之派。轉相摹擬。流弊漸深。論者乃稍稍復理東陽之傳。以相撐拄。平心而論。何李如齊桓晉文。功烈震天下。而霸氣終存。東陽如衰周弱魯。力不足禦強橫。而典章文物。尙有先王之遺風。殫後來雄偉奇傑之才。終不能擠而廢之。亦有由矣。

楊一清石涼類稿。西涯先生高才絕識。獨步一時。詩文深厚雄渾。不爲偏奇可駭之辭。而法度森嚴。思味雋永。古意獨存。詩談長沙李東陽。大韶一奏。俗樂俱廢。中興宗匠。邈焉莫儔。

餘冬敘錄。西涯先生晚年耽對棊酒。春不善棊。然壽村有客。未嘗不與。頗以爲勸。先生曰。將何消日。春曰。詞翰熟自天成。足娛日力。既暮後生。又垂遠世。先生笑曰。此後生計。吾老不暇爲此。一日先生在棊酒間。有奉常道命。以巨軸乞詞翰者。踵至。先生

弗怡。大書一絕云。莫將性命作人情。寫字吟詩總害生。惟有圍棋堪遣興。客來時復兩三杯。春觀之悚然。知先生前意之所在也。

升菴集。唐子元薦與予書論本朝之詩。弘治間文明中天。古學煥日。藝苑則李懷麓、張滄洲、爲赤幟。而和之者多失於流易。夢蕉詩話。弘治庚戌。殿試進士李西涯與諸老讀卷。相與倡和。有云。國有禎祥非物寶。天將吾道付儒紳。雲邊曉日中天見。夢裡春雷昨夜聲。星辰畫下尙書履。風日晴宜進士巾。諸作中。最爲警句。人多誦之。

翰林記。弘治初。上注意講學。遣太監戴義傳示聖意。命學士李東陽等各撰詩十首。用寓啓沃。東陽擬十題。各撰七言律詩一章。曰敬天。曰法祖。曰勤政。曰務學。曰任賢。曰納諫。曰節用。曰愛民。曰恤刑。曰講武。上嘉納焉。

藝苑卮言。李文正爲古樂府一史。斷耳十不能得一。黃才伯辭不稱法。顧華玉邊庭實。劉伯溫法不勝辭。此四人者。十不能得三。王子衡差白質勝。十不能得四。徐昌穀雖不得叩源推委。而風調高秀。十不能得五。何李乃饒本色。然時時已調雜之。十不能得七。于鱗字字合矣。然可謂十不失一。亦不能得八。

弁州讀書後。嚮者於李賓之擬古樂府。病其太涉議論。過爾翦抑。以爲十不得一。自今觀之。奇旨創造。名語疊出。縱不可被之管弦。自是天地間一種文字。

崔廷樞樓輅集。西涯樂府優於詩。

四溟詩話。李西涯閣老善詩。門下多詞客。劉梅軒閣老忌之。聞人學詩。則叱之曰。就作到李杜。只是酒徒。李空同謂劉因噎廢食是也。西涯久於相位。陸滄浪以詩諷之曰。聲名高與斗山齊。伴食中書日已西。回首湘江春草綠。鷓鴣喚罷子規啼。

四大齋叢說。李西涯當國時。其門生滿朝。西涯又喜延納獎拔。故門生或朝罷。或散衙後。卽羣集其家。講藝談文。通日徹夜。率歲中以爲常。一日有一門生歸省。兼告養病還。西涯集同門餞之。卽席賦詩。諸人中獨汪石潭才最敏。詩先成。中有一聯云。千年芝草供靈藥。五色流泉洗道機。衆人傳玩以爲絕佳。西涯將後一句抹去。令石潭重改。衆皆愕然。西涯曰。歸省與養病是二。

事今兩句單說養病不及歸省便是偏枯且又近於合盤衆詩西涯續之西涯卽援筆書曰五色宮袍當舞衣衆始嘆服存餘堂詩話李文正公懷麓堂稿五月七日秦陵忌日詩云祕殿深嚴聖語溫十年前是一乾坤孤臣林壑餘生在帝里金湯舊業存舜殿南風難解慍漢陵西望欲銷魂年年此日無窮恨風雨瀟瀟獨閉門讀之使人掩卷流涕

詩藪成化以還詩道旁落唐人風致幾於盡墜獨文正才具宏通格律嚴整高步一時興起何李厥功甚偉王兆雲烏衣佳話西涯李公會與客聯句拆散禪中故絮以代燭人或謂其好奇之過余曰不然亦古人刻燭之遺意耳其次白洲留別詩有看花不厭傷多酒燃絮還供未了詩蓋紀其實也

國史唯疑李長沙云余今年作詩止詩自戒越兩月爲鳴治師召所督得聯句四章鼎儀聞之拆簡告罰乃以雞酒往受盟鳴治師召以豬紅三斤蛤蜊數十爲助亨父明仲聞亦來稽師召太常音鳴治謝文肅鐸太平休暇詞臣共詩酒爲樂最稱德事所飲饌僅爾儉實具見

列朝詩集文正以金鐘玉衡之質振朱弦清廟之音含咀宮商以納和雅灑灑乎洋洋乎長離之和鳴共命之交響也

明詩選陳臥子云文正網羅羣彥導揚風流如帝釋天人雖無宗派實爲法門所貴

池北偶談海鹽徐豐厓詩談云本朝詩莫盛國初莫衰宣正至弘治西涯倡之空同大復繼之自是作者森起於今爲烈當時前輩之論如此蓋空同大復皆及西涯之門牧齋撰列朝詩集乃力分左右祖長沙何李界若鴻溝後生小子竟不知源流所自誤後學不淺

高士奇天祿識餘明朝典禮中有慶成宴每宴必傳旨云滿斟酒又云官人每飲乾故西涯李文正公詩云坐擁日華看漸進酒傳天語飲教乾蓋紀實也

明詩別裁永樂以後詩茶陵起而振之如老鶴一鳴喧啾俱廢後李何繼起廓而大之駁駁乎稱一代之盛矣王元美謂長沙之於何李猶陳涉之啓漢高此習氣未除不免抑揚太過宜招後人之指擊也

田按西涯宏才碩學。汲引風流。播之聲詩。洵足領袖一時。惟相業差有可議耳。

尊經閣

尊經閣。閣高不可攀。前有文宣宮。後有鍾陵山。

周鑑遜國忠紀。周是修。江西泰和人。建文初爲衡府紀善。衡王者。建文君弟也。尙未之國。是修留京。預修纂翰林。數陳論國家大計。北兵渡淮。與蕭用道上書。指斥用事者。誤國用事者。怒。共挫折之。屹不爲動。北兵渡江。宮中自焚。是修留書別友人。付以後事。具衣冠爲贊。繫衣帶上。入應天府學。拜先師畢。遂自縊於尊經閣。年四十九。

花將軍歌

花將軍。身長八尺。勇絕倫。從龍渡江。江水渾。提劍躍馬走平陸。敵兵不能逼。主將不敢噴。殺人如麻。滿川谷。徧體無一刀鎗痕。太平城中三千人。楚賊十萬勢欲吞。將軍怒呼縛盡絕。罵賊如狗狗不信。橋頭萬箭集如蝟。將軍願死不願生。作他人臣。郤夫人赴水死。有妻不辱將軍門。將軍侍婢身姓孫。收尸葬母抱兒走。爲賊俘虜。隨風塵。寄兒漁家。屬漁姥。死生已分歸蒼昊。賊平身歸竊兒去。夜宿陶穴如生墳。亂兵爭舟不得渡。墮水不死如有神。浮槎爲舟。蓮爲食。空中老父能知津。孫來抱兒。達行在。哭聲上徹天。能聞帝呼。花雲兒。風骨如花雲。手摩膝。置泣復嘆。雲汝不死。猶兒存。兒年十五。官萬戶。九原再拜君士恩。忠臣節婦古稀有。嬰杵尙是男兒身。英靈在世竟不朽。下可爲河嶽。上可爲星辰。君不見金華文章石室史。嗟我欲賦。豈有筆力回千鈞。

黃金開國功臣錄。花雲守太平。僞漢陳友諒。以舟師圍太平。雲率麾下三千餘人。結陣迎戰。三日。友諒不得入。乃引巨舟泊城西南。士卒緣舟尾。攀堞而上。城中乏食。雲士馬俱餓。遂陷。賊縛雲急。雲怒罵賊奴。縛吾。吾主必滅爾。斬爾爲驗也。遂奮躍大呼。縛盡解。奪守者刀。殺五六人。復罵曰。虜非吾主敵也。曷不趣降。賊怒。碎雲首。縛於舟樁。衆射之。雲至死罵賊不少變。雲妻都氏。生一子。燈甫三歲。初雲與賊戰。方急。都氏抱兒拜家廟。泣謂家人曰。今城且破。吾夫忠義人。必以身死之。吾夫死。吾必不獨生。花氏惟一兒。若等善撫之。雲就擒。都氏赴水死。侍兒孫氏。收都氏屍葬之。遂抱兒欲逃。他所爲僞漢軍虜之。至九江。軍惡小兒。曠孫氏恐兒遇害。以簪餌屬漁家。樞鞠之曰。此兒良。宜善視之。後王師伐僞漢。漢敗。孫脫身至漁家。視兒在。樞漁人出。竊負以走。宿陶穴中。明日出江。游。樞舟以渡。遇漢潰軍。還爭舟。摔孫氏及兒。投之江。方出沒波中。有斷木自上游浮至。附之。入蘆渚。中渚有蓮實。孫氏取啗兒。凡七日不死。忽夜半聞人語聲。呼之。逢老父。號雷老。告之故。與其偕行。達上所。上聞雲兒。卽呼入見。孫氏泣抱兒拜上。上亦泣。眞兒於膝曰。此花雲子。將種也。命賜老父衣。老父已不見。追之無所得。衆咸以爲神。兒年十三。授虎賁。後衛千戶。後命爲水軍左衛指揮僉事。

學士柏

我行樹陰日千市。雨葉風枝自蕭颯。惟有諸生識我情。旁人不解空嘲狎。我見先生種樹年。我身尙短樹及肩。枝蟠江山地可縮。平幹造化天無權。瓊臺翠閣何森爽。院柳庭花敢爭長。庇蔭長留六月陰。盤迴直與孤雲上。材堪五鳳難爲用。根到九泉終不枉。零落青袍幾故人。琮琤玉珮空遺響。當時院長文安公。柯亭劉井相西東。百年遺愛豈獨此。此樹欲比人中龍。樹猶如此我何似。已愧斑白非兒童。名收棗核有先後。壽比金石無終窮。下堂再拜想顏色。仰面正拂長髯風。

翰林記。公署後堂有二柏。柯學士潛所種。潛教庶吉士時。李東陽承詔受業。及東陽復教庶吉士。出學士柏爲題。汪俊有一日。百市行樹底之句。東陽悵然感之。因行爲一篇云云。於是倡和成卷。以遺潛之子。使藏焉。蓋潛能汲引後進。令人不忘如此。

過安平鎮減水石壩有懷劉司馬長句

黃陵江頭河水黃。衝沙走石聲礚礚。北趨平原下廣澤。直使運道無津梁。坐令漕舟百萬若山壑。賈船到此徒紛龐。帝遣臺臣出治水。水性肆兀難爲降。千金作埽萬夫力。頃刻下墜輕毫芒。臺臣焦思廢食寢。夜夢神禹授以玉簡青琳琅。水行在導不在障。豈以土石爭濤瀧。地靈順軌水怪伏。河遂南徙歸徐方。因高爲陵下爲澤。復有石壩磊犖長如岡。豐功偉績不可以數計。此乃餘力非未強。憶昔文皇建都向燕薊。中導汶泗通漕綱。尙書宋公富經略。世上但識陳恭襄。武功何人亦奇士。盛以勳績爲文章。四十餘年復一決。嘆此成績安可忘。帝命儒臣分書刻金石。此記正屬臣東陽。使船東來一登眺。風日颯爽炎天涼。是時臺臣入兵省。我在江湖思廟廊。但願此岡不墮河不徙。縱有帶礪無滄桑。

田按永樂九年。濟甯州同知潘叔正上言。舊會通河四百五十餘里。淤者乃三之一。濬之便。乃命工部尙書宋禮。刑部侍郎金純。都督周長往治。凡發山東及徐州。應天。鎮江。民三十萬。二十旬而功成。論功禮第一。受上賞。潘叔正亦賜衣鈔十錠。禮復建言。海運經歷險阻。計海船一艘。用百人而運千石。其費可辦河船容二百石者二十船。每船雇一十人。可運四千石。以此而論。利病較然。請撥鎮江。鳳陽。淮安。揚州。及兗州糧。合百萬石。從會通河。運給北京。其海道則三歲兩運。已而平江伯陳瑄治江淮間諸河。功亦相繼告竣。於是河運大利。便漕粟益多。十三年。遂罷海運。雷鯉列卿記云。禮有徵過。朝廷督責之。革其冠帶。止服儒巾治事。其權中微。而平江伯之功益彰。故今人惟頌平江。而不及宋禮。故邱文莊公嘗過會通河。有感賦詩云。清江浦上臨

清開簫鼓叢祠飲餽餘。幾度會通河上過。更無人語宋尙書。後李文正公各有詩。其意在言表。卽此詩所謂文皇建都向燕薊。中導汶泗通漕綱。尙書宋公富經略。世上但識陳恭襄。恭襄平江伯謚也。厥後弘治中。主事王寵始請爲禮立祠。詔祀之南旺湖上。以金純周長配。邵文莊歸興詩云。漕隄楊柳昔人功。六月清陰處處同。我有瓣香何所致。禮官新祀宋司空。紀其事也。鄭端簡今言云。嘉靖癸卯。王滿泉與齡爲文選郎中。起用周恭肅公。以工部尙書總理河道。忌王清勤者。倡言河道無用尙書。故事王以問余。余曰。永樂初開會通河。尙書宋禮實始其事。西涯詩所謂幾渡會通河上望。竟無人說宋尙書。此蓋端簡誤記。卽詩爲李詩。附正於此。

題清明上河圖

宋家汴都全盛時。四方玉帛梯航隨。清明上河俗所尙。傾城士女攜童兒。城中萬屋暈薨起。百貨千商集成蟻。花棚柳市圍春風。霧閣雲窗燦朝綺。芳原細草飛輕塵。馳者若颺行若雲。虹橋影落浪花裏。捩舵撇篷俱有神。笙歌在樓遊在野。亦有驅牛種田者。眼中苦樂各有情。縱有丹青未堪寫。翰林畫史張擇端。研朱吮墨鏤心肝。細窮毫髮夥千萬。直與造化爭雕鐫。圖成進入緝熙殿。御筆題籤標卷面。天津一夜杜鵑嘯。倏忽春光幾回變。朔風捲地天雨砂。此圖此景復誰家。家藏私印屢易主。贏得風流後代誇。姓名不入宣和譜。翰墨流傳藉吾祖。上有先提舉跋獨從髮樂感興衰。空弔環州一抔土。豐亨豫大紛彼徒。當時誰進流民圖。乾坤顛仰意不極。世事榮枯無代無。

都穆寓意編。清明上河圖。藏閣老長沙公家。公以穆遊門下。且頗知書畫。每暇日輒出所藏。命穆品評。此蓋公生平所寶秘者。

觀其位置若城郭市橋屋廬之遠近高下草樹馬牛驢駝之大小出沒以及居者行者舟車之往還先後皆曲盡意態毫髮無遺蓋汴京盛時偉觀可按圖而得而非一朝夕之所能者其用心亦良苦矣圖有金大定丙午燕山張著跋云翰林張擇端字正道東武人也幼讀書遊學京師後習繪事工於界畫自成一家又引向氏圖畫記謂擇端復有西湖爭標圖與此並入神品元至正壬辰西昌楊準跋則謂前有徽廟標題後有金諸老詩及私印若干今皆不存長沙公自爲詩細書其後

李坤元忽齋雜識王公思質爲分宜害質以清明上河圖故圖寸馬豆人爲宋朝人手筆思質得之價止二百金徐先曾叔祖猶菴公居閩者猶菴名知誦卽儀部敬齋子而思質從甥予嘗見思質任制府日致猶菴手書始悉其由既分宜索取此圖思質以臨筆與之而分宜門下客精於辨畫者覘知其故從思質假金思質拒之因白分宜言圖之僞復披細觀指其絳漏處云安有一小鳥腳而跨二瓦溝之理分宜大怒遂借端中傷以圖之微而竟嬰禍殞身君子責備賢者謂思質實自貽伊戚焉野獲編嚴分宜勢熾時以諸珍寶盈溢遂及書畫骨董雅事時鄒懋卿以總漕使江淮胡宗憲趙文華以督兵使吳越各承奉意旨蒐取古玩不遺餘力時傳聞有清明上河圖手卷宋張擇端畫在故相王文恪君家其家鉅萬難以阿堵動乃託蘇人湯臣者往圖之湯以善裝潢知名客殿門下亦與婁江王思質中丞往還乃說王購之王時鎮薊門卽命湯善價求市既不可得遂屬蘇人黃彪摹真本應命黃亦畫家高手也嚴氏既得此卷珍爲異寶用以爲諸畫壓卷置酒會諸貴人賞玩之有如王中丞者知其事直發爲質本嚴世蕃大慚怒頓恨中丞謂有意給之禍本自此成或云卽湯姓怨弇州伯仲自露始末不知然否以文房清玩致起大獄嚴氏之罪固當誅但張擇端者南渡畫院中人與蕭照劉松年輩比肩何以聲價陡重且爲崇如此田按王氏與分宜構禍之由不僅爲此圖然此圖亦買禍之一端也李坤元沈德符所紀各有不同姑兩存其說後此圖流傳董香光尙及見之見容齋集都南濠稱宣鑒家王氏所藏卽西涯所題圖也錄西涯詩附著其事於此

秋風江口聽鳴榔。遠客歸心正渺茫。萬里乾坤此江水。百年風日幾重陽。煙中樹色浮瓜步。城上山形繞建康。直過眞州更東下。夜深燈影宿維揚。

四溟詩話。李西涯曰。詩用實字易。用虛字難。盛唐人善用虛字。開口呼喚。悠揚委曲。皆在於此。用之不善。則柔弱緩散。不復可據。夏正夫謂涯翁善用虛字。若萬古乾坤。此江水。百年風日。幾重陽。是也。

寄彭民望

斫地哀歌興未闌。歸來長缺尙須彈。秋風布褐衣猶短。夜雨江湖夢亦寒。木葉下時驚歲晚。人情閱盡見交難。長安旅食淹留地。慚愧先生苜蓿盤。

龍堂詩話。彭民望始見子詩。雖時有賞歎。似未犁然當其意。及矢志歸湘。得子所寄詩云云。乃潛然淚下。爲之悲歌數十遍。不休。謂其子曰。西涯所造。一至此乎。恨不得尊酒重論文耳。蓋自是不閱歲而卒。傷哉。

師召有盲馬售錢六百諭之以詩

六百青蚨十里才。忍將筋骨付塵埃。驚魂已脫池邊險。往事無勞塞上猜。師召已連失二馬。斗酒杜陵堪再醉。千金郭隗幸重來。知公自是忘機者。一笑能令萬事該。

餘冬敘錄。成化間陳翰林師召所乘盲馬。售錢六百。西涯先生以詩諭之。有斗酒杜陵堪再醉之句。蓋用子美三百青銅語也。時李刑部若虛舊屋爲積潦所壞。數年不售。竟得銀四兩。涯翁亦諭之以詩云。詞林馬價知多少。卽前師召事也。前輩居處乘騎如此。凡口體之未可知。

海子西涯雜詠

海子西入城。中與龍池連。高樓沙口望。正見打魚船。

西山

磐石傍幽谿。羣峯坐回首。靜愛白雲來。蒼苔濕衣久。

響岡

春濤夜忽至。泊泊溪流滿。津吏沙上來。坐看青草短。

慈恩寺

水繞池邊樹。花垂石上藤。長來寺前坐。不識寺前僧。

飲馬池

立馬春池上。沙水清可憐。溪翁熟予馬。汲罷不須錢。

楊柳灣

沙崩樹根出。細路縈如棧。垂柳隔疏簾。人家住西岸。

鐘鼓樓

月黑行人斷。高樓鐘漏稀。城中聞夜警。邏吏不曾歸。

桔槔亭

野樹桔槔懸。孤亭夕照邊。閒行看流水。隨意滿平田。

稻田

水田雜花晚。畦雨過溪足。老僧不坐禪。秋風看禾熟。

蓮池

秋風吹芰荷。西塘涼意早。獨負尋芳期。苦被詩人惱。

菜園

西園芳意濕。不聞春雨聲。野人閉門睡。園中青菜生。

廣福觀

飛樓凌倒景。下照清徹底。時有步虛聲。隨風渡湖水。

沅湘耆舊集。梧門祭酒法式善。西涯考略云。納蘭容若淥水亭雜識云。李長沙賜第在西長安門西。俗呼李閣。老衛衛是也。其別業在北安門北集中。西涯十二詠。程篁墩學士和之。有桔槔亭、楊柳灣、稻田、菜園、蓮池。而響牀、鐘鼓樓、慈恩寺、廣福觀。皆在十二詠中。今其遺址不可問。常在越橋相近。蓋響牀即越橋下牀。而鐘鼓樓則園中可遙望爾。湯西涯懷清堂集。題李文正慈恩寺詩序云。喬莊簡跋文衡山西涯圖云。寺之後曰西涯。考公懷麓堂集。有西涯十二首。第四篇即慈恩寺。其他如楊柳灣、鐘鼓樓。四詩中亦互見。則慈恩寺在西涯。東西涯之名。所由來久。公因以自號。今亦不能復識其處。公詩首篇云。幾人城市此曾

遊。又云。城中尙有山林。在集中。重經西涯云。城中風景。夢中路。又云。禁城陰裏御河西。慈恩寺偶成云。城中第一佳山水。則西涯之在城中無疑。涿水亭雜識所云。西涯有李長沙別業。考其地在今德勝門西。予近年數得經此。見風漪瀾。直接德勝橋。而東有法華菴在其上。意其爲當時之西涯。所云積水潭海子。亦此地。但相去二百餘年。不特琳宮佛屋。劫灰無存。而園中所。有喬木蒼巖。長橋斷岸。亦不復能彷彿矣。莊簡又云。西涯公嶽降地。公詩有淚痕應共水俱流句。又云。撫今念昔。爲此愴然。集中如禮後述哀云。應謝西涯舊時柳。泣風愁雨共依依。又重經西涯云。淚滿密縫衣上綫。又云。愛日慚非稚子歡。又云。痛哭兒童釣遊地。白頭重到爲何人。則莊簡所云嶽降地者。信有徵矣。至涿水亭雜識所云。公有別業在北安門外。或是舊業。非別業也。公罷相後。客至不能具魚菜。豈能更爲平泉木石計。余綜諸說。與地址印證。蓋庶福觀之南。響師之西。越橋之北。海潮寺之東。地名煤廠。文正故第當在是。煤廠爲文正所生之地。後貴顯始有賜第。所云李閩老衢。循者。殆卽其地耶。帝京景物畧云。李。文正公祠。近在皇城迤西。孝宗賜第也。涿水亭雜識。似足爲據。至於西涯。則今之積水潭無疑。潭卽水關。在諸河極西。林木叢蔚。水石清幽。其先爲法華庵。今建匯通祠。乾隆二十六年。御題也。桔槔亭。稻田。楊柳灣。沿河逕。皆可指識其地。浮業湖。十利海。分流匯注而下。歸宿於澄清崗。余居距其地。址不數十武。門外卽楊柳灣云云。其考西涯根據甚詳。近賢學博攸輿詩鈔。引懷麓堂集。諧命碑陰記。證西涯爲公誕降地。而云。與葦墩俱。和四涯十二詠。不盡在別業中。蓋不知別業卽舊業也。又云。西涯十二詠。程葦墩和之。彭民望亦和之。彭詩今佚一首。乃桔槔亭。懷麓堂詩話中所云。春風滿畦水。不見野人勞。疑卽此作也。但懷麓堂東十二詠。有廣福觀。無明月橋。老葵集則有明月橋。無廣福觀。意者。福廣觀一作。亦已散佚。後人雜取明月橋詩。以益之。而不知其非也。然不可考矣。其說近是。然明月橋亦距西涯近。或偶爾參互。當日未定之作云爾。

顧清二十七首

清字士廉。松江華亭人。弘治癸丑進士。選庶吉士。授編修。進侍讀。以忤劉瑾降。編修。改南兵部員。

外瑾誅復故官擢侍讀學士歷少詹事進禮部侍郎罷歸起南禮部侍郎引疾進本部尙書致仕卒諡文僖有東江家藏集四十二卷

四庫總目顧清東江家藏集皆晚年所自編故體例精審其詩清新婉麗天趣盎然文簡鍊醇雅自調法律當時何李嘯興文體將變清所著波瀾氣焰雖未能極傲奇偉麗之觀要不謂之正聲不可也在景陵一派中亦挺然翹楚矣

列朝詩集文僖詩清新婉麗深得長沙衣鉢正嘉之際猶存正始之音今人以其不爲何李輩所推不復過而問焉斯所謂耳食者也

靜志居詩話東江詩法西涯觀其險韻再四墊用足見能事當日諸公受長沙衣鉢或推方石或稱二泉或首熊峯以鄙見衡之要皆不敵也

田按東江雖法西涯實導源東坡古歌噴薄鬱鬱可與匏菴抗席穿洲輩評詩於附和何李者自鄒以下亦刺刺不休而東江曾不齒及宜來牧齋之指摘也

安山待牖憩大柳下見蜚螻轉丸及窟穴葬藏之狀甚悉村童語其故詞甚鄙而近於人事戲以韻語紀之

蜚螻搏土丸其智竟莫測中包實糞穢外裹疑橡栗後推前復挽圓轉何捷疾端如趁嚴程又似銜巧術趨窪眞一瀉過隘亦屢兀中途遇強暴奮鬪幾撐突歸來不少暇坎土啓藏室旣以首爲舂復以股爲櫛爬沙兼負戴上下幾顛越室成擁丸下劣隘四無隙周旋巧幹運每動輒有入須臾丸盡隱謂爾功已畢

潛身復旁搜。坏壤時艱脆。村童惡劇戲。寸筵時一搯。室開丸反流。驚救走連蹶。雙趨共撫抱。有類拱珠礫。前功已盡棄。餘念猶未歇。想其推挽去。行復事鑽穴。物生均有智。小大理難一。蠶絲利萬世。整網爲口實。蜂房及蟻塚。致用等軒闕。爾丸獨何爲。久念理未徹。村童前致詞。此實神所誅。轉丸輸鬼藏。功滿蛻凡骨。飛騰作風蟬。清響曠雲月。營營苟爲此。蜣計誠已劣。丸也神所須。得無穢明烈。物性爾豈知。神姦我能別。紛紛詎爲信。瑣瑣焉足說。聊戲答村童。鼓響官船發。

臘月廿三日飲德卿宅用涯翁齋居聯句韻

良游集南園。秉燭向深夜。盟尋舊雨餘。坐想重茵藉。牆陰有殘雪。鄰酒方索價。西瞻太行峯。皓白欺二華。茲惟藏春塢。豈伊凌風榭。洪爐赫彤霞。餘香裊檀麝。牕明疑若空。簷短不留罅。吟苦愁後成。棋勃鬪先下。翻思前夕裏。高宴久已罷。遠鐘送深更。疲僕催早駕。顧茲蚓竅鳴。試我蠅頭寫。得雋豪屢揮。沈思首頻亞。忽看山月高。顧影獨驚詫。情兼賓主忘。氣已芝蘭化。諸公信自賢。此夕頗堪訝。招要入拘牽。窘迫自閒暇。詞非石鼎工。酒罄金壘瀉。明朝逐餘歡。此榻甯許借。

望露筋廟作

荒陂下殘月。疎木出古祠。伊昔露筋媛。冥靈此棲遲。渺然葭葦鄉。挺此冰玉姿。仙骨諒已蛻。英風浩無涯。想當野宿日。甯與廟食期。頽垣不踰肩。缺瓦苔參差。不知春秋祀。有土能不遺。堂堂七尺軀。冠帶稱男兒。

婉婉形勢途。所覲在一資。使當生死際。甯復顧四維。念此欲下拜。風橋浩南馳。滄波望不盡。目極空煙霏。
齒落用前韻

癡人老猶童。覽鏡思妍媚。摘白整冠巾。謂老真可諱。不知齒牙脫。還復可留滯。憶昨爾初生。玉白銛鋒利。相從能幾何。竟作鉛刀廢。得非本根撥。無乃言語累。初危冀猶安。凜凜憂爾墜。及茲兩決絕。忽若還重寄。投非東窗梭。去作下坂驥。從茲慎語笑。至理得深契。

東園餞別太守酒酣劇論至於得失寵辱之際聽之灑然是夕被酒齒痛不寐輒用蘇長公過清虛堂韻歌以揚之卒章頌言爲將來世講之章本也

人間萬事真渥沙。黃堂昨日猶早衙。春風留人苦無計。漫天撲路飛楊花。楊花飄揚泊何處。碧山夢繞先生家。邯鄲已爲魯酒誤。憂喜更足憑晨鴉。東園雨餘綠滿樹。猶有青子粘殘葩。撫時惜別萬感集。飄蕭短髮手屢爬。衆賓微酣我輕汗。論功莫計酒與茶。花奴羯鼓不解事。落日猛向紅闌搗。盛時會須有代謝。末俗正爾堪吁嗟。歸舟安穩足春夢。夢抱玉燕吞流霞。

四月十二日定菴先生過訪誦東坡清虛堂詩用韻奉謝

夜窗急雨鳴撒沙。晨鼓不辨州官衙。村童晏眠蓬戶閉。榆莢一徑交殘花。輕年不及長者室。泥水眞作田農家。高軒何日忽戾止。豁若暝霧騰金鴉。清容穆穆峙霜柏。妙語郁郁飛天葩。塵埃塞胸不自理。次第一

一頰梳爬。盤餐非惡。愧草草。幸有杞枿供春茶。此時天公亦助喜。列缺捲旆雷停搗。騷壇夙昔願奔走。世事八九堪咨嗟。酒闌公去倚江閣。遙見一鶴冲高霞。

陪定菴過北野再用前韻

河洲殘水籠銀沙。高柳隔岸排晨衙。濕雲晴旭互吞吐。時復映空飛雨花。人間歲月總能幾。三年不到先生家。諸孫迎拜肅有禮。別時稚語猶軋鴉。不知甘露何日降。親見紫芝團玉葩。山林朝市各有適。如痛須抑搔。須爬羊羹醢豈不美。陸羽獨好山中茶。惜哉禰衡傲一世。營門乃作漁陽槌。先生歸來萬事足。耳目所及堪吁嗟。尊前有酒便一笑。不用導引吞朝霞。時北野先太史墓產芝甘露降庭

爲潘克承題林良蘆雁

林良花鳥今代奇。水墨到處皆天機。長緜闊幅信手揮。妙處不屬丹青爲。江頭雨深菱苕肥。枯槎折葦紛離披。鴛鴦羽冷畏遠飛。雄雌兩兩相偃依。靈苔翠羽不自危。鷓鴣噤語晞玄衣。依棲俯仰各有姿。乍見幾欲呼鷹師。乃知此老筆不疲。市朝山林時見之。雞林相君知白詩。君家此本吾無疑。北風漸高禾黍稀。雲飛日見江南歸。吳江洞庭三泖涯。天空水遠無拘羈。焉得扁舟從爾嬉。

十二月十八日大雪登樓作寄進之天錫時諸君方修府志

酸風割耳鬢作虬。聞雪強起開西樓。西樓一望幾十里。玉田瑤圃爛不收。兩年秔稻化魚鼈。窮計每日占

來牟眼前富貴已如此。何苦更作明年愁。書生耐冷自常事。北窗清坐端誰留。神游不到黨家帳。意行屢上山陰舟。淮南山海誕莫考。吳中溝澮須精求。映雪著書堪一笑。卻似五月披羊裘。

進之天錫舜弼有和章再用韻

凍指握筆如拳虬。猶有雪詩來北樓。北樓幾日不一到。寒陣未許陽鳥收。瑤琨鸞羽孰堅脆。往往精辯聞龍牟。長安書生四十韻。遠喜不救溝中愁。穎陰禁體亦何事。雕刻但有空言留。憑高極目意頗豁。混漾如駕虛空舟。珠宮玉宇隔人世。一煖誰爲蒼生謀。洛陽盡覆吾亦願。尙恐目前無此裘。

敬亭見和山行有李杜齊能之句。雖主押韻而亦非所當也。因歌奉答并寫近懷。仍用三江送行韻。梧櫂不雜中林蒸。詩人以來稱杜陵。公才本高心獨下。退與元白圖中興。山行一篇如見我。捫蘿踏雪幾凜兢。時從雅淡出奇麗。少年斂手不得矜。三陽改歲萬物泰。和氣上與游雲凝。清河沙河柳色動。近山已有游人登。南飛六驥想回首。足底不見陰山冰。甘泉荷囊事已遠。洛橋軻車材弗勝。破除寂寞賴公等。往來郵筒侵夜燈。朝來雪篇更雄富。無復珠貝論升朋。五湖煙艇未許上。灞橋驢子還堪乘。已聞羔韭畢春祀。佇見柴燎中天升。平安夜火報不絕。似有車騎來增增。蘭臺執簡公未老。長楊奏賦吾猶能。掃妖滅怪只一筆。取青媲白應千層。眼前卻有兩物惱。山中狡兔剡溪藤。

春雪敬亭用前韻再答

西山落日雲蒸蒸。漫衍澗谷彌岡陵。曉窗夢破聞埽雪。失喜一笑披衣興。天街大有隔歲伴。羸馬前日猶凌兢。常言三白兆豐稔。民病亟矣天須矜。從風初學柳絮舞。綴樹旋作梅花凝。素娥晨朝紛下女。玉龍夜戰迷先登。瓦爐煙燄坐不煖。起視膽瓶膠作冰。前年冬溫人苦疾。往歲雨多苗弗勝。新春得此喜可說。光景十倍鼇山燈。忘懷一任鴻寄迹。耐久正愛霜爲朋。淮西剗曲總佳語。萬騎孰與扁舟乘。愁來呼酒徑一醉。斟酌不計斗與升。長安薪炭已如玉。又報米價江南增。閉門高臥吾豈敢。手挽溝壑嗟無能。登樓望山一舒嘯。銀屏玉案高峻層。何當致我此中去。看煮雪茗燒枯藤。

畫馬

吳興公子中英文。文學之外百藝精。龍紋鳥迹窮變態。落筆萬類無潛形。畫家難工在狗馬。卽物計數皆天成。平生所見凡幾本。如形在鑑影在燈。君家此幅得何處。真迹似是來吳興。前行三匹駿且蹇。急鞞恐作蛟龍騰。一匹顧類未肯行。一匹欲臥垂青纓。中間一匹骨如堵。四蹠猶帶交河冰。紫衫奚官髮鬚鬢。胡靴短勒帶紅鞞。當年內廐事毛仲。幾隨仙仗過華清。興亡百變物盡化。惟有遺迹留丹青。摩挲絹素三歎息。毛鬣似覺雄風生。君不見千金尙買死後骨。此馬此人君莫輕。

渡江

昨日渡長淮。今日渡長江。長江更比長淮闊。凌空自有飛鳧雙。雙鳧飛。風不起。天青青。江瀾瀾。眼中不復

見塵沙。只有青山如畫裏。青山如畫。畫不如。十年眼夢繞吾廬。山中猿鶴休驚咤。從今日日青山下。

首夏卽事

金獸香殘畫漏稀。嫩槐庭院午風微。蜜房分子蜂初靜。書閣垂簾燕自飛。小碾試茶催爨鼎。輕刀裁葛已成衣。故園遙憶三江外。梅豆青青筍過扉。

松江志餘。東江初入史局。賦首夏詩。結句云。故園遙憶三江外。梅豆青青筍過扉。館閣諸公歎賞之。謂他日必非嗜進者。

出郭

出郭頻瞻尺五天。雨餘雲物更清妍。樓高紫鳳中天見。山躍青龍到海旋。香徑細尋芳草入。酒帘低傍綠楊懸。微官自笑成何事。間過東風又一年。

以燈圓餉陸太僕

三五新正憶故園。層雲糜玉鬧春盤。小奴解作江南意。遠客都忘歲首寒。梅欲鬪圓忙著子。雪如爭巧故成團。玉厓太僕真清吏。莫認明珠按劍看。

九日世興席上有感用齊山韻

城闕秋風木葉飛。西山落日翠烟微。園亭到處花自好。鴻雁來時客未歸。短髮有情憐破帽。長繩無計繫斜暉。尋常遍插茱萸地。目斷江雲空濕衣。

元夕未齋席上次趙穎菴韻

合有新詩記此朝。好天良會故人招。千門華月春殊盎。三日東風凍已消。銀盞酒香分錦荔。綵屏燈影亂虹橋。只應不及雙龍輦。飛上鰲山聽鳳簫。時駕在宣府。

有懷味苓賦詩未就閏八月二十三夜夢與誦之有所更定而不甚明了寤而足成

西亭橋下路逶迤。中有幽人雙鬢絲。長年讀易懶出戶。逢人把酒亦吟詩。山田十畝自云足。車蓋滿城渾不知。何當便了閒居賦。爲說推敲夢裏時。

游南莊

春江晴日漾龍鱗。笑上蘭舟不問津。雲裏遙山指秦望。水邊墟落想春申。百年顧我青鞵在。雙鬢從他白髮新。歸路月明喧鼓吹。鴛鴦撲漉起青蘋。

薛民望號九山持卷乞詩

西北三江帶五湖。九山清勝結吾廬。風煙陸瑁家相近。水石王蒙畫不如。長日林光圍几席。有時空翠落衣裾。鶴書未問他年事。門外時來長者車。

崔世興宅奉次涯翁韻

酒敵棋朋四座分。不知何處是東君。屏間拂石疑生雨。畫裏看花半作雲。王若水畫梨杏花甚妙。白雪詞章隨筆散。

灑翁席上紅塵車馬隔牆紛平生六一堂前士到處春風挹令芬。
作草書

諸廣文餽子龍潭僧舍別後有懷味茶

聽鶴亭前欲上潮。龍潭落木晚蕭蕭。愁來別酒難成醉。老去詩翁不可招。地下騷壇自旗鼓。人間博局幾盧梟。翠蘿金盃當時句。殘月空梁獨自謠。

宮體

瑪瑙階邊蛺蝶花。玉闌低轉畫廊斜。大家近日親經史。不向宮門候小車。

出郊

小隊黃衫簇絳燈。春來幾度出郊行。桃花結子楊花盡。只有蘼蕪滿路生。

九日鶴塘莊過黃耳祠次高進之韻

五畝園池六尺垣。清溪一曲正當門。鶴雛牛犢皆詩料。賸有美談留子孫。

松風餘韻高進之名。企別號西樓。上海縣學生。莊頭幾日無人到。黃犢生兒鶴長孫。進之佳句也。有詩名。而詩不一見。附錄於此。

明詩紀事卷二

丙籤

楊一清二十一首

一清字應宿雲南安甯州人。成化壬辰進士。授中書舍人。出爲山西提學僉事。遷陝西副使。召爲太常少卿。進南太常卿。拜左副都御史。督理陝西馬政。進巡撫總制三邊。擢右都御史。引疾歸。以忤劉瑾逮繫獄。尋解。致仕。起總制軍務。召拜戶部尙書。加太子少保。太子太保。少傅。太子太傅。兼武英殿大學士。入參機務。再致仕。起兵部尙書。左都御史。仍總制陝西三邊。召還。改吏部尙書。加少師。太子太師。兼謹身殿大學士。進華蓋殿大學士。請老歸。落職閒住。卒。後復故官。贈太保。諡文襄。有石淙類稿四十五卷。詩十九卷。

藝苑卮言。楊文襄如老弋陽伎。發喉甚便。而多鼻音。不復見調。

詩藪。國朝詩流顯達。無若孝廟。以還李文正東陽。楊文襄一清。石文隱瑤。謝文肅鐸。吳文定寬。程學士敏政。凡所製作。務爲和平。暢達。演繹有餘。覃研不足。

野獲編。楊文襄在正德末年。以次揆。少傅居丹陽。適武宗南巡。以征甯庶人爲名。幸其第。留車駕。前後凡三至焉。上賦絕句十

二首賜之。楊以絕句賀上。聖武數亦如之。又有應制律詩諸篇。刻爲二編。名車駕幸第錄。吳中王文恪爲詩四章。修其事。其最後一詩云。漫衍魚龍看未了。黎園新部出西廂。想其時文襄上南山之觴。以崔張傳奇。命伶人侑玉食。王詩蓋紀其實也。楊是時特倚殊眷。徒以邀致六飛爲榮。而不能力勸旋軫。僅以册府元龜等書爲獻。似乖舊弼之誼。然能止蘇浙之行。則功亦足稱。靜志居詩話。蓬菴古詩原本韓蘇近體。一以陳簡齋陸放翁爲師。李獻吉送徐昌穀詩。吾師崛起楊與李。力挽元化迴千鈞。初意楊非李敵。不過爲師同耳。及觀石淙集。實有高出李者。乃知文士以千秋自命。類不輕許人也。

田按文襄石淙全集。利鈍雜陳。其傑出之篇。實可與茶陵旗鼓相當。

和楊鏡川學士先生遊南園詩韻

居官僅旋馬。致客真無謀。諸公不我棄。枉駕同郊遊。韓家好庭宇。石徑通林邱。輕風散炎溽。白露淒以秋。泉脈灌畦潤。槐陰當屋稠。地僻境逾靜。身閒心更幽。塞芳步南渚。觀稼來東疇。詞林有鉅筆。古調難爲酬。豈徒慰孤陋。亦足消煩憂。顰眉擬相效。出叻還自籌。惟餘江山興。歲歲無窮休。

甯惟臣話舊有作

京華抗師席。英俊紛追隨。於時雲路中。後先爭奮飛。文章華館閣。論諫光瑣闈。聯班布臺省。各各能自持。荏苒三十年。大半金與緋。建立有大小。一節無瑕疵。得喪不皆齊。貴此名譽垂。君居諸子中。灑然絕塵姿。敬皇樂從諫。封事多匡時。曾毀延齡麻。不受若訥嗤。東藩具瞻地。早被朝堂推。霜蹠忽以蹶。三年滯離司。舊物始光復。新聞隨鸞馳。我豈河汾儔。敢稱房魏師。姓名幸有託。聊以慰衰遲。一燈話疇昔。離緒千縷絲。

眷言平生交。對酒安可辭。出門冰雪厲。萬物斂華滋。灰葭動律管。陽回無愆期。晚節益自珍。持滿須惕而。皜皜白苧裳。勿使緇塵縈。詩成寄同志。庶以存箴規。

●修武寄陸克深大參約河內一會

玉堂少日瞻風神。一麾南去春復春。已知氣概抗流俗。何止文章能潤身。當時沮遏者誰子。鳳池亟奪良有因。明廷未乏班馬輩。揣分甘與簿書親。敍州九載多勞動。閩閩禮讓風俗淳。黃堂坐嘯若無事。盤錯到手紛如塵。功成進佐七州伯。褰帷處處宣皇仁。行河決獄總經義。以儒飾吏斯言真。任渠喜事笑迂腐。忍貪勞伐聽吟呻。西州過客問民吏。共道我侯爲吏循。何君重感蒼生念。四野觸目雙眉顰。直從徐揚向懷衛。白屋蕭條生意屯。黃河流徙固天數。勝天有術須吾人。雖云盛平異卵累。亦可先幾憂厝薪。公才自是濟時具。恨不專制當通津。杞天漆室本迂誕。愚者一得公休噴。相違百里阻歡合。策馬欲進仍逡巡。北風吹沙天宇暗。後庭殘葉聲相聞。乃知良會不易得。聊以尺素通殷勤。交神命駕如有意。或者河內逢寇恂。

和蘇長公聚星堂禁體韻

風團一掬枯桐葉。瓦爐活火初烹雪。是時真宰設奇觀。物態人情兩幽絕。懸崖老樹僵不死。生意往往存摧折。江山一色天冥冥。鳥影不度人蹤滅。孤舟把釣吾所愛。有肘真被微官掣。急呼紅燭照金杯。不覺醉顏生綺櫺。歐蘇白戰有嚴禁。餘子效顰徒瑣屑。今我不樂真成癡。半百光陰過如瞥。嗚呼世人多附熱。此

興蕭蕭向誰說。君看姚李鬥春妍。謾道廣平心似鐵。

富春道中

遠嶼迷新漲。回汀帶急流。野花疑送客。江月巧窺舟。獨坐成遐想。逢人話舊遊。煙霞何處所。吾亦愛尋幽。

東河驛

秦嶺暮衝雪。東河朝履冰。孱軀一僂僂。病眼雙瞢騰。凍鳥住不住。亂山層復層。夜寒愁擁被。無語對孤燈。

偶述

垂髫謁紫宸。四十一回春。年如下坂路。身是未歸人。故國青山舊。窮邊白髮新。世情自翻覆。吾獨任吾真。

瀛海道中雜作二首

潦倒思鄉客。遲迴溯浪舟。樹連雲外寺。城帶海邊樓。病濕偏愁雨。年衰不奈秋。偶然談世事。猶動廟堂憂。天空秋有籟。海近夜通潮。獨樹如相待。羣鷗不受招。貧餘詩券在。愁仗酒兵銷。何用談生計。故山隨老樵。

宿子午輔

躡磴穿蘿路。轉遙夜寒燈。火正蕭蕭。官程仍出子午谷。鄉夢遠懷丁卯橋。秦嶺天低星斗近。漢江春暖瘴嵐消。馳驅敢作賢勞嘆。愧乏涓埃答聖朝。

江上偶吟

浪花搖曳急流分。徒倚船窗日又曛。萬里江山低度鳥。一林春樹半含雲。帆歸驛路看看近。岸有漁歌歷歷聞。莫向朱絃揮楚調。別情鄉思轉紛紛。

迎建儲詔

八葉重熙戴寵靈。萬方和氣擁明廷。虹光下繞坤宮赤。春色潛浮震殿青。江漢有潮歸少海。華夷隨地仰前星。遙知間寢龍樓日。帝範分明列御屏。

謁睢陽協忠廟

一旅開關百戰中。漁陽鼙鼓避英風。城危竟失江淮敵。義正終收郭李功。滅賊死甘爲厲鬼。擁兵身恨失奸雄。年年明水祠宮在。不愧前朝表協忠。

送王司徒提督貴州軍務

萬里車書燹道通。夜郎何事阻華風。我公舊有綏懷略。此去休論戰伐功。八部蠻煙行處盡。盤江春瘴洗來空。都勻白骨憑誰念。風雨啾啾恨未窮。

一笑

落落長風捲岸沙。倦餘行子合歸家。訛言正愁市上虎。酒影一笑杯中蛇。曳杖閒行隨野鹿。看兒默坐數棲鴉。向來寵辱休重問。只此優游度歲華。

謁咸陽王廟廟在雲南元平章賽典赤治滇有大功

香火高城廟貌崇。邦人相對泣遺忠。漢廷才望金車騎。唐代勳庸渾侍中。地盡關山開禹迹。人於絃誦識華風。車書又屬文明運。猶有新碑紀舊功。

秋興

倚棹江天百感生。倦扶筇杖且閒行。蕭蕭紅葉夕陽下。冉冉白鷗秋水明。飲量暗隨詩力減。路歧真向老懷平。蒼蠅不省寒將至。何處飛來漫作聲。

巡邊偶作

一出頻看隴月圓。朔雲回首隔晴川。鄉心已落征鴻後。行色還當小雪前。二十年來三建節。六千里外五籌邊。亦知保障爲長策。全陝蒼生望息肩。

渡江三首

黃塵脫屣一身輕。十載無功恥聖明。獨立江風吹短髮。渚雲汀草各關情。江頭如聽可人招。鼓枻放歌歌沅寥。秋色滿船月皎皎。水聲入樹風蕭蕭。玉關人老貂裘敝。白雪歌寒鐵硯存。已辦輕車隨款段。尋幽日日水西村。

明詩紀事卷三

丙籤

吳寬三十一首

寬字原博，長洲人。成化壬辰第一人及第，授修撰，歷諭德、庶子、少詹，兼侍讀學士，擢吏部侍郎，掌詹事府，入東閣，專典誥敕，進禮部尚書，贈太子太保，諡文定。有《匏翁家藏集》七十七卷。

四庫總目：吳寬學有根柢，爲當時館閣鉅手，平生學宗蘇氏，字法亦酷肖東坡。縑素流傳，賞鑒家至今藏弄。詩文亦和平恬雅，有鳴鸞佩玉之風，以之羽翼茶陵，實如驂之有靳。

麗堂詩話：吳文定原博未第時，已有能詩名。壬辰春，予省墓湖南，時未始識也。蕭海釣爲致一詩曰：京華旅食變風霜，天上空瞻白玉堂。短刺未曾通姓字，大篇時復見文章。神遊汗漫瀛洲遠，春夢依稀玉樹長。忽報先生有行色，詩成獨立到斜陽。予陞辭日，見考官彭敷五爲誦此詩，戲謂之曰：場屋中有此人，不可不收。敷五問其名，曰：予亦聞之矣。已而果得原博爲第一，亦奇事也。原博之詩，體郁深厚，自成一家，與亨父鼎儀，皆脫去吳中習尚，天下重之。

震澤集：文定爲文，不事追琢，獨嚴體裁，爲詩沈著高壯，一洗近世尖新之習，作書姿潤中，時出奇佩，雖規模於蘇，而多所自得。容春堂集：匏翁詩如漢循吏，所至無赫赫聲，而去思不已，世或模擬之，鮮能似也。

藝苑卮言：吳匏菴如學究出身人，雖復閒雅，不脫酸習。

朱承爵存餘堂詩話。吳文定詩格尚渾厚。琢句沈著。用事果切。無漫然嘲風弄月之語。雪後入朝詩云。天門晴雪映朝冠。步履扶白玉闌。爲語後人須把滑。正憂高處不勝寒。鷺鳥隔竹餐應盡。馴象當庭蹈又殘。莫向都人誇瑞兆。近郊或恐有衰安。愛君憂國感時念物之情。藹然可掬。

筆精東坡遊赤壁時。有絲竹道士楊世昌。同遊赤壁。賦云。客有吹洞簫者。卽世昌也。吳匏菴詩云。西飛孤鶴記何詳。有客吹簫。楊世昌當日賦成誰與注。敏行石刻舊曾藏。此一證也。

田按匏翁詩體擅空閑之華。氣含川澤之秀。冲情逸致。雅製清裁。是時西涯而外。當手屈一指。

入玄墓寺

高登鄧尉山。遙入玄墓寺。老僧具衣履。出門迓予至。落落長松間。一徑獨深邃。鞞鞞鐘鼓聲。鳥雀少驚異。仰而睇山腰。殿宇危若墜。長廊埽清風。修竹自爲葦。結夏四五人。趺坐更無事。樹密山果懸。草深井泉祕。盤旋登小樓。洞庭正相值。洋洋太湖波。兀兀林屋翠。始知衆山中。此寺真畫笥。聞昔萬峯老。卓錫據茲地。道行旣孤絕。遺言有高致。化去動吳人。金帛爭布施。歲久骨當朽。遺容未全敝。禪室晝寂寥。雲水乏供饋。惟餘佳山水。不改太古意。磨厓紀勝遊。吾當一題字。

爲王希曾題啓南長蕩圖

吳綾八尺餘。遠勝好東絹。坐移長蕩來。歛向眼中見。按圖想舊遊。巒嶺開生面。陽山踞獨尊。虎阜奔而殿。柔櫓一搖搖。船頭翠痕轉。春水澹若空。白雲故多變。佳哉吳中景。獨許沈郎擅。典客方壯年。孰云宦途倦。

吾志每圖南。欲趁秋風便。幽深付一筇。此樂人無羨。

題海虞錢氏所藏王均章虞山圖

扁舟昆湖去。憶向虞山還。當時迫日暮。未得窮躋攀。至今三短章。寂寥不重刪。安知六載後。依然見茲山。諒無愚公愚。賴有頑仙頑。仙隱居處深。林置柴關。丹竈火常伏。藥闌苗載芟。高情付縑素。丹青色斑斑。茲山臥平野。隱然不成環。逶迤亦甚遠。攢蹙何其慳。只尺見百里。羣峯互垂鬢。飛鳥歸易沒。浮雲出偏閒。拂水最奇麗。空巖故漩澗。天風或稍定。石壁仍潺潺。仙宮對佛寺。妙境非人寰。獨憐仲雍草。誰爲翦榛菅。短棹載書卷。浩歌水雲間。彷彿歸菴翁。往來寶巖灣。竊祿本無補。乞身亦多艱。臥遊畢舊願。坐笑開塵顏。爲楊應甯僉憲題畫

勝地着孤亭。翼然臨絕岸。杖屨復溪頭。斯人來獨慣。青松栽已高。白石煮應爛。詩思逐浮雲。峰回忽中斷。爲盛舜臣題山水長卷

城西蕩雙槳。遙背伍胥門。人家枕河住。漸喜歷鄉村。豁然見平田。農夫荷鋤去。好風低嫩苗。微雨灑高樹。葦間多放艇。柳下或扳罾。錦布菱荷蕩。沙明鷗鷺汀。魚梁接牛宮。沽酒新郭市。迤邐到橫塘。虹橋垂四趾。亂山似遮路。旋轉自長溪。水人太湖北。雲生光福西。叩舷唱吳歌。有客中流過。千載懷古心。悠然欲相和。香徑旣云沒。琴臺亦成空。山頭明月上。仍照館娃宮。登高信徒勞。望遠發深喟。閒展圖畫看。舊遊一何類。

陸天遊畫

儻然掩陋室。幸此絕塵鞅。偶開水墨圖。頗慰山林想。危岑瞰深碧。湖水平如掌。喬木四五株。秋氣始蕭爽。不逢弄舟人。似聽伐木響。二老足高致。多暇自來往。落照變巖態。臨流更欣賞。

秋雪歎

吾生本江南。不慣見秋雪。見之自北都。都人亦不說。初偕雨兼零。忽逐風急刮。漸看瓦溝平。似畏石城滑。陡然作寒威。貧家勢難活。米炭幾時儲。蠶鹽何處斡。以至裹曲身。況也無衣褐。病體強自支。憂世亦頗切。茲事已兩見。挾句未遑闕。月令不深考。政事何所缺。惟天量有容。陽氣終奮發。赤日中天行。窮檐遍昭晰。涼颼只淒然。勿遽變凜冽。霏霏嘉瑞成。卻待嘉平節。

題畫

誰持畫障索我歌。見畫如向江南過。扁舟坐我順流去。兩岸不斷山嵯峨。山中老樹青婆娑。雲深難辨枝。與柯渺然一片漾。微白千頃平湖生遠波。想當若人作此畫。墨汁如雨流滂沱。夕陽落盡板橋上。何彼行客偏么麼。我生固有山水癖。猶道圖畫傳來譌。昨朝騎馬出城去。看山直到燕山阿。千巖萬壑青不了。較之江南山更多。長溪淺渚舟如梭。亦著漁翁披綠蓑。青鞋布襪不曾辦。馬背未必愁坡坨。若非塵鞅縛人住。山水佳處須行窩。題詩自笑徒吟哦。佳哉此圖如我何。煙江疊障寫長句。我亦年年嫌老坡。

趙松雪長江疊嶂圖李貞伯藏

長江滔滔向東瀉。憶昔扁舟順流下。慈悲閣前浪花白。兩岸青山似奔馬。兼葭楊柳風颼颼。江行六月疑深秋。歸來已是十年事。看畫偶然思舊遊。江流樹色非邪是。仍見山腰隱高寺。赤岵滄洲杳靄間。只尺悠然起愁思。茗溪影落鷗波亭。王孫弄筆何時停。北來戎馬暗江滸。千古遺恨歸東溟。

謝孔昭臨黃大癡畫

大癡道人避世士。移家舊隱虞山裏。早年能畫老入神。落筆虞山宛相似。深林依稀村塢重。水口近與昆湖通。高岡硜礧勢欲墮。此老前身黃石公。百年以後誰其亞。昔者吳門稱老謝。案頭臨畫似臨書。咄咄逼人真可詫。風流前輩杳難攀。謔語空傳謝疊山。窗中遠岫依然在。天際春雲仍自還。孔昭善畫山。自稱謝疊山。

李世賢持啓南雪嶺圖索題次韻

小徑升堂新築沙。退朝無事還私衙。誰移雪嶺入我屋。老眼白日疑昏花。坐遊未覺足力倦。倏過野寺仍山家。淺溪舟膠集凍鴨。空谷屐響翔飢鴉。狂風入林一攪動。零落玉蕊兼珠葩。此時誰埽林下白。急欲往煮僧房茶。忽然仰而見高寺。扣戶還須持馬撾。長安十年走薄宦。對此似將塵土爬。西湖尋僧天欲雪。蘇子故事令人嗟。清虛舊韻更可借。捧硯獨無王子霞。

題趙子固畫蘭

王孫弄筆成墨藪。九畹依然連百畝。開圖墨瀋將誤拾。撲袖香風不勞歟。破縑零落三百年。非藉好事安能傳。寸根無土強生活。鄭老後來真可憐。

爲屠大理題石田畫

生綃丈許畫者誰。石田老人今畫師。年來都下家家有。此幅吾知出親手。筆意縱橫信所之。夾岸翛然已疏柳。溪陰欲渡無舟楫。萬杙成橋遠相接。何處詩人跨瘦驢。破帽欹風粘落葉。兩山對峙開高關。豁訝梵宇容千間。半空丹艷勢突兀。雪竇天台真等閒。老人昔共遊虞山。此景彷彿曾躋攀。昆湖蕩漾臨几席。水繞漁莊凡幾灣。京華十年走塵土。看畫分明能破顏。山林在望鳥飛倦。春到江南吾欲還。

郭熙雪浦待渡圖

宋人能畫非等閒。郭熙絕藝如荆關。御府收藏三十軸。玉堂猶自遺春山。橫圖若此纔數尺。春山相逢應厚顏。北風怒號振平野。巖石吹墮林河彎。望中慘慘皆雪意。飛鳥未倦爭飛還。何人翦水作六出。山上陡失千青鬢。渺然上下同一白。但見空林楓葉殷。流泉不流凍作滴。豈似雨過聽潺湲。羣猿入洞失連臂。文豹藏窟無一斑。須臾坑谷盡填滿。萬頃蕩漾仍澄灣。野航載客遙在望。舉手招呼急欲扳。冰花粘棹行尤澁。雲低落日懸孤環。往來浦口屢涉險。未識舟人心苦艱。擁裘馬上莫相笑。山南捷徑非人寰。

東坡樂水圖

右手按膝左手戟。長帽不着毫氣溢。此翁豈是尋常人。眉山秀出文章伯。擘開青峽噴玉泉。石罅百折猶轟然。山中自當一部樂。何用嘈嘈鳴管絃。惠州飽飯渾無事。羅浮之西山崛起。白水留題屬此公。萬里來遊天所使。黃衣翛然戴小冠。水樂同爲杜牧看。圖中不是程正輔。方外當爲鄧守安。

題楊鐵崖墓銘後

泰定年間名進士。會稽山下老徵君。金陵不看三秋月。玄圃長噓五色雲。對客呼兒將鐵笛。從人笑我醉紅裙。風流盡付吳淞水。還繞劉伶四尺墳。

過橫塘

夏半橫塘風日多。畫船載酒壓晴波。高田得雨皆秔稻。長蕩翻雲足芰荷。未必他年成故事。也須隨處結行窩。悠悠十里城西路。此是登山第一歌。

舟經荻蕩阻風留宿王抑夫田舍

歲暮江村落日懸。誰家魚網設平田。岸頭行客認風伯。堂上主人疑水仙。斗酒急呼聊慰藉。扁舟欲去重留連。荒溪白屋炊煙少。縣吏那堪橫索錢。

寄光福徐雪屋

吳下隱君徐雪屋。久緣山水伴漁樵。孝廉有士還堪薦。貧賤於人真可驕。書卷夜當巖月展。布袍寒傍渚

風飄銅坑深處楊梅熟。尙憶題詩坐石橋。

送王允達後飲通法寺西軒

杯酒頻將別恨澆。日斜酒盡卻無聊。獨嫌去客忙騎馬。更欲尋僧懶度橋。小圃杏花春尙淺。長溝流水意俱遙。年華似與人相約。牆外鞦韆映柳條。

送劉職方時雍赴福建參政

早振詞林五色翰。廿年郎署忽彈冠。校書劉向成新序。判事姚崇起夏官。楚客不驚湖海闊。閩山能隔雪霜寒。他時召伯甘棠樹。只是南風荔子丹。

題啓南畫

閉戶蕭然亂雪中。已無賓客晚堂空。檣梧獨據忘爲我。老筆能揮愛此公。卻構石闌臨絕澗。似聞茆屋卷秋風。十年別卻西莊路。歲暮相思白髮同。

謁耶律丞相墓在瓮山下前有石象鬚分三線其長過膝真異人

角端人語大兵還。帷幄功高掩伯顏。身託中原只杯土。神歸朔漠自重關。僧伽香火青松盛。翁仲風霜白石頑。遺象儼然驚嘆久。一間空屋倚西山。

飲玉泉

龍唇噴薄淨無腥。純浸西南萬疊青。地底洞名疑小有。江南泉品類中泠。御廚絡繹馳銀甕。僧寺分明枕玉屏。曾是宣皇臨幸處。游人誰復上高亭。

賀秦修敬八十

扁舟憶泊錫山東。十載丰神夢寐中。巢父釣竿隨海霧。陶僊笙樂坐松風。朝廷錫誥還因子。鄉社評詩合讓公。第二泉甘真可釀。百杯春酒莫教空。

次韻達賓之作書戲效拙體

書家新樣出眉山。若擬丰姿定玉環。硯沼百坡空對影。管城一孔但窺斑。臨模惡札勞唐楮。結構奇材得魯般。此意亦知聊戲我。試看撓奪語尤頑。來詩小序有勿怪撓奪蘇家行市之語。

麗堂詩話。吳文定善蘇書。予嘗作簡戲效其體。文定作斑字。般字韻詩戲予。予和答之。往復各五首。予斑字有曰。心同好古生。差晚。力欲追君鬢。恐斑揚。邇吳箋猶送錦。猶殘湘管半無斑。換羊價重街頭帖。畫虎心勞紙上斑。雲間天馬誰爭步。水底山雞自照斑。般字曰。聊以師模歸有若。敢將交行比顏斑。鄭師乍許三降楚。墨守終能九卻般。文心捧處慚施女。筆陣圍時困楚般。文定詩大有佳句。今失其稿。求之未得也。

竹園壽集

七客同期賀誕辰。古詩三壽句如新。合爲一百八十歲。做樂天語總是東西南北人。露下高松如細雨。風迴曲徑捲湘筠。杏園雅集今重見。良史當筵亦寫真。

匏翁家藏集。太子太傅吏部尚書鄧屠公。太子少保戶部尚書曲陽周公。都察院右都御史鄆城伯公。同生正統庚申。至今弘治己未。同躋六十。伯公之生差先屠公稍後。今其中爲周公。乃五月四日也。是日諸僚友。若戶部尚書祥符王公。太子少保左都御史烏程閔公。吏部左侍郎舒城秦公。戶部左侍郎靈寶許公。右侍郎睢州李公。右副都御史臨淮顧公。及予七人。卽因公私第之後園。置酒合賀。情好甚洽。賓主盡醉。皆以爲自有壽筵以來。無若此盛者。予忝預茲集。乃首賦四韻爲倡。諸公咸和之。秦公別集古句。諸公又和之。周公復自有作。又咸和之。皆以爲自有壽章以來。亦無若此盛者。坐有善繪事者。爲錦衣二呂君。屠公授宣德初館閣諸老。杏閣雅集故事曰。昔有圖。此獨不可圖乎。二君遂欣然模寫。各極其態。因按其次第。繫於卷中。其始並湖石坐者。左爲伯公。右爲許公。一童子拍手導鶴舞以娛之。爲周公。坐稍遠。使其二子共具。伯曰。大學生孟。捧杯前行。仲曰。刑部主事曾方。拱立聽命。並立竹間者。左爲李公。右爲顧公。皆凝然有思。若索句狀。屠公則章已成。一童子捧硯。從竹下書。據石案而題卷者。爲予。共案坐而持筆者。爲王公。執麈尾者。爲閔公。亦若有所思者。獨坐而握卷。則爲秦公。其集句已就之時歟。若二君。左爲紀。右爲文英。展畫並觀。而圖終焉。園中草木非一種。而竹多且茂。故以竹園壽集題卷首。卷成轉寫。各得一卷藏于家。又出屠公之意云。是歲六月二十八日。吏部左侍郎長洲吳寬序。

題畫

漁舟凍不移。況有樵斧響。占斷梅花灣。甘爲五湖長。

竹禽圖

江南煙雨竹枝低。一箇子規枝上唳。日暮不須唳更急。行人初到秣陵西。

次韻天全翁遺光福徐用莊雪湖賞梅

永和人物數諸王。曲水難勝一野航。得似太湖三萬頃。梅花灣裏作家鄉。

王澹游歲寒圖後有王叔明題

修竹風回玉珮清。松聲相和紫鸞笙。北人不識梅兄面。莫怪王蒙說手生。

馬中錫三十六首

中錫字天祿。故城人。成化乙未進士。授給事中。出爲雲南按察僉事。改陝西。入爲大理少卿。擢右副都御史。巡撫宣府。引疾歸。起撫遼東。召拜兵部侍郎。以忤劉瑾。改南工部。尋勒致仕。逮繫詔獄。斥爲民。瑾誅。起撫大同。遷右都御史。提督軍務。進左都御史。以師老無功下獄。尋死獄中。有東田集六卷。

孫緒沙溪集。東田詩。憫時痛俗。以極於體物盡性。而要諸變。雄渾深沈。無急蹙狹小之病。問於閨情幽思。旅懷宮怨。以自況。而閒情逸興。時得之諷誦之外。

田按東田集。句律渾成。有明珠走盤。彈丸脫手之妙。是時茶陵執盟詩壇。東田別派孤行。可謂特立之士。

春詞

紅梅花插銀瓶小。紫降煙隨金篆裊。病酒假香起尙遲。流蘇帳煖雞催曉。是誰偷捲繡簾窺。庭院推籬總不知。小立風前梳洗罷。笑團雪打綠衣兒。

幽居

幽居人不到。撫景自流連。露重花垂地。風狂絮上天。鶯聲行酒曲。榆莢買春錢。只恐王維過。相疑是輞川。
冬夜偶書

甲第備投刺。朝衣瘦不勝。睡於冬夜足。詩向閨年增。家近通書易。官貧立券仍。幾思歸栗里。江守欠王弘。
有所思

想象當時貌。雲鬢內樣梳。鞵金描蛺蝶。領玉綴蟾蜍。淺黛春山遠。嬌姿豔杏初。而今成間阻。何處可通書。
過懷安廢城

古城多年廢。牛羊散碧蕪。水聲南入漢。山勢北連胡。士馬乘秋簡。旌麾向曉徂。所希邊報靜。麟閣未須圖。
西菴

坐愛禪房靜。來憑曲徑通。荳花先雨白。柿葉未霜紅。籬犬金絲小。林鳥玉頂同。猶嫌城市近。或有趁齋翁。
同錢大用早秋遊西園

池運入西園。花香襲酒樽。門臨三汊水。橋枕獨家村。午樹團清影。秋苔滑紫痕。幸陪熊軾老。一醉各忘言。
暮春寫懷和貫道韻

宮袍顏色半凋零。過盡東風坐小亭。燕子不來簾未捲。桃花亂落酒初醒。鏡中短髮三分白。門外西山十

里青無那官閒清晝永。呼兒讀取楚辭聽。

早春省中試筆

畫廊簾幙捲東風。退食今朝又自公。向煖柳條才半綠。怯寒花朵未全紅。朝衣正辦江頭酒。方藥難醫左耳聾。何日上章辭北闕。扁舟去趁陸龜蒙。

和劉振之感懷

垂柳陰陰覆苑池。省中春去吏先知。宮鶯捎蝶衝閒幔。簷雀將雛過別枝。盡日阜囊無一事。幾時黃色見雙眉。爲郎愧我身先老。白髮年來漸覺私。

追和振之山行過廣善寺

寺僻林幽石徑賒。案頭經卷是楞伽。犬閒長晝眠芳草。僧背斜陽掃落花。一幔隔村題酒店。亂罨臨水晒漁家。偶來行院留詩在。香積廚人爲具茶。

夏日病中卽事

心如病酒縈飛絮。情似傷春對落花。茅屋睡殘聞布穀。葦籬編就架蘆瓜。客來具飯還燒笋。僕出分泉自煮茶。誰向山中飽諳此。笑人騎馬候東華。

陳千戶莊上卽事

彷彿裴家綠野堂。柴門茅屋竹牀方。近檐雲宿林花潤。隔隴風來水稻香。白鳥度山秋欲暝。紫駟馱醉路偏長。相過此地年來幾。回首人間吏事忙。

秋夜不寐感而有作

白頭搔短對殘缸。寒鼓聲沈月到窗。爲客不逢牛渚謝。攜妻欲學鹿門龐。愁憑酒破須頻酌。病與詩磨未卽降。卻憶扁舟歸去者。蘆花今夜臥秋江。

省中覆和李汝弼韻

白首叨陪鷓鴣行。北窗爭似傲羲皇。酒開春甕愁仍醉。花落風簾夢亦香。夜雨溪聲來枕近。夕陽山影到門長。自慚岐路迷歸轍。猶戴朝簪直省廊。

立春後禁直

禁門深鎖隔罍罍。吏散空階鳥下遲。殘雪未消鳩鵲觀。暖風先到鳳凰池。一官多暇文書靜。十載無能鬢髮衰。便合放舟江海去。豈應常戀好文時。

挽鄧廷曜編修父

門外闔山遮莫青。烏皮几在吏誰凭。圖書壓架思玄晏。水竹移居失杜陵。墓石文章鐫細字。影堂風雨暗孤燈。可憐東省西曹客。總爲阿翁淚滿膺。

王太史園亭同明仲洗馬圭峯侍讀西涯侍講曰川修撰正夫提學小飲

再到玉猷看竹亭。新梢無數入簾青。酒開上若斟瓊液。門對青山列畫屏。晝永陰雲垂雨腳。樹深幽鳥墮風翎。相逢莫漫談曹事。恐惹花枝笑獨醒。

卽事

春雲低樹鶉鳩鳴。清曉登樓野望平。近郭人家初播種。養花天氣易陰晴。危欄偶受東風倚。芳草偏勞遠客情。況復日來新病起。沈腰消瘦可憐生。

同泰上人縱步東園

散策東園一徑斜。去城尺五未爲賒。春光試煖先楊柳。風信猶寒困杏花。心靜久無朝報擾。眼明應少市塵遮。從遊此地誰爲伴。惠遠年來鬢亦華。

閨怨

羞把高樓玉笛吹。玉人心不似當時。歸期屢負金錢卜。別恨虛勞錦字詩。醒後酒痕猶的歷。病中花事已離披。口脂而藥無消息。紈扇秋風冷漢姬。

居庸關

野色微茫日下昏。長陵西去是居庸。貔貅萬竈關門戍。龍虎千年王氣鍾。地險不須勞北顧。時平端可笑

東封。我來總爲宣威德。令尹毋嗔著述慵。

白瀑寺在居庸關西百里。寺中畫壁碑志皆金大定年物也。

白雲深處萬重山。寺在雲山杏靄間。四壁丹青圖海會。斷碑文字紀完顏。唄餘盤石僧初定。齋罷生臺鳥未還。世上紅塵應不到。正宜長日掩柴關。

德勝寺

山寺樓臺帶晚霞。從來車馬不聞譁。青松樹下盤陀石。綠水橋邊躑躅花。老宿殘經猶在案。前朝斷礎半沈沙。行人不解悲遺事。爭向村中問酒家。

浮圖峪

關城樓櫓出層雲。獨自憑高日又曛。易水遺墟燕太子。飛狐故道李將軍。戍連朔漠兵威盛。山限幽并地勢分。弭節怪來無一事。虞廷長夏奏南薰。

秋日西園

散策西園一徑幽。袖風巾雨足淹留。鳧鷖塘淺蒹葭晚。蟋蟀籬疏薏苡秋。怪事謾勞書咄咄。別名還擬號休休。客來莫共談機事。抱甕先生已白頭。

落花

枝枝狼籍畫闌東。眼底穠華又屬空。弱質可禁三月雨。香魂易斷五更風。乍離芳樹應思綠。欲點蒼苔不
惜紅。一片無何終萬點。曲江愁殺杜陵翁。

訪西庵有懷舊僧

門掩空林叩不應。西庵猶記舊尋僧。花深無路迂雙履。苔滑逢橋仗一藤。風外吟髯吹短折。水邊病骨照
稜層。年來一鶴猶堪煮。何事支郎卻養鷹。

早春半里橋散步

芳草連村柳蘸隄。橫塘北去小橋西。淺黃乍泛鵝兒酒。嫩冷猶欺燕子泥。細雨有時沾袖濕。閒雲無力度
牆低。瀛南獨客掀髯笑。一瞥風光直品題。

泊南旺湖連日阻風

荒灣斜日艤扁舟。病眼逢春恰似秋。鄉思如雲俱北去。閒愁隨水不東流。爲驚旅夢憎黃鳥。未息塵機愧
白鷗。明日謫仙祠下過。石尤風定一登樓。

過分水祠

此地殘年又一經。掀篷垂柳正青青。雲煙斷處山光出。鷗鷺來時水氣腥。市酒一旗風外裊。漁歌雙槳月
中聽。同來誰道貞元客。萬慮全灰兩鬢星。

絕句

春草碧連天。春鶯黃妬柳。行人歸未能。且醉長安酒。

促陳元溥遊水雲亭

萬里橋邊黃四家。水香雲煖小亭斜。少陵頭白猶強健。肯許樽前醉落花。

題小畫

溪友敲門留白魚。浣花翁舍酒應無。急呼阿段衝寒雪。黃四娘家得得沽。

短述

蠶採花鬚忙釀蜜。蠅銜蝶翅亂隨衙。幽人一笑輟吟事。獨倚闌干春日斜。

春怨

酒痕和淚斲羅衣。掌上纖腰瘦一圍。燕子不來猶臥病。半簾紅雨送春歸。

明詩紀事卷四

丙籤

彭韶一首

韶字鳳儀。莆田人。天順丁丑進士。授刑部主事。歷員外郎中。出爲四川按察副使。遷按察使。再遷廣東布政使。改貴州。擢右副都御史。巡撫應天。改順天。永平。召爲刑部侍郎。尋兼僉都御史。巡視浙江。兼理鹽法。改吏部。進刑部尚書。卒。贈太子少保。諡惠安。有從吾滯稿十二卷。

四庫總目。韶正色立朝。巋然耆舊。其文雖沿臺閣之體。而醇深雅正。具有根柢。不同於神瘠而貌腴。

今言方遜志在翰林。寵任時薦。西楊。西楊修實錄。乃謗方。叩頭乞餘生。彭惠安公哀江南詞。敘述建文死義之臣。至方遜志乃云。後來奸佞。巧言自粉飾。叩頭乞餘生。無乃非直筆。蓋指西楊輩修實錄。書方再三叩頭乞生者。非實事也。

關陔詩話。惠安詩風骨峻整。氣味醇厚。

魏孔淵太守送岑嘉州集書數韻復之

岑嘉州真名流。生平浩氣橫清秋。詞源瀕洞傾枚鄒。春江曉漲蛟龍浮。從班解秩不復收。從軍直到海西頭。胡沙三載踏驂騑。長安萬里空悠悠。開關西赴五馬侯。郎官御史青幕遊。蜀嘉山水增清幽。夜夜文光

煥斗牛嘉州嘉州知不憂遺文淪落人重修當時炙手勢莫倚至今寧有姓名留。

王克復一首

克復字師仁福清人天順丁丑進士授刑部主事歷員外郎中出爲江西參政歷湖廣按察使江西布政使擢右副都御史巡撫應天遷南吏部侍郎。

吳門懷古

昔日館娃處繁華空故邱楓橋霜落夜茂苑月明秋響屨青苔沒香涇錦纜收傷心歌舞地一任麋鹿遊。

周謨一首

謨字守謨新淦人天順丁丑進士累官陝西按察副使有東臬集。

寓舍舒懷

春風浩蕩捲晴沙幾日行人未到家料得東臬桃李樹已應開到二分花。

左贊二首

贊字時翊南城人天順丁丑進士授吏部主事歷員外郎中出爲浙江參政遷廣東布政使有桂坡集。

書史會要左贊書法兼諸體尤精於隸得二蔡筆意。

遊從姑山

勝境重來又十年。山中風景故依然。危崖俯瞰雙江水。石竇微開一綫天。夾道松筠森晚翠。隔城樓閣倚晴煙。白鷗波外浮雲淨。目送飛帆到日邊。

徐貫一首

貫字原一。淳安人。天順丁丑進士。授兵部主事。歷員外郎中。出爲福建參政。遷布政使。改山東。擢副都御史。巡撫遼東。召爲工部侍郎。進尙書。加太子太保。卒。贈太保。諡康懿。有餘力稿。

蒜嶺驛別張序班

驛路相逢又相別。客邊送客若爲情。東風也解離人意。故遣飛花繞旆旌。

虞勳一首

勳字舜臣。海鹽人。天順己卯舉人。

登鷹阿頂贈松崖道人

道人結屋懸崖巔。蒼松百尺蟠屋前。凌空怪石根半露。巢鶴老樹藤相纏。層巒醉踏苔雲滑。洞門長嘯蘿月圓。借君九節碧玉杖。同探崑崙十二天。

王佐一首

佐字廷用。福州中衛人。天順己卯舉人。授桐廬訓導。改鄒平教諭。有三留稿。

靜志居詩話。廷用宮怨詩。芙蓉帳冷減容光。愁倚熏籠著牀。寒氣逼人眠不得。鐘聲催月下迴廊。曹能始十二代詩采之。游用之。夢焦詩話。謂南甯伯毛舜臣。留守南都。灑掃舊內。見別院牆壁。多舊宮人題詠。年久剝落不可辨。識其一。署曰媚幽仙子書。卽此詩末二句也。當出好事者傳會。不然裕陵定都北京之後。康陵未南巡以前。安有宮人以廷用詩書之南內壁乎。

上清宮留飲

羽僊邀我飲流霞。不覺松梢日已斜。鶴背洞簫歸路晚。一聲吹落碧桃花。

張濬一首

濬字哲之。閩人。天順己卯舉人。授饒平知縣。有孝友堂遺稿。

宮詞

金箔微開掃玉牀。離宮初度水風涼。月華滿地笙歌沸。未信今宵更漏長。

張元禎一首

元禎字廷祥。南昌人。天順庚辰進士。選庶吉士。授編修。進左贊善。擢南侍講學士。遷南太常卿。兼學士。掌詹事府事。擢吏部侍郎。入東閣典誥敕。天啓初。追謚文裕。有東白先生集二十四卷。

漫興

吾聞唐虞時。明目達四聰。如何後來世。自作瞶與矇。致令天下情。默默不能通。撫卷三嘆息。颯颯來天風。

陳煒一首

煒字文耀。閩人。叔剛子。天順庚辰進士。授監察御史。遷江西按察副使。進布政使。有恥菴集十卷。宿茅山觀。

息影茅山陽。林昏月初上。樹古虬影蟠。風迴葉聲響。客夢不成憩。孤懷共誰賞。緬惟故山雲。無由謝塵想。

黃孔昭一首

孔昭初名曜。以字行。改字世顯。黃巖人。天順庚辰進士。授工部主事。進員外郎。改吏部。進郎中。擢右通政。遷南工部侍郎。嘉靖中贈禮部尚書。諡文毅。有定軒集。

田按文毅官吏部。最有名。嘗與謝鳴治輯台人詩。爲赤城集六卷。許廷慎、李長民諸人詩。皆賴以傳。

遊山寺

山隱招提境。人穿松柏林。鐘聲出樹遠。塔影到池深。掃葉分僧石。聽猿坐竹陰。禪關秋草滿。索寞向誰吟。

陳選一首

選字士賢。臨海人。天順庚辰進士。授監察御史。擢河南按察使。進廣東布政使。

雨阻

蓬響聞雨至。淒然生旅愁。遙尋晚林磬。暫駐寒塘舟。窗下一僧老。林間曲徑幽。誰言阻行者。翻使得佳遊。

祁順二首

順字致和。東莞人。天順庚辰進士。授兵部主事。遷戶部郎中。出爲江西參政。謫石阡知府。遷山西參政。進江西布政使。有巽川集十六卷。

田按致和守石阡。撰石阡志十卷。以才敏稱。文守嘗遊鎮遠西峽山。與興隆周布政瑛倡和。布政有句云。忽聞黃太使。詩句落黔中。其爲黔人傾慕如此。

登臨江清風樓

晚涼公事暇。乘興一登樓。雲氣千山雨。松聲萬壑秋。隄平芳草合。天遠大江浮。日暮行人少。空橫野渡舟。

野塘秋景

翡翠鴛鴦各有情。映波毛羽最分明。玉樓金殿何須問。且了閒塘一段清。

鄭紀一首

紀字廷綱。仙游人。天順庚辰進士。改庶吉士。授檢討。歷國子祭酒。南左通政。太常卿。戶部侍郎。進本部尙書。致仕。有東園文集十四卷。詩集十二卷。

遊鳴峯巖

清絕梅峯下。溪南第一山。客尋流水到。僧伴白雲閒。松子撲琴響。藤花點硯斑。雖居浮世上。卻自異人間。

彭教一首

教字敷五。吉水人。天順甲申第一人及第。授修撰。進侍講。有東瀧遺稿四卷。

麓堂詩話。曩時諸翰林齋居閉戶作詩。有僮僕窺之。見面目皆作青色。彭敷五以青字韻嘲之。幾致反目。予爲解之。有曰。擬向麻池爭白戰。瘦來雞骨豈勝拳。聞者皆笑。

月印龍潭

一月在天心。影落寒潭底。閒撫曲闌干。問龍何日起。

陸鈇三首

鈇字鼎儀。崑山人。榜姓吳。天順甲申第二人及第。授編修。歷修撰。右春坊右諭德。擢太常少卿。兼侍讀。有春雨堂稿三十卷。

懷麓堂集。鼎儀詩調高古。盡去濃豔。當所得意。縱筆揮灑。刻意極力者。顧追之而不可及。尤嗜書。清勁可愛。

麓堂詩話。張滄洲亭父。陸靜逸鼎儀。少同筆硯。未第時。皆有詩名。亭父天才敏絕。而好爲精鍊。奇思硬語。閒見疊出。人莫禦其鋒。鼎儀稍後作。而意識超詣。凌高徑趨。擺落塵俗。筆力所至。有不可形容之妙。雖或矯枉過正。弗恤也。二人者。若天假之年。其所成就。不知到古人何等地步。而皆不壽以死。豈不重可惜哉。詩談。陸鈇九霄之禽。翩然高舉。莫測其意向。

藝苑危言陸鼎儀如吃人作雅語多在咽喉間

田按陸鼎儀張亨父詩均為茶陵所稱許鼎儀有清裁而力弱不能自舉

戲簡文量

樽前誰遣雪兒歌。司馬風情晚更多。銀蠟影偏人已醉。紫檀聲斷興如何。歸來尙想桓伊笛。醒後空慚學士波。戲問韋娘今健否。青樓元自不曾過。十月二十八日予與文量晚酌未懋遲處懋遲以教坊弟子王按拍清歌數曲中有所謂學士波者余不解文量晒之曰此方言也。文量醉甚戲問秀杜韋娘安否秀茫然無以對因相與撫掌而罷云。

次韻答亨甫

水繞城圍二萬家。市門潮落露寒沙。橋憐白塔吟風葉。路憶新隄臥雨花。自媿兒童辭邑里。每因朋舊惜年華。他時歸臥吳江上。應借滄洲十頃霞。白塔亭甫屋邊橋。新隄余家河也。

瓊林醉歸圖

金羈細馬出明光。碧色羅衣錦繡香。行過玉河三百騎。少年爭說李東陽。

田按天順七年癸未二月會試棘闈火八月再試取吳鉞等二百四十七人至甲申乃舉廷試東陽二甲第一年最少僅十七

張泰八首

泰字亨父太倉人天順甲申進士選庶吉士授檢討遷修撰有滄洲集十二卷

升菴集。張亨父詩句清拔。名於一時。其正月十六日詩云。長安元夕少燈光。此夜歡娛覺更忙。十里東風吹翠袖。九門銀燭照紅粧。虹橋御陌爭春步。雲閣誰家闌晚香。醉着吟鞭急歸去。老夫當避少年狂。其手書稿。愼於先師李文正公處見之。

南濠詩話。張修撰亨父。工於詩。嘗歲晚與翰林諸公聯句。有云。生事幾年話。風流後輩誇。竟以是月卒。亦詩叢也。

田按。亨父才華爛漫。與陸鼎儀。陸文量。號吳中三鳳。館選時。劉文安爲院長。語某吉士云。古詩律詩。各有體裁。與亨父叩其妙可也。其爲老輩推重若此。

用韻答陳克敬杏花下作

春來幾花開過春。幾人復爲花主人。臨風問花花不語。一片已墮青溪蘋。我有春詞爲花發。韶華瞥眼春江雪。花時不抱花影眠。孤負青天送明月。

贈別蔡時中溫州佐府

南客之官去浙東。永嘉山水儘相容。城當斗口雲生壘。寺落江心浪打鐘。松院一琴同吏隱。花時五馬勸春農。未應別駕淹高足。漢署人多識蔡邕。

爲鎮江唐一敬題一泓亭

江郭喧喧此室幽。當階一水淨涵秋。晴看細浪搖花幔。夜吸寒星落茗甌。未惜草書供渴兔。最愁橫吹起潛蚪。題詩爲問唐清叟。還許濠梁作勝遊。

長門春思

露重花垂泣。煙深柳暗顰。如何清禁裏。有此斷腸春。

京中咏春

輦路輕塵撲馬鞍。酒房花市繡成團。一家樓榭東風裏。多少春愁隔畫欄。

海城春望

一帶浮光界遠田。數枝花柳簇春煙。誰家酒幔招人醉。搖蕩東風出樹巔。

題畫

遠山隔樹高於隴。墜石當溪響亂泉。欲脫塵衣此中去。滿庭黃葉抱秋眠。

二陸來酌聞隣家絃索聲

酒淺燈寒醉不成。隔牆絃語若爲情。太平兒女中原樂。不是蛾眉出塞聲。

謝鐸四首

鐸字鳴治。太平人。天順甲申進士。選庶吉士。授編修。歷侍講。南國子祭酒。擢禮部侍郎。卒。贈禮部尚書。諡文肅。有桃溪淨稿八十四卷。

麗堂詩話。謝方石出自東南。人始未之知。爲庶吉士時。見其送人兄弟詩曰。坐來風雨不知夜。夢入池塘都是春。爭傳賞之。學詩自立程課。限一月爲一體。如此月讀古詩。則凡翰林官課及應答諸作皆古詩。故其所就。沈著堅定。非口耳所到。既其老也。

每出一詩。必令子指疵。不指不已。及予有所質。亦傾心應之。必使盡力。予嘗爲匡山詩。內一聯。渠意不滿。予以爲更無可易。渠笑曰。觀子胸中。似不止此。最後曰。廟堂遺恨和戎策。宗社深恩養士年。渠又笑曰。微我子不到此。予又爲端禮門古樂府。渠以爲未句未盡。往復再四。最後乃曰。碑可毀。亦可建。蓋棺事久乃見。不見姦黨碑。但見姦臣傳。渠不待辭畢。已躍然而起矣。方石古樂府。最得古意。如過河怨曰。過河過河不過河。奈此中原何。夜半檄曰。國威重。空頭救。相權輕。夜半檄。皆警句也。詩談。天台謝鐸。剛毅英華。焉用藻飾。

姜南蓉塘紀聞。桃溪謝文肅公鐸。有順天鄉試錄。次韻寄潘時用詩云。又是西風桂子秋。不聞仙錄上瀛洲。青燈入夜西涯老。誰復朱衣爲點頭。未注云。時西涯李學士爲考官。而時用不第。豈非命哉。蓋時用與西涯平生最相知者。時用名辰。後以薦舉官至太常。三台詩錄。文肅既歸。路過新河。有軍笑之曰。有官不會做。有錢不會接。文肅聞之笑曰。軍其知我哉。遂賦一絕云。五陵裘馬日更新。白髮歸來苦愛貧。除卻新河軍識我。平生知己更何人。亦前輩一段佳話也。

白楓河

白楓河。河水滿地流。紅波。波聲入海爭盪摩。蛟螭夜泣愁鼉鼉。嗚呼壯士可奈何。白骨兩岸高峩峩。君不見河之水。深不極。至今中有銜冤石。

三台詩錄。元季方氏之亂。陳仲廣率族人禦戰。白楓河不勝。憂憤而卒。世無知者。公特表章之。

病起

病起風光四月過。蕭蕭雙鬢不知皤。驚心午飯還宜粥。入眼春衫盡換羅。筋力轉妨騎馬怯。路岐生見出門多。百年夢覺今如此。一笑青山奈爾何。

龍堂詩話。陸鼎儀嘗言謝方石詩好用夢字及一笑字。察之果然。閒以語之。亦一笑而已。不易。因憶張亨父嘗言杜詩好用真字。豈所謂許渾千首溼。杜甫一生愁者。雖古人亦不能免耶。

謁侯城里有感

欲向西風酌一尊。乾坤何處著英魂。百年事過風前燭。千古名留海上村。香火半龕誰地主。孫枝一葉是君恩。夕陽滿地傷心淚。付與江流自吐吞。

孝女湖

丁甯湖上人。莫汲湖上水。中有孝女淚。下徹重泉底。

倪岳一首

岳字舜咨。錢塘人。徙上元。尚書謙子。天順甲申進士。選庶吉士。授編修。歷侍讀。遷學士。拜禮部侍郎。進本部尚書。加太子少保。歷南吏部。兵部。入掌吏部。卒贈太保。謚文毅。有清溪漫稿二十四卷。

田按文毅父謙。謚文僖。有明父子得謚文。自倪氏始。文毅詩才不逮文僖。而政績遠過之。

晚泊流河

迢迢客路近流河。漁浦風晴起棹歌。夾道短籬村巷小。兩行疏柳夕陽多。

劉大夏二首

大夏字時雍華容人天順甲申進士選庶吉士改兵部主事歷員外郎中以忤閹繫獄尋出爲福建參政進廣東布政使改浙江擢副都御史治張秋河進戶部侍郎兼左僉都御史理宣府兵餉移疾歸起右都御史總制兩廣軍務拜兵部尙書加太子太保賜歸以忤劉瑾逮繫遣戍肅州赦歸卒贈太保諡忠宣有東山集

何孟春燕泉集劉東山公晚年肅州之謫雖由逆瑾其實公同年焦閣老芳爲之公與焦素無他焦特忌公名耳岑猛略既行瑾集大臣議欲寘公重辟諸大臣惴不敢吐一語獨都御史屠公鏞曰劉某何罪必欲文致之瑾怒明日大臣以屠議奏瑾謀於焦及吏部尙書劉宇字又素嫉公者畀劉某輕議夷人遷徙發遠戍瑾初擬廣西邊衛焦曰是送彼歸也乃定肅州公西行稿載公赴肅州時故舊皆避不來會獨鄉人嚴仲洪贈詩公和答之公過六盤山寄西涯閣老詩末句云寄語同年老知己天涯孤客幾時還歎同年也後歸自六盤和前韻末句云憑誰寄語中州子前度劉郎今已還中州子焦與劉也其事蓋如此雙齋詩話劉忠宣公平生不刻意作詩間有爲而作者皆事核意真情到興具如撫諭田州句云如何萬頃桑麻地天與夸人作戰場雖土官岑溥亦感也出錦衣獄中有句云紅塵未了清時債白髮重來此地遊蓋公爲兵部郎中嘗下獄也謫戍甘肅過六盤山句云綠野誤爲三品地白頭今到六盤山蓋以爲終於侍郎不起未必有此謫也謫所示子姪句云報國未能平海宇充軍終是累兒孫蓋以逆瑾有劉某永遠充軍之批旨也又云猶有先朝宣召夢急趨黃屋面承恩蓋思孝廟君臣相遇千載一時雖在謫所不忘情也謫所贈同事詩曰時事何人苦變更邊城持戟半儒生蓋劉瑾用事士大夫有罪多譴謫甘肅也田按忠宣一代名臣詩非所留意語特軒爽

再登重陽菴

山徑迂迴又一菴。白雲深處暫停驂。遊人對景心偏適。遠客懷鄉意豈堪。十載官情淹薊北。半生歸夢在江南。孤臣敢負君恩重。深恐經綸未素諳。

和同遊陸大參韻

雲山何處是歸期。老去偏憐宦況微。作客未離煙水地。行囊先製芰荷衣。吳山地近紅塵少。楚澤尊香紫蟹肥。今日共君須盡醉。白頭相與會應稀。

陳音一首

音字師召。莆田人。天順甲申進士。選庶吉士。授編修。歷侍講。遷太常少卿。進本寺卿。有媿齋集。

田按師召與顧東江居相鄰近。於橋上作綸竿。以便投詩。名曰詩釣。東江有詩紀之云。巧心文思孰兼長。詩釣詩成又幾章。千里浮沈謝江路。一竿風月共鄰牆。君如緣木求魴鯉。我正懷磚想瓊瑣。畢竟兩無名利念。五湖煙水舊同鄉。

送潘栗夫

二十年前舊弟兄。離亭尊酒不勝情。蜀山渺渺知何許。清夜相思只月明。

吳希賢三首

希賢字汝賢。莆田人。天順甲申進士。選庶吉士。授檢討。歷修撰。左諭德。遷南侍讀學士。有聽雨亭稿。

送上人還莆

十載關河雲水蹤。忽驚春雨偃巖松。傳來西竺千年法。歸聽南峯五夜鐘。錫響吳山驚虎豹。杯浮閩海護魚龍。題詩我憶曾遊處。落日曇花意萬重。

倪元鎮畫

春草湖邊浪拍航。篷窗日午坐焚香。此翁老去雲林在。枯樹荒亭幾夕陽。

咏梅送熊通政

江南春色別來久。夢繞梅花思不禁。何似拂衣歸去好。小齋明月夜橫琴。

郭璽一首

璽字文瑞。城武人。天順甲申進士。選庶吉士。改兵部主事。

送王惠民

故鄉憐久別。奉詔喜南還。草色都門道。潮聲潞渚船。清風隨去鶴。明月滿前川。佇看來春暮。鵬搏萬里天。

倪輔一首

輔字良弼。平湖人。天順甲申進士。授吏部主事。改禮部。歷官湖廣參政。有類劇遺稿。

徐州

山中雲散千年氣。隄上人耕百戰場。瘦馬獨行回首處。冷煙斜日似咸陽。

沈棨一首

棨字元節。平湖人。天順甲申進士。授工部主事。歷潮州、延平、臨江、知府。遷貴州參政。有願貞集。

橋李詩繫元節詩文。冲澹純雅。五言古得柴桑風氣。

送友歸省

江天雨繁霜。水落見層石。北風捲地來。寒色晚逾劇。之子戒行李。詰朝問鄉國。青雲多故知。而深世離惜。我懷亦何爲。兀兀殊未釋。一官慚素餐。十年久爲客。甘旨願已違。雙親況垂白。家弟昨致書。海潮害秋穫。因之欲奮飛。安得晨風翼。

林榮一首

榮字孟仁。番禺人。天順甲申進士。授監察御史。遷福建按察副使。

薊門聞笛

冒寒重到塞垣遊。羌笛悠悠起戍樓。應有開元遺譜在。月中三弄小梁州。

官廉一首

廉字汝清。平度人。天順甲申進士。官戶部郎中。有薊東集。

和戈主事勉學韻

相逢歧路際。話別酒尊間。遠樹迷前浦。停雲繞暮山。離襟連日苦。塵鞅幾時閒。回首蒼龍闕。隨君有夢還。

桑悅三首

悅字民懌。常熟人。成化乙酉舉人。除泰和訓導。遷長沙通判。改柳州。有思玄集十六卷。

田按民懌。唐詩品。云唐人詩三百餘篇。大抵賦多而比興少。句多而意少。其傑出者。陳子昂。李太白。杜子美。韓昌黎。四家耳。併唐三百餘家之意。不如陳。李。杜。韓。四家。併陳。李。杜。韓。之意。又不如阮籍。嵇懷詩。漢古詩數十首。可謂知要。第其所作。利鈍雜陳。妄自矜詡。宜爲前人詆訶。其訓導泰和也。李文正贈詩云。十年三度試春闈。親見聲華滿帝畿。甲第久漸唐李邵。奇才終讓宋劉幾。功名歲晚非蓬鬢。湖海官貧尙布衣。試看孤鷹下林落。壯心還向魯天飛。憐才之意。溢於言外。

八月二十二日過分宜昌山洪見一巨蛇長二丈餘雙角嶄然衆夫驚呼潛其首尾脊角獨露冉冉而逝作詩志異

扁舟晚亂昌山洪。巨蛇雙角疑潛龍。隨流徐入巖穴中。薄雲慘慘吹陰風。季秋陽蟄龍德窮。非時小見蜥蜴同。投荒偶覩真奇逢。天意示此非夢夢。震澤秋水涵虛空。先生盍歸採芙蓉。醉弄文墨誅長虹。

贈蕭時清

十里螺湖如掌平。開門正挹滄浪清。偶逢道士贈丹訣。閒課山童鈔酒經。晝長燕子飛入戶。春盡樹陰鋪滿庭。近來聞說有奇事。賣藥修琴曾到城。

過陳巨濟國賓家

醉眼昏昏醉墨斜。題詩閒過晉卿家。朱簾十二無人捲。風定園林自落花。

文洪一首

洪字功大。長洲人。成化乙酉舉人。官涑水教諭。有括囊稿二卷。

田按涑水以名德重。不以詩見長。自敘其詩云。如春山早鶯。初出深谷。舌弱語澁。不能成聲。古人之不自矜謝如此。

菊存坡

杪秋風氣肅。繁霜被原野。采采黃金花。盈盈尙堪把。會心卽欣然。何必東籬下。

明詩紀事卷五

丙籤

羅倫一首

倫字彝正，永豐人。成化丙戌第一人及第，授修撰，坐論事，貶泉州市舶提舉。起南大理評事，就遷修撰。正德中贈諡德諡文毅，有一峯集十卷。

四庫總目：倫文剛毅之氣，形於楮墨，詩亦磊砢不凡。

施閏章螻齋詩話：世傳羅一峯起用時，哭友詩有九原若遇南陽李，爲報羅生已復官。予疑其忿狹不類一峯。偶問施偉長，則御史薛之綱輓廬陵陳莊靜者也。其詩云：學士先生早蓋官，確歌聲裏路人歡。墳門客散名猶在，附郭田多死亦安。鹽井已非今日利，冰山不似舊時寒。九原若遇南陽李，爲報羅生已復官。蓋陳不協鄉評，又嘗與李同齟齬羅公者也。

田按：雍正謫提舉後，起南大理評事。見菽園雜記，可據以補史缺。

林緝熙歸會於薌城梁宅和洪城見寄

雲水千峯更萬峯，此心期與故人同。蒼茫世路浮生在，澹泊春杯野興濃。鄉夢幾回茆店月，蓑衣無恙柳花風。明年喚取陳公甫，阜帽青天信一篷。

程敏政三十二首

敏政字克勤，休甯人。成化丙戌，第二人及第，授編修，歷左諭德，少詹事，兼侍讀學士，以事罷官，尋起復，改太常卿，仍兼侍讀學士，進詹事，再進吏部侍郎，贈尚書，有篁墩集九十三卷。

殿閣詞林記：孝宗時，尤重經筵學士。程敏政記其事云：弘治元年三月十二日，初開經筵，賜宴及白金寶鑑。十三日，文華後殿，早進讀尚書孟子，及午進讀大學衍義，以爲常。講畢，賜茶，上皆呼先生而不名。四月二十八日以後，屢賜桃杏、郁李、蓮房、鮮菊、青梅、枇杷、楊梅、雪梨、鮮藕。敏政等具表稱謝，且記之以詩。有曰：黃封盡帶乾清字，生實平分上苑香。七月二十日，文華殿後講，上顧中官，賜諸臣冠帶。敏政預賜織金雲雁緋袍一副，金帶一，及烏紗帽、皂鞮，面謝訖，上顧謂曰：先生辛苦，咸對曰：此皆職分當爲，頓首而退。有詩紀之云：日映罨巖曉殿清，湛恩稠疊駕親臨。褒衣紅溜天機錦，束帶黃分內帑金。久幸清班容宦履，漸慚華髮點朝簪。經生職分尋常事，消得君王念苦辛。

查慎行人海記：劉文靖以程篁墩短其不能詩，銜之，釀成廷鞠之獄。李文達之賺葉文莊，亦以疵其詩文之故。二公賢相也，其器量狹小乃爾。

田按克勤少慧，四川巡撫羅綺以神童薦，英宗召試，命賜食，即日賦聖節及瑞雪詩，并經義各一篇，援筆立就，文采粲然，詔讀。書翰林，大學士李賢妻以女，翁冠成進士，學問該博，爲一時冠。數遭齟齬，未竟其用。篁墩集存詩甚夥，擷其精華，不愧一時作者，特以蕪蔓不翦，爲世訾議，亦可爲存詩太多之誡云。

十一月偶至南山黃落頗甚夜宿聞雨作

清溪淺可涉，朔氣動原野。數日與山別，殘菊不盈把。多病恆鮮歡，新篳謝杯罍。夜寒夢屢續，涼雨忽鳴瓦。

俯仰天地中。流光疾於馬。紛紛歲將晏。稍幸世緣寡。上想雲谷仙。幽懷浩難瀉。

謁京口魏勝將軍廟

長風吹山礮。落日下京口。桓桓魏將軍。廟食此邦久。士馬贍儀衛。金書炫庭牖。忠義夙所欽。再拜酌江酒。憶當宋社南。君臣竄身走。將軍起田間。意氣最雄赳。孤城江海上。日日事攻守。中原天弗畀。竟爾墮戎醜。前旌曉不揚。雄劍夜空吼。何人始召亂。志士徒殞首。當時百戰場。荒落見沙柳。

過鄭公釣臺余忠宣公隸字刻石

相公湖邊一拳石。截斷湖光三百尺。射蛟人去今幾年。誰掃雲根看遺蹟。師山先生性愛山。偶然得此青屏顏。臨流坐釣不知晚。漁樵並載扁舟還。武威余公天下士。特與先生題篆字。良工刻入斷崖傍。遂使溪山增勝事。一朝海內風塵生。兩公死國如弟兄。平生隱顯雖異迹。竹帛同垂千載名。薰風雨過潮初落。足躡蒼苔俯幽壑。釣絲已逐野煙飛。字畫多爲古藤絡。師山之節峻且孤。武威之字人爭慕。忠賢遺蹟衆所寶。泉石清奇何處無。

蘇墨亭

百步洪有東坡石刻云。郡守蘇軾。山人張天驥。詩僧道潛。月中遊十六字。沒水中三百年矣。水部主事尹君廷用。得而昇之。作亭以覆。曰蘇墨亭。予凡七過其下。不能措一詞。成化丙午秋。歸自南

幾念終不可已。乃勉成數語。留亭中。且以寄尹君。時予族姪孫楚英。方同知徐州。并書以贈之。
蘇墨亭前七回過。春水茫茫懶收舵。公輸門下難爲工。縱有新詩不成和。高秋水落百步洪。登亭如見蘇
長公。大書深刻十六字。橫姿逸態生長風。黃樓東來水如注。野僧山人舊知遇。石瀨潺潺月滿天。彷彿當
時舊遊處。題名一去不復還。風雨剝落莓苔斑。水神淵客那敢闕。至寶有時歸人間。行河郎官訪遺蹟。摩
挲愛此羊公石。百夫舁出泥沙中。搨本相傳驚再得。風流太守惠政多。築隄兩岸高壑義。由來物與人俱
重。墨妙紛紛知奈何。

題吳廷端太守山水障

蒼山突起浮雲中。湖光百頃磨青銅。底須飽看臥遊錄。入眼已覺紅塵空。何人卜築依山住。一任飛雲挂
庭樹。下瞰澄江作小亭。正據溪山最佳處。柴扉晝掩呼未開。石牆夜雨生莓苔。門前有人問奇字。短擢日
攜春酒來。對岸溪橋大於甃。寒潮漸嚙沙頭逕。農家地僻少通車。僧舍樓高屢聞磬。村春有粟爨有薪。忘
機魚鳥相情親。山林豈博鐘鼎貴。優遊最愛漁樵人。竹鶴老翁今已矣。半副生綃映窗几。風致公然似歛
西。歸興蕭蕭隔千里。練水屏山今所無。故鄉之樂不可孤。相期歲晚結新社。飽玩天開真畫圖。

宋理宗賜福王與芮雪景爲鄭村汪宗裕題

瑤峯玉樹瑪瑙坡。寶祐墨本來宣和。天山羝乳紇千雀。此景此意將何如。御筆中題福王字。生綃上遣龍

圖志鳳山日永萬幾輕。廊廡幾人同受賜。天人想像冰雪顏。好文亦自非等閑。詔書屢表濂洛緒。詞翰卻在陳隋間。三百年來驚物換。散落塵寰充一玩。摩挲爲賦懷古篇。安得虹光射霄漢。

贈劉太古

瀟灑劉太古。絕似鮑參軍。老去詩還健。情多酒未醺。疏髯飄亂雪。長嘯遏行雲。何日開春社。巖花約共分。

松蘿山

雙峽中分一徑通。寶坊遙隔片雲東。四時山色涵空翠。萬折泉聲瀉斷虹。清愛竹孫穿凍雪。靜聞松子落香風。登高兩屐吾方健。攜手無因得贊公。

李員外應禎吳太守原博約遊虎邱

日散林霏見虎邱。故人清約此閒遊。望深綠樹知藏寺。吟徧青山始繫舟。塔院風來花似雪。劍池春到水如油。酒闌不盡吳中勝。老衲相招更倚樓。

揚州

江日輝輝下廣陵。客邊吟興偶然增。宋軍水砦多編戶。隋帝離宮半屬僧。鵝鴨似便春雨數。樓臺爭出暮雲層。往來總戴承平福。莫問從前幾廢興。

病中齋居兼謝西涯學士見過

倚榻蕭然不出門。坐聽宮漏幾黃昏。暑留巾襪齋心慣。病卻茶瓜藥禁存。竹簡有情時共閱。楸枰無侶但空捫。故人秉燭能相訪。踏破閑階碧蘚痕。

次韻原博諭德

抱病經旬未入朝。齋居秋思轉寥寥。坐憐白日繩難繫。起望青山手可招。夢繞川原疑脫騎。瘦使風露愛聞蛸。詩壇故事誰先續。倚席長慚郢上謠。

劉諫議祠

老樹陰森護廟門。尙疑生氣塞乾坤。衣冠死愧千言策。俎豆公宜百世尊。晏歲牛羊山下塚。東風桑梓道旁村。匡時不盡平生恨。白日悠悠逝水奔。

送辨如海上人遊松江

霜鴻將盡一帆開。遠別難勝老辯才。郢客未分新社約。吳僧先掃舊經臺。枯腸臘供芟畦菜。白足春遊了徑苔。聞說木蘭花未老。晚香盈握待師來。

客請遊望湖亭修碧軒不及往次韻

西望湖天半日程。擬郵寒綠洗塵纓。一灣路隔紅塵遠。五月涼生白苧輕。山寺茶煙衝鶴起。石門空翠逼人清。春來遙憶憑闌處。萬頃鷗波夕照明。

送陸文量武選赴浙江參政

同榜悠悠感歲華。晨星落落散天涯。除書又拔吳中俊。處世真如海上槎。內史之官先過里。宣公封事久名家。南歸欲訪巢居閣。肯檄林僧一供茶。

廣陵驛下與表兄林文秀倉使夜酌

二十四橋春草平。月明依舊滿蕪城。繁華百代底須問。邂逅一樽無限情。去國浪傳金馬客。倚樓誰送玉簫聲。孤帆又作江南別。坐聽船籤報五更。

楊村道中

幾處吹煙認水村。數聲山犬吠籬門。寒天日落明鴉背。荒歲田空剩草根。垂澗石如牛馬飲。排雲山似節旄屯。眼中無限詩情在。欲對沙鷗了一尊。

吊梅宛陵

詩壘猶傳草木馨。煙雲長鎖舊池亭。魂遊苑下空秋月。客散河陽幾曙星。崑體戰降孤幟赤。都官名重一衫青。晚生欲附宣州派。慚愧牛轅逐鳳軒。

松崖爲縣人胡昭題

老髯踞石幽且貞。喜君卜居若平生。三更滿地星月碎。九夏半空風雨生。知心爰歲竹連隴。過眼一春花

滿城。斷笈有約。幸無拒。杖策來尋。猿鶴盟。

和答吉安顧天錫太守同年

籬菊新黃百草枯。天涯相憶共朝餽。一緘秀句題鈴閣。千里虹光射鏡湖。致主有才淹老守。全身無策笑庸夫。喜聞述職行將近。幾日風帆過直沽。

留別濟甯周同守

憶在成都硯席同。天涯相望幾秋鴻。君生向我五年長。行色困人三月中。宦海積薪隨下上。客途飄梗定西東。艤舟不盡牽情處。太白樓前柳絮風。

送釋方策住善權寺

上剎新開住辯才。一舟南去水如苔。再傳衣鉢詩宗遠。終日溪山畫障開。草沒仙人燒藥竈。花明丞相讀書臺。病夫久欲捐暈飲。春焙還能數寄來。

早過車田村

沙岸深穿石徑幽。橘梢藤刺翠相樛。孤村路出荒垣近。十畝陰蟠古木稠。樵約半灣松崦腳。水椿遙響竹棚頭。息肩少狎羣鷗坐。不覺涼生兩袖秋。

弘治辛亥歲仲冬念五日在萬山觀作

城頭霧斂青天開。平地忽見雙蓬萊。捲簾下瞰白雲起。拂手近招黃鶴回。一龍擎石樹根古。萬弩射潮風
壑哀。鍊師縱爾能謝客。容我到城須一來。

題雜畫

青山寂無人。空波澹流水。垂楊不勝春。搖搖蘸清泚。

留雲亭

亭子臨孤絕。江雲礙不飛。時來簷下宿。水氣濕僧衣。

山水小畫爲張尙相題

山色青於染。松陰掃未開。水邊芳草地。才見兩人來。

與謝子期閒步至北山莊作

與客尋源過石梁。水車遙認北山莊。鷗邊一陣東風起。吹落桐花滿澗香。

會昌雪亭公子許雨中移竹詩以訊之

八尺庭除半綠苔。一春無意買花栽。幾時憑仗連朝雨。分得青鸞數尾來。

送戶部葉叔通郎中知甯國府

宛陵祠下竹娟娟。一榻曾分聽夜泉。攜酒寓公誰復在。六回春色到吟邊。

沈石田小景

雨晴山麓上莓苔。老木亭前罨畫開。城市愛閒應更少。水邊才見一人來。

黃仲昭一首

仲昭名潛。以字行。莆田人。成化丙戌進士。改庶吉士。授編修。坐諫鰲山煙火。予杖謫湘潭知縣。遷南大理評事。進寺副。乞休。弘治初。起江西提學僉事。尋致仕。有未軒集十四卷。

升菴文集。宋時御前內宴。翰林撰致語。八節撰帖子。雖歐。蘇。曾。王。司馬。范。鍾。皆爲之。蓋張而不弛。文武不能。百日之蜡。一日之澤。聖人亦不之非也。成化中。黃編修仲昭。莊檢討景。不撰元宵詞。又上疏論列以去。以此得名。然自是而後。內外隔絕。每有文字。別開侍門。有文華門。仁智殿。輩。每得美官。至蠹政害人。苟若仍舊之愈乎。愚謂於麗語中。寓規諫意。如六一公。王。輩。經年不遊幸。上林花好莫爭開。君王念舊憐遺族。長使無權保厥家。亦何不可。

田按。成化三年。憲宗將以元夕張燈。命詞臣撰詩詞進奉。仲昭與編修章懋。檢討莊景。諫張燈豈羹舜之道。詩詞豈仁義之言。乞將煙火停止。帝以元夕張燈。祖宗故事。仲昭等妄言。並杖之闕下。左遷其官。時修撰羅倫。先以言事被黜。人稱翰林四諫。檢程克勤。纂墩集。有元夕觀燈應制詩云。五朝故事傳來久。樂與民同。上元酒。想像先皇得衆心。尙有燈詞播人口。太平喜是百載過。邊燧不驚天氣和。古來張弛皆有道。賞心一日非爲多。未免近於迎合上旨矣。

送人還莆

兩京飄泊幾星霜。卻喜逢君話故鄉。潮水不知離別苦。又從江上逆歸航。

章懋一首

懋字德懋。蘭谿人。成化丙戌進士。改庶吉士。授編修。坐諫。鰲山煙火。謫臨武知縣。改南大理評事。進福建僉事。致仕。起南國子祭酒。再乞休。復起南太常卿。南禮部侍郎。皆不就。卽家進南禮部尙書。卒。贈太子少保。諡文懿。有楓山集四卷。

劉永澄。郎中。雜記章德懋庶吉士。時開老劉定之爲教習。一日以玉堂蔬圃詩試諸士。德懋結語曰。賢哉公依依。拔卻園中菜。劉以輕薄目之。後又試中秋賞月賦。德懋云。天下之人。有罹悲愁。羈患貧窮。孤寡者。見月則不樂。惟高官厚祿。身享太平之日者。見月則樂也。劉愈怒之。後章以諫。煙火詞得貶斥。而劉遂不救。

靜志居詩話。嘗見思陵御書一幅。詩云。未央鐘動曙光生。隱隱初聞柳外鶯。風靜御爐香篆細。日高芹坐袞衣明。螭頭陛擗黃麾仗。豹尾班聯白玉珩。最喜及時勤庶政。蒼蠅聲裏聽雞鳴。真迹在高上舍佑鉅處。觀者疑爲思陵御製。實楓山集中詩也。惟及時二字。集本作君王御筆更之。是楓山一集。曾歸乙夜之覽矣。附識於此。以當開寶舊事。

田按文懿以清望重一時。不欲以文藻見長。余檢其集。有禁中聞鶯詩云。不隨舞袖歌金縷。卻伴仙韶奏玉墀。長信夢回欵枕處。瑣闌吟罷倚闌時。未嘗不清麗可誦也。

別閩南僚友

三年憲府同懷抱。此日離亭惜解攜。回首建溪溪上路。春山隨處鷓鴣啼。

張弼十四首

弼字汝弼。松江華亭人。成化丙戌進士。授兵部主事。歷員外。出爲南安知府。有東海集九卷。

東海集。成化壬寅九月。旣望石齋先生。白沙陳獻章公甫。應詔起而之京。道過南安。而太守東海居士華亭張汝弼。欲用曹參

禮蓋公故事。款留於周程吟風弄月臺上。數月以受教。石齋不可。曰當不俟駕矣。今方度嶺。又值積雨。裝弗亟辦。容與數日耳。東海不能強。石齋有詩曰。玉枕山前逢使君。西風吹破玉臺巾。巾乃石齋自製。類華陽巾。直方而無襞積者。東海鑿鑿斷斷論。議或有戾於其道。而云破此巾也。遂以一絕激之曰。白沙村裏玉臺巾。不耐風吹易染塵。莫笑烏紗隨俗態。宋廷章甫是何人。石齋復以玉枕山詩答之。一枕橫秋碧玉新。金鑿閣上見嶙峋。使君得此原無用。賣與江門打睡人。跋曰。東海居士詠玉臺巾。侮我太甚。口占玉枕山詩答之。東海和答曰。炎瘴多收一雨新。獨看天柱聳嶙峋。橫秋玉枕真無用。自是乾坤不睡人。天柱山亦南安之照山也。故自依天柱。以玉枕與石齋。順其意耳。而又作二絕句云。客囊羞澁客衣單。欲買南安玉枕山。縱有枕頭那得睡。雞聲催入紫宸班。寄語江門打睡人。而今天地正芳春。覺來莫管閒花鳥。須掃崑崙頂上塵。

龍堂詩話。張東海草書名一世。詩亦清健有風致。假髻曲等篇。皆爲時所傳誦。嘗自評其書不如詩。詩不如文。又云。大字勝小字。予戲之曰。英雄欺人每如此。不足信也。

李濂嵩渚集。華亭張汝弼。詩文俱自成家。草書天趣逸發。論者推爲一代冠冕。觀其送子弘宣會試詩云。直道遜詞真要訣。權門利路是危機。可以見其爲人。詩談。張弼清俊明珠數顆。舉世寶之。

姜南五庄日記。成化間。妖人王臣者。跛一足。人稱王癩子。遊食京師。以左道事中貴。得授錦衣千戶。請爲上合大丹。以採藥爲名。與中貴偕出川。廣直隸。兩浙等處。買辦。搜索寶玩。需求珍異。民不堪命。巡鎮大臣。莫敢誰何。有司官吏。頤指氣使。奔命不暇。及回京。爲各處巡撫守令。交章飛劾。而科道併彈。於是上大怒。斬臣首。傳詣所歷地方。令民心大快。初臣至廣東。南安守華亭張東海。目視其驕橫。作詩嘆曰。過嶺囊箱下瀟船。丁夫日夜少安眠。薄田蕩盡猶輸粉。惡客時來橫索錢。窮髮東南皆赤子。舉頭西北是青天。不才無計甦民困。食祿乘軒自赧然。

武進縣志。雲間張汝弼。有盛名。赴南安郡守。道經毗陵時。陸詹事簡。方得告南歸。張訪之。適展墓不見。乃索紙筆。題一絕於陸世經堂。有始知東閣先生貴。不放南安太守參之句。陸歸急追之。已行遠矣。

震澤集。張汝弼詩多警句。往往爲人傳誦。其草書尤多自得。酒酣興發。頃刻數十紙。疾如風雨。矯如龍蛇。欬如墮石。瘦如枯藤。狂書醉墨。流落人間。雖海外之國。皆購其蹟。世以爲顧張復出也。

田按東海詩有豪氣。不受羈勒。七言斷句。尤推擅場。

假髻曲

東家美人髮委地。辛苦朝朝理高髻。西家美人髮及肩。買妝假髻亦峩然。金釵寶鈿圍朱翠。眼底何人辨真僞。天桃窗下來春風。假髻美人歸上公。

雲間雜識。張東海作假髻曲。諷刺時貴。當路銜之。出守南安。不得調而歸。邵二泉作輓詩云。張公不作南安守。只說文章止澗身。滿路棠陰棺蓋後。忌公人是愛公人。

養馬行

領馬易。養馬難。妻子凍餒俱庭屏。若有芻豆且自殮。安能養馬望息蕃。平原草盡風色寒。羸馬散放聲嘶酸。忽然倒地全家哭。便擬賠償賣茅屋。茅屋無多賠不足。更牽兒女街頭鬻。鄰翁走慰不須悲。我家已鬻兩三兒。

田按陸文量菽園雜記云。國初馬養於各苑。馬寺各監苑而已。永樂中始以官茶。易和林等處馬。養之民間。謂之茶馬。正統十四年。京師有警。乃選取以備軍資。養於順天府近京屬縣。謂之寄養。騎操馬。及京師無事。寄養之馬。不復散去。至今遂爲故事。每歲學生賠補之法。悉與各處茶馬無異。養馬之家。雖已量免糧差。而賠補受累者多。其最害事者。牝馬每歲不通淫而孕。謂

之飄沙。新樂縣一家養此馬。每三年賠二駒。九年已賠六駒。產已廢矣。東海此詩。可以相證。陸清獻稱東海養馬行諸詩。用意深遠。與杜子美兵車行諸作相表裏。有天下國家者。所不可不知。良非虛矣。

夏仲昭畫行

君不見。輞川王郎。鐵鉤鎖。漁陽塵飛。竟摧墮。君不見。江南李主。金錯刀。澄心堂紙。同煙銷。宋家寫竹文。與蘇。不求文字稱士夫。息齋板刻不足數。房山尙書特奇古。俱隨物改世。見稀。我朝好手尙屬誰。九龍山人王友石。毫素爭先化。工力當時揮洒未足珍。於今一紙千金值。太常清卿得真傳。風流瀟洒與差肩。宛如指活妙書法。陽冰古勁張旭顛。紫宸朝迴寫此幅。遠近縱橫萬枝玉。鷓鴣吟雨下江皋。猿猱號煙度巖曲。湘靈瑤瑟廿五絃。淒淒切切如流泉。長日相看竟忘寢。箇中妙趣難言宣。乃知此老真奇絕。飽弄清風與明月。古來數輩皆其儔。興酣還陋芭蕉雪。

東皋堂爲宜興王景昇賦

荆溪東下白雲鄉。五斗先生舊草堂。蔬圃幾弓連町疇。稻田百畝接陂塘。魚兒浦口酒船小。燕子風前茶焙香。應笑東華塵土客。馬蹏終日爲誰忙。

渡江

揚子江頭幾問津。風波如舊客愁新。西飛白日忙於我。南去青山冷笑人。孤枕不勝鄉國夢。敝裘猶帶帝

京塵交遊落落俱星散。吟對沙鷗一愴神。

董其昌畫禪室隨筆。張東海題詩金山。西飛白日忙於我。南去青山冷笑人。有一名公見而物色之。曰。此當爲海內名士。東海在當時。以氣節重。其書學醉素。名動四夷。自吳中書家後出。聲價少減。然行書尤佳。今見者少耳。

和江源一韻

半醒半醉寫烏絲。卻憶南安對酒時。玉面阿童鸚鵡舞。青山小吏鷓鴣詩。曲江池畔秋風早。鐵漢樓頭落日遲。聞道使君重過此。此情應與水同馳。

棠溪景

白露宿寒塘。寒塘浸明月。懊惱少年心。分明鏡中雪。

觀泉

山巘高低如繡。溪流屈曲無聲。幽人閉戶不出門。外小橋自橫。

題畫

石磴縈紆而又斜。上方樓殿隔煙霞。孤舟倚岸無人渡。嘯鳥聲中自落花。

雨飲

花朝風雨阻清遊。便躡棕鞋上小舟。白髮周郎留共飲。大吳橋下酒如油。

守南安東招張直

五羊城裏半詩仙，袂接神交三十年。綠髮張生最年少，好來鈔我紫霞篇。

琳湖

琳湖湖上草堂幽，四面窗涵一鑑秋。軒冕紅塵飛不到，竹牀高枕對沙鷗。

寄金陵王尙文

司諫王郎我舊知，薛逢詩句李憨棋。曾從虎口中間過，贏得歸來兩鬢絲。

王中舍蘊和所畫團扇

素紈團扇王郎畫，竹石霜柯慘淡中。謂是誰家舊時物，幾回烈日幾涼風。

中國古無摺扇，嘗見王秋鵬記，元初東南夷使者持聚頭扇，當時譏笑之。我朝永樂初始有，特僕隸下人所持，以便事人耳。及倭國充貢，太宗徧賜羣臣，內府又倣其制，以供賜予，天下迨徧用之，而團扇廢矣。今江南惟婦人猶存其舊，題團扇，因著摺扇之緣起云。

陸深春風堂隨筆：今世所用摺疊扇，亦名聚頭扇。吾鄉張東海先生，以為貢於東夷，永樂間始盛行於中國。予見南宋以來詩詞，詠聚扇者頗多，予收得楊姝子所寫絹扇面，摺扇尚在。東坡謂高麗白松扇，展之廣尺餘，合之止兩指許。正今摺扇，蓋自北宋已有之，倭人亦製為泥金面，烏竹骨，充貢出自東夷，果然。

田按：郎瑛七修類稿謂成化初高麗貢摺疊扇，至朝命倣製以答。復書格言以賜羣臣。高江村天祿識餘亦謂聚頭扇揮灑翰墨，始於成化間。予檢曾棨西墅集，有交趾削竹黏紙為摺扇，以充貢。永樂乙未夏，命中書舍人寫傳格言於上，以賜百官。詩云：捲霧舒霞疊水紋，中官擊出御前分。溪藤蕭颯裁新樣，汗竹參差綴古文。爽氣尚含鮫室雨，墨香偏染鳳池雲。極知當暑清肌

骨願播仁風。答聖君。則揮灑翰墨。不自成化間始矣。

賀欽一首

欽字克恭。廣甯後屯衛人。成化丙戌進士。授戶科給事中。謝病歸。弘治初。以薦起陝西參議。不赴。有翳閩集九卷。

田按翳閩山人。師事陳白沙。才筆不及白沙。而踐履篤實過之。

簡鄉人

攜壺欲就名園賞。借問如今春淺深。但得紅芳飛未盡。便來枝下聽鳴禽。

林瀚一首

瀚字亨大。閩人。成化丙戌進士。改庶吉士。授編修。歷修撰。諭德。祭酒。進禮部侍郎。改吏部。進南吏部尚書。改兵部。以忤劉瑾。謫浙江參政。瑾誅復官。贈太子太保。諡文安。有泉山集二十五卷。

田按文安世有清德。子庭揚。庭機。孫嫌。煙。皆官至尚書。庭機。嫌。並得諡文。又皆爲國子祭酒。一家五尚書。三祭酒。三世諡文。非獨明代僅見。古亦罕有其倫也。余檢李西涯集。有賀文安得子詩云。三鳳豈須誇薛氏。八龍今已半荀家。縱極力頌揚。安能預測子姓如此之盛耶。

越王臺懷古

乘閒獨上釣龍臺。滿目興亡事可哀。宋主行宮惟綠草。越王舊業半蒼苔。樓船東去家何在。陵谷春深花

自開山色不知風景別。還從江上送青來。

陸容十七首

容字文量。太倉州人。成化丙戌進士。觀政工部。授南吏部主事。改兵部。歷員外郎中。出爲浙江參政。有式齋稿、浙藩稿、歸田稿、三十七卷。

藏園雜記。予未登第時。未嘗作詩餘。天順己卯赴會試。夢至一寺。老僧出卷求題。予爲一闕與之。既覺猶記其中云。一片白雲人留不住。一坐湖山人移不去。翠竹吟風。蒼松積雨。此是怡情處。及下第歸。讀書海甯寺。僧文公出白雲窩卷求題。宛如夢中。癸未會試。嘗夢人贈詩云。一篙春水到底渾。入指不見波濤痕。霹靂爲我開天門。至期貢院火。蓋術家有霹靂火之名。而到底渾。不見痕。如其兆矣。

田按參政與張亨父。陸鼎儀。稱婁東三鳳。所著藏園雜記。王守溪稱爲明代說部第一。平生不以詩名。而學問既博。擬其佳篇。究非專語性靈者。所得比擬。參政自言登第後始作詩餘。而靜志居詩話云。式齋登第後始爲詩。豈未細檢藏園雜記耶。

送鼎儀

匍匐歸故里。歡愉非昔時。時窮天弗閔。心瘁醫難治。人欺鬼神侮。四體失自持。所賴諸友生。相將慰吾私。清談碧酒盡。偶坐白日移。隱憂爲之解。春陽煦寒澌。君茲忍子棄。感觸成傷悲。文詞雜點竄。經史紛讐疑。于時跨門出。躑躅將誰之。敢云巷無人。而君故相知。前秋別亨甫。戚戚心已危。今春當君別。騷屑愈不支。平生頗剛腸。不解惜別離。邂逅有此態。瑣瑣成何爲。得非情意迫。無乃志氣衰。我辰將無良。早歲逢百罹。

壯心半墜。似與林壑宜。君誠青雲器。夙抱經世資。良時不易得。壯齒難久羈。匡濟當自此。行矣無遲遲。
發鄞縣

孤眠愜曉涼。登舟已云晏。推窗望海隅。日出煙未散。雲山相吐吞。冉冉青不斷。冥搜起遐思。興到幘一岸。
涼風從何來。吹我鬢絲亂。時無謝康樂。居然發長歎。

和李賓之止詩之作

陶翁謝麴生。作詩示終止。平生匪徇外。此舉尤近裏。昨聞詩止詩。一哂西涯子。感時公是非。遇事竊憂喜。
詩本具性情。觸之卽興起。耽溺固可悲。力止亦非理。操觚與擲筆。要在必由己。適意無勞神。如此而已矣。
君看杜拾遺。病肺泯江涘。生無濟世功。藉此名千祀。

城西草堂

抱藝客侯門。歸來樂自存。草堂幽傍郭。花隴曲通村。靜坐開書帙。閒情付酒樽。侯嬴今已矣。心事與誰論。
次孫汝貞韻

檢點牀頭舊酒樽。煖來花下喚詩魂。歌魚不逐人彈鋏。題鳳從教客過門。粉署看雲眠白晝。畫樓邀月坐
黃昏。廟堂身世江湖樂。一飯難忘聖主恩。

磧磯寺限韻

移舟來看九峯青。古寺幽深試一經。畫堵半昏支碧殿。殘碑欲斷倚朱櫺。階前老樹知僧臘。海上浮槎仰使星。極目湖天詩興遠。片雲孤鶴過華亭。

桐江夜行

櫂聲搖月下桐江。短夢驚回午夜長。道路勞人自甌越。雲山送我到錢塘。還家正及迎春宴。隨俗先愁賀歲忙。行過釣臺天已曙。巨鯿須爲覓漁航。

過公主廢宅

金屋重重瑣翠苔。東風依舊燕飛來。鳳簫聲歇春無主。牢落宮花幾度開。

僊人宮

野樹無名花氣香。古碑橫臥蘚痕蒼。僊人已去空陰洞。滿地白雲春晝長。

題畫

餘寒歷盡見春工。一樹疏梅霽雪中。破履短筇詩自好。不知吟過小橋東。

南郊

臥擁明衣席未安。齋郎早已報登壇。君王行處陽春在。不用靈犀避夜寒。

紅梅

面面春紅試曉粧。天然肌骨耐冰霜。東坡居士如相識。肯爇銀燭照海棠。

題畫

林屋重重枕野塘。水花千頃一歸航。何年了卻公家事。來趁山人幾日涼。

杏花便面

海霞薰染玉容酣。不逐東風上舞衫。記得春來曾識面。相公莊在午橋南。

海甯道中

溪上漁人已曬罾。晚風吹浪碧層層。不知歸去了鬢女。浮甕如船坐採菱。

臨安道中

修篁高樹綠依依。路繞青山見日稀。城市炎風吹不到。只愁空翠濕人衣。

將之新城復經於潛

青山高下綠陰稠。觸暑登程且未休。莫笑癡兒了公事。從容只作看山遊。

韓文一首

文字貫道。洪洞人。成化丙戌進士。授工科給事中。出爲湖廣參議。歷山東參政。雲南布政使。擢右副都御史。巡撫湖廣。改河南。入拜戶部侍郎。改吏部。進南兵部尙書。改戶部。以劾劉瑾罷官。瑾誅。

復職。加太子太保。贈太傅。諡忠定。有忠定集四卷。

田按忠定詩音調高爽。在錦衣獄時。與劉忠宣唱和不輟。人服其量。

題送別卷爲張汝振致政還蘇州

翩翩車騎送君行。路指東吳萬里程。秋水長天渾入畫。暮雲春樹總關情。身閒已遂吟邊樂。官好還留去後名。林下優游無箇事。任將詩酒樂餘生。

潘禎一首

禎字應昌。天台人。成化丙戌進士。官山東僉事。

龍堂詩話。陳公甫論詩專取聲。最得要領。潘禎應昌嘗謂予詩宮聲也。予訝而問之。潘言其父受於鄉先輩曰。詩有五聲。全備者少。惟得宮聲者爲最優。蓋以兼衆聲也。李太白杜子美之詩爲宮。韓退之之詩爲角。以此例之。雖百家可知也。予初欲求聲於詩。不過心口相語。聞潘言始自信。以爲昔人先得我心也。

看菊

獨憐九日在天涯。夢繞東籬海上家。千里一官空白首。十年雙眼又黃花。

陸淵之一首

淵之字克深。上虞人。成化丙戌進士。選庶吉士。改禮部主事。出爲鉅州知府。終河南布政使。有東

皋集十三卷。

寄章德懋

嶺月江雲望眼枯。美人猶自客南都。別來多少知心語。臨到封題一字無。

張海二首

海字文淵。德州人。成化丙戌進士。授給事中。歷都給事中。順天府丞。出知鶴慶府。遷太僕寺卿。罷歸。起兵部侍郎。謫山西參政。

山左明詩鈔弘治時吐魯番侵哈密。命文淵往經畧。條上六事。因言遠方不可加兵。來則撫之。去則拒絕之而已。得命閉嘉峪關。捕誅通番回夷而還。孝宗以其無功。謫山西參政。致李西涯送文淵詩云。營平圖略本常事。定遠功名非彼曹。空庭搗穴豈不易。不忍赤子塗脂膏。閉關卻使法亦有。重念王業經營勞。亦可見當時朝議所在。非文淵之過也。其後遂用師。遂虜。不久復爲所據。勞而無功。文淵固未爲失策矣。

春閨曲二首

小窗睡起坐來慵。寶鴨香銷錦帳空。可惜好花容易謝。憑將一笑買春風。
夢回繡枕啓窗紗。簾幙風輕燕子斜。不信閒愁春不管。平分一半與梨花。

林克賢一首

克賢字一中。黃巖人。成化丙戌進士。官福建僉事。

卽事

落日荒荒照女牆。輕陰閣雨過西廂。無情最是新巢燕。猶自雙雙語畫梁。

戴縉一首

縉字子容。南海人。成化丙戌進士。除監察御史。歷尙寶司少卿。擢右僉都御史。進右副都御史。右都御史。掌院事。遷南工部尙書。黜爲民。

田按尙書以附和汪直取敗。詩頗明秀。

夜泊武昌

奉節臨湘水。維舟近楚城。月明山犬吠。夜靜水禽鳴。戀關心尤切。思家夢未成。何如訪仙侶。投老學長生。

明詩紀事卷六

丙籤

張昇一首

昇字啟昭，南城人。成化己丑，第一人及第，授修撰。歷贊善、諭德、庶子，以劾劉吉，調南工部員外。吉罷復官，遷少詹，擢禮部侍郎，進尚書。忤劉瑾謝病，加太子太保致仕。卒贈太子太傅。諡文禧。有集三十六卷。

四庫總目：張昇文禧集，前有邵寶序，謂此集本名柏崖集，刻成而賜諡之命適至，遂以名之。明史本傳不言有諡，或偶漏歟。

與人話舊

邂逅逢君坐月輝，泊舟柳下近山扉。不知玉笛來何處，吹起鄉心逐雁飛。

董越三首

越字尚矩，甯都人。成化己丑，第三人及第，授編修。歷侍讀、庶子、太常少卿，擢南禮部侍郎，進南工部尚書。卒贈太子少保。諡文禧。有集四十二卷。

四庫總目：朝鮮賦一卷。明董越撰。孝宗卽位，越以庶子同刑科給事中王敏使朝鮮，因述所見聞，以作此賦。又用謝靈運山居

賦例自爲之注。所言與明史朝鮮傳合。知其信而有徵。非鑿空也。

重泛大江

樓船重泛出通津。細細晴波漾麴塵。翠柳亂搖絲袅娜。青山倒浸碧嶙峋。壺觴又勸歸來客。詩句難留過去春。卻怪鳧鷖似相識。水濱沙際往來頻。

送邵文敬二首

思南太守我同年。吏隱東曹筆似椽。曾有清詩膾人口。半江帆影落樽前。筆退如山未足多。門闌鐵限尙來過。不知萬里黔中地。還有山陰道士麼。

邵珪五首

珪字文敬。宜興人。成化己丑進士。授戶部主事。歷員外郎中。出爲嚴州知府。有半江集六卷。

麓堂詩話。邵文敬善書工藝。詩亦有新意。如江流白如龍。金焦雙角短之類。又有半江帆影落樽前之句。人稱爲邵半江。聞變蘇書答之。跋云。予亦以蘇書戲效東曹新體。邵誤以爲效其詩。作依字韻抵弔首句曰。東曹新體古來稀。此意茫然失所歸。字擻坡書聊共戲。詩於崑法敢相譏。休誇驥裏才無敵。未必葫蘆樣可依。卻問棋場諸國手。向來門下幾傳衣。相與大笑而罷。堯山堂外紀。邵半江一日題陳嗣南小像云。盤陀石上淨無塵。岳色江聲共此身。莫怪吳儂渾不醒。百年俱是夢中人。詩成求質於李西涯。西涯給之曰。尙有一二字欠穩。待予更之。西涯乃默記竊爲己有。先題畫上。後邵公見之。撫掌大笑。

田按文敬以戶曹郎將出守思南。李賓之。陸鼎儀。徐謙齋。有送邵思南序。倪舜咨有南園別意記。賓之諸人有南園別意聯句。

云送客南莊秋色清。羅環酒杯花事總關情。黎淳長材用事須爲郡。吳希賢野興逢人慣出城。李東陽好憶行囊詩卷富。倪岳還看遠道驛舟迎。楊時暢黑頭太守黃金重。陸鈺汗竹應垂千載名。陳音文敏有留別詩云。楚道山川非禹州。壯懷都屬望京樓。親分符竹承天寵。遠藉珠璣託俊遊。古道未能忘一硯。宦情今已付孤舟。迂疏滿負羣公意。翻笑謀生拙似鳩。寶之次韻云。徵外天留萬里州。送君無賴倚高樓。閒將筆札供餘興。盡閱江山壯遠遊。紅樹夕陽深駐馬。碧溪芳草漫隨舟。人生巧拙渾閒事。莫更重論鵠與鳩。董尚矩亦有送別詩見前。一時翰藻紛紜。其實文敏以半道丁艱去。未嘗至吾黔也。文敏在當時稱好事。詩筆亦雅令瀟灑。

觀杜氏假山

平生負奇癖。愛山看不足。十日陽羨遊。曾未飽饑目。驚看米顛家。乃有此巖谷。浮嵐似九疑。幽思含湘竹。靈源洞七澤。春溜濕楚綠。織雲起膚寸。變態不可逐。傳聞太華巔。窮此玲瓏玉。巨靈惜不得。失守鬼夜哭。焉知斃幾牛。閒道歸應速。當時蘇老泉。卻詫枯楠木。茲山迴奇絕。屹然當我屋。春來饒樂事。遞賞壺尊續。紀勝屬菲才。豪吟當刻燭。但愧梅二丈。吾詩豈堪錄。

九鷺岡

江沱水落沙尾長。蒹葭白露秋作霜。蓼叢蓮葉亦蕭索。渺渺澄波秋有光。晚風吹斷寒雲腳。天高氣清入寥廓。飄然白鷺從何來。一樹梨花鏡中落。倉皇兩隻殊苦飢。窺見寒魚爭逐之。一隻仍飛欲來止。一隻偃宿何葳蕤。其餘五隻紛離立。相喚相呼隨所適。日短江空意自閒。應憐此地無矰弋。嘆息良工多苦思。滿

堂風露秋淋漓。夢斷江南渺何許。撫視徒令楚客悲。

無錫聽松寺復竹茶爐和秦武昌韻

此君只合對臞禪。淪沒重經甲子年。茗椀詩瓢情脈脈。松風水月夢娟娟。風塵瀕洞誰能識。湖海歸來信有緣。珍重武昌秦太守。大篇珠玉爲誰傳。

送宜興僧琛公

法藏寺前春草生。斬蛟溪上暮雲平。十年薄宦違清賞。此日送君空復情。社燕秋鴻浮世夢。煮茶燒筍石林盟。西風一葦滄江遠。看取東南佛日明。

寓新塘雜咏

夏雲重疊晚猶奇。江館追涼也自宜。欲放扁舟過別渚。荷花菱葉雨絲絳。

屠勳三首

勳字元勳。平湖人。成化己丑進士。授工部主事。改刑部。歷員外郎中。南大理寺丞。進大理少卿。擢右副都御史。巡撫順天。召拜刑部侍郎。改左副都御史。復爲刑部侍郎。歷右都御史。進刑部尙書。忤劉瑾。引疾求去。加太子太保致仕。卒。贈太保。諡康禧。有太和堂集六卷。

田按康禧以政事名。詩亦雅飭。

遊西郭園池

遠山含雨黑雲稠。詩到林泉景更幽。野寺可能添一榻。水田應只欠雙鷗。風光入眼渾無賴。塵事驅人且未休。唯有杜陵豪氣在。盡將花鳥賦春遊。

再遊南山

門出清波一掌平。宜煙宜雨又宜晴。粘泥飛絮漫漫下。蕩日遊絲裊裊輕。蓬島只疑雲咫尺。江山好是畫分明。園林無地無春色。漫道東風不世情。

題蔣文藻扇

數竿修竹綠猗猗。水石翛然物外奇。誰遣林塘落君手。畫圖相見一題詩。

周瑛五首

瑛字梁石。莆田人。成化己丑進士。授廣德知州。遷禮部郎中。出爲撫州知府。改鎮遠。歷四川參政。擢布政使。有翠渠摘稿七卷。

莆楊文獻。梁石文章。渾深雅健。有根底。詩格調高古。書初學晦翁。變爲奇勁。

田按。梁石與陳白沙講學。旨趣不合。晚與黃未軒。修興化府志。持議亦抵牾。自號莆陽拘史。詩擬古音節。極合律絕。亦饒風趣。

猗蘭操

維山有谷，露瀼瀼兮。維谷有蘭，揚孤芳兮。我行四方，荆棘蔽野。採芳而佩，知蘭實寡。我思文武，于鎬于豐。欲往從之，路阻不通。吾道非矣，掩袂漣洏。與世違矣。

邵武道中夜宿半山鋪

邵武城南路，行行重苦辛。高山雙倦足，空館一愁人。涼月照華髮，西風吹敝巾。長安一萬里，何處是通津。

早春出郭呈祁石阡

侵晨出郭喜聯鑣，馬首人家入望遙。雲暝孤城微見堞，雪消春水欲平橋。山田鳴雉麥猶短，野箔初蠶桑未條。經國有謀勞相度，擬將封事上清朝。

神樂觀張道士乞詩

金爐火煖養丹砂，滿院靈光含紫霞。野鶴不鳴春晝永，玉笙吹落碧桃花。

爲葉左參題畫

短短桃花點綠莎，輕輕白鳥下晴波。宛然西塞山邊路，只欠能詩張志和。

楊先溥六首

先溥字文卿，沂水人。成化己丑進士，官山西按察副使。有沂川集。

田按文卿詩有閒適之趣，覺柴桑風景去人不遠。

村居漫興

老去常昏飯。支離仗酒全。存亡驚故友。寒暑感流年。書映松窗月。茶烹土釜煙。一琴高挂壁。陶令任無絃。

六十

短髮垂肩白。蹉跎六十年。乾坤歸老眼。歲月付攏禪。嗜酒劉玄石。耽詩孟浩然。採薇應亦足。無事祝蒼天。

春日村居

鋤罷園蔬又治田。陰陰榆柳蔭堂前。市沽頓積頻年債。午夢真成小洞仙。幾葉漁舟春水渡。一聲樵笛夕陽川。回思車馬紅塵路。卻恨歸來已暮年。

初歸

組綬勞生兩鬢星。歸來笑殺草堂靈。秋風蘿蔓迷樵徑。春水桃花失釣汀。避洗久慚龜手藥。養生新買種魚經。等閒睡醒茅檐日。坐看山中草樹青。

夏日卽景

黃梅時節雨初晴。半畝槐陰小院清。卻怪山童驚夢覺。午風吹送搗茶聲。

春歸

酒肆逢春屢典衣。一年無奈又春歸。好花落盡桃千樹。幾日山人不啟扉。

陳紀一首

紀字叔振。閩人。成化己丑進士。選庶吉士。改監察御史。歷陝西按察使。進僉都御史。巡撫宣府。召爲副都御史。

圓通寺

翠微雲樹擁。亭院俯嵯峩。路轉天梯上。人從木杪過。澗煙眠白鹿。山雨濕青蘿。應識禪堂近。鐘聲向晚多。

馮蘭一首

蘭字佩之。餘姚人。成化己丑進士。選庶吉士。仕至江西提學副使。有雪湖集。

姚江逸詩。佩之在京師。與李西涯、謝木齋三人雅相好。木齋歸田。與佩之偕。和無虛日。間書之以寄西涯。西涯亦一一和之。有云。惟因兩巾屨。長得夢中遊。又云。羨君江海上。猶有舊同遊。是時西涯爲一世宗工。而於佩之敬爲老友。佩之西涯。同有樂府詠史。號爲新體。今西涯樂府已流傳。佩之無有能舉之者矣。

靜志居詩話。謝木齋以宰輔歸田。與佩之締姻。日以詩札酬報。澗淵劉應徵。知餘姚縣事。爲刊湖山唱和詩一卷。集中句可採者。謝如嘉客不來虛掃榻。好山難致卽移家。路當樹與雲深處。舟及潮隨月上時。野色遙連晴樹杪。秋聲忽動暮雅羣。樓臺月上寒雲盡。村巷泥乾宿雨餘。扶老最便方竹杖。入秋卻愛早禾田。馮如鐘。真流年從老去。山中傳業得生還。遠林返照明村落。斷岸分流入海田。絕頂夜晴先見日。中峯春煖易生雲。雨疏籬落菊開晚。水澗湖田雁下遲。秋晚菜畦依水種。日斜村媪過鄰春。雲中僧住茅茨屋。雨後人耕斥鹵田。沙淨雨苔無屐齒。竹深秋野有棋聲。雷霆忽作三更雨。江海疑生六月冰。燈火誰家無樂事。江湖此夜有離人。其詩頗難優劣。洵同調也。

贈鍾欽禮

一笑天顏豈偶然。清癯真似老神仙。更教歸去應勞夢。何止呼來不上船。城市已無蹤迹到。江山合有畫圖傳。蕭蕭短髮寒吹帽。載鶴西湖雪後天。

田按欽禮以繪事徵。值仁智殿。孝宗常以老神仙呼之。此詩首二句紀其事也。

丁鏞三首

鏞字風儀。上元人。成化己丑進士。授南刑部主事。歷員外郎中。出爲興化知府。有石厓集。

田按風儀耽詩。尤愛佳山水。生平多出宿山寺。栖託清曠。焚香對書。頽然自適。出守興化。能折疑獄。推爲神明。金陵詩徵第錄一詩。不足見所長。余從周翠渠弘治興化志。獲詩數首。亟登之。

遊廣化寺

嶺路肩輿側側行。寒泉泱泱映衣明。蒼松蟠屈歲華古。白鳥高飛羽翼輕。題字暫留遊宦蹟。看山少緩故鄉情。前年記得登牛首。石磴分明雲際橫。

重遊廣化寺

山與石崖叟。豈應有夙緣。愛山有佳句。時時崖上鐫。

月峯院

青山碧樹一重重。偶爾看雲到月峯。卻悔塵緣消未盡。那能長聽上方鐘。

曹時中一首

使。時中名節以字行。松江華亭人。成化己丑進士。授刑部主事。歷浙江按察僉事。改雲南。進浙江副

雲間志略。時中喜爲懷素書。與吳門沈石田不識面。而詩筒往來不絕。一夕夢與石田執手永訣。不數日而訃至。錄石田墓所寄詩若干篇。爲神交集。

雷鰲

夜雨桃花漲。春風楊柳灣。數船燈火亂。知是打魚還。

李晟一首

晟字孔陽。濮州人。成化己丑進士。授監察御史。改本院照磨。終鄖陽同知。

寄彭總戎

昔年曾出玉門關。帝命重來鎮黑山。宛馬盡輸龍種至。番城無警虎牙間。籌邊方叔心逾壯。草檄陳琳鬢已斑。枹鼓不鳴胡騎遁。將軍塞上射鵰還。

呂憲一首

憲字秉之。秀水人。大學士原子。以蔭授中書舍人。乞與試。中成化辛卯舉人。歷禮部郎中。南太僕少卿。遷南太常卿。有九柏存稿六卷。

田按九柏詩。質慤少韻。特勛於學。與劉文和子銍。並稱於時。

送崇信伯奉使還朝

開國風雲委慶長。使還龍節正煌煌。館甥初識汾陽第。揖客能容汲黯狂。甕裏葡萄浮大白。廐中首着飽飛黃。朝廷一飯思頗牧。忠孝毋忘守四方。

李仁傑一首

仁傑字唐英。莆田人。成化壬辰。第三人及第。授編修。

漁梁遇雨

西風秋氣冷。況復雨淒淒。鳥道藤蘿濕。人家煙火迷。雲深川谷暝。溪漲野橋低。對此堪惆悵。孤猿何處啼。

文林二首

林字宗儒。長洲人。教諭洪子。成化壬辰進士。除永嘉知縣。改博平。遷南太僕寺丞。出知温州府。有文温州集十二卷。

答啓南見寄

綠水縈紆四山周。山深雲合叫輜輳。坐吟春草思靈運。臥看飛鳶感少遊。竹馬愧非前度客。虎符空縉一方憂。因君更重鄉關念。滿目煙波怕上樓。

李少卿貞伯寓龍泉菴奉懷

美人掉首西山去。談笑何由一雲同。多在紫薇泉石畔。煮茶暢飲落花風。

鄧庠二首

庠字宗周。宜章人。成化壬辰進士。授行人。遷監察御史。出爲河南副使。進按察使。歷廣東、廣西、布政使。擢右副都御史。總督南京糧儲。改巡撫河南。遷南右都御史。就拜南戶部尙書。有東溪稿十卷。

田按尙書無詩名。而五字詩特疏疑。

游泐溪石室

頻年役簿書。偶此息塵鞅。出城松徑陰。刺水秧鉞長。驕陽蒸初夏。漸有踏冰想。石室泐溪上一竅。透天盪。襄公屹崇碑。樂事傳自曩。曲竇遠禪牀。張炬窮幽賞。苔痕步屨輕。巖溜琮琤響。出洞濯清風。翛然天籟爽。可當真都遊。佳境幸無黨。

蒼梧江行

殘雨滴疏梧。蒼江水墨圖。暮雲迷鳥嶼。沙鳥宿菰蒲。路險憂羣盜。民貧望賜租。王師何日下。一爲掃榛蕪。

楊榮一首

榮字時秀。餘姚人。成化壬辰進士。官工部主事。有和唐音。

詩談。楊時秀和唐音。煞有風致。

姚江逸詩。都水工於詩。會試舟中。取唐音和之。月餘成帙。書學懷素。尤善畫竹。

號宮送河丞市馬

野色正蒼蒼。秦山半夕陽。雕弓雙羽箭。寶劍百金裝。夜月臨關白。秋雲壓塞黃。君休市千里。當宁漢文皇。

高昂二首

昂字尊卿。莆田人。成化壬辰進士。官六安知州。有和唐鼓吹集。

田按。楊時秀和唐音。高尊卿和唐詩。鼓吹一時風尚爾爾。高詩較楊工甚。

凌歊臺和許渾韻

歌舞三千夢不回。春風依舊掃行臺。青山似怨蛾眉老。芳草曾承翠輦來。離燕有情還自語。野棠無主爲誰開。斷碑文字多零落。猶自摩挲玩古苔。

長洲懷古和劉滄韻

獵獵西風吹劫灰。荒基猶是舊樓臺。長江無際青山出。返照微明白鳥來。壓酒吳姬還解笑。行吟楚客不勝哀。停車欲問前朝事。淺渚蘆花幾度開。

胡超一首

超字彥超。湯溪人。成化壬辰進士。官工部員外。有恥菴稿。

咏懷

東籬有佳菊。淡然幽素姿。終懷林壑韻。不生桃李時。亭亭白日晚。湛湛寒露滋。寂寞冰霜後。此意竟何爲。

林壑一首

壑字世調。閩人。成化壬辰進士。歷吏部郎中。終廣東布政使。有雙松集。

潯陽驛

潯陽江上日初斜。蕭瑟西風亂荻花。隱隱菱歌起愁思。月明猶似訴琵琶。

蕭顯一首

顯字文明。山海衛人。成化壬辰進士。授兵科給事中。出爲鎮甯同知。改衢州。遷福建按察僉事。有

海釣遺風。

田按文明在諫垣。有直聲。上疏陳時政。斥神奸左道。語甚激切。出官鎮甯同知。馬東田寄詩云。聊復題詩寄遠人。天涯一別幾

晨昏玄都觀裏非前度。武德年中有讜言。瑣闥尙懷同出入。瘴鄉深喜獨生存。始知去住皆君賜。莫道南遷不是恩。

題小景

碧樹俯清流。高人愛獨坐。讀罷發長吟。不知斜日墮。

張黻一首

黻字兼素。吉水人。成化壬辰進士。授涪州知州。擢後軍都督府經歷。以言忤旨。謫石州知州。改師宗。

儀真述懷

親見朝廷政令新。小臣私計轉憂民。一言真忤九重聽。萬死猶存七尺身。沙上白鷗閒笑我。鏡中華髮苦催人。十年揚子江三渡。今日何須更問津。

姜南風月堂雜識。吉水張黻。任涪州知州。清介公明。不畏權貴。擢都督府經歷。時見素林公俊爲主事。以忠諫下獄。黻上章救之。亦逮下獄。三原王端毅公。時爲都御史。疏言二人忠亮。勸上納諫旌直。以隆治道。宜復俊。黻職。以慰天下之望。上怒解。二人皆謫外補。黻得石州。尋改師宗。行至儀真。述懷云云。一時傳誦之。

